


Xtidxcoob Dios ni
biädinä dad Jesucrist



New Testament in Zapotec, Mitla (MX:zaw:Zapotec, Mitla)

**Xtidxcoob Dios ni biädñä dad Jesucrist
New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

San Mateo	1
San Marcos	57
San Lucas	92
San Juan	152
Hechos	195
Romanos	251
1 Corintios	273
2 Corintios	295
Gálatas	309
Efesios	317
Filipenses	324
Colosenses	329
1 Tesalonicenses	334
2 Tesalonicenses	339
1 Timoteo	342
2 Timoteo	348
Tito	352
Filemón	355
Hebreos	357
Santiago	373
1 Pedro	379
2 Pedro	385
1 Juan	389
2 Juan	395
3 Juan	396
Judas	397
Apocalipsis	399

Guijtz Ni Bacuaa Mateo

Retoxpen_{goldoo} Jesucrist

(Lc. 3:23-38)

¹ Guijtz ni rusule' laj retoxpen_{goldoo} xten Jesucrist xi'n toDavid, xi'n toAbraham.

² Abraham gujc xtad Isaac, Isaac gujc xtad Jacob, Jacob gujc xtad Judá con rebejtzni.

³ Judá con Tamar gujc xcuzajn Fares con Zara. Fares gujc xtad Esrom, Esrom gujc xtad Aram.

⁴ Aram gujc xtad Aminadab. Aminadab gujc xtad Naasón. Naasón gujc xtad Salmón.

⁵ Salmón con Rahab gujc xcuzajn Booz. Booz con Rut gujc xcuzajn Obed. Obed gujc xtad Isaí.

⁶ Isaí gujc xtad rei David. David con nani gujc chääl Urías gujc xcuzajn Salomón.

⁷ Salomón gujc xtad Roboam. Roboam gujc xtad Abías. Abías gujc xtad Asa.

⁸ Asa gujc xtad Josafat. Josafat gujc xtad Joram. Joram gujc xtad Uzías.

⁹ Uzías gujc xtad Jotam. Jotam gujc xtad Acáz. Acáz gujc xtad Ezequías.

¹⁰ Ezequías gujc xtad Manasés. Manasés gujc xtad Amón. Amón gujc xtad Josías.

¹¹ Josías gujc xtad Jeconías con rebetzni cheni huij reben Israel pres lo guedx Babilonia.

¹² Che gudejd huij rebejnğa pres Babilonia, dxejc guyu' xi'n Jeconías, Salatiel. Salatiel gujc xtad Zorobabel.

¹³ Zorobabel gujc xtad Abiud. Abiud gujc xtad Eliaquim. Eliaquim gujc xtad Azor.

¹⁴ Azor gujc xtad Sadoc. Sadoc gujc xtad Aquim. Aquim gujc xtad Eliud.

¹⁵ Eliud gujc xtad Eleazar. Eleazar gujc xtad Matán. Matán gujc xtad Jacob.

¹⁶ Jacob gujc xtad José chääl Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajnlı toAbram cheni gubajnlıza torei David. Tzudajza rexagdoonajc reni gudejd cheni gubajnlı toDavid cheni huijlı reben Israel pres Babilonia. Stzudaj rexagdoonajc reni gudejd cheni biriilireni pres Babilonia che gojllı Crist.

Cheni gojl Jesucrist

(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchnaani José ni gac chäälni. Per ansde xca' sa'reni, Marii agac nuxi'nni sa'csi biääd Sprit Dxaan xten Dios lojni.

¹⁹ José com najcni te beñsa'c, di rlajzni nuro'nni Marii nez loj rebejn te niacbeereni, ni'c bejnıni xhigab Gu_{ron}xhiga'tzni Marii.

²⁰ Xhigabga cayujnni cheni baluiloj te xangl Dios lojni, lo bacal räjpni lojni: —José xajg toDavid, na'c guidxeyblu xca'lu Marii gacni chäällu sa'csi xi'nni nani chu najc xten Sprit Dxaan xten Dios.

²¹ Che gaal xi'nni cuälajluni Jesús sa'csi laani guslaani rexpejnıni lo rextojlreni.

²² Guiraa redee gujc si'c te guzobj diidx ni gunii tej ni bacuaa xtidx Dios. Räjpni:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajın con nuure).

²⁴ Che gubajn José lo bacal, bejn ni si'cni räjp xangl Dad lojni. Cua'ni Marii gujc chäälni.

²⁵ Luxh dini niembeeni si'c chäälni dxejli cheni gudejd gojl xingangalojni ni gulälajni Jesús.

2

Che biädhuii reben nanduxh ni laa remagos lojni

¹ Cheni gojl Jesús neñ guedx Belén xten guedx Judea, najc Herodes reii xten guedx Judea. Dxejc bidzujñ rebenñajni ni najc remagos, siädreni nejz cadre rliejn gubijdx, bidzujñreni guedx Jerusalén.

² Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajlni laadxinu, ni'cni siopdonuni.

³ Che biejn diajg reii Herodes diidxga, guyuduxhni yärsia' näjza guiraa reben Jerusalén.

⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani ruluu xleii Moisés lo rebejn te gunabdiidxni lojreni:

—¿Caro gaal Crist?

⁵ Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neñ guejdxre guirii tej nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni.

⁸ Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jiädniitu loä te näjza narä chaganäni.

⁹ Che biejn diajgreni xtidx reii, sä'tireni. Bajl nani bahuiireni lagajc lajdxreni laltis nijdni lojreni. Che bidzujñlireni cadre yu' bázga, dxejcro guzobdx bajlga.

¹⁰ Che bahuii remagos loj bajlga, rbalazduxhrenei.

¹¹ Si'c bidzujñreni. Che biu'reni neñ yu', bahuiireni lo bázga con xnanni Marii. Dxejcti bazuxhijbreni, gojñreni bázga, baxhalreni rexcälñasa'creni bazalajzreni oor, näjza yaal näjza yalnejxh.

¹² Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biäd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguiil Herodes biuxe're sa'csi rlajzni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto.

¹⁵ Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebixbäz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz nájza rebiuxe' ni yu' guxiiru dxej, guideb nen̄ guedx Belén nájza reguejdx ni re' gabiga, si'cti redxej ni rájɔ remagos lojni.

¹⁷ Dxejc guzobj diidx ni bacuaa Jeremías ni gunii xtidx Dios che rájɔni:

¹⁸ Biejn xse' bejn̄ nen̄ guedx Ramá, te yäl̄huinuxh, te yäl̄rbedxdij, yäl̄rbedxnen̄: laa Raquel ni roon yejc rexi'nni.

Naaddini jiäj̄l lajzni sa'csi agujt rexi'nni.

¹⁹ Cheni gujt Herodes, dxejc lo te bacal̄ huiluiloj xangl Dios loj José nen̄ Egipto.

²⁰ Rájɔni:

—Huistie, cua' biuxe're nájza xnanni, gubisac nez Israel sa'csi agujt renani rlajz ju't biuxe're.

²¹ Dxejcti huistie José, cua'ni biuxe' nájza xnanni. Gubi'reni Israel.

²² Luxh che biejn diajgni rnibee Arquelao guejdx Judea lacuaa Herodes, xadni, bidxejbni nuini ro'c. Dxejc gunisac Dios lojni loj te bacal̄, ni'c huijni lo reguejdx xten Galilee.

²³ Dxejc biädläjzni nen̄ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni rájɔni: “Sirilajni nazaren̄.”

3

Juan Bautist basule' xtidx Dios loj rebejn̄

(Mr. 1:1-8; Lc. 3:1-9, 15-17; Jn. 1:19-28)

¹ Nen̄ redxejga biääd Juan Bautist lo reyubijdz xten guedx Judea, ro'c cagulijdxni,

² cayäjɔni:

—Colgusiechlajztu rextojl̄tu sa'csi xcäl̄rnibee Dios abidzũgajxhni.

³ Juan najc nani basä't Isaías, te niguii ni gunii xtidx Dios, cheni bacuaani: Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh.

⁵ Riääd reben̄ guedx Jerusalén náj guiraa reben̄ Judea nájza rebejn̄ ni tre' gajxh nez ro' gueu Jordán, riädcuadiajgreni xtiidxni.

⁶ Che ruxhobdojl̄reni xtoj̄lreni, rutiobnis Juanreni ro' gueu Jordán.

⁷ Che bahuiini siääd xhidajl̄ reben̄ guidoo ni najc refarisee nájza ni najc resaducee, rlajzreni gutiobnisnireni, rájɔni lojreni:

—La'tu ben̄guidxduxh, najctu si'c bäl̄. ¿Chu balijdxtu guxũtu loj xcäl̄rdxe'ch Dios ni siääd?

⁸ Colguibaṅsa'c si'cni nungäj̄l te fiipac rebejn̄ guliipac abasiechlajztu.

⁹ Na'c litis guntu xhigab naatu: “iNi nurnu najcnu rexagdoo toAbram!” Rniliä lojtu, sajc xca' Dios reguijre gunni gacreni rexi'n toAbram.

¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni.

¹¹ Narä guliicani rustiobnisä con nis si'c te seen cheni abasiechlajztu, abaxhobdojl̄tu. Niluxh nani siääd detzä sutiobnisni la'tu con Sprit Dxañ xten Dios nájza con guiboo. Rnibeeruni loä. Ben̄sacduxhni. Nicla xcura'chni digacdi chanää.

¹² Aca'ni xhi cojn gusiani triuu xtenni te chuchee triuuga nen̄ ngodx xtenni. Dxejcti guixhtriuuga, suze'cni guijxhga lo guiboo ni rejɔ par tejpas.

*Che gurobnis Jesús**(Mr. 1:9-11; Lc. 3:21-22)*

¹³ Dxejc birii Jesús nez Galilee, bidzujñni ro' gueu Jordán cadre yu' Juan te gutiobnis Juanni.

¹⁴ Niluxh naaddi Juan gutiobnis Jesús. Räjñ Juan lojni:

—Luj nanab gutiobnislu narä, niluxh ñaj alga luj siäädlu loä te gutiobnisälu.

¹⁵ Dxejc räjñ Jesús lojni:

—Basaan gacni si'c ñaj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädäjt Sprit Dxi xten Dios si'c te palom, biäjtni lojni.

¹⁷ Dxejc xhaguibaali biejn diajgreni te xse' ni räjñ:

—Dee najc xi'nä ni sanälazä. Laani rbanälazä.

4*Che huij Jesús lo reyubijdz**(Mr. 1:12-13; Lc. 4:1-13)*

¹ Dxejc bejn Sprit Dxi xten Dios huij Jesús nez lo reyubijdz te nejzga nuhual beñdxab Jesús.

² Che gulujx bacua'n Jesús tiuu gubijdx, tiuu guxhijñ, gulaanni.

³ Sas biäd beñdxab lojni, räjñni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxre lojni, räjñni:

—Loj reguijtz xten Dios caj scree: “Xhet ganaxdi yälxtiil guibajñ rebejñ; sibajñzani con guiraa diidx nani rñi Dios.”

⁵ Dxejcti huinä beñdxab Jesús guedx Jerusalén. Gulä'pnini jiaa yejc xques guidoro. Dxejcru räjñ beñdxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con ñaareni didi gacnaj ni'lu lo reguijga.

⁷ Badzu' Jesús diidxre lojni, räjñni:

—Caj loj rexquijtz Dios: “Na'c fallu Dad ni najc Xtioslu.”

⁸ Stee huäl huinä beñdxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcälñasa'creni.

⁹ Dxejcti räjñ loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjñ Jesús lojni:

—¡Huij nez rec beñdxab! Scree caj loj rexquijtz Dios: “Dad Xtioslu ganlu; lojtisni chulu.”

¹¹ Dxejcti gubicaj beñdxab loj Jesús. Dxejc biäd rexangl Dios biädhuiireni Jesús.

*Gusloj Jesús cayujñ xtzuumni**(Mr. 1:14-15; Lc. 4:14-15)*

¹² Che biejn diaj Jesús yu' Juan neñ ladzguiib, huijni nez Galilee.

¹³ Dxejcti gudejñni guedx Nasare't, huiläjñni guedx Capernaum ni tre' gajxh nez ro' nis, nez reguejdx Zabulón con Neftalí.

¹⁴ Si'c gujc te guzojb diidx ni bacuaa Isaías ni gunii xtidx Dios:

¹⁵ Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadre rbäjz rebejñ nani di gac rexpen Israel.

¹⁶ Rebejñ nani rbäjz neñ te yälcäjy abahuiireni te bajlga,

luxh bajlga basanij xcäriejn renani nabajñ lo xcälrdxejb, lo xpalaa yälgujt.

¹⁷ Dxejcli gusloj cagulijdx Jesús, räjpni:

—Colgusiejchljaztu, colguxhobdojl te guibaṅsa'ctu sa'csi abidzūṅajxh xcälrnibee Dios.

Che gurejdx Jesús tajp xpejñni

(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäjl, ni'c cacuaareni guijxh lo nisdoo.

¹⁹ Dxejcti räjp Jesús lojreni:

—Coltanajl narä. Naj riniaaztu bäjl, niluxh narä gunä cueedxtu rebejn.

²⁰ Lagajc dxejc basa'nreni xquijxhreni te sanajlreni laani.

²¹ Che gudejdreni ro'c, bahuini loj stio'p niguii, Jacob con bejtzni Juan. Yu'reni neñ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

²² Lagajc dxejc basa'nreni barcw näjza xtadreni te sanajlreni Jesús.

Caguluii Jesús xhidajl bejn

(Lc. 6:17-19)

²³ Sasajti Jesús guideb nez región xten Galilee, caguluiini neñ tejga rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälguijdx.

²⁴ Biejn diajg rebeñ Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälguijdx, yälñayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'n tiejxhreni. Dxejcti basiajc Jesús rebejnga.

²⁵ Xhidalduxh beñ Galilee huinajlni, näj rebeñ reguedx Decápolis, näjza rebeñ guedx Jerusalén, näjza rebeñ Judea näjza rebejn ni tre' stelaad gueu Jordán.

5

Yejc te dajn balijdx Jesucrist rebejn

¹ Che bahuii Jesús loj rebeñ xhidajl, huä'pni yejc te dajn. Dxejcti gubig rexpejñni ni gurejdxni lojni.

² Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³ —Sibaalajz rebejn nani nanchee rquinduxhreni xcälracnäy Dios, sa'csi laareni nungäjlni xcälrnibee Dios.

⁴ Sibaalajz rebejn nani rac-huin lajzreni xcuent rextojlni, sa'csi sudzucaj Dios xtojlreni, susiäjlni lajzreni.

⁵ Sibaalajz rebejn nani nadolajz nani rlajz guntis si'cni rnibee Dios, sa'csi sacnäy Diosreni lo xcälñabajñreni lo guedxliujre.

⁶ Sibaalajz rebejn ni nastoocanu rliaanreni, riojlni, sa'csi rlajzreni guibaṅsa'ctisreni nez loj Dios, sa'csi sudeed Dios lojreni guiraa ni rniabreni.

⁷ Sibaalajz rebejn nani rulasajz sa'reni, sa'csi sulasajzza Diosreni.

⁸ Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ Sibaalajz rebejn nani ruscuecdxilajz sabejnreni, sa'csi laareni sirilajreni rexi'n Dios.

¹⁰ 'Sibaalajz rebejn nani rusutijp lajzreni che rusacsí bejnreni sa'csi nabansa'creni nez loj Dios, sa'csi xtenreni najc xcälrnibee Dios xhaguibaa.

¹¹ 'Colspaalajztu che gusacsí bejntu tilnäjreni la'tu, guiniireni guiraloj didx-xhii xcuent xtidxä.

¹² Colguibaalajz, colbalajz sa'csi xhaguibaali sunidxduxh Dios xcuent xtzu-untu. Sigajcza basacsíreni reniguii ni gubajñ galoo ni gunii xtidx Dios.

La'tu najctu si'c sejd lo guedxliujre
(Mr. 9:50; Lc. 14:34-35)

¹³ Räjpzani:

—La'tu najctu si'c sejd lo guedxliujre. Palga di sejd gac nadzuuj, ¿xho gacsacni nadzuuj? ¿Xhi gun bejnñi dxejc? Susälreni sejdga detz yu', suläj bejn yejñi.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni.

¹⁵ Digacdi xcaguij te bajl dxejcti jiäuuni neñ te caj. Maazru huen soobni jiaa neñ te gandilieer te gusanijni loj guiraa rebejn ni tre' neñ yu'.

¹⁶ Xcäl nabansa'ctu najc si'c te bajl loj reben guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Ruluii Jesús xcuent leii

¹⁷ Räjpzani:

—Na'c guntu xhigab siädgudzucaä leii xten toMoisés, niclaza rediidx ni baluii redad ni gunii xtidx Dios. Xhet siäddzucaädini, narä siälä te guluiäpacni si'cni najcni.

¹⁸ Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga.

¹⁹ Ni'cni chutis ni rlanj gusaan te diidx nani caj loj leii, mase te didxbäzni, luxh ruluiini gun bejn si'c, laani guxiduxh sajñi lajdx Dios guibaa. Niluxh renani rucua diajg xtidx leii, luxh rujnpacreni si'cni caj lo leii, ruluiizani leii, beñsacduxh gacni lajdx Dios guibaa.

²⁰ Ni'cni rniä lojtu, palga ditu gunsa'cru xtzun Dios, ditu guibañsa'cru loj reni najñ xcuent xleii toMoisés, näjza loj reben guidoo ni laa farisee, dipactu jiu' lajdx Dios xhaguibaa.

Ruluii Jesús xcuent yälrdxe'ch
(Lc. 12:57-59)

²¹ Räjpzani:

—Abiejnza diajgtu nani gunii reben goldoo: “Na'c ju'tlu. Chutis te nani ju't sa'ni, sinärenini lo guxhtis te jiäuuni neñ latzguiib.”

²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “beñnayälajz” sidejdni loj yälguxhtis xten Dios, sijni gabijl cadre cayejc guiboduxh.

²³ 'Che sanälu gojn guidoo te gusa'nlnuni lo bacuug, palga guinaj lajzlu yu' chu lo cadxe'chlu,

²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

²⁵ 'Palga yu' chu rdxe'ch lojlu, basquejn basiäjñ diidx con laani lagajc cheni sasanäjñluni lonezyuj te di guteedni luj lo juejz. Luxh juejz suteedni luj loj reguixhajg te gusaureni luj neñ latzguiib.

²⁶ Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

Rului Jesús xcuent yälrusguee sa'ni

²⁷ Räj pzani:

—Abiejn diajgtu guniireni galoo: “Na'c guesnäjtu gunaa nani di gac chäältu.”

²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni.

²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl.

³⁰ Palga ñaalu ladbee rujn rujnlu dojl, batiu'ni sa'csi hueenru gunijtlu te ñaalu quela chää guideb tiejxhlu gabijl.

Rului Jesús xcuent yälruo'n chääł bejn

(Mt. 19:9; Mr. 10:11-12; Lc. 16:18)

³¹ Räj pzani:

—Abiejn diajgtu guniireni galoo: “Chutis niguii ni rlajz guro'n chääłni, nanabtis gudeedni te guijtz nani rni abaro'nni chääłni.”

³² Narä rniä, niguii nani guro'n chääłni niluxh xhet dojldi bejn chääłni, niguiiga sujn gun chääłni yälgubejxh, niluxh chutis ni guchña gunaaga sujnzani yälgubejxh.

Rului Jesús xcuent che ria'n diidx

³³ Räj pzani:

—Abiejn diajgtu gunii rebeñgool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.”

³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios,

³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiuro,

³⁶ niclaza por lagajc bitiuvejclu, sa'csi digacdi guncheelu te guichyas niclaza te guichnol, nicla tej guijch.

³⁷ Nanab guiniitisl: “Mbaj” o “Ajndi”. Palga yu' xhiru rniilu, beñdxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸ Räj pzani:

—Abiejn diajgtu gunii rebeñgool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.”

³⁹ Narä rniä, na'c tilñajlu te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni.

⁴⁰ Palga yu' chu rlajz tilñajlu te xca'ni xcamangwlu, badeedza näj xsa'cwlu lojni.

⁴¹ Palga yu' chu guinibee guulu xcargwni te kilómetro, huinani tio'p kilómetro.

⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxoijnluni lojni, na'c gäblu: “Xhetini.”

⁴³ Abiejn diajgtu gunii rebeñgool: “Colchanälajz sa'tu. Colguidxe'ch loj renani rdxe'ch lojtu.”

⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcujdx, colñab loj Dios xcuent rebejn nani rdxagdijltu, rusacsíreni la'tu,

⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riajb nisguij lo rebensa'c sigajcza lo rebenguijdx.

⁴⁶ Palga la'tu chanälajztu lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier.

⁴⁷ Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios?

⁴⁸ Colyajc bensa'c si'c ni najc xtadtu ni yu' xhaguibaa.

6

Rului Jesús xho gudeedni gojn

¹ Rájpzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu.

² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni.

³ Luj che gudeedlu gojn xtenlu, na'c gacbee nicla tej xamiigwlu xhi badeedlu,

⁴ te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

Rului Jesucrist xho cueedx, guiniabni lo Dios

(Lc. 11:2-4)

⁵ Rájpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni neñ reyu' cadre riel xtidx Dios, näjza guiraa resquin, näjza nez ronejz te ruhuii rebejn xho rujnreni. Rniliäpac, acua'reni gaan xtenreni.

⁶ Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

⁷ 'Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naaren sa'csi sanuutis rniireni xhidajl diidx balti huält, siejn diajg Dios.

⁸ Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni.

⁹ Ni'cni scree colguinii lo Dios:

Xtadnu ni yu' xhaguibaa dxan najc lajlu.

¹⁰ Sujiääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

¹¹ Nadxej baniidx xcu'nnu sa' ni rdaunu guira dxej.

¹² Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

¹³ Na'c gusaanlu jiaabnu xhigabguijdx,

basłaa nuure lo dojl,

sa'csi xten guejblu najc yälrnibee, yälradip näjza yälrdimbicha' par tejpas.

Sugacni si'c.

¹⁴ Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu.

¹⁵ Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Ruluii Jesús xho gucua'n bejn

¹⁶ Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni.

¹⁷ Niluxh la'tu, che rucua'ntu, colcun yejctu, colquiib lojtu

¹⁸ te na'c gacbee rebejn cagucua'ntu, xtadtistu suhuii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

Yälñasa'c ni yu' xhaguibaa

(Lc. 12:33-34)

¹⁹ Räjpzani:

—Na'c gapdajntu yälñasa'c lo guedxliujre cadre rajw reman o rbibtiejn xhixtentu, niluxh richu' gubaan rolijz bejn te rbajnreni.

²⁰ Hueenru ga'ptu xcälñasa'ctu xhaguibaa cadre di reman gauu, diza rexhixtentu cuibtiejn, diza regubaan jiu' te cuanreni.

²¹ Sa'csi cadre yu' xcälñasa'ctu, ro'cza naga' lastootu.

Bianij xten tiejxhtu

(Lc. 11:34-36)

²² Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij.

²³ Niluxh palga rebalojtu di fisa'c, guideb tiejxhtu yu' lo nacäy, ni'cni palga bajl nani yu' tiejxhtu dini gusanij, jlinacäiboo najc guidebtu!

²⁴ 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguuiltistu xcälñasa'ctu lo guedxliujre.

²⁵ 'Ni'cni rniä lojtu, na'c chutu yärsia' por xcälñabajntu, xhicha gautu, xhicha yätu, niclaza naatu xhicha lajd gajcwtu. Yälñabajn sajcru lo yälrajw, luxh sajcru tiejxhtu lo xhajbtu.

²⁶ Colhuii remane' ni rtajt xhaguibaa. Direni cue'c binij, dizareni guilia' gäjł, dizareni cuhee xhi gaureni nen yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä?

²⁷ ¿Chu tej la'tu sa'csi ru'tu yärsia' sajç tiobrutu ste bo'c jiaaru?

²⁸ ¿Xhicuent runduxhtu xhigab xcuent xhajbtu? ¿Colhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni.

²⁹ Narä rniä lojtu, nicla rei Salomón guideb najcwni rexhabsa'c xtenni di nisiuchee si'c rsiuchee tej reguiiga.

³⁰ Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz?

³¹ Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?”

³² Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajnni xhini'c rquiintu.

³³ Colquilxgaa yälñabee xten Dios näjza yälñabañsa'c si'cni rrajz Dios dxejç sica'tu guiraa ni rquiintu.

³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

7

Na'c cubeetu sa'tu
(Lc. 6:37-38, 41-42)

¹ Rāj pzani:

—Na'c cubeetu sa'tu te na'cza cubee Dios la'tu.

² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutie xhtu lo bejn, si'cza sutie xh Dios lojtu.

³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu?

⁴ ¿Xhicuent gāblu lo sa'lu, nādoñnu cuää guijxh ni yu' neñ balojlu, luxh dilu fii loj yagro ni yu' neñ balojlu?

⁵ Benguijdx ni rusguee, gulāxgaa yagro ni yu' balojlu te gac fisa'clu te cuäalu guijxh nani yu' baloj sa'lu.

⁶ 'Na'c guluiitu guiraa rextidx Dios loj chutis bejn sa'csi yu'reni najc si'c bā'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni rulāj yejc xhitis xhi cos.

Colnab, colquiil, colgusejz rolä'
(Lc. 11:9-13; 6:31)

⁷ Rāj pzani:

—Colnab lo Dios te guniidxni nani rniabtu. Colquiilni te guidxājltuni. Colnii rolä', te guixalni jiu'tu.

⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

⁹ ¿La yu' chu tejtutu che guiniab xi'nni te yätxtiil, alga gudeedni te guij, ä?

¹⁰ O palga guiniabni te la' bāj, ¿la sudeedni te bāj?

¹¹ Palga la'tu ni najc beñ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

¹² 'Ni'cni guira'ti cos ni rlanjtu gunnāj bejn la'tu, sigajcza colyennājreni, sa'csi si'c caj lo leii xten toMoisés, nājza lo diidx ni bacuaa redad ni gunii xtidx Dios.

Rolä' xten yäl nabajñ najc dää
(Lc. 13:24)

¹³ 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhidajlreni riu' nejzga.

¹⁴ Sa'csi dää najc rolä', dääza najc nezyuj nani rinä bejn nez loj yäl nabajñ, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga
(Lc. 6:43-44)

¹⁵ Rāj pzani:

—Colnatiro rebejn nani rlanj gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni.

¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb.

¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni.

¹⁸ Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c.

¹⁹ Guiraa reyajg nani di ninexhsa'c xcaj lojni, nanab guidinni te checni.

²⁰ Sigajcza sajc gumbeetu beñsa'c sa'csi rujnreni dzunsa'c.

Xhet guiraadi bejn jiu' lo xcälrnibee Dios
(Lc. 13:25-27)

²¹ Räj pzani:

—Xhet guiraadi renani rnii, “Dad, Dad”, jiu' lo xcälrnibee Dios xhaguibaa. Ganaxtis renani rujn si'cni rlajz Xtadä ni yu' xhaguibaa.

²² Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu reben dxab, con lajzalu biennu remilagwr.”

²³ Dxejç säpä lojreni: “Dina gumbeä la'tu. Colbicaj loä benlatsiaj.”

Tio'p cimient
(Lc. 6:47-49; Mr. 1:22)

²⁴ Räj pzani:

—Chutis nani rucudiajg diidx nani caniä, luxh ruzoob xtidxä, laani najc si'c te beñsin nani basoob rolijzni yejç te guilaj.

²⁵ Che biajb nisguij, biäjt nis gueuu, gubi' bej, bidinreni yejç yu'ga sas di yu'ga niajb sa'csi sojbni yejç guilajga.

²⁶ Nani riejn diajgni xtidxä, luxh dini guzoob xtidxä najc si'c te beñ gualajz nani basoob rolijzni lo yujxh.

²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejç ligurebä'n yu'ga. Lacti xhiroob banijt bejn ga.

²⁸ Che gulujx gunii Jesús rediidxga, lacti bidxeloj rebejn rediidx ni baluiini,

²⁹ sa'csi baluiini rebejn si'cpac te nani rnibee, xhet si'c ruluiidi rebejn ni najn leii.

8

Rusiajç Jesús te bejn ni raļ tiejxhni
(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejn huinajlni.

² Dxejçti biääd te benracxhuu ni raļ tiejxhni nez loj Jesús. Bazuxhijbni, räj pni:

—Dad, palga rlajzlu, sajc gusiajçlu narä.

³ Dxejçti basgaa Jesús ñaani, gudajnni dade'ga con ñaani, räj pni:

—Rlazä jiajçlu. Siajç tiejxhlu.

Lagajç dxejç gubicaç guejdx ni raļ tiejxhni.

⁴ Dxejçti räj p Jesús lojni:

—Arniä, rut lojdi gäblu xhi guzajçlu. Huijtis lo rebixhojz te badeed gojn ni gunii toMoisés gudeed bejn ni riajç, te fii rebixhojzga abiajçlu.

Rusiajç Jesús te xmos capitán roman
(Lc. 7:1-10)

⁵ Che biu' Jesús guedx Capernaum, bidzujn te capitán roman nani rnibee te gayuu soldaad. Gunabduxhni lo Jesús,

⁶ räj pni:

—Dad, xmosä naga' rolizä. Di gacdi guiniibni luxh cayanduxhni.

⁷ Räj p Jesús:

—Do'o te gusiäcäni.

⁸ Dxejçti räj p capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajç xmosä.

⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajçni. Che gäpä loj xmosä: “Bejn dee”, rungajçnini.

¹⁰ Che biejn diajç Jesús si'c, bidxeloduxhni, räj pni loj renani siädnaçlni:

—Rniliäpac lojtu, nicla nen guideb reguedx Israel dina nidxälä te bejn ni rililajz si'c rililajz dade're.

¹¹ Niluxh rniä, sirii xhidajl benzijt nez ladjiaa, nez ladjiät, te jiädcuenäjreni Abram, Isaac, Jacoob lajdx Dios xhaguibaa.

¹² Luxh reben Israel nani niajc xi'n Dios sijreni te laad lo yälkäy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orğa biajc xmosni.

Rusiajc Jesús xnansueegr Pedr

(Mr. 1:29-31; Lc. 4:38-39)

¹⁴ Che bidzujn Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa.

¹⁵ Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl ben racxhuu

(Mr. 1:32-34; Lc. 4:40-41)

¹⁶ Che biu' guxhijn, biädnäreni loj Jesús xhidajl bejn ni yu' rebenxab lotooreni; con xtiidxni gunibeeni birii guiraa rebenxabga. Basiajczani guiraa reben racxhuu.

¹⁷ Si'c bejn ni te guzojb diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanäzani rexcälñayannu.

Reni rlajz ninajl Jesús

(Lc. 9:57-62)

¹⁸ Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexpejnpacni stelaad ro' nis.

¹⁹ Dxejcti biäd te beñajn loj Jesús, räjpni:

—Mastr, sisiaäza cadrotis chäälu.

²⁰ Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpi-tiääzreni, niluxh narä Xi'n Dios ni gujc Niguii dina gapä cadro gaa yecä.

²¹ Stee rexpejnpacni räjp lojni:

—Dad, basaan chaxgaä ladxä te chacuatzá xtadä.

²² Räjp Jesús lojni:

—Gudanajl narä. Basaan sugucua'tz resabenğutreni rebejn nani najc si'c beñgut sa'csi najcreni beñdojl.

Basiacdxi Jesús te beduxh

(Mr. 4:35-41; Lc. 8:22-25)

²³ Che biu' Jesús nen barcw, biu'za rexpejnpacni lagajc nenga.

²⁴ Dxejc huäjs te bedonduxh lo nisdoo. Lirusiääzni barcw neñ nisdoo. Luxh Jesús nagayejsni.

²⁵ Dxejcti huij rexpejnpacni huicuäänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni.

²⁷ Dxejc bidxeloduxh rexpejnpacni, räjpreni:

—¿Chuni'c najc niguiire? ¡Ahuilaa xho rucuardiajg bej näjza nisdoo xtiidxni!

*Rebendxab ni yu' lajdx regadarenos**(Mr. 5:1-20; Lc. 8:26-39)*

²⁸ Che bidzujn Jesús stelaad nisdoo cadro najc lajdx regadarenos, tio'p bejn ni yu' bendxab lastooreni biädchaglojreni Jesús. Rebejnnga riireni neñ rebaa, nialazduxhrene, ni'cni rut rajcdi rdejdx nezyujga.

²⁹ Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siädllu ree te gusacsílu nuure luxh gad gal'di xor'nu, ä?

³⁰ Nez te laad, zijte' cadro suga'reni, cayajp bejn xhidarlo cuch.

³¹ Dxejcti gunab rebendxabga loj Jesús, räjpreni:

—Palga cuäálu nuure, basaan jiu'nu neñ recuchre.

³² Dxejcti räjp Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxunreni, huitejbreni ro' te guilaj, biääzreni neñ nisdoo, gujttireni neñ nis.

³³ Rebejn ni cayajp recuchga, baxunreni, huijreni lajdxreni, huiyeireni didx guiraa ni guzajceni näjza ni guzajc redade' ni guyu' rebendxab lastooreni.

³⁴ Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

9*Basiajcx Jesús te bejn nani abixu'n tiejxhni**(Mr. 2:1-12; Lc. 5:17-26)*

¹ Dxejcti biu' Jesús neñ barcw. Gudejdni stelaad ro' nis te bidzujn lajdxni.

² Ro'c biädnärene lojni te bejn nani abixu'n naani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—¡Baspaa lajzlu xi'nä! Agubicaj rextojllu.

³ Dxejcti gaii bennajn ni ruluii xleii Moisés cayujnreni xhigab ensilaareni, caniyaj dee Dios con rextiidxni.

⁴ Dxejcx guchbegajc Jesús xhi xhigab cayujnreni, dxejcx räjpni lojreni:

—¿Xhicuent cayujntu xhigabguijdx neñ lastootu?

⁵ ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.”

⁶ Dec gunä te gacbeetu Xi'n Dios ni gujcx Niguii rajp yäl'nibee lo guedxliujre te gudzucajni dojl.

Dxejcti räjpni loj benracxhuuga:

—Huistie, cua' xta'lu, huij rolijzlu.

⁷ Dxejcti huistie benracxhuuga, siini rolijzni.

⁸ Che bahuii rebejn lojni, bidxeloduxhrene, gulä'preni xpala'n Dios, ni badeed yäl'nibeega loj rebejn.

*Che gurejdx Jesús Mateo**(Mr. 2:13-17; Lc. 5:27-32)*

⁹ Dxejcti birii Jesús cadro basiajcxni benracxhuu, sä'tini. Dxejcx bahuiini loj te dade' ni laa Mateo. Sobga'ni loj te yagxhiil cadro rbej reni ruquijcx xluent guiraloj. Dxejcx räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijcx xluent guiraloj, ni najc rebejn ni di gac xpen Israel, gurejzarenini lo mex näj Jesús näjza reni najc rexpejn pacni.

11 Che bahuii reben guidoo, ni laa refarisee, xhi cayujn Jesús, räjpreni loj rexpejn pac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

12 Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiaj cni, niluxh rebejn racxhuu ni'c rquii reni chu gusiaj creni.

13 Colchäj te colchaseed xhi säloj diid xre ni caj loj reguijtz: “Yäl rulas lajz rlazä, dina rlazä guniidxtu guidxaa löä.” Sa'csi narä dina niädtedxä rebeñsa'c, narä siädtedxä rebeñdojl te gusiechlajzreni.

Gunabdiid xreni xcuent yälrucua'n

(Mr. 2:18-22; Lc. 5:33-39)

14 Dxejcti biäd rexpejn pac Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexpejn pac lu gucua'n, ä?

15 Räjp Jesús lojreni:

—Che ruchnaa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

16 'Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga.

17 Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtz reguijdgä. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajn xhajb Jesús

(Mr. 5:21-43; Lc. 8:40-56)

18 Lal ni caniini rediidxga, biäd te dade' ni rnibee neñ guidoo xten rexpejn Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub naalu yej cni te guibañsacni.

19 Dxejcti huisu Jesús, sanäni Jairo. Näj rexpejn pacni sanajlreni.

20 Luxh guyu' te gunaracxhuu nani agujc tzubitio'p ijz cayajcni yälguidxbäii. Bidzujñni nez dejtz Jesús, gudajñni ro' xhajbni,

21 sa'csi bejñni xhigab neñ lastooni: “Palga sajc canätis ro' xhajbni, siacä.”

22 Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yäl rililajz xtenlu abasiajclu.

Luxh lagajc dxejc biajc gunaaga.

23 Cheni biu' Jesús rolijz dade' nani rnibee neñ xquidoo rexpen Israel, bahuiini rebejn ni rol bizej näjza xhidajl rebejn ni cabedxa' cayoon, li te biey cayajc, dxejc

24 räjpni loj rebejn ga:

—Colguibicaj. Nagayejstis dxa'pga, gajdni guet.

Dxejc rebejn ga alga ruxhiznäjreni Jesús.

25 Cheni abirii rebejn neñ yu', biu' Jesús, gunaazni naa dxape', dxejc huistie dxape'ga.

26 Dxejcti bire'ch diid xga guiraa neñ reguejdx ni tre' nejzga.

Basiajc Jesús tio'p lotiä'p

27 Che birii Jesús ro'c, huinajl tio'p bejñni nani di fii. Rbedxa'reni roonreni räjpreni:

—Balaslajz nuure, Xi'n toDavid.

28 Che bidzujñ Jesús cadro caya'nni, gubigreni lojni. Dxejcti gunabdiid Jesús lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹ Dxejcti gudajnni balojreni, räjpni:

—Sugacni si'cpacni rililajztu.

³⁰ Lagajc dxejc bixal balojreni. Sas räjppac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadro biajc baloj rebejn̄ga, biääd sgaii bejn̄ biädnäreni te gop loj Jesús. Yu' xp̄rit beñdxab neñ lastoo bejn̄ga.

³³ Che barilaagw Jesús xp̄rit beñdxab neñ lastoo beñgopga, guslogajcni caniini. Rdxeloduxh rebejn̄ räjpreni:

—Gajdpacnu guihuii sa' redzuunre lajdx rexpejn̄ Israel.

³⁴ Dxejc rebeñ guidoo ni najc refarisee, räjpreni:

—Rbääni rexpr̄it beñdxab con yäl̄rnibee xten beñdxabro.

Rulaslajz Jesús rebejn̄

³⁵ Gudejd Jesús guiraa reguedxro näjza reguedxbäz, basule'ni xtidx Dios neñ reguidoo xten rexpejn̄ Israel. Basääbni diidx xten xcäl̄rnibee Dios. Basiajczani guiraloj yäl̄racxhuu, guiraloj yäl̄guijdx ni rajc bejn̄ neñ reguejdxga.

³⁶ Che bahuiini loj rebeñ xhidajl biaduxhni rebejn̄ga sa'csi rdebya' lajzreni, rac-huin lajzreni, najcreni si'c najc rexiiil nani di ga'p baxtoor.

³⁷ Dxejcti räjpni loj rexpejn̄pacni:

—Guliipac xhidalduxh beñ guedxliuj di gan xtidxä, luxh guxii najc reni guluiireni; najcni si'c gäj̄l ni agojl guilia', niluxh ruti mos ni guilia'ni.

³⁸ Col̄nab lo Dad nani najc xtenni guedxliujre te guxhañni rebejn̄ ni sajc guluii rebeñ guedxliujre, gacreni si'c mos ni rlia' gäj̄l.

10

Gule Jesús guitzubitio'p rexpejn̄pacni

(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejn̄pacni, badeedni yäl̄rnibee lojreni te gurilaagwreni rexpr̄it beñdxab lastoo bejn̄ näjza te gusiajcreni guiraloj yäl̄guijdx näjza yäl̄racxhuu.

² Laj reguitzubitio'p rexpejn̄ni ni guleni najc: Simón, ni laaza Pedr; Andrés bejtz Simón; Jacob xi'n Zebedeo; Juan bejtz Jacob;

³ Felipe; Bartolomé; Tomás; Mateo, ni najc colectoor; Jacob, xi'n Alfeo; Lebeo ni rniireni Tadeo;

⁴ Simón, te bejn̄ ni yu' loj recananita; Judas Iscariote, nani bateed Jesús ladz̄naa rebejn̄ nani rdxe'ch lojni.

Baxhañ Jesús rexpejn̄pacni gutie'chreni diidx

(Mr. 6:7-13; Lc. 9:1-6)

⁵ Guitzubitio'p rebejn̄re baxhañ Jesús. Balijdxnireni räjpni:

—Na'c chäätu nez cad yu' rebejn̄ ni di gumbee Dios. Na'c jiu'tu lajdx rebeñ samaritan.

⁶ Col̄chäxga lo rexpejn̄ Israel nani agunijt neñ dojl.

⁷ Col̄chäj, col̄zäbdiidx lo rebejn̄, col̄ye'tz lojreni xcäl̄rnibee Dios abidz̄ungajxh.

⁸ Colgusiajc beṇ racxhuu, colgusiajc tiejxh rebejn ni raḷ guejch tiejxhreni, colguspajṇ bengut. Colgurilaagw xpriṭ beṇdxab lastoo rebejn. Ligaj cua'tu yälrnibee, ligajza colyejn dzuun.

⁹ Räjpzani:

—Na'c chanätu oor, niclaza pla't, niclaza coobr neṇ xdoḃdäjltu,

¹⁰ niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla bastoṇ sa'csi bejn ni rujn dzuun nungäjḷ xca'ni xhi gauni.

¹¹ Räjpzani:

—Che guidzujṇtu xhitis te guedxro, xhitis te guedxbäz, colḷquiil te beṇsa'c. Rolijztisni colḷjia'n dxejli ni jiunejztu guejdxga.

¹² Cheni jiu'tu neṇ yu', colṇii xtidx Dios lo rebejnḡa.

¹³ Palga najcreni bejn ni numbee Dios, sujia'n yälrbexilajz loj rebejnḡa. Niluxh palga direni gac beṇsa'c, naaddireni xca'reni xtidx Dios, suguibi' yälrbexilajzga lojtu, colḷjiunejz ro'c.

¹⁴ Palga direni gusaan jiu'tu rolizreni, palga di rlaizreni gucuadiajgreni xtiidxtu, dxejc colḷjiunejz roliz bejnḡa, o colḷjiunejz guejdxga, dxejc colḷcuijz guxhuj ni'tu si'c te seen gulälazreni xtidx Dios.

¹⁵ Rniliäpac lojtu, dxej ni gun Dios xcälḡuxhtisni, te yälḡuxhtisoru gun Dios rebejnḡa, quela yälḡuxhtis ni gujc rebeṇ guedx Sodoma näj Gomorra.

Yälrusacsí ni siääd

¹⁶ Räjpzani:

—¡Colḷhuiire! Narä suxhalä la'tu si'c xile' nez loj reloob, ni'cni colḡacnasiṇduxh si'c najc te bäl, colyajza nadolajz si'c te palom.

¹⁷ Colṇatiro rebejn sa'csi suteedreni la'tu ladzṇaa rexcuxhtisreni, siguijn-zareni la'tu neṇ xquidooreni.

¹⁸ Sinäzareni la'tu nez loj regubier, nez loj reṇeii xcuent rextidxä, te gusule'tu xtidxä nez lojreni näjza nez loj rebejn nani di gumbee Dios.

¹⁹ Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga.

²⁰ Sa'csi et la'ditu ni guinii dxejc, Sprit xten Xtadtu Dios ni yu' neṇ lastootu, laani guinii neṇ lastootu.

²¹ 'Luxh rebejn suteedreni lagajc bejtzreni ladzṇaa reni ju'treni. Redad suteedreni lagajc xi'nreni, rexi'n bejn sidxe'chzareni lo xcuzajṇreni te ju't bejn xcuzajṇreni.

²² Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yälḡabajṇ par tejpas.

²³ Che guirinajlreni la'tu te gusacsíreni la'tu neṇ te guejdx, colḡuxuṇ ro'c, colḷchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiääd Xi'n Dios ni gujc Niguii.

²⁴ 'Di te bejn ni casieedgaj beṇroru lo xmastrni, diza te mos gac beṇroru lo xlamni.

²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee beṇdxab, ¿xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räjpzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujṇ dxej guixal lojni, te fii chutis bejn lojni. Xhetiza te cos xhiga'tzdi ni di guidzujṇ dxej siejn diajg bejn xcuentni.

²⁷ Diidx nani rniä lojtu guxhijñ, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni.

²⁸ Na'c guidxejbtu renani rugu't bejñ, sa'csi direni gun gaan ju'treni xaim bejñ. Colguidxejbru nani rugu't tiexh bejñ näjza xaim bejñ neñ gabijl.

²⁹ '¿La di bejñ guto' tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj.

³⁰ Näjza rexquidxejclu nagab tebgajreni.

³¹ Ni'cni rniä na'c guidxejbtu; sajcrutu lo te chinaa manbáz ni rutajt.

Renani rusule' xtidx Jesucrist nez loj rebejñ

(Lc. 12:8-9)

³² Räjzani:

—Chutis renani rusule' xtidxä nez loj rebejñ, narä siniäza xcuentni nez loj xtadä ni yu' xhaguibaa.

³³ Guiraa renani di gusule' xtidxä nez loj rebejñ, sigajcza narä dina guiniä xcuentni nez loj xtadä ni yu' xhaguibaa.

Rlia' Jesús sa' bejñ

(Lc. 12:51-53; 14:26-27)

³⁴ Räjzani:

—Na'c guntu xhigab siädnää yälrbexilajz lo rebeñ guedxliujre, xhet yälcedxidi ni siädnää, yälrdxagdiñ siädnää.

³⁵ Narä siädnää yälrdxagdiñ te bi'n con xtadni; te dxa'p con xnanni; te gulijzni con xnansuegrni.

³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxapni, di gacdiza gacni xpenä.

³⁸ Nani di guu xcrujzni, nalajznu tedni trabajw, jiädnañni narä, di gacdi gacni xpenä.

³⁹ Nani guidxäl xcälñabajñni lo guedxliujre, sunitni yälñabajñ xhaguibaa. Luxh nani gunijt xcälñabajñni lo guedxliujre xcuent rextidxä, sidxälñi yälñabansa'c xhaguibaa.

Gaan nani xca'ni

(Mr. 9:41)

⁴⁰ Räjzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzani Gueb Dios nani baxhal narä.

⁴¹ Nani guscuääz te niguii ni rnii xtidx Dios rolijzni sa'csi baxhal Dios niguiiga, sica'za bejnga lagajc gaan ni xca' niguii ni rnii xtidx Dios. Nani guscuääz te beñsa'c rolijzni sa'csi beñsa'cni, sica'zani lagajc gaan ni xca' beñsa'cga.

⁴² Chutis nani gudeed mase te xhijgtis nis niäliuj xcuentä lo rebiuxe're, rniliäpac lojtu, direni gunijt, sica'pacreni nani nungäjñ xca'reni.

11

Renani baxhal Juan Bautist loj Jesús

(Lc. 7:18-35)

¹ Che gulujx baluii Jesús rexpejñpacni xho gunreni dzuun, dxejcti biriini ro'c te saluiini, chasule'ni diidx lajdx rexpejñpacni.

² Juan yu' neñ latzguiib. Che biejn diajgni xhi cayujñ Jesús, baxhalñi tio'p xpejñpacni

³ te huinabdiidxreni:

—¿La luj ni najc Crist ni jiääd, ä?, o ¿la siläáznu chu stee bejn?

⁴ Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhui-itu.

⁵ Reni di fii, ruhuiireni; reni di sa, arsiajreni, reni ral tiejxhni, abiajc tiejxhreni; reni di jien diajg, ariejn diajgreni; rebengut, ahuäjzreni, gubansacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni ruslaa bejn neñ dojl.

⁶ Chicbaa renani di jieed narä.

⁷ Cheni sii rebejn ga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä?

⁸ ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolijz rereii.

⁹ La'tu ¿xhicient huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beñroruni.

¹⁰ Laa Juan nani rusä't ni bacuaa lo reguijtz cadre caj scree:

Narä suxhalä te niguii nani guinii xtidxä nez lojlu;

laani susucheeni nezyuj nezlojlu.

¹¹ Guliipac rniä, loj guiraa rexingaän xten gunaa, nicla tejni gajd guiricaj ni najc te beñsacduxh loj Dios si'c ni najc Juan Bautist. Niluxh bejn nani najc beñ huinru lo xcälrnibee Dios xhaguibaa, bejn ga maazru sajcnii loj Juan.

¹² 'Cheni gucli dxej ni gusloj rusule' Juan Bautist diidx najli, yu'duxh reni rlanjpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' rlanjzreni cuäxuuni xcälrnibee Dios.

¹³ Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist.

¹⁴ Palga rlanjztu chalilajztu, lagajc Juan najc Elías, niguii xten Dios nani bia'n diidx jiääd.

¹⁵ Nani sobdiajg diidx, gucudiajgni.

¹⁶ ¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo guii cadre rdo', rbejdxreni lo sa'reni,

¹⁷ rniireni: “Bielnu bizej te गया'tu luxh ditu nuya'. Dxejcti bielnu redij ni nabaduxh luxh dizatu nioon.”

¹⁸ Sa'csi che biääd Juan dini niajw dizani niä', luxh räjp rebejn najcni te xpejn beñdxab.

¹⁹ Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: “Niguiire rauxha't, rätejzani bin, najcni xamigw rebendojl näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcäl'najn Dios, ni'cni baxhalni guiro'p rebejnre.

Reguejdx gyalajz

(Lc. 10:13-15)

²⁰ Dxejcti gusloj Jesús gudil'näjni rebenguejdx cadre benduxhni remilaagwr, sa'csi naaddireni gusiechlanjzreni xtojlreni, sanuutis nabajnreni neñ dojl. Dxejcti räjpni:

²¹ —¡Gunatiru guedx Corazín! ¡Gunatiro guedx Betsaida! Paru neñ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lanjzreni xtojlreni, cadxejli niajcwreni neñ godx, nidäáb cobdäj yejcreni.

²² Luxh rniä lojtu: che guidzujn dxej ni gun Dios xcälguxhtisni, sidejdrutu castiigw loj rebejn ni guläjz guedx Tiro näjza guedx Sidón.

²³ Luj guedx Capernaum di gunlu xhigab chäslu xhaguibaa; jäjt nen baa jiajblu, sa'csi paru nen guedx Sodoma niajc sa' remilaagwr nani gujc guedxlajdxlu, pet najli tresijc guejdxga.

²⁴ Luxh rniä lojtu, dxej ni gun Dios xcälguhxhtisni, trabajwduxhru tedtu loj rebejn Sodoma.

Coltaa loä, te gusilajztu
(Lc. 10:21-22)

²⁵ Laa dxejcnj räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c biuxbäz.

²⁶ O'n. Guliini, Xtadä, sa'csi rujnlu xhigab si'c najc hueen gacni.

²⁷ Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni.

²⁸ Coltaa loä guiraatu nani abadxajg, nani rsina', narä sunidxä yälrusilajz lojtu.

²⁹ Colguisieed guntu dzuun si'cni ruluiätu. Colhuii xho runä, xho nacä nadolajz, dizana gacä benneyedxlajz nen lastoä, ni'cni sidxäl xaimtu yälrusilajz.

³⁰ Sa'csi guyasi najc xtzunä ni ruluiätu, dizani gac naganduxh.

12

Rutie' rexpejn Jesús triuu dxej ni rusilajzreni
(Mr. 2:23-28; Lc. 6:1-5)

¹ Che sasaj Jesús nez loj reyuj cadre naga' triuu, luxh dxejga najc dxej ni rusilajz rexpejn Israel, calaan rexpejn pacni, guslojreni calädxä'reni doj lo triuu te cayajwrenini.

² Che bahuii reben guidoo ni laa farisee, räjpreni loj Jesús:

—Ahuii xho rujn rexpejn paclu dzuun nani di nungäjł gunreni dxej nani rusilajz bejn.

³ Luxh laani räjpni lojreni:

—¿La gajdtu goł xhi caj loj reguijtz xcuent ni bejn toDavid che gulannäjni rexpejn ni, ä?

⁴ Biu'reni xquidoo Dios, gudajwreni yätxtiil nani di nungäjł gauni, nicla laani, niclaza rebejn nani sanäni, sa'csi yätxtiilga rebixhojztis rajwni.

⁵ O ¿la gajdtu goł lo reguijtz xten leii cadre caj xcuent rebixhojz, ä? Laareni riu'reni nen reguidoo dxej ni rusilajz bejn, rujnreni xtzunreni niluxh xhet dojłdi rujnreni.

⁶ Narä rniä lojtu, ree suga' tej nani saj cru loj guidooga.

⁷ Paru niacbeetu xhi säloj dee: “Yäl rulaslajz rlazä, xhet yälrejtdi guidxaa”, ditu nucuaquij redee ni xhet bejn di.

⁸ Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani
(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni.

¹⁰ Ro'c suga' te bejn ni gubijdz te naani. Luxh sa'csi caguuilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcnj ben racxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni nen bisie che gal dxej ni rusilajz bejn, ¿xhixh dini cuää xiilga nen bisie, ä?

¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcni tebloj si'c najc stelaad naani.

¹⁴ Dxejcti birii reben guidoo ni laa farisee, bachagsa'zareni te bia'nreni diidx ju'treni Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu.

¹⁶ Dxejc räjpni lojreni:

—Na'cpac gäbreni chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnä j bejn, dizani cuedxa';
rudza jiejni diajgni xse'ni lad nezyuj.

²⁰ Dini qui'ch nicla te nijt ni cabiejc,
dizani gusuii te duxiil ni cayujn guxh,
dxejli che gunni gaan guinibeeni yälguxhtis.

²¹ Lajtisni sustioob lastoo reben ni digac xpejn Israel.

Rucuaquijreni Jesús rajpni yälrnibee xten bendxab

(Mr. 3:19-30; Lc. 11:14-23; 12:10)

²² Dxejcti biädnäreni loj Jesús te bejn ni di fii, dizani guinii, yu' te bendxab lastooni. Dxejcti basiajc Jesúsni, te gujc guniini, te gujca bahuiini.

²³ Guiraa rebejn bidxeloreni, räjpreni:

—¿Xhaa laa Xi'n toDavidni, ä?

²⁴ Che biejn diajg reben guidoo ni laa farisee rediidxga, räjpreni:

—Bejnre rbää rebenxab con yälrnibee xten Beelzebú ni rnibee loj rebenxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridilnä j sa'reni, sinitlojreni.

²⁶ Sigajcza palga bendxab rbää sabendxabni, silia' sa'reni, dxejc ¿xho gac chanuu xcälrnibeereni?

²⁷ Palga narä rbää rebenxab con yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab.

²⁸ Palga narä rbää rebenxab con Xpirt xten Dios, guliipacni abidzujn xcälrnibee Dios lojtu.

²⁹ 'Bahulaare. ¿Xho gac jiu' te bejn cuan roliiz te bendaan, xho gac cuanni xhixten bejnga, palga dini gulibxgaani bendaanga? Che abiliib bejnga, sajc cuanni rehxixten bejnga.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yälrusguee xte bejn sajc gusiäj l ajzni xtebtis yälrniyaj Sprit Dxan xten Dios di Dios gusiäj l ajzni.

³² Chutis ni guinii xhi te diidx yälrniyaj Xi'n Dios ni gujc Niguui sajc gusiäjl lajzni, luxh chutis ni guiniyaj Sprit Dxan xten Dios, di Dios gusiäjl lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni

(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni.

³⁴ Sa' la'tu benguijdx ni najc si'c te bäl niälasduhx, ¿xho gac guiniitu te didxsa'c?, ni ro' bejn rniitis rehxigab ni yu' neñ lastoo bejn.

³⁵ Te beñsa'c rniini didxsa'c, sa'csi ganax xhigabsa'c yu' neñ lastooni, te benguijdx rniitisni cosguijdx sa'csi ganax xhigabguijdx yu' neñ lastooni.

³⁶ Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis,

³⁷ sa'csi lagajc rextiidxlu sujn guinii Dios najclu beñsa'c, lagajc rextiidxlu sujn gunijtlu lo Dios.

Rebenguijdx rniab te milagwr si'c te seen

(Mr. 8:12; Lc. 11:29-32)

³⁸ Dxejcti rebejn ni ruluu xleii toMoisés näjza reben guidoo ni laa farisee, räjpreni loj Jesús:

—Mastr, nuurnu rrajznu guihuiinu te seen; bejn te milagwr te finuni.

³⁹ Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseen-tis Jonás, dade' ni gunii xtidx Dios.

⁴⁰ Sa'csi lagajc si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguui neñ lastoo guedxliuj choñ dxej, choñza yääl.

⁴¹ Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi reben Nínive basiejch lajzreni, bia xtojlrni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás.

⁴² Näjza rein xten reben sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduhx biriini te biädcuadiajgni reyälhajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³ Räjzani:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadre gusilajzni, per cad rdxäldini.

⁴⁴ Dxejcti rujni xhigab, naani, guibisacä cadre biriä. Cheni rbisacni ro'c, rdzujni si'c rdzujn te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c.

⁴⁵ Dxejcti rijni, rixiini sgajdz sprit nani najc nadxuudxru lojni te jiädlänäjreni neñ lastoo bejnga. Dxejcti rxhinduxhru bejnga lojni gujcni galoo. Sigajcza gac rebejn ni tre' lo guedxliujre naj.

Xnan Jesús con rebejzni

(Mr. 3:31-35; Lc. 8:19-21)

⁴⁶ Lañ ni caninäjni rebejn, bidzujn xnanni con rebejzni, suga'reni rolä' rrajzreni guiniireni lojni.

⁴⁷ Dxejcti biääd tej ni räjp loj Jesús:

- Xnanlu nájza rebejtzlu suga' rolä' rlanjreni guininäjreni luj.
⁴⁸ Laani badzu'ni diidx lo bejnga räjpni:
 —¿Chuni'c najc xnanä? ¿Chuni'c najc rebetzä?
⁴⁹ Dxejcti basgaani naani nez loj rexpejnpacni, räjpni:
 —¡Redee najc xnanä redeeza najc rebetzä!
⁵⁰ Chutis nani rujn si'cni rnibee Xtaä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn nani rbe'c binij (Mr. 4:1-9; Lc. 8:4-8)

- ¹ Lagajc dxejga birii Jesús royu'ga, huicueni nez ro' nisdoo.
² Xhidalduxh bejn bire' cadre suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii.
³ Dxejc gusloj caguluii Jesús con recuent, räjpni:
 —Colcuadiajg. Birii te dade' ni rbe'c binij te cue'cni binij.
⁴ Lañ ni cabe'cni binij yu' binij ni bitejb gajxh nez ro' nesij, biääd remane' ni rutajt, sas gudajwreni binijga.
⁵ Yu' binij ni bitejb nez neñ reguij cadre guxii yu' yuj. Gulengajc binijga sa'csi direni nibej jiät neñ yuj.
⁶ Che birii gubijdx, bigolreni sa'csi xhetiza xlobaani, dxejc gubijdzni.
⁷ Yu'za binij ni bitejb neñ reguejch. Che guroob reguejchga, dini nusaan niroob regäje', gubijdzireni.
⁸ Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej.
⁹ Nani rsobdiajg diidx gucuadiajgni diidxre.

Xhi pajr najc recuent xten Jesús (Mr. 4:10-12; Lc. 8:9-10)

- ¹⁰ Dxejcti gubig rexpejnpacni, gunabdiidx lojni, räjpreni:
 —¿Xhicuent rusule'lu diidx loj rebejn con recuent?
¹¹ Dxejcti badzu' Jesús diidx rajpni lojreni:
 —Sacnäj Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeerenini.
¹² Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni rajpni sibicaj.
¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni.
¹⁴ Laareni najcreni si'c te soob diidx ni gunii Isaías, dade' ni gunii xtidx Dios, che räjpni:
 Siejn diajgpactu, niluxh xhetliidi gacbeetu,
 sidxelojactu, niluxh ditu fii.
¹⁵ Sa'csi gualajz rebejnre, lastooreni najc si'c te guij,
 di diajgreni jiejn,
 luxh niäüza balojreni, didi fisa'creni con balojreni,
 didi jiejnza diajgreni, didi gacbeeza lastooreni,
 didi gusiejch lajzreni guibi'reni loä te gusiaca lastooreni.
¹⁶ La'tu colguibalaznäj balojtu sa'csi rhuisa'ctu, riensa'cza diajgtu.
¹⁷ Rniliäpac, xhidajl redade' ni gunii xtidx Dios, nájza xhidajl beñsa'c rladuxh nuhüi sa' recos ni cahüitu, luxh direni nuhüini, rlanjreni niejn diajgreni sa' rediidx nani cayejn diajgtu, luxh di diajgreni niejn.

Rusule' Jesús xcuent bejn ni rbe'c binij
(Mr: 4:13-20; Lc. 8:11-15)

¹⁸ Colcuadiajg xhi säloj xcuent bejn nani rbe'c binij.

¹⁹ Rebejn nani rucuadiajg diidx xten xcälrnibee Dios, niluxh direni gacheeni, najcreni si'c najc binij nani bitejb nez ro' nesuyj; riääd beñdxab rudzucajni rediidx nani biu' neñ lastooni.

²⁰ Rebinij nani bitejb nez neñ reguij, najc si'c rebejn nani rucuadiajg diidx, gustli rca'reni diidxga,

²¹ luxh guxii yu' xlobaani, direni sutijp. Che rdejcreni trabajw, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga.

²² Rebinij nani gurej neñ reyaguejch säloj rebejn nani rucuadiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios neñ lastoo rebejnre, dini gusaan gac te cosechsa'c neñ lastoo rebejnre.

²³ Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzoo.

Xcuent triuu cadre guyu' cuanguejch

²⁴ Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni.

²⁵ Lañ nagaguejs bejnğa, biääd te bejn nani rdxe'ch lajz loj xpaxhuaan binijğa, biädle'cni bedz cuanguejch lo xtriuu bejnğa, dxejcti sääni.

²⁶ Cheni gulejn triuuga, birii doj lojni, dxejc biricaj näjza cuanguejch ro'c.

²⁷ Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?”

²⁸ Räjp xlamreni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlajz guejblu cholädxanu recuanguejchga, ä?”

²⁹ Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu.

³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni neñ yu'.”

Xcuent bedz muxhtas
(Mr: 4:30-32; Lc. 13:18-19)

³¹ Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni.

³² Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

Xcuent levaduur
(Lc. 13:20-21)

³³ Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo choñ mediid arin, dxejc ni'c rusaguijni guideb cojbga.

*Xhicuent baluii Jesús ganaxtis con cuent**(Mr. 4:33-34)*

³⁴ Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni.

³⁵ Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni:

Suiyã diidx con recuent,

suiyã diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch nen triuu

³⁶ Dxejcti basadiidx Jesús rebejn, biu'tini nen yu' cadre bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguui;

³⁸ loniaaga najc guedxliuj; retriusa'c najc rebejn nani najc xpejn Dios, nani rucuaiajg xtiidxni; recuanguejchga najc rebejn ni najc xpejn bendxab.

³⁹ Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios.

⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj.

⁴¹ Xi'n Dios ni gujc Niguui suxhal rexanglni te jiädgutie'reni, te jiädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx.

⁴² Susälreni rebejn ga nen te or cadre cayecduxh. Ro'c sonduxhreni, sauya'reni läjyreni.

⁴³ Dxejcti rebensa'c sidimbicha'reni si'c gubijdx lo xcälrnibee Xtradreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴ Räjzani:

—Si'cza xcälrnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räjzani:

—Xcälrnibee Dios xhaguibaa najcza si'c najc te dad rapduxh nani caguuil perlsa'c te siini.

⁴⁶ Che bidxäl ni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bäjl

⁴⁷ Räjzani:

—Xcälrnibee Dios xhaguibaa najcza si'c te guijxh ni rusäl bejn lo nis te rniaazreni guiraloj cuaa bäjl.

⁴⁸ Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni najc hueen rucweeni nen te dxijm; nani di gac hueen rusälrenini te laad.

⁴⁹ Si'cza gac che gac fis guedxliuj; sirii rexangl Dios te sudzucajreni rebenguijdx lo rebensa'c.

⁵⁰ Dxejcti susälreni rebenguijdx nen te or cadre cayecduxh; ro'c sonduxhreni, sauya'reni läjyreni.

Te ben rajp

⁵¹ Dxejcti gunabdiidx Jesús lojreni, räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

⁵² Dxejcti räjpni lojreni:

—Cheni rsieed te bejn nani najn leii xcuent yälrnibee xten Dios xhaguibaa, najcni si'c te lam nani rajc rbää lo rexcäl_nasa'cni recos ni nacoob, näjza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni.

⁵⁴ Huijni lagajc lajdxni. Ro'c gusloj caguluiini nen xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl_najnre? ¿Xho rajc rujnni remilagwr?

⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacob, José, Simón con Judas.

⁵⁶ Luxh rebisiajnri rbäzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdx-pacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc nen redxejga Herodes, ni laaza tetarca, biejn diajgni diidx xcuent ni cayujn Jesús.

² Dxejc räjpni lo rexmosni:

—Dee najc Juan Bautist. Pet agubañsacni lo reben_gut, ni'cni rajpni yälrnibee te rujnni remilagwr.

³ Si'c gunii Herodes sa'csi laani basäuuni Juan nen latzguiib. Niluxh gunibeeni biliibni con caden nen latzguiib xcuent Herodías, ni gujc chääl bejtzni Felipe.

⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni reben_guejdx, sa'csi guiraareni nriireni Juan najc te niguii ni rnii xtidx Dios.

⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni,

⁷ räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸ Dxejcti gunaaga, abaliidx xnannini, räjpni lo Herodes:

—Loj te platón baniidx bituuejc Juan Bautist.

⁹ Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga.

¹⁰ Dxejcti gunibeeni biru' yejc Juan Bautist nen latzguiib.

¹¹ Sas biädnäreni yejcn lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujn rexpejn Juan sanäreni togoolga te huicua'tzrenini. Dxej-cru huisa'nreni diidx loj Jesús.

Bayaan Jesús gaa mil bejn
(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni.

¹⁴ Che birii Jesús neñ barcw, bahuini loj xhidalduxh bejn, dxejc balazlazniren, basiajcn rebejn nani racxhuu.

¹⁵ Cheni acayu' guxhijn, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjrl rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjrl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisreneni loj reben xhidajl.

²⁰ Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni.

²¹ Renani gudajw najcreni si'cti gaa mil niguii, xhet näjdi regunaa niclaza rebiiux bigab.

Gusaj Jesús lo nisdoo
(Mr. 6:45-52; Jn. 6:16-21)

²² Sas gunibee Jesús biu' rexpejn pacni neñ barcw te ganidreni tedreni stee lad nis lalni casadiidxni rebejn.

²³ Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojl guxhijn, ro'c sugaxteb Jesús.

²⁴ Luxh barcw galäi lo nis sasaj. Cagusnibduxh reol barcw, liriääzni lo nis sa'csi cabi' beduxh cadre sääreni.

²⁵ Rsildooru gubig Jesús, bidzujñni lojreni, siädsajni lo nisdoo.

²⁶ Che bahuii rexpejn pacni siädsajni lo nisdoo, bidxejbreni, räjpreni:

—Colhuii te fantasmni —guredxa'reni sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús.

³⁰ Che bahuii Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, jgulää narä!

³¹ Lagajc dxejc gunaa Jesús naani, räjpni loj Pedr:

—Guxii rajplu yälirililajz. ¿Xhicuent guctio'p lajzlu?

³² Che huä'preni neñ barcw, guläzgjajc bej.

³³ Dxejcti renani sää neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

*Basiajc Jesús rebeñ racxhuu guedx Genesare't**(Mr: 6:53-56)*³⁴ Che gudejdreni lo nis, bidzujñreni nez lo reyuj xten Genesare't.³⁵ Che biembee rebeñ ro'cni, batie'chreni diidx guideb gabi lajdxreni. Dxejcti biädnäreni guiraa rebeñ racxhuu lojni.³⁶ Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.**15***Nani ruxhiñ bejn**(Mr: 7:1-23)*¹ Dxejcti gubig gaii rebejn nani ruluu leii näjza rebejn guidoo ni laa farisee. Siäädreni guedx Jerusalén, räjpreni loj Jesús:² —¿Xhicuent di rexpejnpaclu jiu xcostrumbr rebeñgool? ¿Xhicuent direni gusoob yälrdiib ñaareni che rajwreni?³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu.

⁴ Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.”⁵ Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.”⁶ Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu.⁷ ¡Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:⁸ Rebeñguejdxre con ro'reni rliä'preni xpala'nä niluxh lastooreni zijt suga' nez loä.⁹ Xlia'si rajñreni narä, sa'csi ruluiireni si'c xtidxä reyälñnibee xten rebeñ guedxliuj.¹⁰ Dxejcti gurejdxni rebejn, räjpni lojreni:

—Colcuadiajg, colyacbee.

¹¹ Nani riu' ro' bejn di guxhiñ bejnga, sanga nani rii ro' bejnga ni'cni ruxhiñ bejnga.¹² Dxejcti rexpejnpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani.

¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii canejz chää stee lotiä'p, guiro'preni sitejbreni neñ te gueed.¹⁵ Räjp Pedr loj Jesús:

—Basule' cuentre loonu.

¹⁶ Räjp Jesús:

—¿La näjza la'tu ditu gacbee, ä?

¹⁷ ¿La ditu gacbee guiraa ni rajw bejn ru' xque'ni, dxejcti che rdejdnii xque'ni, abigo'ñni?¹⁸ Niluxh diidx nani rii ro' bejn, neñ lastoo bejn riini; dee ni ruxhiñ bejn.¹⁹ Sa'csi neñ lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chää sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijl sa'ni.

²⁰ Laa sa' recosre ni ruxhin bejn. Che dini gusoob recostumbr xte yälrdiib naani, di ni'c guxhin bejn.

*Te gunazit nani huililajz xtidx Jesús
(Mr: 7:24-30)*

²¹ Biriiti Jesús ro'c, sääni nez región xten Tiro näjza Sidón.

²² Nejzga rbäjz te gunaa cananee, cabedxa'ni biädäni lo Jesús, räjpni:
—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädna^ubduxh rexpejⁿpacni lojni, räjpreni:
—Barilaagw gunaare, didi rbedxa'ni siädna^uljni luj.

²⁴ Dxejcti räjp Jesús lojni:
—Dios baxhal narä lojtis xpen Israel nani agunijt nen dojl.

²⁵ Dxejcti gubig gunaaga, bazuxhijbni nez loj Jesús, räjpni:
—Dad, gucnäj narä.

²⁶ Dxejc räjp Jesús lojni:
—Di gac hueen xca' bejn xcuxtiil rexi'nni gusälⁿnini lo rebä'cw.

²⁷ Dxejc räjp gunaaga lojni:
—Guliini Dad, näjza rebä'cw rajw te la' yätxtiil ni rtejb lo mex xten xpax-huaanni.

²⁸ Dxejcti räjp Jesús lojni:
—Nane', lacti guroob najc xcäl^rrililajzlu. Sugac si'cni r^lajzlu.
Lagajc dxejc biajc xindxa'pni.

Basiajc Jesús xhidäl beñ racxhuu

²⁹ Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni.

³⁰ Xhidajl bejn bidzujⁿ cad sobga'ni. Siädnäreni reben ni rajc ni'ni, reben ni najc lotiä'p, reben gop, reben ni xheti naani, näjza xhidälro beñ racxhuu, bidzunⁿäjrenini nez loj Jesús. Dxejcti basiajcnireni.

³¹ Ni'cni lacti bidxeloduxh reben xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpen Israel.

*Badeed Jesús xhi gudajw tajp mil bejn
(Mr: 8:1-10)*

³² Gurejdx Jesús rexpejⁿpacni räjpni lojreni:

—Riaä rebejnⁿre sa'csi agujc choñ dxej yunäjreni narä luxh xhet ca'direni gaureni. Di r^lazä guxhaläreni jüireni rolijzreni palga gajdreni gau didi guidxajgreni lo nezyuj.

³³ Dxejcti räjp rexpejⁿpacni lojni:
—¿Xho guidxälⁿu xhi gau reben xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn lo yuj.

³⁶ Dxejc cua' Jesús guigajdz yätxtiilga näjza rebäj^l, badeedni xquixtios lo Dios dxejc gula'ni reyätxtiilga näjza rebäj^lga badeednireni loj rexpejⁿpacni. Dxejcti laareni gudisreni yätxtiilga con rebäj^lga lo rebejn xhidajlga.

³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmⁿi.

³⁸ Renani gudajwga najc si'cti tajp mil bejn, niluxh xhet näjdi regunaa niclaza rebiuux bigab.

³⁹ Dxejcti basadiidx Jesús rebejn, biu'tini neñ barcw te gudejdni lo nisdoo nez región xten Magdala.

16

Rebeñ guidoo ni laa farisee näjza saducee rniabreni te milagwr si'c te seen
(Mr. 8:11-13; Lc. 12:54-56)

¹ Refarisee näjza resaducee bidzujñreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagusguesireni, sa'csi rlajzreni guiga' Jesús.

² Dxejc badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.”

³ Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseñ ni rien xhaguibaa, luxh ditu gumbee xhi säloj reseñ xcuent redxejre, nalajznu recos ni cayajc.

⁴ Rebeñ guijdxre, rebeñ gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejd rexpejñpacni stelaad nisdoo biäl-lajzreni ninäreni yätxtiil.

⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.”

⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¿Huinuxh najc xcälirililajztu!

⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii mil bejn, ä? ¿Bal dxijmni batie'tu, ä?

¹⁰ ¿La diza lajztu guizaj che gudisä gajdz yätxtiil gudajw tap mil bejn, ä? ¿Bal dxijmni batie'tu?

¹¹ ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

¹² Dxejcru gucbeerene dini niäjp: “Colnati levaduur xten yätxtiil.” Laani caniini: “Colnaáti yälrlului xten refarisee näjza resaducee.”

Bicäjp Pedr Jesús najc Cristpac

(Mr. 8:27-30; Lc. 9:18-21)

¹³ Che bidzujñ Jesús región xten Cesarea xten guedx Filipino, gunabdiidx Jesús loj rexpejñpacni, räjpni:

—¿Chu naj rebejn nacá narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacá?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejndi baluui dee lojlu, Xtradätis ni yu' xhaguibaa baluuiinini lojlu.

¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejlu guidxagsa'za renani rililajz xtidxä, niluxh che guetreni, direni nitloj.

¹⁹ Narä gunidxä yälrnibee lojlu te gulijdxlu rebejn nani ahuiililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn pacni laani najc Guejb Crist.

Gunii Jesús xho guetni

(Mr. 8:31-9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejn pacni, guniini lojreni xho nanabpac chääni guedx Jerusalén te ro'c tedni trabajwduxh ladzṇaa rebengool xten guidoo, ladzṇaa rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibaṇsacni lo rebengut.

²² Dxejcti huinä Pedr Jesús te laad, gusloj cadilnäjnini, räjpni:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpni lo Pedr:

—¡Gubicaj loä beṇdxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti räjp Jesús loj rexpejn pacni:

—Palga yu' chu tejtü rlanj guirinajl narä, sucuälazni lagajc laani, suguuni xcrujzni, nalajznu tedni trabajw, sujiädñajni narä.

²⁵ Sa'csi nani rlanj gunni gaan xcälñabajñni, sunijtnini. Luxh nani runijt xcälñabajñni por narä, sidxälñi xcälñabajñni par tejpas.

²⁶ Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni?

²⁷ Sa'csi narä Xi'n Dios ni gujc Niguii siälä lo yälrdimbicha' xten Xtradä con rexanglñi, dxejcti siguixä tebgaj bejn si'ctis ni gujc xtzuunni.

²⁸ Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcälñibeä.

17

Chuni'c najc guroob

(Mr. 9:2-13; Lc. 9:28-36)

¹ Che gudeed xho'p dxej, huinä Jesús Pedr, Jacobo, con Juan betz Jacobo, xtebreni huijreni jiaa yejc te dajn.

² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl.

³ Dxejc bahuigajcreni loj Moisés näjza loj Elías, cayujyreni diidx con Jesús.

⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rlanjzlu, sajc jiennu choṇ yuguijxh, tejni gac xten guejblu, steeni gac xten Moisés, steeni gac xten Elías.

⁵ Lañi canii Pedr, biäjt te za ni rdimbicha' guideb gabireni; neṇ zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶ Che biejn diajg rexpejn pac Jesús diidxga, bazuxhijbreni, basajbreni lojreni lo yuj, bidxebduxhreni.

⁷ Dxejcti gubig Jesús lojreni, batzuubni ṇaani yejcreni, räjpni:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäj dini.

⁹ Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibaṅsacä narä Xi'n Dios ni guj Niguui lo rebeṅgut.

¹⁰ Dxejcti gunabdiidx rexpejṅpacni lojni:

—¿Xhicuent rñii rebejṅ ni najṅ xleii Moisés ganid Elías nanab jiääd, ä?

¹¹ Badzu' Jesús diidxre, räjpni:

—Guliini siädxgaa Elías, laani gunsa'cni guira'ti,

¹² niluxh narä rniä lojtu, abiääd Elías, di rebejṅ nienbeeni, luxh bennäjrenini si'ctis ni rlajzreni, basacsíduxhrenini. Sigajcza gunnäjreni narä Xi'n Dios ni guj Niguui, susacsíduxhreni narä.

¹³ Dxejcti gucbee rexpejṅpacni caniini xcuent Juan Bautist.

Jesús basiajc te biuux ni guyu' xpej beṅdxab

(Mr. 9:14-29; Lc. 9:37-43)

¹⁴ Cheni bidzujṅreni cadre tre' xhidajl bejṅ, gubig te bejṅ lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguijdxgani, yu' huält rtejbni lo guiboo yu' huält rtejbni lo nis.

¹⁶ Biädnääni loj rexpejṅpacu, luxh di niajcdi nusiajcrenini.

¹⁷ Jesús badzu' diidxre lojreni räjpni:

—Beṅguijdx, bejṅ ni di chalilajz, ¿gucli yu'ä lojtu? ¿Cati gac gunä huant la'tu? ¡Coltanä biuuxga ree!

¹⁸ Dxejcti gudilṅ Jesús beṅdxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹ Dxejc guniṅ rexpejṅpacni Jesús te laad, gunabdiidxreni räjpreni:

—¿Xhicuent di niajcdi nibäänu beṅdxab neṅ lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rñiliä lojtu, paru najc yälṛililajz xtentu si'cti te bejdz muxhtas, sajc gäbtu loj dajṅ rec: “Gubicaj ro'c, gudejd stelaad”, luxh sibicaj dajnga. Palga rililajzfactu, xhetliidi yu' ni di gacdi guntu.

²¹ Niluxh sa' beṅdxabre, dini guirii palga ditu guiniabduxh lo Dios, gu-cua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²² Lalni sasajreni nez región xten Galilee, räjp Jesús:

—Suteedreni narä Xi'n Dios ni guj Niguui ladzṅaa rebeṅdojṅ te gusacsíreni narä.

²³ Niluxh sugu'treni narä, dxejc ni riojṅ dxej sibaṅsacä lo rebeṅgut.

Che biejn diajgreni diidxga, guc-huinuxh lajzreni.

Gudijxni impuest xten guidoo

²⁴ Che bidzujṅ Jesús näjza rexpejṅpacni guedx Capernaum, biääd rebejṅ ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr neṅ yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejṅ ni rnibee lo guedxliujre? ¿Chuni'c rguijx reimpuet, recuyo't? ¿Rebeṅ lajdxreni o rebeṅzijt?

²⁶ Badzu' Pedr diidxre räjpni:

—Rebeṅzijt.

Räjp Jesús:

—Ni'cni di rexi'nreni quiixni.

²⁷ Luxh te di guidxe'chreni, huij ro' nisdoo, bacuaa ansuel, gulää bäjl ni guiniazngaalu. Ro' bäjlga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcru lajdx Dios xhaguibaa?

(Mr. 9:33-37; Lc. 9:46-48)

¹ Laa dxejcnì gubig rexpejn̄pac Jesús lojni te gunabdiidxreni:

—¿Chuni'c sajcru lajdx Dios xhaguibaa?

² Dxejcti gurejdx Jesús te biuxbáz, bazujnini nez galäiireni,

³ dxejc räjpni:

—Rniliäpac lojtu, palga ditu gusiechljaztu, palga ditu gac nadolajz si'c te biuxbáz, ditu jiu' lajdx Dios xhaguibaa.

⁴ Ni'cni chutis bejn̄ nani gac nadolajz si'c biuxe're, laani gac ni sajcru lajdx Dios xhaguibaa.

⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezwg jiajbni nen̄ dojl

(Mr. 9:42-48; Lc. 17:1-2)

⁶ Räjpzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnni, chatejbni loj nisdoo, palga gunni jiajb tej reni'c lo dojl.

⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn̄ ni ruzobloj rehxigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ Palga ni'lu o ñaalu gun jiajbli lo dojl, batiu'ni. Hueenru jiu'lu lo xcäl̄nabajn̄ Dios nitiujnglu o ñatiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas.

⁹ Palga te balojlu rujn riajbli lo dojl, gulääni. Hueenru jiu'lu lo xcäl̄rnibee Dios najclu lotiä'p lacuaa chu guiro'p baloj chazäl̄reni luj lo balduxh ni rejc par tejpas.

Xcuent xiil ni gunijt

(Lc. 15:3-7)

¹⁰ Räjpza Jesús lojreni:

—Col̄natiro, andi cuälaztu rebejn̄ ni najc si'c biuxbázre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios.

¹¹ Sa'csi Xi'n Dios ni gujc Niguii biääd te guslaani rebejn̄ nani agunijt nen̄ dojl.

¹² Räjpzani:

—¿Xho rhuiitu? Palga rajp te bejn̄ te gayuu xiil, dxejc nit tejni, ¿laa dini gusaan stabitzubigaaga ni yu' nen̄ gurajl te chatiilni xile' ni gunijt, ä?

¹³ Luxh palga guidxäl̄ni xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiiil nani di ninijt.

¹⁴ Sigajcza Xtradnu ni yu' xhaguibaa di rlajz nit lo Dios nicla tej reni ahuililajz xtiidxni, ni najc si'c biuxbázre.

Xho gunnäjlu bejtzlu

(Lc. 17:3)

¹⁵ Räjpzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejn̄ni lojlu. Palga saru gucuadiajgni xtiidxlu, abiäj̄l lajztu.

¹⁶ Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnğa, te arajplu tio'p o chon testiigw.

¹⁷ Palga di bejtzlu gucuadiajg xtidx rebejnğa, luxh dizani jiu xtiidxreni, nen guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te benğuijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸ 'Ni'cni rniliäpac lojtu, guiraa yälguxhtis xten bejn ni di gusiechlajz xtojlrēni ni guntu lo guedxliuj, si'c jia'nni xhaguibaa; guiraa redojl nani gusiäjl lajztu lo guedxliuj sa'csi basiechlajz benđojlğa, si'cza jia'nni xhaguibaa.

¹⁹ 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni.

²⁰ Sa'csi cadrotis nadxagsa' tio'p o chon bejn sa'csi rinälajzreni narä, ana-suga'ä galäii rebejnğa.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjl lazä? ¿La sajl gajdzli huält, ä?

²² Badzu' Jesús diidxre lojni räjpni:

—Dina guiniä gajdztis huält, rniä gayonbidzuu huält, nalajznu si'ctiza huält basiäjl lajzlu.

Xcuent tio'p bejn ni nazäab meel

²³ 'Xcälrnibee Dios xhaguibaa najc si'c te rei ni rlajz gunni cuent lac nazäab rexmosni lojni.

²⁴ Agusloj cayujnni xcuentni chela bidzunnäjreni te mos ni nazäab balti mil lojni.

²⁵ Luxh mosre xhet rajpdini te quiixni rexti'nni, ni'c gunibee rei guido'ni si'c sclav, näjza chäälni, näjza rexi'nni, nägajcza guirali xhixtēni, te gaxh xti'nni.

²⁶ Dxejcti mosga bazuxhijbni loj xlamni, gunabduxhni lojni, räjpni: “Guläzsijc tiop-chon dxej, Dad, te gac quixä xti'nä.”

²⁷ Dxejcti lamğa balazlajzni xmosni, badzucajni guiraa ni nazäab mosga lojni, baslaanini.

²⁸ Cheni birii mosga rolijz xlamni, bidxaagni stee samosni ni nazäab bale'si beex lojni. Gunaaznini, baxhiya'ni yejnini, dxejc räjpni: “Gudijxga ni nazääblu loä.”

²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.”

³⁰ Luxh steega naaddini, alga huisäugacni samosni nen latzguuib te bejnni gaan gudijxni guiraa ni nazääbni.

³¹ Cheni bahuii sgaii mos xhini'c bejnini, gucnaduxhlajzreni, huiye'tzreni lo xlamreni xhi huiyejnini.

³² Dxejcti gurejdx xlamreni mosga, räjpni lojni: “¡Mos guijdx! Narä badzucä di'n ni nazääblu loä, sa'csi gunabduxhlu loä.

³³ Si'cza niunnäjlu sa'lu, nulazlajzluni sigajc ni balazlazälu.”

³⁴ Sas lacti bidxechduxh lamğa, gunibeeni biäuuni te gudijxni guiragajc ni nazääbni lo xlamni.

³⁵ Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiälajzpac guiraa redojl ni rujn resa'ni lojni.

19

Jesús ruluu xcuent yälruo'n sa'ni

(Mr. 10:1-12; Lc. 16:18)

¹ Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán.

² Xhidajl bejn birinajlni, ro'c basiajcní rebenracxhuu,

³ dxejc gubig refarisee lojni, rlanjzreni gusguesireni Jesús ni'c räjpreni lojni:
—¿La sajc guro'n te niguii cháälni che rlanjztisni, ä?

⁴ Badzu' Jesús diidxre lojreni, räjpni:

—¿La gajdtu gol lo reguijtz nani bacuaa to Moisés cadre caj xho benchee Dios bejn galooli: “Niguii näjza gunaa bencheenireni”?

⁵ Guniiza Moisés: “Ni'cni gusaan niguii xtadni con xnanni te xca'ni cháälni, dxejc dirureni gac tio'p, tejtis bejn najcreni.”

⁶ Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo cháälni te si'c gac guro'nni gunaaga, ä?

⁸ Räjp Jesús lojreni:

—Sa'csi najc lastootu si'c te guij, ni'c basaan to Moisés baro'n niguii cháälni, niluxh galodoo et si'cti gujcní.

⁹ Luxh rniä lojtu, niguii nani gusaan cháälni, luxh xhet dojl di bennäj cháälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n cháälhini, rujnza niguiiga dojl.

¹⁰ Dxejc räjp rexpejnpacni lojni:

—Palga si'c najc xcuent niguii con cháälni, hueenru na'c guchnaani.

¹¹ Jesús räjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee.

¹² Yu' xhicuent digacdi guchnaa niguii: yu'reni digacdi guchnaa sa'csi si'c gojlni; yu'reni digacdi guchnaa sa'csi baxhin sabejneni; yu'zarení digacdi guchnaareni sa'csi rlanjzreni gunreni xtzuantis Dios. Nani rajc racbeeni rediidxre, sugacbeenireni.

Biädnäreni rebiuux loj Jesús

(Mr. 10:13-16; Lc. 18:15-17)

¹³ Dxejcti biädnäreni rebiuxe' loj Jesús te gudzuubni naani yejcreni, guini-abni lo Dios xcuentre. Luxh rexpejnpacni gudilnä j rebejn ni siädnä rebiuxe'ga.

¹⁴ Dxejc räjp Jesús lojreni:

—Colgusaan guibig rebiuxe' loä, na'c gudxojtunreni, sa'csi xcälrnibee Dios xhaguibaa najc xten reni nadolajz si'c najc rebiuxe're.

¹⁵ Che gulujx badzuubni naani yejc rebiuxe', biunejzni ro'c.

Te ben ni rajp guninä j Jesús

(Mr. 10:17-31; Lc. 18:18-30)

¹⁶ Dxejc biäd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yäl nabajn lo Dios par tejpas?

¹⁷ Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlanjzlu xca'lu yäl nabajn lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjlū bejn nani di gac chäällu, na'c cuanlu, na'c guiliäslu didxxhii xcuent bejn.

¹⁹ Bazoob xtidx xtadlu con xnanlu, huinälajz sa'lu si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

²¹ Dxejc räjp Jesús lojni:

—Palga rlajzlu gaclu beṅsa'c lo Dios, huij, bato' guiraa ni rajplu, dxejc gudisni lo rebeṅproob, dxejc xhaguibaa sapduxhlu xhixtenlu. Dxejcti gudaä te jiädnaṅllu narä.

²² Cheni biejn diajg bi'nga rediidxre, guc-huinuxh lajzni sa'csi rajpni xhidalduxh xhixtenni.

²³ Sas Jesús räjp loj rexpejṅpacni:

—Rniliäpac lojtu, naganduxh jiu' te beṅ rajp loj xcälṅnibee Dios.

²⁴ Rnisacä lojtu, guyasiru ted te cameii neṅ baloj te guux; naganduxhru jiu' te bejn ni rajp lo xcälṅnibee Dios.

²⁵ Che biejn diajg rexpejṅpacni rediidxre, bidxeloduxhrene, dxejc canabdiidx loj sa'reni:

—¿Chuni'c sajc jiu' lo xcälṅnibee Dios?

²⁶ Dxejc bahuidzu'tz Jesús lojrene, räjpni:

—Naganduxh gun rebejṅ dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸ Jesús räjp lojrene:

—Rniliäpac lojtu, la'tu ni biädnaṅlū narä, che guscobä guiraa recos cheni cueä narä, Xi'n Dios ni gujc Niguui, lo yagxhil cadro guinibeä lo guiraa rebeṅ guedxliuj, la'tu ni siädnaṅlū narä sibejzatu lo tzubitio'p yagxhil te guinibeetu loj guitzubitio'p guejdx xten rexpejṅ Israel.

²⁹ Luxh guiraa rebejṅ ni basa'n rolijzni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnaṅlni narä, rebejṅga sajp te gayuu huält locni gojpni, nägajc ga'preni xcälṅnabajṅ Dios par tejpas.

³⁰ Rebejṅ nani rchalo najcreni beṅroru lo sa'reni nez loj Dios, reni'c gac bejn ni guxii sajc nez loj Dios. Rebejṅ nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räjzani:

—Xcälṅnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub.

² Che bidxälni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhaṅnireni loj xyujni sayujnreni dzuun.

³ Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guii.

⁴ Räjpni lojrene: “Näjza la'tu colchayujn dzuun lo xyuä. Narä siguixä si'cni riäjṅ xca'tu.” Sä'ti rebejṅga lo dzuun.

⁵ Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejṅga.

⁶ Dxejc si'cti rcagaii birisacni, huijni lo guii. Ro'c bidxälni sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?”

⁷ Dxejc räjpreni lojni: “Sa'csi rut siädtiildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.”

⁸ Che biu' guxhijñ, räjp lam lo mos ni rnibee remos: “Gurejdx remos te quiixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.”

⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujñ dzuun guideb dxej.

¹⁰ Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni.

¹¹ Che cua'reni xcuentreni gusloj cadxe'chreni lo baxhuaan xten dzuunga.

¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yälñanlaa.”

¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej?”

¹⁴ Huij, cua' xmeellu. Narä rlazä quixä bejnre ni biu' lult sigajc ni gudixä lojlu.

¹⁵ ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?”

¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguui, siabä ladzñaa reni rnibee lo rebixhojz, näjza lo rebejn ni najñ lei. Laareni sinibeereni guetä.

¹⁹ Suteedreni narä ladzñaa rebenzijt te cubeereni narä quiinreni narä, dxejc gucuaareni narä lo cruzj. Luxh ni riojn dxej, sibansacä loj rebengut.

Ni gunab xnan Jacobo näjza Juan

(Mr. 10:35-45)

²⁰ Dxejcti gubig xnan Jacobo näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

²¹ Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lu lo xcälñrñibeelu, gunibelaa cue tej rexi'nä xladbeelu, steeni cue xladbäjägwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yälñsacsí sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälñsacsí. Et narädi cueä reni cue xladbägwä o xladbeä. Xtadä ni yu' xhaguibaa alaguleni rebejnğa.

²⁴ Che biejn diajg stzuu rexpejn_{pac} Jesús, bidxe'chreni loj guiro'p rexi'n nane'ga.

²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejn_{ga} si'c xlamreni. Luxh reni najc rebenro lojreni runnäjreni rebejn_{ga} si'ctis ni rlanjreni.

²⁶ Et si'cni gunditu la'tu loj rebejn. Chutis rlanj gac benro lojtu, nanab gunni dzuun gacnäjni guiraliitu si'c te mos.

²⁷ Luxh chutis tejt_u ni rlanj guiliä'p xpala'nni, nanab gacni si'c xmos lo guiraliitu.

²⁸ Sigajcza biääd Xi'n Dios ni gujc Niguui. Dini niniab mos chu lojni, alga laani najc xmos bejn, badeedzani lagajc yäl_{nabajn} xtenni te gudixni baslaani xhidal bejn ni yu' lo dojl.

Jesús rusajc tio'p lotiä'p

(Mr. 10:46-52; Lc. 18:35-43)

²⁹ Che gojl guiriireni guedx Jericó, xhidalduxh bejn sanajlni.

³⁰ Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilnä_j rebejnreni, te gusäuren_i ro'reni. Luxh laaren_i dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlanjtu gunä?

³³ Räjpreni lojni:

—Dad, rlaaznu guixal balojnu te gac finu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹ Cheni Siäddz_{ungajxh}reni guedx Jerusalén, bidzuj_nreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejn_{pac}ni,

² räjpni lojreni:

—Colchäj loj guedxbäzre ni tre' nez lojtu. Ro'c guidxä_{ltu} te burgunaa caduu näjza teburhuin. Colguxhecni, coltanäni loä.

³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

⁴ Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Sión,

bahuii xreiilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

⁶ Dxejcti huij rexpejn_{pac}ni, bejnreni si'c gunibee Jesús gunreni.

⁷ Biädnäreni burga näjza burbäz xi'nni. Gudixh_{reni} xhajbreni detz burbäzga, dxejc gubijb Jesús burbäzga.

⁸ Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixh_{reni} rebalajg lo nez yuj cadre ted Jesús.

⁹ Rebejn ni nijd, näjza reni siääd dejtzn_i gusloj cabedxa'reni, räjpreni:

—¡Xchej guibajn Xi'n toDavid! ¡Chicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹ Yu'zareni räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús nen guidoro xten Dios, gulääni guiraa rebejn ni caguto' näjza rebejn ni casii. Barexhättni remex xten reni ruchaa meel xten rebejn, näjza reyagxhil xten reni ruto' repalom.

¹³ Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbejdx, yälrniab loj Dios.” Niluxh la'tu abejntuni xpiliää gubaan.

¹⁴ Lagajc nen guidooga, gubig loj Jesús gaii bejn ni di fi näjza gaii bejn ni rsiacoj, luxh basiajcnireni.

¹⁵ Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebiuxe' caniireni: “Rliä'pnu xpala'nlu Xi'n toreii David”, bidxe'ch rebixhojzga.

¹⁶ Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goļ lo reguijtz ni bacuaa te dade' ni gunii xtidx Dios? Ro'c caj xcuent redee, cadre caj rediidxre:

Abejnlu goļ rebiuux näjza rebäznite' dij ni rliäpsa'cpac xpala'n Dios.

¹⁷ Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Laļ ni sääni, gusloj calaanni.

¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—¡Nuncru xcaj nicla tej ninejxh lojlu!

Dxejcti gubidzgajc yajgga.

²⁰ Cheni bahuii rexpejn pacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliäpac lojtu, palga chalilajzfactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni.

²² Guiraa ni guiniabtu loj Dios, palga chalilajzfactu, suniidxnini.

Xcälrnibee Jesús

(Mr. 11:27-33; Lc. 20:1-8)

²³ Dxejcti biu' Jesús nen guidoro, dxejc laļ ni caguluiini rebejn gubig reni rnibee loj rebixhojz näjza rebengool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre.

²⁵ ¿Chuni'c gunibee gutiobnis Juan ni rutiobnis? ¿La Dios o la beñ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni?

²⁶ Palga jie'tznu beñ guedxliuj gunibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidx Dios.

²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.”

²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtdadni.

³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij.

³¹ Loj guiro'preni, ¿chuni'c bejn si'cni rlazj xtdadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios,

³² sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ '¡Colcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcnä te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro.

³⁴ Che agojl guire' cose'ch baxhaļ baxhuaanga gaii xmosni loj xyujni te chaxiireni cose'ch ni riäjl xca' baxhuaanga.

³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni.

³⁶ Dxejc baxhaļsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ Dxejcti bejn baxhuaanga xhigab: “Maazru huen guxhaļä xi'nä; sucuadi-ajgrureni xtiidxni.”

³⁸ Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'o guigu'tnuni te jiannänu yujre.”

³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiääd baxhuaan xten yujga, ¿xhi gunnäjni rebejn nani biannäj xyujni?

⁴¹ Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gal guire' cose'chga.

⁴² Dxejcti räjp Jesús lojreni:

—¿La gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijsa gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejn.

⁴³ 'Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riäjł xca' xcälrnibee Dios, nalajznu renani chalilajzpac xtiidxni.

⁴⁴ Luxh xcuent guijsa: nani jiajb lo guijsa, silia'ni, per nani guitejb guijsa yejcnı, li siujynı, gacni däj.

⁴⁵ Che biejn diajg reni rnibee lo rebixhojz näjza refarisee recuent ni canii Jesús, gubeerenı cagusä'tni lagajc laareni.

⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yälruchnaa

¹ Guslosac canii Jesús lojreni con recuent, räjpni:

² —Xcälrnibee Dios najc si'c te reiı ni bejn te sa' te guchnaa xi'nni.

³ Baxhalni rexmosni te saxiireni regolnejdx chäärenı sa', niluxh rebejnre di rlajzdireni.

⁴ Dxejc baxhalsacni rexmosni, räjpni: “Colye'tz loj reni abidon, agujc comiid. ;Abagutä balti gonsa'c, gonguro'! Anacchee guira'ti yälrajw. Coltaa.”

⁵ Niluxh reni abidonğa di niu xtiidxreni. Tejıni sahuıi rexyujni, steeni sää lo rexnegosni,

⁶ dxejcti sgaiı reni nıajc biooz gunaazreni rexmos reiı, basacsıreni remosga, sas bagu'trenini.

⁷ Che biejn diajg reiıga, bidxe'chduxhni, baxhalni rexsoldaadni te sagu'treni guiraa rebenguijdxga, te saze'czarenı guejdx cadro rbäjzreni.

⁸ Dxejcti räjpni loj rexmosni: “Guiraa dee anacchee, di nungäjł jıäädru reni abidon.

⁹ Colchäj, pues, lo resquiin lo nezyuj, colcuejdx chutis bejn ni guidxaagtistu.”

¹⁰ Birii rexmosni, säärenı lo nezyuj. Dxejc bachagsa'reni guiraatis bejn ni bidxaagrenı, renı najc benguijdx sigajc renı najc benhueen te gudxaj rolıjz reiıga.

¹¹ 'Dxejc biu' reiı biädhuıini loj rebiooz. Bahuiıini loj te bejn ni sobga' ro'c, luxh xhet xhablanıjdini najcwnı.

¹² Dxejc räjp reiı lojıni: “Xamıgwä, ¿xho bejnlu biu'lu ree luxh xhet xhablanıjdılu najcwlu?” Dxitıs sobga' bejnğa, xhet rniıdini.

¹³ Dxejc räjp reiı loj rexmosni: “Colguliıb ni'ni näjza naani, colsälıni detzyu' cadro nacäjy te ro'c gonduxhni chubejlı reläjynı.”

¹⁴ Sa'csi xhidajł najc renı bidon luxh guxii najc renı bıbee.

La sajc quıixni impuest

(Mr. 12:13-17; Lc. 20:20-26)

¹⁵ Dxejcti sıi refarisee, bıa'nrenı diıdx siguiılrenı xho gunıjıt Jesús te diıdx te guıga'ni.

¹⁶ Ni'c baxhalrenı gaiı xpejnrenı näjza gaiı bejn ni nadxaag Herodes te räjprenı loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rni rebejn, sa'csi dilu cue bejn ni sajcro lo stee bejn.

¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni neñ lastooreni, dxejc räjpni lojreni:

—¡Benguijdx! ¿Xhicuent rlanjtu guquiiltu narä?

¹⁹ Colguluii te meel loä.

Dxejc badeedreni te meel ni laa denario.

²⁰ Che bahuii Jesús loj meelga, gunabdiidxn ni lojreni, räjpni:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäj l xca' César, colgudeedza lo Dios ni riäj l xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibañsac rebejn

(Mr. 12:18-27; Lc. 20:27-40)

²³ Lagajc dxejga bidzujñ gatii reni laa saducee, reni di chalilajz sibañsac bejn loj rebengut. Gubigreni loj Jesús, gunabdiidxreni,

²⁴ räjpreni:

—Mastr, si'c naj toMoisés, palga yu' te bejn ni abachña, luxh ruti xi'nni che guetni, riäj l guchña bejtzni biuudga te chu xi'nreni xcuent bejtzni.

²⁵ Mbaj. Loonu yu' gajdz niguii ni najc bejtz sa'reni. Betzgoolga bachña, dxejc gujtni, luxh di xi'nni niu'. Basa'nni chääl ni lo bejtzni.

²⁶ Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga.

²⁷ Sas che gujt guiraareni, näjza gunaaga gujt.

²⁸ Che guibañsac rebejnga lo rebengut, ¿chu tej lo rebejtzga gac chäälpac gunaaga, ni guiraareni bachñaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälrnibee Dios.

³⁰ Ni che guibajn rebengut, diru yäl'ruchña chu, diruza bejn gudeed rexindxa'preni guchña. Dxejc sajcreni si'c rexangl Dios ni yu' xhaguibaa.

³¹ Dxejc xcuent yäl'rbañsac loj rebengut, ¿la gajdtu gol reguijtz ni bacuaa toMoisés che räjp Dios xcuent retoxtadgoldoonu:

³² “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios bengut, Xtiois rebejn ni nabajn najcni.

³³ Che biejn diajg rebejn xtidx Jesús, bidxeloduxhreni diidx ni ruluiini.

Diidx ni maazru sajc

(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx.

³⁵ Dxejc tejreni nani najn leii, rlanjzn guquiilni Jesús ni'c gunabdiidxn ni lojni räjpni:

³⁶ —Mastr, ¿xhi diidx ni gunibee Dios sajcro lojreni caj lo leii?

³⁷ Räjp Jesús lojreni:

—Nani rni scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.”

³⁸ Diidxre ni gunibee Dios najc ni sajcro, luxh ganidni siädni loj rextidx Dios.

³⁹ Ni ro'pga sigajcza najcni: "Huinälajz resa'lu sigajc ni sanälajzlu lagajc luj."

⁴⁰ Guiro'p remandamientre nanab te guzoob bejn guiraa rediidx ni bacuaa to Moisés näjza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lałni tre' refarisee, gunabdiidx Jesús lojreni, räjpni:

⁴² —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg to David.

⁴³ Räjp Jesús lojreni:

—¿Xhicuent räjp David "Xtadä" lojni che basanij Sprit Dxaan xten Dios lastooni? Ni'c bacuaa to David rediidxre:

⁴⁴ Dad Dios räjp lo Xtadä,

gurej xladbeä lał ni gudzugä guiraa reni rdxe'ch lojlu ladzni'lu.

⁴⁵ Palga lagajc David rnii: "Dad" lojni, ¿xho mood najcni xi'nni?

⁴⁶ Dxejc rut gujcdi badzu' nicla te diidx lojni, luxh dxejliga rutru gojpdix xhi diidx niniabdiidxrureni lojni.

23

Rucuaquij Jesús refarisee näjza rebejn nani najn leii

(Mr. 12:38-40; Lc. 11:37-54; 20:45-47)

¹ Dxejc räjp Jesús loj rebejn xhidaalga näjza loj rexpejn pacni:

² —Rebejn ni najn leii näjza refarisee rajp yäl najn te gusule' reni xleii Moisés.

³ Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu.

⁴ Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni.

⁵ Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsreni näjza roxhajgwreni recaje' cadre yu' tla' guijtz ni caj xtidx Dios lojni. Rustioolzarenini xi' xhajbreni.

⁶ Rlajzreni ganidreni tedreni lo mex che gal te lanij; rlajzreni cuereni lo rebancw ni suga' delant nejn reguidobäz.

⁷ Sigajcza rlajzreni guchagro' bejn naareni nez lo guii, guiniiza rebejn "Mastr" lojreni.

⁸ Na'c gusaantu guinii rebejn "Mastr" lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu.

⁹ Na'c guiniitu "Xtadä" loj te bejn guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa.

¹⁰ Na'cza gusaantu guiniireni lojtu "Mastr" sa'csi yu' tejtis Mastr, ni'c najc Crist.

¹¹ Ni yu' si'c mos lojtu ni'c najc bejnroru loj resa'ni.

¹² Sa'csi chutis ni rchaloni najcni bejnro lo sa'ni, ni'c sustuiyä lojni, chutis ni najc nadolajz loj Dios, ni'c sunäni bejnro lo sa'ni.

¹³ 'jProobzatu remastr xten leii näjzatu refarisee, najctu bejn guijdx! Sa'csi rudxojujntu jiu' rebejn loj xcälrnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

14 'iProobzatu remastr xten leii näjzatu refarisee, najctu beṅguijdx! Sa'csi rudzucajtu rolijz renanbiuud laṣi cabedx canabduxhtu lo Dios, naatu gusgueetu bejṅ si'c. Sa'csi rujntu scree, siabduxh fis xten Dios yejctu.

15 'iProobzatu remastr xten leii näjzatu refarisee, najctu beṅguijdx! Zijt rijtu lo renezyuj näjza lo nisdoo te guntu gaan guchaa mase tejtis bejṅ xmoodni te ganni Dios si'c rajṅtuni. Luxh che ahuililajz bejṅga xtiidxtu, rujntuni tio'p huält maazru te xi'n gabijl loj ni najctu.

16 'iProobzatu, najctu si'c lotiä'p, rļajztu guluiitu nezyuj! La'tu ni rnii palga te bejṅ guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' neṅ guidoo, dxejc sii rniliini dxejc nungäjl guzoobni xtiidxni.

17 iBeṅ nayääl, beṅlotiä'p! ¿Xhini'c sajcrū? ¿La oor la guidoro ni rundxan oorga?

18 Rniizatu: “Palga te bejṅ guiniliipacni guzä'tni lo bacuug ni yu' neṅ guidoro, di xcuentdi xtiidxni. Luxh palga yu' chu guiniliipac guzä'tni gojṅ ni dzuub lo bacuug, dxejc sii rniliipacni dxejc nungäjl gusoobni xtiidxni.”

19 iBeṅ nayääl, beṅ lotiä'p! ¿Xhini'c sajcrū? ¿La gojṅ o la bacuug nani rundxan gojṅga, ä?

20 Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni.

21 Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza neṅ guidoro ruzä'tni.

22 Sigajcza ni ruzä't guibaa che rniliipacni caguzä'tzani yagxhilo xten Dios näjza lagajc Dios ni sobga' ro'c.

23 'iProobzatu remastr xten leii näjzatu refarisee, najctu beṅguijdx! Bedzxtiil, anis näjza comiṅ ni rajptu, rudeedu lo Dios tej tantga yejc cade te tzuu, niluxh ditu jiu ni sajcrū lo xtidx Dios, cadre caj xcuent yälṅabanya, yälṅulazlajz, näjza yälṅililajz. Deeza ni riäjlpac guntu laṣi ni cayujnzatu steega.

24 iLa'tu, lotiä'p ni rļajz guluii nezyuj! Riutu rediidx ni guxii sajcdi, niluxh rediidx ni sacduxh ditu jiuni, najctu si'c bejṅ ni rbää te rex lo xpla'tni dxejcrū rājṅni te cameii.

25 'iProobzatu remastr xten leii näjzatu refarisee, najctu beṅguijdx! Rusiatu detz bas näjza pla't luxh neṅni najc-dxuudx. Sigajcza la'tu riuduxhtu recos-tumbr, luxh lastootu guidxa yälṅubaan näjza yälṅrdxe'chlajz.

26 Farisee ni najc lotiä'p: gudibxgaa neṅ bas näjza neṅ pla't, dxejc näj dejtzni sajcdi naya.

27 'iProobzatu remastr xten leii näjzatu refarisee, najctu beṅguijdx!, sa'csi najctu si'c rebaa ni nacchesa'c; nolbājreni, saru rļuiini, luxh neṅreni guidxa dzujt xte beṅgut näjza bäljudx.

28 Sigajcza najctu la'tu. Saru rujṅ lojtu, rchalo rebejṅ najctu beṅsa'c, niluxh lastootu guidxa yälṅrusguee näjza yälṅguyalajz.

29 'iProobzatu remastr xten leii näjza refarisee, najctu beṅguijdx! Runcheetu xpaä redade' ni gunii xtidx Dios galoo, rusucheezatu ro' xpaä rebejṅ ni gujc beṅsa'c,

30 dxejc rniitu: “Paru nibajṅnu neṅ redxej ni gubajṅ retoxtadgoldoonu dinu niacnäj reni bagu't redade' ni gunii xtidx Dios.”

31 Lagajc con rediidxre rcājptu najctu rexajg renani bagu't redade' nani gunii xtidx Dios.

32 iColṅuscuääz guntu sa' recos ni guläxtiej retoxtadgoldootu!

33 'iLa'tu ni najc si'c bäl, la'tu ni najc si'c te bitiäz guidxa bälṅialajz! ¿Xho guntu te na'c chäätu gabijl par tejpas?

³⁴ Ni'cni, guxhalä rexpenä ni guinii xtidxä, näjza beñnajn, näjza mastr. Luxh yu'reni sugu'ttu sucuaatureni lo cruzj; yu'zareni siguijntu neñ reguidobäz, sirinajltureni guejdx por guejdx.

³⁵ Si'cza yejctu jiajb xtiejn guiraa rebeñnadolajz ni bagu't bejn xchejli to Abel ni gujc nadolajz, xchejliza Zacarías, xi'n Berequías, ni bagu'ttu neñ guidoro gajxh lo bacuug.

³⁶ Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Räjpa Jesús:

—¡Jerusalén, Jerusalén! Xpejnlu rugu't redade' ni rnii xtidx Dios, ru-cuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni neñ xhigani, per ditu nicäjb!

³⁸ Colhuii xho jianxteb xquidootu cuälazrenini.

³⁹ Rnixgaä lojtu, naj dirutu fii loä, dxejli che guiniitu: “Benle' Dios nani siääd xcuentni.”

24

Jesús räjp sibijl guidoro

(Mr. 13:1-2; Lc. 21:5-6)

¹ Birii Jesús neñ guidoro te asiini, dxejc gubig rexpejn pacni lojni, gusloj caguluiireni reyuduxhga lojni.

² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

Cos ni guluijoj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejn pacni lojni te xhiga'tz gunabdiidxreni lojni:

—Rlaaznu guiniilu loonu gac gac guiraa recosre. ¿Xhi seen guluijoj ameer jiäädlu näjza che ameer nitloj guedxliuj?

⁴ Dxejc räjp Jesús lojreni:

—¡Colnatiro te rut gusguedi la'tu!

⁵ Sa'csi su' xhidajl reni jiääd, naareni: “Narä nacä Crist”, luxh susgueereni xhidajl bejn.

⁶ Siejn diajgtu xcuent cadre cayajc guer, näjza xcuent cadre rlazj chu guer, na'c guidxejbtu sa'csi si'c nungäjl gac, niluxh gajd galädi nitloj guedxliuj.

⁷ Sa'csi siäjs te nación sidilnäjni stee nación; te yälrnibee sujn guer con stee yälrnibee, luxh su' gubijn, su' yälguijdx, su'za xuduxh xhidajl lajt.

⁸ Luxh guiraa redee cuäxtiejtis retrabajwduxh ni churu chu.

⁹ Dxejc guteedreni la'tu ladznaa rebeñdojl te gusacsíreni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä.

¹⁰ Neñ redxejga, xhidajlreni sibälaz xcälirililajzreni, sidxe'ch lo sa'reni, suto' sa'reni lo sa'reni.

¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn.

¹² Sa'csi lacti suduxh yälätsiaj lo guedxliuj, diru bejn chanälajz sa'ni.

¹³ Dxejcti bejn ni chasanäj xnezyujtis Dios, ni'c sun gaan xca'ni yäl nabajn par tejpas.

14 Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jiääd fis xten Dios.

15 'Cheni fiitu asobga' te beḡguidxduxh neḡ yu' ni najc dxan neḡ guidoro, si'cni gunixgaa toDaniel ni gunii xtidx Dios gacni, beḡ ni goḡ dee sugacbeeni nani roḡni,

16 dxejc renani rbäjz lo guedx Judea, suguxuḡreni gucuatzlojreni neḡ dajn.

17 Beḡ ni niä'p yejc xyu'ni dxejga di galḡdi jiäjtni te chalääni xhixtenni neḡ xyu'ni;

18 beḡ nani cayujn dzuun lo niaa, na'c guibi'ni niclaza chaxhiini xhajbni.

19 ;Proobza regunaa ni nuxi'n, näjza reni cagusiä' báz neḡ redxejga!

20 Coḡnabduxh loj Dios xhet neḡdi redxej ni cayacnalduxhdi nanab guxuḡditu, niclaza dxej che rusilajz beḡ.

21 Sa'csi su' trabajwduxh neḡ redxejga, sa' ni gajd beḡ fii dxejli ni guzobloj guedxliuj, luxh che tedni, diru guibi' chuni.

22 Luxh palga di Dios gutiu' yejc redxejga, nicla tej beḡ di laa. Luxh suti' Dios yejc redxejga sa'csi rinälajzni reni aguleni.

23 'Neḡ redxejga palga yu' chu naa lojtu: “Coḡhuii, aree Crist”, o “Coḡhuii ani arec”, na'c chalilajztuni.

24 Siääd xhidajl niguii ni rusguee, gäbreni najcreni crist; sidzujnza rebeḡni ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueereni, susgueduxhreni rebeḡni, niluxh rlajzreni gusguezareni rebeḡni ni agule Dios, ni rililajz xtiidxni.

25 Agunixgää lojtu xhini'c gac.

26 Ni'cni palga naareni lojtu: “Bahuii, a crist yu' nez lo reyubijdz”, na'c cháätu; o palga naareni: “A crist suga' neḡ yu're”, na'c chalilajztuni.

27 Sa'csi si'cni guideb xhaguibaa rien che rdinya' ladjiaa näjza ladjiaätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj.

28 Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguii

(Mr. 13:24-37; Lc. 21:25-33; 17:26-30, 34-36)

29 Räjpzani:

—Cuantsi ted guiraa retrabajwduxh, sicäy lo gubijdx, diruza bäii gusani, sitejba rebajl ni yu' xhaguibaa, sinibduxhza guideb xhaguibaa.

30 Dxejti suhuiireni xhaguibaa seen xten Xi'n Dios ni gujc Niguii, luxh guiraa rebeḡni ni rbäjz neḡ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yäḡrnibee näjza yäḡrdimbichaduxh.

31 Dxejc suxhalni rexangl ni con te trompet ni guscuedxa'reni dipduxh te guire' guiraa rebeḡni ni aguleni lo guidaḡp lajd squiin guedxliuj, guideb lo guedxliuj näjza xhaguibaa.

32 ;Coḡguisieed ni ruluii yajg iigw! Che naren reḡaani che cabääni be'n, asiääd bäi curex,

33 sigajcza cheni fiitu cayajc guiraa recosre, sacbeetu asiädgajxh fis, rolä'li abidzujnni.

34 Rniliäpac lojtu, guiraa redee sajclal ni nabajḡ gaii rebeḡni ni suga' ree naj.

35 Guibaa näjza guedxliuj sinitloj, niluxh xtidxä di nitloj.

36 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

37 'Sigajcni gujc neḡ redxej che gubajḡ toNoé, si'cza gac che jiälä Xi'n Dios ni gujc Niguii.

³⁸ Neñ redxe galoo, cheni gajd nisguiduxhga jiajb, rebejn ni nabajn dxejc cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé neñ barcwro.

³⁹ Direni niacbee xtiidxni; cheni biädli nisguiduxh ni sanä guiraareni dxejcru gubeereni. Sigajcza gacni che jiälsacä narä Xi'n Dios ni gujc Niguii.

⁴⁰ Neñ redxejga palga cayujn tio'p bejn dzuun lo niaa tejni guibee, steeni sia'n.

⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni col̄susin, sa'csi ditu gan xhi dxej jiäd Dad xtentu.

⁴³ Col̄ganchee, paru niacbee baxhuaan xten yu' cor̄ yääl niäd gubaan ni siädlan rolijzni, nisiusin̄ni dxejc, dini nusaan niu'ni rolijzni te cuanni.

⁴⁴ Ni'cni col̄susin̄za la'tu, sa'csi siäd Xi'n Dios ni gujc Niguii lagajc or̄ ni ditu gun xhigab jiädni.

Xcuent te mossa'c näjza te mosguijdx

(Lc. 12:41-48)

⁴⁵ '¿Chuni'c najc mossa'c ni ruzoob diidx, ni basannäj xlam̄ni rebejn ni yu' rolijzni te gudeedni xhi gaureni ä?

⁴⁶ Chicbaa mos ni saru cayujn xtzuunni che guidzujn xlam̄ni.

⁴⁷ Rniliäpac lojtu, lam̄ga susa'nni sa' mosga te fini guiraa xhixtenni.

⁴⁸ Dxejc palga mosga di gusoob xtidx xlam̄ni, gunni xhigab: “Sacladuxh guibi' xlam̄ä”,

⁴⁹ dxejc guisloj cagusacsíni resamosni, guislojni gaunäjni, yänäjni rebengu.

⁵⁰ Dxejc sidzujn xlam̄ni dxej che dini gun xhigab jiädni, luxh or̄ ni dini gan guidzujni.

⁵¹ Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

25

Xcuent tzuu gunaa

¹ Räjpa Jesús:

—Pues xcäl̄rnibee Dios najc si'c tzuu gunadxa'p nani cua' xcandilse'treni te huijreni te sa'.

² Gaii regunaaga nasin, sgaiireni nayääl.

³ Reni nayäälga sanäreni xcandilreni, niluxh direni nica' sijn se't.

⁴ Niluxh reni nasinga sanäreni sijn se't te guze'creni neñ xcandilreni.

⁵ Sa'csi bi'nga di nidzujgaj, gunaa bacal̄ regunadxa'p̄ga, gudiejstireni.

⁶ Dxejc si'cti garol yääl, biejn te xse' ni räjpa: “Bi'n asiäd, col̄chäj, col̄chachaglojni.”

⁷ Guiraa regunaare huistieguxun̄reni, dxejc bensa'creni xcandilreni, te cuaguijreni.

⁸ Dxejc guigaii regunayääl räjpreni loj reni nasin: “Col̄gunidxlaa te bo'c se't gusanijnu xcandilnu, sa'csi arlajzni jiuini.”

⁹ Dxejcti regunanasin räjpa lojreni: “Digacdini, dxejc dini gal̄ nicla par nuurnu nicla par la'tu. Col̄chäj cadre ruto'reni se't col̄chazii xse'ttu.”

¹⁰ Lalni sasi guigaii regunaa-nayäälga se't, bidzujn bi'n. Regunaa-sin ni cabäj bi'n biunäjrenini lo sa', biäuuti ro lä'.

¹¹ Cheni bidzujn regunanayäälga, räjpreni: “Dad, Dad, baxhal ro lä'.”

¹² Dxejc räjpni lojreni: “Rniliäpac lojtu, dina gumbeätu.”

¹³ Dxejc Jesús räjpa lojreni:

—Col̄susin̄za, sa'csi ditu gan nicla xhi dxej nicla xhi or̄ siäd Xi'n Dios ni gujc Niguii.

Xcuent lam ni badeed meel

¹⁴ 'Xcäl̄r̄nibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

¹⁵ 'Lo tejni badeedni si'cti gaii mīl meel, lo steeni badeedni si'cti tio'p mīl, dxejc steeni cua' te mīl. Loj tejgani badeedni si'cti ni rujnni xhigab sajc gunnäjreni dzuun, dxejcti biriini xpiajni.

¹⁶ Ni cua' gaii mīl meel bejn te dzunro, bejnna gaan sgaii mīl meel.

¹⁷ Sigajcza ni cua' tio'p mīl meel, bejnna gaan stio'p mīl.

¹⁸ Dxejcti ni cua' te mīl meel, huicua'tzni xmeel xlam̄ni neñ te gueed ni gudäänni lo yuj.

¹⁹ 'Gudejdti balti bäii, dxejc gubi' xlam̄ remosga, bejnna cuent loj guiraareni.

²⁰ Che bidzujñ ni cua' gaii mīl meel, bidzunnäjni sgaii mīl meel ni bejnna gaan, räjpni loj xlam̄ni: "Dad, baniidx guejblu gaii mīl loä. Aree sgaii mīl meel ni benä gaan."

²¹ Räjp xlam̄ni lojni dxejc: "Hueenca, mos hueen najclu, rusoobzalu xtidxä. Sa'csi gujclu beñsa'c con te cos báz, ñaj sunidxä guinibeelu xhiroobru. Biu' loä, bibalaznäj narä."

²² Che bidzujñni ni cua' tio'p mīl meelga, räjpni loj xlam̄ni: "Baniidx guejblu tio'p mīl meel loä, aree stio'p mīl meel ni benä gaan."

²³ Räjp xlam̄ni lojni: "Mbaj. Mos hueen najclu rusoobzalu diidx. Sa'csi gujclu beñsa'c con te cosbáz, ñaj sunidxä guinibeelu xhiroobru. Biu' loä, bibalaznäj narä."

²⁴ Che bidzujñ mos ni cua' te mīl meel, räjpni lo xlam̄ni: "Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij.

²⁵ Ni'cni bidxebä, huicua'tzä xmeellu neñ yuj. Niluxh axh aree xmeellu."

²⁶ Dxejc räjp xlam̄ni lojni: "¡Mos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij.

²⁷ Riäj̄l̄ nisa'nlu xmelä neñ te bancw te che nibi'ä nicasacä xmelä con xi'nni ni niujni gaan."

²⁸ Dxejc räjpni loj reni suga' ro'c: "Colgudzucay te mīl meel ni ca'ni colgudeedni loj ni rajp tzuu mīl meel.

²⁹ Sa'csi loj ni rajp sudedäru, niluxh ni xhet rajpdi sudzucää tudxe'n nani rajpni."

³⁰ Dxejc räjpni: "Colca' mosre ni xhet sajcdi, colguzäl̄ni lo yäl̄nacäjy, cadre chu yäl̄ronduxh, näjza yäl̄rajw reläjy bejn."

Yäl̄guxhtis xten reguejdx

³¹ 'Che jiädsac Xi'n Dios ni gujc Niguui con yäl̄rdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni.

³² Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni.

³³ Suzujni rexiil xladbeeni dxejc redxib xladbäjgwni.

³⁴ Dxejc säjb̄ reii loj reni suga' xladbeeni: "Col̄taa, la'tu ni benle' Xtaä. Col̄jiu' lo yäl̄r̄nibee ni guc-chee cheni guzoblojli guedxliuj.

³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te beñzijt, la'tu banidxlaatu cadre bia'nä.

³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguiib, biädhuiitu narä."

³⁷ Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu?"

³⁸ ¿Guc bahuiinu najclu si'c te benzijt, baniidxnu cadro bianlaalu, o biäädx xhajblu, baniidxnu xhi gojtlu?

³⁹ O ¿guc bahuiinu cayacxhuulu, o yu'lu nen latzguiib, biophuiinu lojlu?"

⁴⁰ Dxejc reiiga säjb lojreni: "Rniliäpac lojtu, xhitis xhi bejntu loj te rexpənä ni rnii xtidxä mase proobreni, lagajc loä bejntu recosga."

⁴¹ 'Dxejc säjpszani loj reni suga' ladbäjägwini: "Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpəndxabni.

⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä;

⁴³ cuanzaä si'c te benzijt, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza nen latzguiib, niluxh ditu niädhuii loä."

⁴⁴ Dxejc laareni säjbreni: "Dad, ¿guc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu nen latzguiib, luxh dinu niacnäjlü?"

⁴⁵ Dxejc säjb reiiga lojreni: "Rniliäpac lojtu, loj xhitis ni ditu niacnäjä rebejn ni rililajz xtidxä, mase proobreni naräni ditu niacnäjä."

⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcäl nabajñ Dios par tejpas.

26

Bejnreni xhigab xho guiniaazreni Jesús

(Mr. 14:1-2; Lc. 22:1-2; Jn. 11:45-53)

¹ Che gulujx gunii Jesús rediidxre, räjpni loj rexpəjn pacni:

² —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladznaa reni gucuaa narä lo cruiz.

³ Dxejc bidojp rebejn ni rnibee rebixhojz, näjza remastr xten leii, näjza rebəngool lo rexpəjn Israel. Lo xle' Caifás, ni rnibee loj rebixhojz, bidojpreni.

⁴ Ro'c bachaagreni diidx xho guiniaazreni Jesús con yälrusguee, te ju'trenini.

⁵ Luxh räjpreni lo sa'reni:

—Na'c jiennuni nen redxe lanij, te di gun rebejn bieiduxh.

Te gunaa ni biädnä perfum

(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajcnii che ral tiejxhni,

⁷ ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús.

⁸ Che bahuii rexpəjn pacni xhi cayujnni, bidxe'chreni, gusloj cayäjpreni:

—¿Xhicuent casälxlia'ni perfumga?

⁹ Perfumre niajc nido'ni, nirii xhidajl meel lojni te niacnäjni rebenproob.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaaare? Ni te coshween najc dee nani bejnii loä.

¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu.

¹² Nani bejn gunaaare che bachajni perfumre guideb lagaa tiexhä, najcni par guzucheeni narä te guiga'tzä.

¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäjä gunaaare narä, te guinaj lajzreni gunaaare.

*Judas bato' Jesús**(Mr. 14:10-11; Lc. 22:3-6)*

¹⁴ Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz,

¹⁵ räjpni:

—¿Lac guniidxtu loä te gutedä Jesús ladznaatu?

Dxejc badeedreni galbitzuu melpla't lojni.

¹⁶ Dxjecli caguil Judas xho gutedni Jesús lojreni.

*Lult xchej xten Jesús**(Mr. 14:12-25; Lc. 22:7-23; Jn. 13:21-30; 1Co. 11:23-26)*

¹⁷ Primer dxej lanij, dxej ni rajwreni yätxtiil ni di saguij, gubig rexpejn pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸ Dxejc räjpni lojreni:

—Colchäj lo guejdx rolijz te dade', colye'tz lojni: “Si'c naj Dad mastr: Asiäddzungajxh xorni, ni'cni rolijzlu gaunäjni rexpejn xchej lanipascw.”

¹⁹ Bejnti rexpejn pacni si'cni gunibee Jesús gac, bazucheereni xchej xten pascw.

²⁰ Che biu' guxhijn, sobga' Jesús lo mex con retzubitio'p xpejn pacni.

²¹ Lał ni cayajwreni räjpni lojreni:

—Rniliä lojtu, yu' tejtü ni guto' narä.

²² Dxejc guc-huinduxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä neñ tejtis pla't, laa ni'cni guto' narä.

²⁴ Xi'n Dios ni gujc Niguü sajc si'ctis ni caj loj guiitz xten Dios, per gunatiro bejn ni guto'ni. Huenru na'c niajl bejnga.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ Lał ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn pacni, räjpni:

—Coltajw; dee najc si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejn pacni, räjpni:

—Guiraatu colyä',

²⁸ sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni neñ dojl.

²⁹ Luxh rniä lojtu, diruna yä'ä nis nani rii yejc uub, dxejlini yänäsacätu lo xcälrnibee Dios, Xtadä.

*Räjp Jesús sibälaz Pedroni**(Mr. 14:26-31; Lc. 22:31-34; Jn. 13:36-38)*

³⁰ Che gulujx bilreni te dij, biriireni, sääreni lo dajn ni laa Oliib.

³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguiitz xten Dios caj scree: “Sugu'treni baxtoor dxejc sire'ch rexiiil.”

³² Dxejc cheni guibañsacä lo rebengut, ganidä cha'ä región Galilee, dxejcti jiädnajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:
—Rniliäpac lojlu, lagajc guxhijñre, nicla gajd guidgaii cuedxa', luxh luj alagulälazlu narä choñ huält.

³⁵ Räjp Pedr loj Jesús:
—Masque riäjñ guetnäälu, dina cuälazälu.
Dxejc sigajcza gunii guiraa rexpejñpacni.

Gurejdx-gunab Jesús loj Dios nen Getsemaní
(Mr. 14:32-42; Lc. 22:39-46)

³⁶ Dxejcti bidzujñ Jesús näjza rexpejñpacni te lajt ni laa Getsemaní, räjpni lojreni:

—Colcuésijc ree lañ ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh.

³⁸ Dxejc räjpni lojreni:
—Te yälhuinduxh yu' lastoä; astoocanu agojñ guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajcní, basanlaa tedcaj trabajwduxhre ni tedä, te na'c tedäni. Xhet si'c di ni rlazä gacni; si'cpacni rlazzlu gac, si'c gacni.

⁴⁰ Dxejcti gubi'ni cadro suga' guichon rexpejñpacni, che bidzujñni ro'c, nagayejsreni. Räjpni lo Pedr:

—¿La di niajcdi nutie'chtu bacal lojtu nicla tebor, ä?

⁴¹ Colguibajñ, colñab lo Dios te na'c jiajbtu nen dojñ. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlazzlu gacni.

⁴³ Dxejc gubisacni, bidxälñ rexpejñpacni, nagayejsreni sa'csi yuduxh bacal lojreni.

⁴⁴ Basaannireni, dxejc säsacni, gurejdx-gunabni lo Dios ni riojñ huält, gunisacni lagajc rediidx ni guniini galoo.

⁴⁵ Dxejc huijñi cadro suga' rexpejñpacni, räjpni lojreni:

—¡Naj sii, colguejs, colgusilajz! Abidzujñ or ni gutedreni Xi'n Dios ni gujc Niguii ladzñaa rebendojñ.

⁴⁶ ¡Colchastie, colcho', colhuii! Asiääd nani guted narä ladzñaa rebendojñ.

Gunaazreni Jesús sanärenini pres
(Mr. 14:43-50; Lc. 22:47-53; Jn. 18:2-11)

⁴⁷ Lalñi canii Jesús bidzujñ Judas, nani najc tej retzubitio'p xpejñpacni. Bidzunñajni xhidalduxh bejñ ni ca' espaad, ni ca' garo't, najcreni xpejñ reni rnibee rebixhojz, näjza xpejñ rebengool xten rexpejñ Israel.

⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni.

⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejñ lojni, gunaazrenini.

⁵¹ Per tej reni suganäj Jesús guläani te spaad, batiu'ni diajg te mos xten rebixhojz ni rnibee.

⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni.

⁵³ ¿La ditu gan sajcza guiniabä lo Xtadä, luxh laani suxhalgajcni gayonbitzubitio'p mil xanglni gacnäj narä?

⁵⁴ Dxejc xho gac soob diidx ni caj lo reguijtz xten Dios ni rnixгаа riäjł gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädnätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu neñ guidoro, luxh ditu niniaaz narä.

⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojp guiraa rebejn nani ruluii leii näjza rebeñgool xten xpejn Israel.

⁵⁸ Dxejcti zit-zijt biädnajl Pedr rebejnğa, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebeñgool con guiraa reni rajp yälrnibee gusloj caguilireni xhitis te diidx, masque xhet guliidini, te gucuaquijreni Jesús te guinibeereni guetni.

⁶⁰ Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii,

⁶¹ räjpreni:

—Niguiire gunii scree: “Narä sajc gutzulä guidoro xten Dios, sajcza gunch-esacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—¿Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

⁶⁶ ¿Xhi rchalotu?

Dxejc basejcreni diidx:

—¿Abiga'ni! Riäjł guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni,

⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Lal ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejn; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgäi.

⁷⁵ Dxejcro banalajz Pedr rediidx ni gunii Jesús lojni che räjpni: “Che gajdli guidgäi cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza re-bengool xten rexpejn Israel bia'nreni diidx xho gunreni ju'treni Jesús.

² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzoo meel pla't loj rebixhojz ni rnibee näjza loj rebengool.

⁴ Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj nen guidoro, biritini ro'c. Sas huijni, baliibni te duu guejni, gojni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälnu meelre nen caj gojn sa'csi najcni xcuent xtiejn te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt.

⁸ Ni'cni najli rniireni yujga: “Yurejn”.

⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzoo melpla'tga si'cti basoob rexi'n Israel sajc bejnga.

¹⁰ Con meelga guziireni yuj lo bejn ni runchee guejs, sigacni gunibee xtadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

12 La_lni cabe'c rebixhojz ni rnibee näjza rebengool rexquej Jesús xhetliidi guniidi Jesús.

13 Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

14 Per xhetliidi diidxd basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38-19:16)

15 Nen redxe lanij rajpreni costumbr rus_laa Pila't tej bejn ni cue rebejn loj reni yu' nen latzguib.

16 Nen redxejga guyu' te bejn ni sääb xtiidxni ni laa Barrabás.

17 Cheni tre' guiraareni ro'c, gunabdiidx Pila't lojreni:

—¿Chuni'c rlajztu gus_lää, la sus_lää Barrabás o Jesús ni laa Crist?

18 Sa'csi najn Pila't rdxe'chlajzreni lo Jesús, ni'c bateedrenini lojni.

19 La_l ni sobga' Pila't lo yajgxiil cadro rujnni yälguxhtis, baxha_l chäälni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixca_lä xcuentni.

20 Niluxh rebixhojz ni rnibee näjza rebengool baquiilreni rebejn te gunabreni _laa Barrabás, näjza te guet Jesús.

21 Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu gus_lää?

Dxejc guredxa'reni, räjpreni:

—¡Barrabás!

22 Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruz.

23 Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruz!

24 Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni _naani nez lojreni, räjpni:

—Dina xcaquiä xtiejn bejnre ni xhet bejndi. La'tu col_huii xho guntu. Xcuenttitu najcni.

25 Dxejc guiraa rebejn_ga badzu' diidxre, räjpreni:

—Suxcaquijnu xtiejn_ni, nuurnu näjza rexi'nnu.

26 Dxejc bas_laa Pila't Barrabás, dxejc gunibeeni gudijnreni Jesús dxejc bateednini ladz_naa rebejn te gucuaarenini lo cruz.

27 Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni.

28 Dxejc gulääreni xhajbni, bashuajcwrenini te lad xniaa.

29 Dxejc bencheereni te coron guejch, basälrenini yejcn_i, basälreni te yabixijl _naani, xladbeen_i, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

30 Sas batiobxhejnreni lojni, cua'reni yabixijlga te ni'c batiäjlni yejcn_i.

31 Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo cruz.

*Bacuaareni Jesús lo cruzj**(Mr. 15:21-32; Lc. 23:26-43; Jn. 19:17-27)*

³² Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

³³ Che bidzujñreni te lajt ni laa Gólgota, nani säloj: dan Calabeer,

³⁴ ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

³⁵ Cheni abacuaareni Jesús lo cruzj, gudzujt resoldaad yejc xhajnbi, te si'c gudisreni xhajn Jesús cua'reni, te si'c guzojb diidx xten te dade' ni gunii xtidx Dios.

³⁶ Gurejtireni ro'c, gusloj canäjreni Jesús.

³⁷ Yejc cruzjga bacuaareni te guijtjz con letirro. Lo guijtjzga rcaj xhini'c najc xtojñ nani cayejt. Lo guijtjzga caj: “Dee najc Jesús reii xten rexpejn Israel.”

³⁸ Näjza tio'p gubaan cuaj lo stio'p cruzj con laani. Tejni cuaj lo te cruzj xladbee Jesús, steeni cuaj xladbäjgwni.

³⁹ Luxh renani sadejd nejzga guniyajreni Jesús, cagusniibreni yejcreni,

⁴⁰ cayäjpreni lojni:

—Ja'ä! Luj ni nutiexhlu guidoo, luxh choñtis dxej niunchesacluni; palga guli najclu Xi'n Dios, biäjñ loj cruzjga.

⁴¹ Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

⁴² —Baslaani xhidajñ bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtni lo cruzj nanaj te chalilajznu xtiidxni.

⁴³ Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recruzj sigajcza guniyajreni Jesús.

*Che gujt Jesús**(Mr. 15:33-41; Lc. 23:44-49; Jn. 19:28-30)*

⁴⁵ Dxejcti bicäjy guideb guedxliuj läidxej hasta rcachon gudxej.

⁴⁶ Si'cti rcachon gudxej guredxa' Jesús dipduxh, räjpreni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' reni suga' ro'c, che biejn diajgreni räjpreni si'c, räjpreni:

—Cabejdx Dade're Elías.

⁴⁸ Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagra ro' Jesús.

⁴⁹ Dxejc reni tre' ro'c räjpreni:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpriitni.

⁵¹ Lagajc orga biräsya' ladro ni zäab nen guidoro, gujcnii tio'p la' jiaali hasta lo yuj. Gujc te xuro, sas gusuj bej reguiro.

⁵² Dxejc gubicaj reguij ni niäuu ro' rebaa, luxh gubansac xhidajñ xpejn Dios ni gujt aguc xchej.

⁵³ Dxejcti, che huäjs Jesús lo rebengut, biriireni nen baa, baluilojreni lo xhidajñ bejn ni rbäjz guedx Jerusalén.

⁵⁴ Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵ Zijtru tre' xhidajñ regunaa ni biädñajñ Jesús che biriini nez Galilee te bahuiirenini. Cadxelojtisreni guiraa ni cayajc ro'c.

⁵⁶ Teĵ regunaaga najc Marii Magdalen, steeni najc Marii xnan Jacoob nájza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujn te benrajp ni siädääd guedx Arimatea; laani José. Nájza dade'ga najc teĵ reni birinajl Jesús.

⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudee-drenini lojni.

⁵⁹ Cua'ti José tiejxh Jesús, batejbnini nen te bariadya,

⁶⁰ huitixhnini nen xpaapacni. Nacoob baaga, gojni bidäänni cuä' te guilaj. Dxejc basäuni ro' baaga con guiro, dxejcti siini.

⁶¹ Sobga'za Marii Magdalen nájza stee Marii nez loj baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni gulec-cheerene lanij, bara yääl bidojp rebixhojz ni rnibee nájza rebejn ni laa refarisee, bidzujnreni loj Pila't,

⁶³ räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted chon dxej sibansacni loj rebengut.”

⁶⁴ Ni'c baxhal chu chacanäj ro' baaga dxejli guisa' chon dxej, te di chää rexpejnpacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzut'z ro' baaga si'ctis ni sajc guntu.

⁶⁶ Dxejcti sääreni, basäutzut'zreni ro' baaga; con resoldaad bacuaareni te sei lojni te rut faldini. Dxejc basa'nreni resoldaad canäj ro'c.

28

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii Magdalen nájza stee Mariiga, siädhuiireni lo baa.

² Luxh alagujc te xuro ni basniib lo yuj, sa'csi biädääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga.

³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riab.

⁴ Che bahuii resoldaadni, bichebduxhreni, sädiidxreni, gujcreni si'c bengut.

⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguiltu Jesús ni cuaj lo cruiz.

⁶ Rutini ree sa'csi agubansacni sigajc ni najni. Coltahuii cadre gojtni.

⁷ Colguxun, colchaye'tz loj rexpejnpacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabal-azduxhzareni sanäreni diidx loj rexpejnpac Jesús.

⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojrenini.

¹⁰ Dxejc räjpni lojreni:

—Na'c guidxejbtu. Colchanä diidx loj rexpənä, chääreni región Galilee, sa'csi ro'c suhuiireni loä.

Rediidx ni räjp resoldaad

¹¹ La_lni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga.

¹² Dxejc rebixhojz ni rnibee bachagsa'zarenı con rebengool te bia'nreni diidx gudeedreni xhiroob meel lo resoldaad,

¹³ räjpreni lojreni:

—Scree colye'tz lo rebejn: “La_l ni nagayesnu, canäjnu ro' baa, biääd rexpejn_{pac} Jesús guläxhiga'tzreni tiejxhni.”

¹⁴ Palga jiendiajg gubernadoor dee, siohuinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpən Israel. Najli canisijceni si'c.

Baxha_l Jesús rexpejn_{pac}ni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejn_{pac} Jesús lo región Galilee, lo dajn cadro bia'n Jesús diidx guidxaagnireni.

¹⁷ Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni.

¹⁸ Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj.

¹⁹ Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios.

²⁰ Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluu Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios.

² Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä,
ganidni chääni lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Colyunsa'c xnezyuj Dad,
colslüi rexnezyulajzni.”

⁴ Biricaj Juan ni rutiobnis nez loj reyubijdzga. Räpgajcni nanabpac gusiechla-
jzreni, tiobnisgajczeni, te jia xtojreni.

⁵ Riädcuadiajg xhidajl reni rbäjz Judea, näjza reni rbäjz guedx Jerusalén.
Dxejcti cheni ruxhobdojlreni lo Dios, rustiobnis Juanreni neñ gueu Jordán.

⁶ Xhajb Juan nacchee con guichlajd cameii, xsindoorni nacchee con guijd,
niluxh gudajwni guxha't näjza dzunbäserguijxh.

⁷ Caguluiini rebejn, räpgajcni:

—Detzä siääd tej nani sajcrü loä, nani nicla di nungäjü surloä, cuää
xcura'chni.

⁸ Narä abatiobnisä la'tu con nis, biädla laani guxhalni Sprit Dxañ xten Dios
te cuääzni neñ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neñ redxejga, birii Jesús guedx Nasare't ni yu' Galilee. Dxejcrü
batiobnis Juan Jesús neñ gueu Jordán.

¹⁰ Che birii Jesús neñ nis, bahuiini bixal guibaa. siädyäjt Sprit Dxañ xten
Dios yejcnü si'c te palom.

¹¹ Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

Bateed bendxab prueb Jesús

(Mt. 4:1-11; Lc. 4:1-13)

¹² Sas baxhal Sprit Dxañ xten Dios Jesús lo reyubijdz.

¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil
bendxab nani rnibee, nani laa Satanás, xho niujnni te nusoob Jesús xtiidxni.
Dxejcrü biääd reangl xten Dios, biädhuiireneni.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basälreni Juan neñ latzguiib. Dxejcti huij Jesús nez Galilee, huiluiini xtidx
Dios.

¹⁵ Dxejc räjp Jesús:

—Abidzujñ dxej, luxh yälrnibee xten Dios abidzujñ gajxh. Colsiejch lajztu,
colchalilajz xtidx Dios.

Gurejdx Jesús tajp bejn ni rniaaz bäjl

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón näjza loj
Andrés bejtz Simón. Cazälreni xquijxhreni lo nis, sa'csi rniaazreni bäjl.

17 Dxejc räjp Jesús lojreni:

—Coltanajl narä, te gunä cueedxtu bejn lacuaa ni guiniaaztu bäjl.

18 Lagajc dxejc basa'nreni rexquijxhreni, sanätirenini.

19 Dxejc gusaj Jesús sche'n, sas bahuiini loj Jacob näj Juan, rexi'n Zebedeo. Cayunsa'creni xquijxhreni neñ xcanuureni.

20 Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmosni, sanätireni Jesús.

Te bejn nani guyu' beñxab neñ lastooni

(Lc. 4:31-37)

21 Bidzujntireni guedx Capernaum. Dxejcru sabd, dxej ni rusilajz rexpən Israel, biu' Jesús neñ guidobäz xten rexpən Israel. Dxejcti baluii Jesús rebejn ni tre' ro'c.

22 Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi.

23 Neñ xquidobäzreni yu' te bejn yu' te beñxab neñ lastooni. Beñxabga guredxa', räjpni:

24 —Jesús, ni siääd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beñxan ni siääd lo Dios.

25 Dxejcti gudidxa' Jesús lo beñxabga, räjpni lojni:

—Basäuu ro'lu, birii neñ lastoo niguiire.

26 Sas beñxabga batienguij niguiiga, luxh cabedxa'ni biriini neñ lastoo niguiiga.

27 Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj re-beñxab, luxh ruzoobreni xtiidxni.

28 Di niacjaa gucbee rebejn guideb nez Galilee xhi rujn Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

29 Che biriireni xquidobäz rexpejn Israel, huiinä Jesús Jacob näj Juan rolijz Simón näjza Andrés.

30 Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

31 Dxejcti gubig Jesús lojni, gunaazni ñaani, guläsnini; lagajc dxejc biriini xliaa. Dxejc gusloj cayunireni.

Xhidajl beñracxhuu basiajc Jesús che huääz gubijdx

(Mt. 8:16-17; Lc. 4:40-41)

32 Che huääz gubijdx, luxh abiu' guxhijn, biädnäreni guiraa rebenracxhuu loj Jesús, näjza renani yu' beñxab neñ lastooni.

33 Luxh guideb guejdxga bidojp ro' yu'ga.

34 Basiajc Jesús xhidajl renani rajc garen-garen yälguijdx. Niluxh gulääzani xhidajl beñxab, niluxh dini nusaan ninii rebenxabga, sa'csi najnreni chu najcni.

Baluii Jesús nez Galilee

(Lc. 4:42-44)

35 Che bara yääl, cäyru bistie Jesús, biriini sääni te laad cadre ruti bejn. Ro'c cabejdx-canabni loj Dios.

36 Dxejcti Simón näj resa'ni huitiilreni Jesús.

37 Che bidxälrenini, räjpreni lojni:

—Guiraa rebejn caguillu.

38 Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.
 39 Dxej cru cuansaj Jesús guideb nez Galilee, caguluiini xtidx Dios nen reguidobáz xten rexpejn Israel. Gunibeezani birii rebeñdxab nen lastoo xhidajl rebejn.

Basiajc Jesús te bejn ni ral tiejxhni
 (Mt. 8:1-4; Lc. 5:12-16)

40 Gubig te beñracxhuu ni ral tiejxhni loj Jesús, bazuxhijbni. Dxejcti räjpni lojni:

—Narä nanä sajc gusiajclu narä palga rlanjzlu.

41 Balaslajz Jesús beñracxhuuga, gunaazni naani, räpgajcni:

—Rlazä jiajclu. Biajc naj.

42 Cheni guniini scree, biacgajc beñracxhuuga.

43 Dxejcti gulunejz Jesús bejnga. Per räpxgaani lojni:

44 —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp to Moisés gudeed bejn lo Dios si'c te seen, te gacbee rebejn abiajclu.

45 Dxejc säa bejnga. Sas gusloj cayujyni diidx lo rebejn xcuent guiraa nani gujcn. Ni'cni diru niajcdi niu' Jesús nicla tej guejdx. Cansajni te laad cadre ruti bejn. Niluxh guiranejz rii rebejn, siädhuiireni Jesús.

2

Basiajc Jesús te bejn ni di guniib
 (Mt. 9:1-8; Lc. 5:17-26)

1 Che agudejd balti dxej, biusac Jesús nen guedx Capernaum. Dxejcti biejn diajg rebejn arbäjzni.

2 Bidopgajc xhidalduxh bejn. Gudxaj nen yu'. Nicla rolä' di niajl nisiujreni. Dxejcti caguluii Jesús xtidx Dios lo rebejn.

3 Dxejcti bidzujn tajp bejn, nuureni te bejn ni digacti guiniib; siädnärenini lo Jesús.

4 Luxh di niajcdi nidzujnreni cadre suga' Jesús, sa'csi yu' xhidajl bejn ro'c. Ni'c baxhalreni yejc yu' nejc cadre sujni. Dxej cru cadre baxhalreni basiäjtreni da' ni naga' beñracxhuuga lojni.

5 Che bahuii Jesús rililajzreni, dxejc räjpni loj beñrachxhuuga:

—Xi'nä, agubicaaj rextojllu.

6 Sas gaii bejn ni ruluii leii ni sobga' ro'c bejnreni xhigab nen lastooreni, naareni:

7 “¿Xhicuent rnii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!”

8 Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c nen lastootu?

9 ¿La guyasiru gäbni loj beñracxhuure: “Agubicaaj rextojllu”, o la gäbni: “Huistie, cua' xta'lu, gusaj”?

10 Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beñracxhuure:

11 —Lojlu rniä, ¡Huistie, cua' xta'lu, huij rolizlu!

12 Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví
 (Mt. 9:9-13; Lc. 5:27-32)

¹³ Dxej cru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni.

¹⁴ Sasaj Jesús che bidxaagni Leví, xi'n Alfeo. Sobga'ni cadre rusquijxni rebejn. Dxej räjp Jesús lojni:

—Gudanajl narä.

Sas huisuni, sanajltini Jesús.

¹⁵ Dxej sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebejdojl ni di chasanäj leii, näjza rexpejn pacni, lo mex. Xhidajlreni tre', luxh sanajlreni Jesús.

¹⁶ Dxej cru rebejn ni ruluii leii näj refarisee, che bahuiireni cayaunäjni renani rusquijx näjza rebejdojl, räjpreni loj rexpejn pac Jesús:

—¿Xhicuent rbenäj xmastrtu reni rusquijx näj rebejdojl, luxh raunäjnireni, ränäjnireni?

¹⁷ Che biejn diajg Jesús xhi caniireni, räjpni lojreni:

—Renani nadip nadaan di guiquin doctoor, per reni racxhuu rquuin doctoor. Dina niädtedxä rebeñsa'c, biädtedxä rebejdojl, te gusiech lajzreni.

*Gunabdiidxreni loj Jesús xcuent yälrucua'n
(Mt. 9:14-17; Lc. 5:33-39)*

¹⁸ Cagucua'n rexpejn Juan näj rexpejn refarisee, renani najc rebejguidoo loj guedx Israel. Dxej biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn pacu di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdoñ chää cadre ru' yälruhnaa che meer suga' bi'n? Che meer suga' bi'n lojreni, direni gucua'n.

²⁰ Per sidzujn dxej sibicaj bi'n lojreni, dxej sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxej xhiroobruni räjs.

²² Rutza rusäldi bin ni gajd guilaj neñ guidyux ni abigaa. Sa'csi bin ni gajd guilajga sutiäjsni guiidga che guilajni, luxh sinijt binga näjza guiidga. Ni'cni nanab gusälni bincoob neñ guidcoobza.

*Batojp rebejn ni rinajl Jesús triuu sabd
(Mt. 12:1-8; Lc. 6:1-5)*

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu.

²⁴ Dxej räjp refarisee, renani najc bejguidoo loj guedx Israel, loj Jesús:

—Arniä, ¿xhicuent rujn rexpejn pacu dzuun ni di guchaag gunni neñ dxej ni rusilajznu, ä?

²⁵ Dxejcti räjp Jesús lojreni:

—¿La gajdtu goj nani bejn toDavid te huält, laani näj resa'ni, ä? Che biäädx xhi gauureni, gulaanreni.

²⁶ Biu' David neñ xyu' Dios cheni guyu' toAbiatar loj Dios. Abiatar saj cru loj rebixhojz ni guyu' neñ xquidoo rexpejn Israel. Dxej gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquiinpac gusilajz bejn. Dini niujn sabd te gapda bejni.

²⁸ Ni'cni narä, Xi'n Dios ni gujc Niguii, näjza sabd rnibeä.

3

Niguii ni nabijdz te naani
(Mt. 12:9-14; Lc. 6:6-11)

¹ Biu' Jesús stehuält nen̄ xquidobāz rexpejn̄ Israel. Ro'c yu' te niguii nani nabijdz te naani.

² Niluxh ro'c cagula'tz rebejn̄ Jesús don la susiajcn̄i niguiiga sabd, dxej ni rusilajz rexpejn̄ Israel, sa'csi rlanjreni cue'creni xquejni loj nani rnibee rexpen̄ Israel.

³ Dxejc räjp Jesús lo niguii nani nabijdz naani:
—Huistie, guzuj galäiire.

⁴ Dxejcti gunabdidxgajcn̄i loj gaii rebejn̄ga, räjpni:
—¿La laaca gunni dzunza'c, o la dzunguijdx, sabd, ä? ¿La suslaani yäl̄nabajn̄, o la sugu'tni?

Luxh laareni biacdxireni.

⁵ Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini.

⁶ Dxejcru biunejz refarisee. Guslogajcreni caguchaagreni diidx con reni nadxaag Herodes, te don xho ju'treni Jesús.

Xhidajl bejn̄ bire' ro' nis

⁷ Jesús näjza rexpejn̄pacni sääreni ro' nis, luxh xhidajl ben̄ Galilee birinajlni.

⁸ Che gojnreni redzunro ni rujn̄ Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zaren̄i birii nejz stelaad gueu Jordán, biriizaren̄i nez guedx Tiro, näj nez guedx Sidón, biädhuiireni loj Jesús.

⁹ Ni'cni räjp Jesús loj rexpejn̄pacni quiilreni te canuu, te na'c gutää reben̄xhidaalgani.

¹⁰ Abasiajc Jesús xhidajl ben̄racxhuu, ni'cni guiraasi ben̄racxhuu caxa't lojni, te canren̄ini te jiajcreni.

¹¹ Niluxh che rhuii reben̄dxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreni chu najcni.

Gule Jesús tzubitiop bejn̄ loj reni rinajlni
(Mt. 10:1-4; Lc. 6:12-16)

¹³ Birii Jesús säani lo te dajne' cadre gurejdxni renani rlanjzni cueni. Gu-bigtireni lojni.

¹⁴ Dxejcti guleni tzubitio'preni te sanäjreni laani, te guxhal̄niren̄i chaluiireni xtidx Dios;

¹⁵ te ga'preni yäl̄rnibee te gusiajcreni ben̄racxhuu, te cuääzaren̄i reben̄dxab.

¹⁶ Retzubitio'p bejn̄ ni gule Jesús najc: Simón, ni gulälajzani Pedr.

¹⁷ Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn̄ ni nasesya', si'c guzii.

¹⁸ Näj Andrés, Felipe, Bartolomé, Mateo, Tomás, Jacob xi'n Alfeo, Tadeo, Simón, ni di guidxejb rnigajc,

¹⁹ näj Judas Iscariot, ni bato' Jesús loj reni rdxechlajz lojni. Sä'tiren̄i rolijz te dade'.

Yäl̄rniyaj loj Sprit Dxan xte Dios
(Mt. 12:22-32; Lc. 11:14-23; 12:10)

- 20 Dxejc bidopsac reben_xhidaalga; nicla niajc niaunäj Jesús rexpelj_npacni.
 21 Che biejn diajg resa' Jesús dee, biädxhiirenini, sa'csi naareni, yej_ncni cayajc.
 22 Rebejn ni ruluii leii ni birii guedx Jerusalén bidzuj_nza lo Jesús, dxejc räjpreni:
 —Beelzebú, nani rnibee reben_xab, yu' ne_n lastoo niguiire. Niluxh nani rnibee reben_xab rudeed yä_rrnibee lo Jesús te cuääni ben_xab.
 23 Dxejc gurejdx Jesús rebejn_{ga}, bijyni te cuent ni ruluii lojreni, räjpni:
 —¿Xho gurilaagw ben_xab lagajc saben_xabni?
 24 Palga rebejn_xten te yä_rrnibee la'reni, luxh til_näj te cuaani ste cuaaga, di yä_rrnibeega chu xchej.
 25 Palga te famil_rrdil_näj lagajc sa'ni, di familga chu xchej.
 26 Palga ben_xab nani rnibee til_näj lagajc laani, di xcä_rrnibeeni chu xchej, sa'csi ni'c gun luuxni.
 27 'Rut gacdi jiu' rolijz te niguidaan, cuanni xhixhtenni, palga dini gulibx-gaani, si'ctis sajc cuanni xhixhtenni.
 28 'Rniliäpac lojtu guiraa dojl_näjza yä_rrnijay xten rebejn_x sajc jia.
 29 Nani guiniyaj Sprit Dxan xten Dios, digacdi guibicaj rextoj_ni, anuutisni xtoj_ni par tejpas.
 30 Räjpni si'c sa'csi caniireni yu' ben_xab ne_n lastooni.

Xnan con rebetzhuin Jesús

(Mt. 12:46-50; Lc. 8:19-21)

- 31 Dxejcru bidzuj_n xnan Jesús, näj rebetzhuinni. Direni niu', baxhaltisreni chu huitejdxni.
 32 Rebejn_x ni sobga' gabi Jesús räjpreni lojni:
 —Xnanlu näj rebejtzlu suga' ro lä', caguuilreni luj.
 33 Dxejcti räjp Jesús lojreni:
 —¿Chu reni'c najc xnanä näj rebetzä?
 34 Bahuigajcni loj renani sobga' gabini, dxejc räjpni lojreni:
 —Redee najc xnanä, rebetzä.
 35 Chutis ni rujn ni rlanj Dios, ni'c najc betzä, bisianä, näjza xnanä.

4

Xcuent niguii ni sale'c binij

(Mt. 13:1-23; Lc. 8:4-15)

- 1 Suga' Jesús ro' nis guslosac caguluiini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús ne_n te canuu ni suga' ro' nisga. Dxejcti gurejni ne_nga, biääd guiraa bejn bia'ntireni ro' nis.
 2 Dxejc baluiinireni guiraloj, ganax cuent ni ruluii guniini. Che caguluiini, räjpni lojreni:
 3 —Gucua diajgtu dee. Guyu' te niguii. Biriini sale'cni binij.
 4 Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga.
 5 Stee lajt biajb binijga ne_n guij cadro xheti xhidajl yuj. Binijga gulengajcni, sa'csi xheti xhidajl yuj ro'c.
 6 Dxejc, sa'csi lo jiaa yu' xlobaani, che birii gubijdx, bigol_ni, gubijdzitini.
 7 Stee lajt biajb binijga ne_n yaguejch. Dxejcti biroob reyaguejchga, luxh bejnreni balaa loj binijga, ni'cni guj_ncni ganax bilii.
 8 Per stee lajtga biajb binij lo yusa'c. Gulejn reyäj_lga, guroobreni, gucsa'creni. Yu'reni cuaj galbitzuu xob, yu'reni cuaj gayoj_n xob, yu'zaren i cuaj tegayuu xob.
 9 Dxejc räjpni lojreni:

—Chutis ni rlajz guisieed, sucuadiajgni.

¹⁰ Che asii xhidajl bejn, rebejn nani suga' gajxh cadro suganäj Jesús guitzubitio'p xpejn pacni gunabdiidx lo Jesús xhi säloj cuentre.

¹¹ Dxejc räjp Jesús:

—Dios abejn gacheetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre,

¹² te mase cahuiireni direni gumbee, te mase cayiejn diajgrenti, direni gacbee. Scree gacni, te na'c gusiejch lajzrenti, te na'c guibicaj xtojreni.

¹³ Räjpzani lojreni:

—¿La ditu gacbee cuentre? ¿Xhocha gacheetu xhidajlru cuent?

¹⁴ Niguiire nani sale'c binij najc si'c te nani ruluii xtidx Dios.

¹⁵ Yu' bejn ni najc si'c binij ni biajb cuä' nezyuj: riejn diajgrenti xtidx Dios nani ruluii bejn. Dxejc che jiejn diajgrenti xtidx Dios, riääd Satanás rbägajcni xtidx Dios ni yu' neñ lastooreni.

¹⁶ Yu'za rebejn ni najc si'c binij ni biajb neñ reguij, renani che jiejn diajgrenti xtidx Dios, rbaa lajzrenti rca'reni diidxga.

¹⁷ Niluxh direni nisiudzu'tz, sa'csi guxii huilii lajzrenti. Che rdejdreni trabajw o che rusacsí bejnreni xcuent xtidx Dios, rusaanreni xtidx Dios.

¹⁸ Yu'zarenti najc si'c binij ni biajb neñ yaguejch, riejn diajgrenti xtidx Dios,

¹⁹ dxejc che ru'rurenii yärsia' xcuent recos guedxliujre, rsia' lajzrenti ga'preni meel, rlajzrenti ga'prurenii guiraloj recos, dxejc riu' redee neñ lastooreni, rusäuuni lo xtidx Dios, xlia'si biejn diajgrenti xtidx Dios.

²⁰ Yu'za bejn ni riejn diajgrenti xtidx Dios, rlii lajzrenti diidxga, xhet xlia'ti biejn diajgrenti xtidx Dios. Najc'reni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx

(Lc. 8:16-18)

²¹ Räjpza Jesús lojreni:

—¿La riädñätu te bajl te suuni dejtz te alm, o neñ te loon, ä? ¿La xhet nanabdi suuni jiaa te guzanijni, ä?

²² Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni.

²³ Pal yu' chu rlajz guisieed, sucuadiajgni.

²⁴ Räjpza Jesús lojreni:

—Colyunxгаа xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu.

²⁵ Renani rajp che'n yälñajn, lojreni sudeedru Dios yälñajn. Luxh renani xhetru rusäldi loj xhigabreni, sudzucaj Dios yälñajn nani rajpreni.

Xcuent binij ni roob

²⁶ Guniiza Jesús lojreni:

—Yälrnibee xten Dios najc si'c rsiajc te niguii che rbe'cni binij lo yuj,

²⁷ dxejc yääl riguesni, rdxee ristieni, dxejcti rliejn binijga, luxh di niguiiga gan xho roobni.

²⁸ Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdz'e neñ dojga.

²⁹ Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpni.

Xcuent bedz muxhtas

(Mt. 13:31-32; Lc. 13:18-19)

³⁰ Räjpa Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guiluiin-uni?

³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bāze'ru loj guiralii bedze' ni yu' loj guedxliuj.

³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpalaani.

Si'c baluii Jesús ganax con cuent

(Mt. 13:34-35)

³³ Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racheereni.

³⁴ Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

Rusiadxi Jesús bej näj nisdoo

(Mt. 8:23-27; Lc. 8:22-25)

³⁵ Lagajc gudxejga räjpni loj rexpejn pacni:

—Colcho', chonnu stelaad nis xten Galilee.

³⁶ Basa'ntireni rebejn, sanätireni Jesús neñ canuu cadre sobgajcni. Dxejcti sgaii canuu sanajlni.

³⁷ Chela gubi' te beduxh, gusloj cayu' nis neñ canuuga. Cadxaj canuuga nis.

³⁸ Nagayejs Jesús dejtz canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

³⁹ Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biacdxini.

⁴⁰ Räjpa Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹ Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

5

Nigui Gadara ni yu' bendxab neñ lastooni

(Mt. 8:28-34; Lc. 8:26-39)

¹ Bidzujntireni stelaad ro' nisga, lo yuj xten Gadara.

² Si'ctis ni birii Jesús neñ canuu, biädgjajc te niguii lojni ni birii neñ rebiliää cadre rga'tz beñgut. Yu' bendxab neñ lastoo niguiiga.

³ Rbäjzni neñ rebiliääga luxh rut rajcdi rucuaduuni, nicla con cadenguiib.

⁴ Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxini.

⁵ Si'ctis canzajni, dxej, yääl. Rbedxa'ni neñ redajn, neñ rebiliää, luxh cagutiugni tiejxhni con reguij.

⁶ Che bahuiini loj Jesús zijtru, baxuñni huichaglojni Jesús, bazuxhijbni lojni.

⁷ Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

⁸ Sa'csi agac cayäjb Jesús lojni:

—Luj, bendxab, birii neñ lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidaltro, sa'csi xhidajl najcnu.

¹⁰ Sanuutis canabni lo Jesús na'c guxhalni reben_{dx}abga ste'ca guejdx.

¹¹ Ro'c tre' xhidalduxh cuch cuä' dane'ga, cayajwreni.

¹² Dxejc gunab reben_{dx}abga loj Jesús, räjpreni:

—Baxhal nuure loj recuchre te jiu'nu ne_n lastooreni.

¹³ Dxejcti basaan Jesúsreni. Biriiti reben_{dx}abga ne_n niguiiga, dxejc biu'reni ne_n lastoo recuchga. Yu' si'cti tiop mi_l cuch ro'c. Baxun_n recuchga, dxejc birol_nreni ro' guilaj, bitejbreni ne_n nis, gujtireni ne_n nisga.

¹⁴ Renani cayajp recuchga baxun_nreni, huiyeiireni diid_xga ne_n guejdx, näjza loniaa. Dxejc biääd bejn biädhuii nani gujc ro'c.

¹⁵ Che bidzuj_nreni cadre suga' Jesús, bahuiireni loj niguii nani guyu' reben_{dx}abga ne_n lastooni. Sobga'ni ro'c, najcwni xhajbni luxh nasa'c yej_cni. Niguiire najc nani guyu' ben_{dx}ab ni laa Legión ne_n lastooni. Bidxejbt_i rebejn nani bahuii lojni.

¹⁶ Dxejcru rebejn ni bahuii xhi gujc ro', huiyeiireni diid_x xho guzajc niguiire nani guyu' ben_{dx}ab ne_nni galoo, näjza nani guzajc recuch.

¹⁷ Dxejc gusloj canabreni loj Jesús jiunejz_ni.

¹⁸ Che biu' Jesús ne_n canuu, niguii nani guyu' ben_{dx}ab ne_n lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diid_x lojreni xho bennäj Dadlu, näjza xho balaslajz_ni luj.

²⁰ Sä'ti niguiiga, gusloj cayujy_ni diid_x ne_n reguejdx xten Decápolis xho bennäj Jesúsni. Guiraa rebejn bidxeloj.

Xindxa'p Jairo näjza gunaa ni bahual_n xhajb Jesús

(Mt. 9:18-26; Lc. 8:40-56)

²¹ Che bidzun_{sac} Jesús stelaad ro' nisga ne_n canuu, bidzuj_n xhidalduxh bejn cadre suga'ni. Bia'nti Jesús ro' nisga.

²² Dxejcru biääd te niguii nani laa Jairo, ni rnibee ne_n xquidobäz rexp_en Israel. Che bahuiini loj Jesús, bazuxhijb_ni lojni.

²³ Canabpacni lojni, räjpni:

—Xindxapä'ä acayejt. Gudaa, guzujlu naalu yej_cni, te jiaj_cni, te guibaj_nni.

²⁴ Sanäti Jesús bejn_{ga}. Xhidajl bejn sanajl_ni, luxh cagutääreni.

²⁵ Loj reben_xhidaalga yu' te gunaa ni agujc tzubitio'p ijz racxhuuni yälguidxbäi.

²⁶ Agudedduxhni trabajw, abahuii xhidajl doctoorni. Xlia'si abanij_tni guiraa nani rajpni, luxh xhet racnäjdini, alga rxuuruni.

²⁷ Sa'csi biejn diajgni xhini'c canii rebejn xcuent Jesús, gubig gunaaga nez dejt_z Jesús, guideb ne_n rebejn, bahual_ni xhajb Jesús.

²⁸ Cayuj_nni xhigab, naani: “Palga narä falä xhajbtisni, siacä.”

²⁹ Lagajc dxejc guläjz caxe' xtiej_nni, gucbeeza tiejxhni abirii xcäl_nracxhuuni.

³⁰ Gucbegajc Jesús yu' chu abasiaj_cni. Gubiregaj_cni ne_n reben_xhidaalga, räjpni:

—¿Chuni'c bahual_n xhabä?

³¹ Dxejcru räjp rexpejn_{pac}ni lojni:

—Rhuiilu ben_xhidaal cagutäälu, luxh naalu: “¿Chuni'c bahual_n xhabä?”

³² Sas cahuii Jesús nez ree, nez rec, te fini loj nani bahual_ni.

³³ Dxejc bidxejb gunaare, racejsni, sa'csi gucbeeni xhini'c guj_cni. Dxejc biäädni, bazuxhijb_ni loj Jesús, räbliini loj Jesús guira'ti ni bejn_ni.

- ³⁴ Dxejc räjp Jesús lojni:
—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.
- ³⁵ Canisijc Jesús si'c che bidzujñ renani birii rolijz dade' ni rnibee neñ xquidobáz rexpejn Israel. Räjpreni:
—Agujt xinxape'lu. ¿Xhicuent rusieedrulu Dad maestr?
- ³⁶ Dxejc che biejn diajg Jesús nani caniireni, räjpni lo dade'ga:
—Na'c guidxejblu. Bililajztis.
- ³⁷ Luxh dini nusaanru nij chu ninäni, Pedrtis näj Jacob näjza Juan bejtzni.
- ³⁸ Che bidzujñni rolijz dade'ga, bahuii Jesús biey ni cayujñ rebejn ni rbedxa' roon.
- ³⁹ Biu'tini räjpni:
—¿Xhicuent rujntu si'c? Gajd dxape're guet. Nagayejsini.
- ⁴⁰ Alga baxhiznäjrenini. Dxejc gunibee Jesús birii guiraa rebejnğa. Dxejcti huinäni xcuzañ dxape'ga con renani sanäni. Biu'reni cadre naga' dxape're.
- ⁴¹ Gunaazni ñaa dxape'ga, dxejc räjpni:
—Talita cumi —nani säloj con xtiidxnu: Dxape', lojlu rniä, huistie.
- ⁴² Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga.
- ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

6

Che guyu' Jesús Nazare't (Mt. 13:53-58; Lc. 4:16-30)

- ¹ Dxejcro birii Jesús ro'c, huijni lajdxni, sanäzani rexpejn pacni.
- ² Che bidzujñ sabd, dxej nani rusilajz rexpejn Israel, gusloj caguluiini neñ xquidobáz rexpejn Israel. Bidxeloj xhidajl bejn nani biejn diajg rextiidxni, räjpreni:
—¿Caro bisieed niguiire guiraa recosre? ¿Xhi yälñajnre cua'ni ni'c rajc rujnni rextzunduxh Dios con ñaani?
- ³ ¿La xhet laadi carpinteer, xi'n Marii, bejtz Jacob, näj José, näj Judas, näjza Simón dee, ä? ¿La xhet reedi rbäz rebisianhuinni?
Luxh bidxechlajzreni lojni.
- ⁴ Dxejc räjp Jesús lojreni:
—Catis rinälajzreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.
- ⁵ Luxh di niajcdi niujñ Jesús xhidajl milaagwr ro'c. Tiopchontis beñracxhuu basiajcní, bazujñ ñaani yejcreni.
- ⁶ Bidxelo Jesús sa'csi di lajzreni nilii. Caguluiitini neñ guiraa reguejdxe' ni ria'n gajxh nejzga.

Baxhal Jesús tzubitio'p bejn ni rinajlni chaluiireni xtidx Dios (Mt. 10:5-15; Lc. 9:1-6)

- ⁷ Dxejcro gurejdxni guitzubitio'p xpejn pacni. Gusloj caguxhalni tiopgajreni; badeedzani yälñibee lojreni te guinibeereni loj rebeñdxab.
- ⁸ Gunibeeni xhet chanädireni lo nejz, ganaxhtis te yajg te sanäjreni. Di nungäjñ chanäreni nicla bisiuud, nicla yätxtiil, niclaza meel neñ dobdäjñ.
- ⁹ Nungäjñza xcaj gura'ch ni'reni, nägajc ga'preni tejtis gamangw, xhet tio'pdini.
- ¹⁰ Dxejcti räjpni lojreni:

—Cadrotis jiu'tu neṅ te guejdx, coljia'n neṅ tejtis yu' guiraa redxej ni chutu guejdxga.

¹¹ Palga yu' te guejdx cadre direni gusaan jiu'tu luxh di rlajzreni cuadi-ajgreni diidx ni sanātu, colrii guejdxga, colcuijb guxhuj ni'tu si'c te seen te gacheereni xhet laadi bejnreni. Rniliāpac lojtu, guxiiru trabajw ted rebeṅ Sodoma nāj rebeṅ Gomorra quela rebejṅ ni yu' guejdx cadre direni gusaan jiu'tu.

¹² Dxejc biriireni, sääreni. Cayābgajcreni nanabpac gusiejch lajz rebejṅ.

¹³ Gulääzareneni xhidajl beṅdxab dxejcti gudääbreni se't yejc xhidajl beṅracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesús, sa'csi guiralii rebejṅ calä'p xpala'nni. Dxejc räjp Herodes:

—Juan nani rutiobnis ahuäjs loj rebeṅgut, ni'c rajc rujnni remilagwre.

¹⁵ Sgail bejṅ räjp:

—Laa Elías ni gunii xtidx Diosni.

Sgailreni räjp:

—Laa te bejṅ ni rnii xtidx Dios, o sa' te rebejṅ ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejcn, luxh naj agubaṅsacni loj rebeṅgut.

¹⁷ Sa'csi lagajc Herodes gunibee biga' Juan, dxejc bacuaduurenini con cadenguuib neṅ latzguuib, xcäl_nasa'c Herodías. Herodías gujc chääl Lib, bejtz Herodes, dxejc cua' Herodes gunaaga si'c chäälni.

¹⁸ Räjp Juan loj Herodes:

—Xhet laadi rbäznäjlu chääl bejtzlu.

¹⁹ Ni'cni rdxechlajz Herodías loj Juan, luxh rlajzni ju'tnini, luxh di niajcdini

²⁰ sa'csi rdxejb Herodes Juan, sa'csi najnni beṅsa'c, beṅdxan najc Juan, ni'cni dini nusaan niujn Herodías latsiajni. Mase dini gachesa'c ni rnii Juan, rucuaadiagsa'cni xtiidxni.

²¹ Niluxh guyu' xmood Herodías. Che gojl laj Herodes, bayaanni rexpeljṅni ni rnibee, nājza rebejṅ nani sajz nez región Galilee.

²² Dxejcti biu' xindxa'p Herodías cadre cayajwreni, baya'ni nez lojreni. Bidxaglazduxh Herodes nājza rexpioozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rlajztislu loä, narä sunidxäni.

²³ Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

²⁴ Biriitini neṅ yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵ Huigajcni loj rei, sas gunabni lojni, räjpni:

—Rlazä gunidxgajclu loä yejc Juan ni rutiobnis. Neṅ te pla't baniidx yejcn.

²⁶ Dxejcti guc-huinuxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlajzni nudxojni nani gunab gunaaga lojni.

²⁷ Baxhalgajc rei te soldaad ni rcanäj ro'c, baxhalnini, te chaxiini yejc Juan.

28 Ni'c huij, dxejcti bagu'tni Juan nen latzguiib, biädnätini yejc Juan nen te pla't. Badeedtinini loj gunaaga. Dxejcti gunaaga badeednini loj xnanni.

29 Che biejn diajg rexpejn_{pac} Juan si'c, biädläsreni togoolga. Dxejcti bacua'tzrenini nen te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

30 Che gubi' renani baxha_l Jesús, bijreni diidx guiraa ni bejnreni nájza ni baluiireni.

31 Dxejc räjp Jesús lojreni:

—Col_{ta}a, xtebnu cho_{nnu} cadre rut rbäjzdi, guisilaaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni.

32 Dxejcti sääreni nen te canuu cadre rut rbäjzdi.

33 Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzuj_nreni loj Jesús nájza rexpejn_{pac}ni, dxejcti bidojpreni lojni.

34 Birii Jesús nen canuu, bahuiini loj be_nxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj.

35 Che goj_l gudxej, gubig rexpejn_{pac}ni lojni, räjpreni:

—Rut rbäjzdi ree, luxh agudxej naj.

36 Baxha_l rebejn te chääreni lo reguejdx, nájza re_nench, te chasiireni yätxtiil gauureni sa'csi xheti xhi gauureni ree.

37 Dxejc räjp Jesús lojreni:

—La'tu col_{de}ed xhi gauureni.

Dxejc räjpreni loj Jesús:

—¿Xhixh saj_l tiop gayuu meel yätxtiil chosiinu gauu guiraa rebe_nxhidajlre?

38 Dxejcti räjp Jesús lojreni:

—¿Bal yätxtiil rajptu? Col_{ch}ahuii.

Che gojnreni balni dxejc räjpreni:

—Gaii yätxtiil, nájza tiop bäj_l.

39 Dxejcru gunibee Jesús räjpreni loj guiraa rebejn:

—Col_cuej xcua-xcuaatu loj guixhaya'.

40 Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni.

41 Dxejcti cua' Jesús guigaii yätxtiilga nájza guiro'p bäj_lga, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bäj_l, badeednini loj rexpejn_{pac}ni te badeedrenini loj guiraa rebe_nxhidaalga.

42 Dxejc gudajw guiraareni, gudxaj xque'reni.

43 Dxejcru batojpreni tzubitiop dxij_m guidxadoo yätxtiil nájza bäj_l ni bia'n.

44 Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

45 Gunibee Jesús jiu' rexpejn_{pac}ni nen canuu, chägajcreni Betsaida, ni tre' dejtz nis stelaad, la_lni cagusadiidxni rebejn.

46 Che gulujx basadiidxnireni, sääni nen redane', sanabni lo Dios.

47 Cheni acayu' guxhij_n, yu' rexpejn_{pac}ni nen canuu galäi_i nis la_l ni suga' Jesús xtebni ro' nis.

48 Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadre sasajreni, r_lajzni ninijdni lojreni.

⁴⁹ Dxejc che bahuiireni sasaj Jesús loj nis, naareni pet te benmalni, ni'c guredxa'reni.

⁵⁰ Guiraareni bahuiireni lojni, bidxebduxhrene. Sas gunigajcni lojrene, räjpni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdxi bej, luxh laareni bidxeloduxhrene,

⁵² sa'csi direni niacbee xhini'c bennäj Jesús reyätxtiil. Guc najd lajzrene, ni'c direni niacbee.

Basiajc Jesús rebenracxhuu neñ guedx Genesare't

(Mt. 14:34-36)

⁵³ Gudejdrene lo nis, bidzujñrene lo yuj xten Genesare't. Ro'c bacuaduureni canuu ro' nis.

⁵⁴ Che biriireni neñ canuu, biembegajc rebejn Jesús,

⁵⁵ dxejcti birii rebejn guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgrene yu' Jesús riädnäreni rebenracxhuu.

⁵⁶ Niluxh cadrotis rij Jesús, neñ reguedxbäz, neñ reguedxro, näjza loj reñench, rguixhrene rebenracxhuu cadro rajc guii. Dxejcti rniabrene loj Jesús te gac caanrene xhajbni, niluxh biajc guiralii renani gudajn xhajb Jesús.

7

Nani runijt lastoo bejn

(Mt. 15:1-20)

¹ Dxejcti refarisee, renani najc benguidoo loj guedx Israel, näjza gaii rebejn ni ruluii leii, renani birii Jerusalén, bidojprene loj Jesús.

² Bahuiireni cayajw gaii rexpejn pac Jesús, luxh canii rebejn nacdXuudx naareni (dee säloj direni quilib naareni si'ctis ni rdiib naa reben lajdxrene). Ni'cni guniyajrene rexpejn pac Jesús.

³ (Guiraa rebejn xten Israel, näjza refarisee, sasanäj nani baluii rebengool ni yu' guedx Israelrene. Direni gauu palga direni quilib naareni balti huält.

⁴ Che rbi'reni rijrene lo guii, rguibsa'creni naareni, lojrene, ni'reni, dxejcti rajc rajwrene. Niluxh guyu' xhidajl costumbr ni sasanäj rureni, luxh yu' mood rguibrene rextrastrene näjza rexplooreni, näjza rextrastguibrene, näjza rexloonrene.)

⁵ Dxejc gunabdiidx refarisee näjza rebejn ni ruluii leii loj Jesús, räjpreni:

—¿Xhicuent di rexpejn pacu gun si'cni baluii rebengool, niluxh rajwrene guideb nacdXuudx naareni?

⁶ Dxejcti gunii Jesús lojrene räjpni:

—¡Ben guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni, niluxh lastooreni zitra suga' loä.

⁷ Xlia'si ruzuxhjbrene, sa'csi direni chanälajz narä.

Ruluiireni si'c xtiidx pac Dios nani rnii rebejn.

⁸ Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlru cos sa' redee.

⁹ Räjpza Jesús lojrene:

—Rusa'ntu xtidx Dios te risanäjtu recostumbr xtentu.

¹⁰ Sa'csi räjp Moisés: “Huinälajz xtadlu con xnanlu.” Räjpzani: “Suju'tpactu nani gudzubde yejc xtadni o yejc xnanni.”

11 Niluxh la'tu rniitu sajc gäb bejn loj xtdni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios).

12 La'tu ditu gusaan gunru bejn por xtdni nicla por xnanni.

13 Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

14 Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä.

15 Rexhicos yälrajw ni rajw bejn, dini gunijt bejn ga, rediidx ni rii nen lastoo bejn, näjza recos ni rujn bejn, ni'c runijt bejn ga.

16 Pal yu' chu rlajz guisieed, sucuadiajgni.

17 Dxejcti gula'reni loj rebenxhidaal, biu'reni nen yu'. Dxejc gunabdiidx rexpejn pacni loj Jesús xhi säloj cuent ni guniini.

18 Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' nen bejn digacdi gunijtni lastoo bejn, ä?

19 Sa'csi dini jiu' nen lastooni; riu'ni xque'ni, rdejdtini.

Si'c guniini te baluiini guira'ti xhicos najc naya.

20 Dxejc räjpni:

—Rediidx ni rii nen lastoo bejn, näjza recos ni rujn bejn, ni'c sii runijt lastoo bejn.

21 Sa'csi nen lastoo rebejn rii rexhigabguijdx, näjza yälresnä j chääl sa'ni, yälresnä j ni xhet najcdi chääl ni, yälrgu't sa'ni,

22 yäl gubaan, yälrlajzni ga'pni xhixhten bejn, yäl latsiaj, yäl rusgueeni, yäl xheti xtu j lojni, yälrdxechlajz, yälrudzubde sa'ni, yäl nayeclajzni, yäl gualajz.

23 Guiraa reyäl latsiajre nen lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús

(Mt. 15:21-28)

24 Dxejc biriini ro'c, sääni nez guedx Tiro näjza nez Sidón. Ro'c bia'nni nen te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni.

25 Biengajc diajg te gunaa ro'c yu' Jesús. Xindxape' gunaaga yu' bendxab nen lastooni. Bidzujn gunaaga, bazuxhijbni lo Jesús.

26 Gunaaga rnii griegw, najcni ben Sirofenicia. Gunabni lojni guinibeeni guirii bendxabga nen lastoo xi'nni.

27 Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

28 Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' nen mex rajw nani rtejb ro' rebiuux.

29 Dxejcti räjp Jesús lojni:

—Laaca rniliilu. Huij rolijzlu. Abirii bendxab nen lastoo xindxape'lu.

30 Luxh che bidzujn gunaare rolijzni, a dxape' naga' lo da'. Gucbegajc gunaaga abirii bendxab nen lastoo dxape'ga.

Basiajz Jesús te bengop

31 Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee.

32 Biädnä gaii bejn te niguii ni nacia't diajgni lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga.

33 Dxejcti badzucajnini loj rebejn. Baquitzgajcni rebicueñaani nen diajgni, dxejcru batiobxhejn ni, gudajntini lujdxni.

- ³⁴ Bahuiini xhaguibaa, bazaa lajzni, dxejc räjpni:
—¡Efata! —nani säloj bixal.
- ³⁵ Dxejcru bixalgajc rediajgni, gubangajc lujdxni, gunisa'cni.
- ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga.
- ³⁷ Rdxeloduxhreni, räjpreni:
—Guira'ti laaca rujnni; ruxhalni diajg rediagcua't, luxh rusniini regop.

8

Bayaan Jesús tajp mil bejn (Mt. 15:32-39)

- ¹ Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejn̄pacni ni rinajlni, räjpni lojreni:
- ² —Rulazlazä rebejn̄re, sa'csi ñaj rajc choñ dxej tre'reni loä, luxh xhet yu'di gauureni.
- ³ Niluxh palga guxhaläreni rolijzreni, xliajzreni, sidxajgreni lo nejz; sa'csi yu' renani zijtru siädreni.
- ⁴ Dxejcru räjp rexpejn̄pacni lojni:
—¿Caro chaca'nu yätxtiil te cha xque' rebejn̄re ree, cadre rut rbäjzdi?
- ⁵ Sas gunabdiidx Jesús lojreni:
—¿Bal yätxtiil rajptu?
Dxejcru räjpreni:
—Gajdztisni.
- ⁶ Gunibee Jesús gurej reben̄xhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn̄pacni te guteedrenini loj reben̄xhidaal. Bateedtireni yätxtiilga lo reben̄xhidaalga.
- ⁷ Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj reben̄xhidaalga.
- ⁸ Dxejc gudajwreni, gudxaj xque'reni. Dxejc batojp rexpejn̄pac Jesús gajdz dxijm̄ reyätxtiil ñaj rebäj̄l dxuc ni bia'n.
- ⁹ Niluxh renani gudajwga najcreni si'cti tajp mil bejn. Dxejcti basadiidxnireni.
- ¹⁰ Biunägajc Jesús rexpejn̄pacni neñ canuu, biädreni nez Dalmanuta.

Gunab refarisee te senro loj Jesús (Mt. 16:1-4; Lc. 12:54-56)

- ¹¹ Biäd refarisee, renani najc reben̄guidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.
- ¹² Dxejcti bazaa lajz Jesús neñ lastooni, räjpni:
—¿Xhicuent rlajz rebejn̄ ni nabajn̄ ñaj fii gac resenro xten Dios? Rniliäpac lojtu, di rebejn̄ ni nabajn̄ ñaj fii nicla tej sen xhaguibaali.
- ¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduur xten refarisee (Mt. 16:5-12)

- ¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu.
- ¹⁵ Cagulijdx Jesús rexpejn̄pacni, räjpni lojreni:
—Col̄susin, col̄nati levaduur xten refarisee, col̄natiza levaduur xten Herodes. (Nalajznu, xtiidxreni najc si'c levaduur.)

16 Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

17 Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajd lastootu?

18 ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj?

19 Che gula'a guigaii yätxtiil te gudajw gaii mil niguii, ¿bal dxijm yätxtil biujy batojptu?

Sas räjpreni lojni:

—Tzubitio'pni.

20 —Che gula'a guigajdz yätxtiil te gudajw tajp mil bejn, ¿bal dxijm yätxtil biujy batojptu?

Sas räjpreni:

—Gajdzni.

21 Dxejc räjpni lojreni:

—¿La gajdtu gachesa'c xhi benä?

Basiajc Jesús te lotiä'p Betsaida

22 Bidzunäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga.

23 Dxejc gunaazni naa lotiä'pga, guläänini nen guejdx. Che batiobxhejn ni nen rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

24 Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

25 Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn.

26 Dxejcti baxhal Jesúsni rolijzni, räjpni:

—Basquejn, huijga rolijzlu, na'c jiu'lu nen guejdx, na'c gäblu xhi gujclu lo rebejn ni yu' nen guejdx.

Basule' Pedr Jesús najc Crist

(Mt. 16:13-20; Lc. 9:18-21)

27 Birinäj Jesús rexpejn pacni lo reguejdx ni ria'n nez Cesarea xten Filipo. Lalni sasajreni lo nejz räjp Jesús loj rexpejn pacni:

—¿Chuni'c rnii rebejn nacä narä?

28 Sas räjpreni lojni:

—Yu'reni rnii najclu Juan ni batiobnis, yu'zarenii rnii najclu Elías, yu'zarenii rnii najclu te rebejn ni gunii xtidx Dios.

29 Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

30 Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

31 Dxejcti gusloj Jesús caguluiini rexpejn pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebejngool ni najc guxhtis nen guedx Israel narä, näjza renani rnibee loj

rebixhojz, näjza rebejn ni ruluu leii: sugu'treni narä, luxh ni riojn dxej guibansacä lo rebengut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpejnpacni. Dxejc gudilnäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebenxhidaal con reni najc xpejnpacni, räjpni lojreni:

—Palga yu' chu rlanj gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo crujz, sujiädnejni narä.

³⁵ Sa'csi nani rlanj gusläa xcälñabajñni, sunijtni xcälñabajñni. Luxh nani runijt xcälñabajñni xcälñasa'c narä, xcälñasa'c xtidxä, siliaapac xcälñabajñni.

³⁶ Xlia' ga'p bejn guiraloj lo guedxliujre palga nitni lo Dios par tejpas.

³⁷ Xhet gacdi gudeed bejn te guibanäjni Dios.

³⁸ Nani guituinäj narä con rextidxä naj, cheni najc rebejn bendojl, narä, Xi'n Dios nani gujc Niguui, situinäázani che jiädnäá reangl xten Dios che jiälää lo xcälrdimbicha' Xtadä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcälñnibee Dios.

Gubixhlo Jesús garenca

(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacob, näjza Juan, laatisreni huinäni yejc te danro. Ro'c gubixhlojni garenca lojreni.

³ Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni.

⁴ Dxejc baluiiloj Elías näjza Moisés lojreni, cayuinäjreni Jesús diidx.

⁵ Sas räjp Pedr loj Jesús:

—Dad, laaca dxunnu ree. Naj jiennu choñ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhreni.

⁷ Dxejc biääd te za bejn balaa yejreni. Neñ zaga biejn xse' te ni räjp:

—Dee najc xi'nä nani sanälazä, colcuadijg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibanxgaasi Xi'n Dios nani gujc Niguui lo rebengut.

¹⁰ Basälcheereni rediidxre neñ lastooreni. Dxejcru canabdiidx lo sa'reni xhicha säloj guibansacni lo rebengut.

¹¹ Sas gunabdiidxreni lojni, räjpreni:

—¿Xhicuent rnii remastr xten leii naquiinpac jiädxgaa Elías?

¹² Dxejcti bazejcnii diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtz xcuent Xi'n Dios ni gujc Niguui, sidejdni trabajwduxh, rutza jiidini?

¹³ Luxh narä rniä lojtu, abiääd Elías, luxh bennäjrenini si'ctis ni rlanjreni, si'cpac ni caj loj guijtz ni rusule' xcuentni.

Basiajc Jesús te biuux ni guyu' beṇdxab neṇ lastooni
(Mt. 17:14-21; Lc. 9:37-43)

¹⁴ Che asiäädreni cadre tre' sgaii rexpejṇpac Jesús, bahuiireni loj xhidaltro bejṇ ni tre' lojreni, luxh cayeinäj rebejṇ ni ruluui leiireni.

¹⁵ Che bahuii guiraa rebejṇ loj Jesús, bidxeloduxhreni, baxuṇreni, huiye'tzreni xchan lojni.

¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beṇxhidaalga, räjpni:

—Dad, ree siädnää xi'nä lojlu, yu' beṇdxab neṇ lastooni, nani rujn najcni gop.

¹⁸ Cheni rniaaznini, rutienta'ni xi'nä, luxh riduxh bitzuṇ ro'ni, näjza rauya'ni ro'ni, luxh cabijdzni. Aräpä loj rexpejṇpacu cuääreni beṇdxabga, niluxh di niajcdi nibäärenini.

¹⁹ Dxejcti gunii Jesús lojreni, räjpni:

—La'tu, bejṇ ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Cołtanäni loä!

²⁰ Dxejc biädnäreni biuuxga lojni. Che bahuii beṇdxab lo Jesús, basnijni bi'nga, basälta'tinini lo yuj. Sädiidxi, luxh caṇii bitzuṇ ro'ni.

²¹ Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz.

²² Balti huält rusälñini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴ Guredxa' xtad bi'nga, räjpni:

—¡Rililazä! Gucnäj narä te chaliiru lazä.

²⁵ Che bahuii Jesús bixa't xhidajl bejṇ lojni, gudidxa'ni lo beṇdxabga räjpni lojni:

—Beṇdxab ni rujn gop, narä canibeä, birii neṇ lastoo bi'nga. Na'cru chulu neṇ lastooni.

²⁶ Dxejcru guredxa' beṇdxabga, luxh basnibzejsni bi'nga, dxejcru biriini neṇ lastooni. Astoo te beṇgut bia'n bi'nga ro'c. Xhidajl rebejṇ räjp:

—Agujtni.

²⁷ Dxejc gunaaz Jesús naa bi'nga guläsnini. Guzuliiti bi'nga.

²⁸ Dxejcti che abiu' Jesús neṇ yu', gunabdiidx rexpejṇpacni lojni:

—¿Xhicuent di niajcdi nibäänu beṇdxabga?

²⁹ Dxejc räjp Jesús lojreni:

—Di gacdi cuäätu sa' beṇdxabre palga ditu cuedx-guinab lo Dios, palga ditu gucuaṇxgaa.

Gunisac Jesús xho guetni
(Mt. 17:22-23; Lc. 9:43-45)

³⁰ Dxejc biriireni ro'c, gudejdreni Galilee. Luxh di rrajz Jesús niacbee rebejṇ sadejdreni nejzga,

³¹ sa'csi caguluiini rexpejṇpacni. Cayäjpni lojreni: “Xi'n Dios ni gujc Niguui sidejdni ladzṇaa rebejṇ, niluxh sugu'trenini. Che guiza' choṇ dxej gujtni, sibajṇni stehuält.”

³² Niluxh laareni direni niacbee xhini'c guniini, bidxejbzarenini niniabdiidxi lojni.

¿Chuni'c sajcru?

(Mt. 18:1-5; Lc. 9:46-48)

³³ Bidzujntireni Capernaum. Che biu'ni nen_u yu' räjpni lojreni:

—¿Xhini'c cagusiejytu lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c sajcru lojreni.

³⁵ Sas gurej Jesús, dxejc gurejdxni guitzubitio'p xpejn_upacni, räjpni lojreni:

—Palga yu' chu rlanj gasajcru lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbáz, huinänini galäiireni. Dxejc gudääzni biuxbázga, räjpni lojreni:

³⁷ —Chutis ni gacnäy te rebiuxe're sa'csi rinälajzni narä, sacnäjni narä, luxh nani gacnäy narä, xhet narätis gacnäjtini, näjza xtadä nani baxha_l narä racnäjni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bejn ni rbää be_undxab con xcä_lrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹ Dxejc räjp Jesús lojni:

—Na'c gudxo_untu gunni si'c sa'csi bejn nani rujn milagwr con xcä_lrnibee lää digacdi guiniyagajcni narä.

⁴⁰ Nani di guidxagdij_l nuunu, xlaadnu yu'ni.

⁴¹ Rniliäpac lojtu, chutis ni guniidx te bas nis lojtu sa'csi najctu xpejn_upac Crist, siguijx Diosni xcuent nani bejn_u.

Nani rujn jiajb bejn lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä nen_u dojl, suga_l te guimolin yejn_uni dxejcti gucuareneni lo nisdoo.

⁴³ Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusa_lreni luj gabijl, loj bajl ni di jiuui,

⁴⁴ cadro diza xpisiujgreni guet, diza bajl jiuui.

⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chääl_u gabijl, lo bajl ni di jiuui,

⁴⁶ cadro di xpisiujgreni guet, diza bajl jiuui.

⁴⁷ Luxh palga tej balojlu gun gunlu dojl, gulääni: hueenru chääl_u cadro rnibee Dios natiä'p lojlu quela sojb guiro'p balojlu chääl_u gabijl,

⁴⁸ cadro di xpisiujgreni guet, diza bajl jiuui.

⁴⁹ 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn_u lo Dios.

⁵⁰ Hueen najc sejd, luxh palga agudejd yäl_unadzij yejcni, ¿xho guntu te gacsacni nadzij? Colyajc nadzij la'tu, colguiba_unnäsa'c sa'tu.

10

Baluu Jesús xcuent rä_lru_o'n sa'ni

(Mt. 19:1-12; Lc. 16:18)

¹ Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn_u lojni stehuält, sas guslosacni caguluiinireni si'ctis ni ruluiinireni.

² Sas referisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

- ¿La laaca gun niguui gusaan cháälni, ä?
- ³ Dxejc laani bazejcní diidx, rájpní lojrení:
—¿Xhini'c guníbee Moisés guntu?
- ⁴ Dxejcru rájprení:
—Moisés basaan gudeedni te guitz gusaan cháälni che guro'nnini.
- ⁵ Dxejc Jesús rájpní lojrení:
—Sa'csi guyaa lajztu, ni'cni bacuaa Moisés diidxga lojtu.
- ⁶ Niluxh che birixtiej beñ guedxliuj, “niguui con gunaa benchee Diosrení.”
- ⁷ “Ni'cni te niguui siriini loj xtadni, loj xnanni te cuáznájni cháälni.
- ⁸ Niluxh renani gujc tiop beñ sajcreni si'c tejsi beñ”, dirureni gac tiop beñ, si'c tejsi beñ gacrení.
- ⁹ Na'c gudzucaj beñ lo sa beñni nani abachaag Dios lo sa'ni.
- ¹⁰ Che biu'reni neñ yu' gunabdidxsac rexpejñpacni lojni xcuent rediidxre.
- ¹¹ Dxejc rájpní lojrení:
—Chutis niguui ni gusaan cháälni, sas guchñaani ste'cani, rujnni dojl.
- ¹² Niluxh palga gunaa guro'n cháälni sas guchñaani ste'ca niguui, rujnzani dojl.

Gunab Jesús gunle' Dios yejc rebiuxbáz
(Mt. 19:13-15; Lc. 18:15-17)

- ¹³ Biädñäza rebeñ biuxbáz lojni te gutzuub Jesús ñaani yejcreni, sas gudidxa' rexpejñpacni lojrení.
- ¹⁴ Che bahuii Jesús xhi cayujñ rexpejñpacni, bidxe'chni rájpní lojrení:
—Colsaan jiäd rebiuxbáz loä. Na'c gudxojtñureni, sa'csi xcälñíbee Dios najc xten rení najc nadolajz si'c najc biuxbáz.
- ¹⁵ Rñiliäpac lojtu, chutis ni rlajz jiu' lo xcälñíbee Dios nanab guzobdiajgrení xtidx Dios si'c ruzobdiajg rebiuxe' xtidx xtadrení. Palga dini gun si'c, dini jiu' lo xcälñíbee Dios.
- ¹⁶ Dxejcti gudääz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

Te bi'n ni rapduxh guninäj Jesús
(Mt. 19:16-30; Lc. 18:18-30)

- ¹⁷ Che birii Jesús loj xnejzñi, ruxuñ te niguui biäd lojni, bazuxhijbñi. Dxejcti gunabdiidx niguiiga lojni rájpní:
—Dad, beñsa'c, ¿xhini'c gunä te xca'ä yälñabajñ par tejpas?
- ¹⁸ Sas rájpní Jesús lojni:
—¿Xhicuent rñiilu loä beñsa'c? Tejtisni najc beñsa'c; Diostis najc beñsa'c.
- ¹⁹ Najñlu xhini'c guníbee Dios gunni: “Na'c guesñäjlu cháäl sa'lu, na'c ju'tlu, na'c cuanlu, na'c gusgueelu chutis, na'c cuäálu yejc xhixten sa'lu, huinälajz xtadlu, xnanlu.”
- ²⁰ Dxejc rájpní niguiiga lojni:
—Dad, guiraa redee cayunä cheni gucäli bi'n.
- ²¹ Che bahuii Jesús lojni, huinälajznini, rájpní lojni:
—Tejtis nani cayäädx gunlu. Huij, huito' guiraa xhixtenlu, badeed xcuentni loj rebeñ nani diga'p, dxejcti guniidx Dios xhidajl xhi ga'plu xhaguibaa. Gudanañl narä, mase tedlu trabajw.
- ²² Dxejc che bieñ diajgní diidxre, guc-huin lajzñi, xhet laadi yu'ni siini, sa'csi naclenduxh xhixtenni yu'.
- ²³ Dxejc bahuii Jesús guideb gabi lojrení, rájpní loj rexpejñpacni:
—Naganduxh jiu' rebeñ nani yu'duxh xhixtenni lo xcälñíbee Dios.
- ²⁴ Dxejc bidxelo rexpejñpacni che bieñ diajgrení rextiidxni. Dxejc rájpní Jesús lojrení stehuält:

—¡Aitu xi'nä!, lacti naganduxh gusaan renani sanälajz xhixtenni guinibee Diosreni.

²⁵ Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxhreni, räjpreni lojni:

—¿Chuxhni'c sajc laa lo dojl?

²⁷ Dxejc bahuii Jesús lojreni, räjpni:

—Bejn digacdi guslaa sabejn, Diostis rajc ruslaa bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajlnu luj.

²⁹ Dxejc räjp Jesús:

—Rniliäpac lojtu, chutis nani cuälaz rolijzni, rebejtzni, rebisiajn, xtdni, xnanni, chäälni, rexi'nni, rexyujni, xcäl'nasa'c narä, näjza xcäl'nasa'c xtidx Dios,

³⁰ sica'ni lo guedxliujre te gayuu huält xhidajlru. Sica'ni rolijzni, rebejtzni, rebisiajn, xnanni, rexi'nni, rexyujni. Sisiunajlrenini naj, dxejc xhaguibaa sica'ni yäl'nabajn par tejpas.

³¹ Xhidajl rebejn nani sajc lo guedxliujre xhet sajc direni xhaguibaa; niluxh rebejn nani xhet sajc di lo guedxliujre, xhaguibaaru gasajc reni.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcru sasaj Jesús, nijdni lo rexpejn pacni sääreni Jerusalén, luxh cadx-elojreni. Cadxejbza rebejn nani sanajlreni. Dxejcti guläsac Jesús rexpejn pacni lo rebejn, gusloj cayäjpni lojreni guira'ti nani sacni.

³³ Räjp Jesús:

—Sionnu Jerusalén, luxh narä, Xi'n Dios nani gujc Niguui, sidedä ladznaa rebixhojz nani rnibee näjza rebejn ni ruluii lei. Luxh sinibeereni guetä. Suteedreni narä lo rebenzajt nani digac xpejn Israel.

³⁴ Suxhisnäjnreni narä, siguijnreni narä, sutiobxhejnzaren loä, dxejcru sugu'treni narä. Che riojn dxej sibañsacä.

Gunab Jacob näjza Juan te yäl'nasa'c

(Mt. 20:20-28)

³⁵ Dxejcti gubig Jacob näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—¿Xhini'c rlajztu gunä xcuent la'tu?

³⁷ Räjpreni:

—Cue tejnu cuä'lu ladbee, xteenu cue cuä'lu ladbägw che acanibeelu.

³⁸ Dxejc räjp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä.

⁴⁰ Te cue tejtu ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacob näjza loj Juan.

⁴² Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxagljaz gasajcrueni lo rebejn. Luxh rebejn ni sajc rnibeduxhrene lo rebejn.

⁴³ Xhet si'c di guntu la'tu. Chutis nani rlanj gasajcru lojtu, riäjł gacni mos lojtu.

⁴⁴ Luxh chutis la'tu nani rlanj gasajcru, riäjł gacni xmos guiraatu.

⁴⁵ Di Xi'n Dios ni gujc Niguii niääd, te ga'ptisni mos, biäädzani te quiixni con xcälnabajnni te laa xhidajł bejn lo dojl.

Basajc Jesús Bartimeo, ni natiä'p lojni

(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejn pacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn.

⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸ Xhidajłreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas rołca xhablajzni gudixhni, huisuliini, biäädteni lo Jesús.

⁵¹ Dxejc räjp Jesús lojni:

—Naja', ¿xhini'c rlanjzlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuini. Sanajłtini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujnreni gajxh Jerusalén, gudejdreni neñ reguedx Betfagé näjza neñ guedx Betania nez cuä' dajne' ni laa dan Oliib. Baxhal Jesús tiop xpejn pacni,

² räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxältu te bure' ni caduu. Gajd bejn cuibni. Colxhečni, coltanägajcni.

³ Palga yu' chu naa lojtu: “¿Xhicuent rujntu si'c?” Colye'tztis: “Dad caqui-inni.” Dxejc suxhalgajcni bure'ga ree.

⁴ Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini.

⁵ Gaii bejn ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejn ga si'cni räjp Jesús lojreni gäbreni. Basangajc rebejn ga sanäreni bure'ga.

⁷ Dxejcru biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga.

⁸ Xhidajłza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:
—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni.

¹⁰ Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejn pacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni

(Mt. 21:18-19)

¹² Che bara yääl, biunejzreni Betania. Dxejcti gusloj calaan Jesús,

¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc.

¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejn pacni.

Gulää Jesús renani ruto' näj renani rsii nen guidoo

(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujnreni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guideoga. Niluxh batiejxhni rexmex renani ruchaa meel, näjza reyagxhil xten renani ruto' paloom.

¹⁶ Diruni nusaan nidednäjreni xhicos nez nen guideoga.

¹⁷ Dxejc caguluiinireni, räpgajcni lojreni:

—¿La et screedi caj loj guiijt? “Xyu'ä sirilaj yu' cadre rminab guiraa rebenguedxliuj lo Dios.” La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxelox rextidx Jesús.

¹⁹ Che biu' guxhijn, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani.

²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

²² Dxejcti gunii Jesús räjpni lojni:

—Colchalilajz Dios.

²³ Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini.

²⁴ Ni'cni rniä lojtu, xhitis nani guiniabtu lo Dios che rninäjtni, colchalilajz xca'tuni, dxejc sica'tuni.

²⁵ Luxh che guiniabtu Dios, palga yu' chu loj rdxechlajztu, colsiäjz lajztu, te näjza Xtadtu nani yu' xhaguibaa gusiäjz lajztojtutu.

²⁶ Palga ditu gusiäjz lajztu con resa'tu, diza Xtadtu nani yu' xhaguibaa gusiäjz lajzni rextojltutu.

Yälrnibee xten Jesús

(Mt. 21:23-27; Lc. 20:1-8)

²⁷ Sas bidzun sacreni guedx Jerusalén. La_l ni sasaj Jesús nen guidoro, rebixhojz nani rnibee, nájza rebejn ni ruluii leii, nájza reguxhtis gubig lojni.

²⁸ Rájpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹ Dxejc rájp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre.

³⁰ ¿Chu baxhal Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, rájpreni:

—Palga jie'tznu “Dios”, naani “¿xhicient ditu nililajz xtiidxni?”

³² Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, rájpreni loj Jesús:

—Dinu guidon.

Sas rájp Jesús lojreni:

—Dizana guiniä xhi yälrnibeere rapä runä redzuunre.

12

Te xcuent rebenguijdx ni rbäzlaa

(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni ruluii, rájpreni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadre jiä't uubga. Dxejcti bejn ni te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt.

² Che bidzujn xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäj_l xca' bejnga.

³ Dxejc rebejn ni rbäzlaa ro'c gunaazreni mosga, gudijnrenini, luxh bazejrenini siini ganaxni.

⁴ Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni.

⁵ Dxejc baxhal bejnga stee mos, dxejc bagu'trenini. Baxhalni xhidajlrurenini. Gaii gudilguijdxreni, sgaaini bagu'treni.

⁶ 'Yu'za tejtis xi'nni, luxh sanälajznini. Por lult nájza xi'nni baxhalni, naani: “Siucareni xi'nä.”

⁷ Dxejc rebejn nani rbäzlaa ro'c rájp loj sa'reni: “Dee najc laa ni jiannäj ree. Coltaa, guigu'tnuni, te xca'nu yujre.”

⁸ Sas gunaazrenini, bagu'trenini. Guläätirenini lo yujga.

⁹ ¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

¹⁰ ¿La gajdtu gol guijtz ni rnii scree?

Guij nani guläcaj renani runchee yu', ni'c agujc maestr ni guzuj galoo.

¹¹ Dad xtenu bejn scree, cos sacduxhni nezlojnu.

¹² Dxejc rlajz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³ Dxejcti baxhalreni gatii xpejn refarisee näjza gatii xpejn Herodes loj Jesús te gula'tzreni don xho gac guiniaazreni Jesús.

¹⁴ Dxejcti biädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj ruluiipaclu xhini'c rlajz Dios gun bejn. ¿La laaca quiix bejn reimpuest lo xcubeer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtü narä scree? Coltanä te meelga loä, te fiä lojni.

¹⁶ Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

¹⁷ Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn ga con xtiidxni.

Yälriabdiidx xcuent yälrbansacni lo rebengut

(Mt. 22:23-33; Lc. 20:27-40)

¹⁸ Sas biädhuii resaducee loj Jesús. Resaducee najc rebejn nani rnii di rebengut guibansac. Dxejc gunabdiidxreni lojni, räjpreni:

¹⁹ —Dad, xleii Moisés ruluii loonu, palga guet te niguii luxh gusa'nni chääl ni ruti xi'nni, nanabpac xca' bejtzni chääl ni, te chu xi'nni con laani lacua niu' xi'n tobejtzni.

²⁰ Guyu' gajdz niguii, bejtz najc reni. Sas cua' niguigalooga chääl ni. Che gujtni ruti xi'nni.

²¹ Dxejcti cua' ni rojppa gunaaga. Che gujtni, rut gajc di xi'nni. Si'cza gusajc ni riojnga.

²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtzta gunaaga.

²³ Guigajdzreni guläznäjreni gunaare. Cheni guibansacreni lo rebengut, ¿chu chääl gacni?

²⁴ Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yälriabee xten Dios.

²⁵ Che guibansacreni loj rebengut, direni guchnaa, rutza gudeedtireni te guchnaaren. Niluxh sajc reni si'c najc rexangl Dios nani yu' xhaguibaa.

²⁶ Palga canabdiidxtu la rbansac rebengut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen bajl, räjpni: “Narä nacä Xtios Abraham, Xtios Isaac, Xtios Jacoob.”

²⁷ Palga Dios najc Xtios rebejnre, direni gac bengut, nabañnjreni Dios. Et laadi najc xhigabtu.

Yälriabee ni sajcru

(Mt. 22:34-40)

²⁸ Dxejcru bidzujn tej rebejn ni najn leii, biejn diajgni xhi canii reni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcru lo guiraaren?

²⁹ Dxejc räjp Jesús lojni:

—Mandamient nani sajcru loj guiraaren najc dee: “Bacuadiajg luj, guejdx xten Israel, Dad Xtiosnu, Dad tejtis najcni.

³⁰ Chanälajzlu Dad Xtioslu guideb lastoolu, näj xaimlu, näj guideb xcäriejnlu, näjza guideb xcälñadiplajzlu.”

³¹ Sigajcza najc mandamient ni rojpga: “Huinälajz sabejnlu si'ctis sanälajzlu lagajc luj.” Redee najc remandamient nani sajcro loj guiraareni.

³² Dxejcti räjp bejnğa ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

³³ Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcälñadiplajzni, luxh chanälajzni resabejnni sigajc laani. Redee sajcro loj ni rujn bejn che rudeedreni gojn lo Dios.

³⁴ Che bahuui Jesús laaca guniini, räjpni lojni:

—Guxii cayäädx te jiu'lu loj xcälñabee Dios.

Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús neñ guidoro, räjpni:

—¿Xho mood rnii rebejn ni najn leii Crist najc xi'n David?

³⁶ Sprit Dxañ xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebeñxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lalni caguseedni rebejn, räjpni lojreni:

—Colsusin, na'c gu'chtu loj rebejn ni ruluii leii. Laareni rlanj sanäj relad-siool xtenreni. Rdxagljazreni rnii bejn lojreni nez lo reguii.

³⁹ Rlajzareneni cuereni cadre rbej renani sajcro neñ reguidoo näjza cadre ru' relanij.

⁴⁰ Rudzucjzareneni xhixten rebiuud, rniizareneni xhidalduxh diidx che rolreni le', te rusäuureneni loj rebejn. Castigwroru gac redee.

Gojn xten te biud prob

(Lc. 21:1-4)

⁴¹ Dxejcti gurej Jesús cuä' caj cadre rusäl bejn gojn. Cahuiini cagusäl rebejn meel neñ cajga. Xhidajl reni rajp cagusäl xhidajl meel nenga.

⁴² Che biäd te biud prob, basälni tiop melbäz ni sajci si'cti tej centaab.

⁴³ Dxejcru gurejdx Jesús rexpejn pacni, räjpni lojreni:

—Rniliäpac lojtu, biud probre basäl xhidajlru lo guiraa renani basäl neñ cajre,

⁴⁴ sa'csi guiraareni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

13

Gunii Jesús sibijl guidoo

(Mt. 24:1-2; Lc. 21:5-6)

¹ Cheni sariireni neñ guidoro, räjp tej rexpejn pacni lojni:

—Dad, bahuui lacti reguij, lacti reyu'.

² Dxejcti räjp Jesús lojni:

—¿La rhuiilu loj reyu're? Nicla tej guij dijia'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Olib, cahuiini nez ro' guidooga. Che sugaxhtebreni, gunabdiidx Pedr näj Jacob näjza Juan näjza Andrés lojni, räjpreni:

⁴ —Gunii loonu, ¿guc gac dee? ¿Xhi guihuiinu te gacheenu asiäddzungajxh soob guiraa rediidxre?

⁵ Dxejcti gusloj gunii Jesús lojreni, räjpni:

—Colhuii, te rut gusgueedi la'tu,

⁶ sa'csi xhidalduxh bejn jääd con laä, gäbreni: “Narä nacä Crist”, luxh niisireni si'c, susgueezareni xhidajl bejn.

⁷ 'Che jiejn diajgtu yu' guer näj yälnadxeeb xten guer, na'c guidxejbtu. Nanabpac gacni; et dxejcdi nitloj guedxliuj.

⁸ Säjs naciön yejc sanaciönni, näj yälnibee yejc sayälnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

⁹ 'Dxejc la'tu col_{susin} sa'csi sutedreni la'tu ladz_{naa} reguxhtis, siguijnzareni la'tu neñ reguidoo. Sacrejdxtu lo regubieer näjza loj rereii xcäl_{nasa}'c narä, te si'c gac guiniitu xtidxä lojreni.

¹⁰ Nanabpac guirechxgaa xtidx Dios loj guiraa reben guedxliuj.

¹¹ Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col_{nii} nani jäjtis yejcti dxejc, sa'csi xhet la'ditu ni guinii, Sprit D_{xan} xten Dios ni guinii.

¹² Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiiux yejc rexcusajnni te guet reguzajnga.

¹³ Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcäl_{nabaj}nni.

¹⁴ 'Che fiitu loj nani najc yälrdechlejz, nani najc yälrunitloj, nani gunii Daniel ni gunii xtidx Dios. Che fiitu nani suga' cadre di nunyäj_l suuni, dxejcti suguxuñ renani yu' nez Judea chääreni nez neñ redajn. (Nani go_l guijzre sugacbeenini.)

¹⁵ Bejn nani suga' yejc yu' na'c jäjt_{ni} jiu'ni neñ te yu' xca'ni gaii xhixt_{enni}.

¹⁶ Nani yu' loj n_{iaa}, di gal jäjt te xca'ni xhablajzni.

¹⁷ ¡Aii! Xhiza nalas chu regunaa ni nuu báz, luxh renani rusiä' xi'nni, neñ redxejga.

¹⁸ Col_{nab} loj Dios na'c sactu scree neñ rebäinaj_l.

¹⁹ Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni.

²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejn_{ni} nani aguleni.

²¹ 'Dxejc palga yu' chu naa lojtu: “Colhuii, aree Crist”, o “Colhuiire, ani suga' rec”, na'c chalilajztuni.

²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueer_{eni}, te palga sajcni, r_{lajz}reni gusgueelireni renani agule Dios.

²³ Ni'cni la'tu col_{susin}; agunixgää lojtu guira'ti ni gac.

Xho gac che jääd Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴ 'Neñ redxejga, cheni luux retrabajwduxhga, sicäy_l lo gubijdx, luxh diru bäi gusanij.

²⁵ Sitejb rebal_{xhaguibaa}, sinibsejs recos nani nasnä_j rebal_{xhaguibaa}.

²⁶ Dxejcti suhiii rebejn loä, Xi'n Dios nani gujc Niguii, siälä neñ reza guideb yälrnibeduxh xtenä, näjza xcäldimbicha'a.

²⁷ Dxejcti guxhalgacä rexanglä jiädtojpreni renani guleä guideb lo guedxliuj, cat nalooli guedxliuj näjza cadre nalooli guibaa.

²⁸ 'Colguisieed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguij asadzun_gajxh.

²⁹ Sigajcza, che fiitu acayajc recosre, sacbeetu asiädgaxhä, ameer guidzunä.

³⁰ Rniliäpac lojtu, rebejn ni nabajn dxejc, direni nitloj, fixgaareni gac recosga.

³¹ Sinitloj guibaa näjza guedxliuj, rextidxä di nitloj.

³² 'Naj, rut najndi gac gac recosga, nicla rexangl Dios ni yu' xhaguibaa, niclaza narä Xi'n Dios, Xtradätis najn.

³³ 'Colhiii, col_susiñ, colnab loj Dios, sa'csi ditu gan gac guidzujñ redxejga.

³⁴ Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susiñ nani canäj rolä'.

³⁵ Si'cza col_susiñ, sa'csi ditu gan gac jiäd baxhuaan yu'ga, la jiädni gudxej, o la jiädni garol yääl, o la cäjy, o la jiädni rsil.

³⁶ Col_susiñ, te di guiga'tu nagayejstu che guidzujñni.

³⁷ Rediidx nani rniä lojtu, loj guiraa rebejn rniäni: col_susiñ.

14

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

¹ Riäädx tiop dxej guidzujñ lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluii leii rlaizreni niniaazreni Jesús con yälrusguee, te nugu'trenini.

² Dxejcti räjpreni lo sa'reni:

—Na'c jiennu scree neñ redxelanij, te na'c gun beñguejdx biejj.

Te gunaa ni basäl se't yejc Jesús Betania

(Mt. 26:6-13; Jn. 12:1-8)

³ Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biäd te gunaa ca' te bo'tguij yu' setnard neñni. Rlianexhduxhni, sacduxhni. Dxejc gudi'chni yejn bo'tguijga, te basäl'ni se'tga yejc Jesús.

⁴ Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga?

⁵ Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, ¿xhicuent rudxoijntu nani cayujñ gunaare? Cos sacduxh dee bennäjni narä.

⁷ Guideb ni guibajntu, su' rebejn nani xhet rajpdi lojtu, luxh che rlaiztu sajc gacnäjturen. Narä et xchejdi chu'a lojtu.

⁸ Gunaare abejñni nani gujctis bejñni. Abaslanexhxgaani tiexhä, te chää tiexhä neñ baa.

⁹ Rniliäpac lojtu, cadrotis guidzujñ xtidx Dios, guideb lo guedxliuj, siniizaren xcuent nani bejn gunaare, te guinaj lajzreni gunaare.

*Rlajz Judas guto' Jesús**(Mt. 26:14-16; Lc. 22:3-6)*

¹⁰ Dxejcti huij Judas Iscariot, nani najc tej retzubitio'p xpejn_{pac} Jesús, loj rebixhojz nani rnibee te guto'ni Jesús lojreni.

¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

*Gudauxchej Dad con rexpejn_{pacni}**(Mt. 26:17-29; Lc. 22:7-23; Jn. 13:21-30; 1Co. 11:23-26)*

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladz_{naa} reEgipto. Räjprexpejn_{pacni} loj Jesús:

—¿Caro rlajzlu chosucheenu te gauulu nadxej, dxelanij?

¹³ Dxejc baxhal_{ni} tiop rexpejn_{pacni}, räjpreni lojreni:

—Colchäj ne_n guejdx, ro'c guidxaagtu te niguii ni nuu te re' nis. Colchanajl niguiiga.

¹⁴ Cadro jiu'ni colye'tz loj bejn ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn_{pacni} nadxej, dxelanij?”

¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexgaa ne_nni. Colyujn xhi guidaunu ro'c.

¹⁶ Sas huij rexpejn_{pacni}, bidzuj_{reni} ne_n guejdxga. Bidxälreni te yu' si'cni räjpre Jesús lojreni. Ro'c bejnreni xhi gudajwreni dxelanij.

¹⁷ Che huääz gubijdx, bidzun_{näj} Jesús guitzubitio'p xpejn_{pacni}.

¹⁸ Lalni sobga'reni lo mex cayajwreni, räjpre Jesús lojreni:

—Rniliäpac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räjpre tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpreni lojreni:

—La tej retzubitio'p, tej ni cayajw loj xp_{la}'tä.

²¹ Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Lalni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räjpreni:

—Colca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni ne_n basga.

²⁴ Dxejcti räjpre Jesús lojreni:

—Dee najc si'c xtienä ni ruluii diidx ni biä'nmu, nani guixe' xcuent xhidajl rebejn.

²⁵ Rniliäpac lojtu, diruna yä'ä bin nani ri_i yejc uub, dxejli yä'äni stehuält loj xcä_{rn}ibee Dios.

*Gunii Jesús sinii Pedr dini gumbeeni**(Mt. 26:30-35; Lc. 22:31-34; Jn. 13:36-38)*

²⁶ Che gulujx bil_{reni} te dij xten Dios, biriireni, sääreni nez dalje' ni laa dan Oliib.

²⁷ Dxejcru räjpre Jesús lojreni:

—Guiraatu sibälaztu narä naguxhij_n, sa'csi si'c cajni lo guijtz: “Sugu'tä baxhtoor luxh suxun rexiiil.”

²⁸ Che guibansacä loj rebe_{ngut}, ganidä cha'a Galilee, dxejcti jääd_{tu}.

²⁹ Dxejc räjpre Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjp Jesús lojni:

—Rniliäpac lojlu, lagajc guxhijñre, nicla gajd guidgäi cuedxa' tiop huält, luj aguiniilu choñ huält dilu gumbee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn pacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

³² Dxejcti bidzujñreni te lajt cadre laa Getsemaní. Dxejc räjpni loj rexpejn pacni:

—Colcuej ree lañi chanabä lo Dios.

³³ Dxejcru sanäni Pedr näj Jacob näjza Juan. Dxejc gusloj cayac-huinduxh lajzñi, luxh cayu'ni yälrsiaduxh.

³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc.

³⁶ Räjpni:

—Abba, xtadä, luj rajc rujnlu guira'ti: badzucäj retribajwre loä. Xhet si'cni rlazädi narä, bejn si'cni rlajzlu luj.

³⁷ Dxejc biädäni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal?

³⁸ Coltie'ch bacal, colnab lo Dios, te na'c guntu dojl. Lastootu rlajz gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo.

⁴⁰ Dxejcti biädsacni cadre tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni.

⁴¹ Ni riojñ huält biädäni, dxejc räjpni lojreni:

—Agojl colguejs, colsilajz, agujc, abidzujñ or ni ted Xi'n Dios ni gujc Niguü ladznäa rebendojl.

⁴² Colchastie, colcho'. Asiäddzujñgajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujñ Judas, ni najc te retzubitio'p xpejn pacni, siädnäni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebengool nani najc guxhtis.

⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini.

⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xspaadni, gudilguijdxni xmos bixhojz nani sajrcu, batiu'ni diajgni.

⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan?

⁴⁹ Guiraa dxej guyu'ä lojtu nen guidoo, caguluiätu xtidx Dios luxh ditu niniäztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejn pacni gulälazrenini, baxuntireni.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini.

⁵² Dxejcti baxunni, libasa'nni bariaadga, sä'tini xhabäälni.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädnäreni Jesús loj bixhojz ni sajcrü. Bidojp rebixhojz nani rnibee, näj rebeᅅgool ni najc guxhtis, näjza rebejn ni ruluii leii.

⁵⁴ Luxh Pedr zijt zijt sanajlni Jesús. Che bidzujntini lo xle' bixhojz ni sajcrü, gurenäjni rebejn nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebeᅅgool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxäldireni.

⁵⁶ Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni.

⁵⁷ Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con ᅅaa rebejn, luxh chontis dxej guncheä steeni, ni nac-chee et con ᅅaadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcrü galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niäuuutis ro'ni, xhet guniidini. Dxejcti gunabdidxsac bixhojz ni sajcrü lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguui, sobga'ä xladbee Dios ni rnibee, siäläza neᅅ reza ni tre' xhaguibaa.

⁶³ Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni?

⁶⁴ Abiejn diajgtu xho guniyajni Dios. ᅅaja', ¿xhi najtu?

Dxejcti guiraareni räjp nungäjl pac guetni.

⁶⁵ Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biääd te xcriaad bixhojz ni sajcrü.

⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Nä j luj nadxaaglu Jesús ni siääd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii.

⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni nä j luj najclu tejreni, sa'csi beᅅ Galileelu, luxh guyasi riejn rniilu si'c rni rebeᅅ Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

⁷² Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa' tiop huält, luj gacla choṅ huält aräjplu dilu gumbee narä.”

Dxejc guslojni cayoouni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't.

² Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús.

⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelanijpac ruslaa Pila't tej rebejn ni yu' latzguiib. Ruslaani chutis te ni rniab rebejn.

⁷ Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäjä gubieer.

⁸ Dxejc bidojp xhidajl bejn loj Pila't, gunabreni lojni gunni si'ctis rujnni casob lanij.

⁹ Dxejc gunabdiidx Pila't lojreni, räjpni:

—¿La rlaiztu guslaä reii xten rexpejn Israel, ä?

¹⁰ Sa'csi gucbegajcni rdexchajz rebixhojz loj Jesús, ni'c bateedrenini lojni.

¹¹ Ni'cni baquuilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehuält:

—¿Xhini'c rlaiztu gunnää nani rniitu reii xten rexpejn Israel?

¹³ Dxejcru guredxa'reni:

—¡Bacuaani lo cruz!

¹⁴ Dxejc räjp Pila't lojreni:

—¿Xhini'c xhet laati bejn?

Dxejcti laareni rbedxa'rureni:

—¡Bacuaani lo cruz!

¹⁵ Baslaati Pila't Barrabás, sa'csi rlaizni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruz.

¹⁶ Dxejc huinä rexsoldaadni Jesús neṅ Pretoor, yu' cadre rujnreni yälguxhtis, ro'c batojpreni guiraa resa'reni.

¹⁷ Dxejcti bashuajcwreni Jesús te lad moraad, bencheereni te coron guejch basälreni yejcn.

¹⁸ Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

¹⁹ Batiäjłreni te yabixhił yejcnı, batiobxhejnreni lojni, luxh guzuxhijbreni te rajñrenini.

²⁰ Che gulujx basacsıreni Jesús, gulääreni lad moraad ni najcwni, sas bashuajcwrenini xhajbpacni. Gulägajceni Jesús te cuaarenini lo cruzj.

Bacuaareni Jesús loj cruzj

(Mt. 27:32-44; Lc. 23:26-43; Jn. 19:17-27)

²¹ Te niguii ni laa Simón, ni siädä Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruzj Jesús.

²² Dxejcti huinäreni Jesús cadro laa Gólgota, nani säloj: dan Calabeer.

²³ Ro'c badeedreni lo Jesús bin nani nu'ch mir lojni, dxejc laani naaddini niä'ni binga.

²⁴ Che gulujxti bacuaareni Jesús loj cruzj, gudzujtreni yejc rexhajbni, te don xhini'c xca' tejpgareni.

²⁵ Agujc choñ or gulejn gubijdx che bacuaareni Jesús lo cruzj.

²⁶ Letreer cadro bacuaareni xtojłni scree bejnrenini: “Reii xten rexpejn Israel.”

²⁷ Bacuaazareni lo stiop cruzj tiop gubaan, tejni xladbee Jesús, xtee xladbäjgwni.

²⁸ Dxejc guzobj diidx ni caj loj guiitz nani rnii: “Loj rebenguijdx bigabni.”

²⁹ Luxh renani sadejd nejzga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh chontis dxej niunchesacluni.

³⁰ Naj basłaa lagajc luj, biäjt loj cruzjga.

³¹ Näjza rebixhojz ni rnibee, näj rebejn ni ruluıi leii, baxhiznärenini, räjp loj sa'reni:

—Ste'ca bejn rusłani, xhoxh digacdi gusłani lagajc laani.

³² Naj sujiäjt Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyazareni Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

³³ Che gojł läidxej, bicäy si'cti choñ or.

³⁴ Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxun tejni, bahuajdxni te sponj loj binagr. Dxejcru basälñini yejc te yabixhił, badeednini loj Jesús te yänini, räbgajcni:

—Colgusaan guihuiinu don la siädłäjd Elíasni loj cruzj.

³⁷ Dxejcru guredxaduxh Jesús, gujttini.

³⁸ Dxejc lajd ni najł nen guidoro biräjsni, gujcnı tiop la', jiaali lo yujli.

³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee.

⁴¹ Che guyu' Jesús Galilee birinajł regunaare Jesús, luxh bahuiirenini. Yu'za xhidajłru regunaa ni biädñajł Jesús che biädñi Jerusalén.

*Biga'tz Jesús**(Mt. 27:57-61; Lc. 23:50-56; Jn. 19:38-42)*

⁴² Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejñ Israel.

⁴³ Biääd José ni siääd Arimatea, najcni te rebejñ ni sajc loj reguxhtis. Näjza laani cabäjzni xcälrnibee Dios. Guideb yälnabajñ gunabni tiexh Jesús lo Pila't.

⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús.

⁴⁵ Che räjp capitánga lojni agujt Jesús, dxejc badeed Pila't tiexh Jesús loj José.

⁴⁶ Agusii José te bariaad, luxh che gulätñi Jesús lo cruiz, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxejcro batzugni te guiro ro' biliääga.

⁴⁷ Bahuii Marii Magdalenñ näj Marii xnan José cadro biga'tz Jesús.

16*Huäjz Jesús loj rebengut**(Mt. 28:1-10; Lc. 24:1-12; Jn. 20:1-10)*

¹ Che gudejd sabd, dxej ni rusilajz rexpejñ Israel, Marii Magdalenñ näj Marii xnan Jacoob näjza Salomee gusii setnejxh te chatäábreni se'tga tiexh Jesús.

² Che biu' xmaan, rsildooru, che calejn gubijdx, biädreni ro' xpaani.

³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaj guijga, luxh najcni te guiroduxh.

⁵ Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regunaaga.

⁶ Dxejcti räjp bi'nga lojreni:

—Na'c guidxejbtu. Caguiltu Jesús ni siääd Nazare't, nani cuaj lo cruiz. Rutiruni ree. Agubajñni lo rebengut, coltahuii cadro gudixhreni tiejxhni.

⁷ Colchäj, colchaye'tz lo rexpejñpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

⁸ Biriitireni ro' biliääga, racejslireni sa'csi cadxejbreni. Rut lojdi guniidiireni sa'csi cadebduxhreni.

*Baluiloj Jesús loj Marii Magdalen**(Jn. 20:11-18)*

⁹ Gubajñ Jesús loj rebengut rsildooru che biu' xmaan. Baluilojni galoo loj Marii Magdalenñ, nani agacgulääni gajdz bendxab neñ lastooni.

¹⁰ Dxejcti huij Marii Magdalenñ, huiye'tzñi loj renani cuansanäj Jesús, renani cayac-huin lajzñi, cayoonreni.

¹¹ Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

*Baluiloj Jesús loj tiop xpejñpacni**(Lc. 24:13-35)*

¹² Ste'ca najc Jesús baluilojni loj tio'p renani sasaj sääreni lo nejz.

¹³ Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

*Baxhal Jesús repost**(Mt. 28:16-20; Lc. 24:36-49; Jn. 20:19-23)*

¹⁴Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebenğut.

¹⁵Räjp Jesús lojreni:

— Colchäj guideb lo guedxliuj, colnii xtidx Dios lo guiraa rebejn.

¹⁶Nani chalilajz luxh tiobnisni, siliaani loj dojl; biäda nani di lajzni chalii sinijtnei lo dojl.

¹⁷Niluxh remilagwre jiannäj renani chalilajz: sibääreni benđxab xcuentä; siniireni ste'ca diidx;

¹⁸guiniaazreni bäl con ñaareni; masque yäreni xhicos ni rugu't bejn, xhet gacdireni; susujreni ñaareni yejc rebenracxhuu luxh siajc rebenracxhuu.

Huä'p Jesús xhaguibaa

(Lc. 24:50-53)

¹⁹Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee.

²⁰Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnmi milagwr te gucbee bejn laapac xtidx Dios ni caniireni. Sugacni si'c.

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guijtz xcuent guiraa redzuun ni gujc nez loonu te cuäxnejzreni redzuunga

² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu.

³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo,

⁴ te gachesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoö bixhoz Aarón.

⁶ Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl.

⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laḷ ni cayujn Zacarías dzuun neḷ guidoro si'c bixhojz nez loj Dios,

⁹ dxejc con daad bibee chuni'c jiu' neḷ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni.

¹⁰ Laḷ ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios.

¹¹ Dxejcti baluiloj te xangl Dios lo Zacarías, suliiini ladbee lo dxan cadre cayejc guxhyaal.

¹² Che bahuii Zacarías lo xangl Dios, di jien xhi gunni, lacti bidxebduxhni.

¹³ Sas xangl Dios räjp lojni:

—Na'c guidxiejblu, Zacaríi, sa'csi Dios abiejn diajgni xtiidxlu, luxh su' te xi'n chäälü, Elisabe't; cuälajluni Juan.

¹⁴ Sibalazduxhlu, siroob lastoolu; xhidajl bejn sibalajz sa'csi gaalni,

¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxaan xten Dios neḷ lastooni cheni gaallini.

¹⁶ Sujnni gusiechlajz xhidajl rexpejn Israel, guibi'reni lo Gueb Dios.

¹⁷ Juanre sinijdni loj Dad, sujni lagajc xhigab, sajpní lagajc yälrnibee ni gojp profe't Elías, te che jiejn diajgredi xtiidxni susiechlajz redad, susiäjlzarení diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jäädsucheeni lastoo rebejn te chalilajzreni xtidx Dad ni jääd.

¹⁸ Gunabdiidx Zacaríi loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxhaḷni narä te guininää luj, jäädnää didxhweenre lojlu.

²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisac̄lu. Rextidxä sisiojb che guidzujn dxej che riäjḷ gacni.

²¹ La^lni cayajc dee, cadxeloj rebejn ni suga' nez ro' yudxan cabäjzreni guirⁱ Zacarⁱ sa'csi cayaclaani neⁿ yudxan.

²² Che birⁱ Zacarⁱ, di niajcdiru niniini loj rebejn; dxejc gucbeer^eni yu' xhi cosro bahuiⁱni neⁿ yudxan xten guidoo. Dxejc con seen guninäjni rebejn^{ga}, sa'csi xheti xse'ni te niniini.

²³ Che gulujx bejnⁿⁱ dzuun neⁿ guidoro, gubi'ni rolijzⁿⁱ.

²⁴ Che gudejd redx^ej dxejcti bazeⁿ nuu Elisabe't, chäälni, báz, gaii bäi diruni nirⁱ rolijzⁿⁱ. Bejnⁿⁱ xhigab, räjpⁿⁱ:

²⁵ “Si'c bejn Dad Dios narä ⁿaj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäi, baxha^l Dios xanglⁿⁱ Gabriel lo te guedx Galilee ni laa Nazare't,

²⁷ te chahuini te dxapxteeb ni laa Marii. Agojt xtiidxⁿⁱ te guchⁿaani te dade' ni laa José. Dade're najc xagdoo torei David.

²⁸ Biu' anglre cadro sobga' dxape'ga, räjpⁿⁱ lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjl^u. Abenle' Dioslu loj guiraa regunaa.

²⁹ Luxh che bahuiⁱni lo xangl Dios bidxelojⁿⁱ lo rextiidxⁿⁱ, rujnⁿⁱ xhigab: “¿Xhicuent caniini si'c loä?”

³⁰ Dxejc räjp xangl Dios lojni:

—Na'c guidx^ejblu, Marii; agule Dios luj.

³¹ Bacuadiajg diidx. Suulu báz, su' te xi'nlu. Che gaalni guirilajⁿⁱ Jesús.

³² Laani saj^cni te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujⁿ gacni rei sigajc ni gujc toxtadgoldooni David,

³³ te tejpas guinibeeni loj rexi'n Israel, luxh dipac xcäl^rnibeeni nitloj.

³⁴ Dxejc gunabdiidx Marii lo xangl Dios, räjpⁿⁱ:

—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpⁿⁱ:

—Sprit Dxan xten Dios siäd lojl^u, xcäl^rnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal saj^cni te beⁿdxan, sibälaj bejnⁿⁱ Xi'n Dios.

³⁶ Näjza sa'lu Elisabe't su' te xi'nⁿⁱ luxh anaj^cni te beⁿgool; ni'cni gunaa nani najreni digacdi chu xi'nⁿⁱ agujc xho'p bäi nuuni báz.

³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnä^j Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Neⁿ redx^ejga, basquejn Marii sääni lo te guejdx ni tre' neⁿ redajn xten Judea.

⁴⁰ Biu'ni rolijz Zacarⁱ, guniini xtidxbee loj Elisabe't.

⁴¹ Che biejn diajg Elisabe't guniini, biniib xi'nⁿⁱ xque'ni, gudxaj Sprit Dxan xten Dios lastoo Elisabe't.

⁴² Dxejc dipduxh guniini räjpⁿⁱ:

—Abenle'ru Gueb Dios luj loj guiraa regunaa. Abenle'zani xi'nlu.

⁴³ ¿Chu narä te siädhuii xnan Xtioozä narä?

⁴⁴ Biejntis diagä xtiidxlu, bibalazgajc xi'nä, biniibni xque'ä.

⁴⁵ Sibaa lajzlu, luj ni huililajz sisiojbpac nani gunii Xtadnu Dios.

⁴⁶ Dxejc räjp Marii:

Xaimä rliä'p xpala'n Xtradnu Dios.

⁴⁷ Rbalazduxhza lastoä xcuent Dios ni ruslaa narä lo dojl.

⁴⁸ Sa'csi agule Dios narä,
nacä te mos gunaa ni xhet sajcdi,
luxh najli sinii rebejn näjza reni churu chu lo guedxliuj,
chicbaani loj guiraa regunaa.

⁴⁹ Sa'csi Gueb Dios ni rajp guiraa yälrnibee abejn xhidajl cosro löä,
dxanduxh najc lajni.

⁵⁰ Dini cuääz gulaslajzni guiraa rebejn ni riu xtiidxni, reni rajjni.

⁵¹ Xhidajl cosnagajn abejnni con lagajc naani,
abatie'chni renani rustioob lastooreni rliä'p lagajc xpala'nreni.

⁵² Abasajbni reni rnibee,
per rebenadolajz bejnni gacreni beņro.

⁵³ Bachajni xque' reni calaan,
badeedni ganax cossa'c,
niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni nación xten xpejn Israel, ni najc xmos Dios.

Di lajzni niäl nulaslajznireni

⁵⁵ sa'csi si'c bia'nni diidx con retoxtadgoldoonu,
sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii roliz Elisabe't si'cti choņ bäii, dxejc gubisacni rolizjni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te bäs niguiini.

⁵⁸ Dxejc bidzujn rexpisinni näjza resa'ni biädhuiireni guiro'preni che
gucbeereni lacti hueen gujc Dios con laani. Bibalaznäjrenini.

⁵⁹ Che gudejd xhujn dxej, huinäreni bāze'ga chuni bee. Rlajz rebejn nirilaj
bāze'ga si'c laa xtradni, Zacaríi.

⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamilu ni laa si'c.

⁶² Dxejcti gunabdiidxreni con seen lo xtrad bāze'ga te gacbeereni xho rlajzni
guirilaj bāze'ga.

⁶³ Xtradni gunab te la' guijtz, dxejc bacuaani: “Lajni najc Juan.” Dxejc
guiraareni bidxelojreni.

⁶⁴ Luxh lagajc dxejc gujc gunii Zacaríi stehuält, dxejc guslojni calä'pni
xpala'n Dios.

⁶⁵ Bidxeloduxh rexpisinnreni xhini'c gujc ro'c. Luxh bire'ch diidx xcuent
recosre guideb neņ redajn xten Judea.

⁶⁶ Guiraa reni biejn diajg rediidxga gusloj cayujnreni xhigab, dxejc gunab-
diidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacaríi

⁶⁷ Dxejcti biääd Sprit Dxaan xten Dios neņ lastoo xtradni Zacaríi, gusloj
caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel,
sa'csi abiädhuiini loonu, ni najcnu rexpejnni,
te siädguslaani nuurnu neņ dojl.

⁶⁹ Abaxhalni loonu te bejn ni rajp yälrusladuxh bejn neņ dojl.
Najcni te rexagdo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijt galoo:

⁷¹ Suslaani nuurnu loj reni rdxe'ch loonu, nājza ladzṇaa rebejn ni gulälaz nurnu.

⁷² Te gulaslajzni retoxtadgoldoonu, te soob diidx ni bia'nni con rebejnṅa.

⁷³ Scree bia'nni diidx con toxtadgoldoonu, Abram:

⁷⁴ Suslaani nuurnu ladzṇaa rebejn ni rdxe'ch loonu, te na'c guidxebnu chunu lojni gusoobnu xtiidxni,

⁷⁵ con yälṇabaṇsa'c nājza yälṅuxhtis guiraa redxej ni guibajṇnu.

⁷⁶ Luxh luj, bāze', sirilajlu dade' nani rnii xtidx Gueb Dios ni yu' xhaguibaa, sa'csi sinijdlu lo Dad te gusucheelu rexnezyulajzni,

⁷⁷ te gunlu gachee rexpejṇni xho gac laani lo dojl, te gac guibicaj xtojṇreni.

⁷⁸ Sa'csi Dios sanälajz bejn,

nājza rulaslajzni bejn ni'cni xhaguibaali suxhaṇni xi'nni te jiädṇäni te dxe-coob,

⁷⁹ te gusanijni lo rebejn ni nabajṇ lo yälxcäy xten dojl,

nājza rebejn ni nabajṇ lo xpalaa yälṅujt,

te guluiini xho sānu lo xnez yälṇbecdxilajz.

⁸⁰ Dxejc gunís biuxe'ga, guyuduxh xcäriejṇni xcuent recos xten Dios. Gubajṇni nez loj reyubijdz cheni bidzujṇli dxej che baluilojni loj rexpejṇ Israel, che gusloj cagusule'ni xtidx Dios.

2

Che gojl Jesús

(Mt. 1:18-25)

¹ Neṇ redxejga, gunibee Augusto César xcaj laj rebejn guideb guedxliuj lo xquijtzn.

² Ni'c nacobgujc yälbigabre cheni najc Cirenio gobernador xten Siria.

³ Guiraa rebejn nanab chääreni lagajc lajdxreni te ro'c guigabreni.

⁴ Ni'cni birii José guedx Nazare't Galilee, te huijṇni Judea, lo guedx Belén, cadro gojl toDavid, sa'csi najc José xagdoo toDavid.

⁵ Huinäni Marii, nani guchṇaani, huijreni guedx Belén te ro'c guigabreni. Luxh nuu Marii bāz.

⁶ Lalsi yu'reni guedx Belén, bidzujṇ dxej ni gaal xi'n Marii.

⁷ Ro'c gojl xi'n galooni, dxejc batejbnini te xzuudni. Dxejc gudixhnini cadro rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios nājza rebaxtoor

⁸ Gajxh guejdxga guyu' gaii baxtoor cayajpreni xhiilreni lo niaa guxhijṇ.

⁹ Chela baluiloj te xangl Dios, luxh bianij guideb gabireni con yälṇdimbicha' xten Dios, dxejc bidxebduxhreni.

¹⁰ Sas anglga räjp lojreni:

—Na'c guidxejbtu, narä siädṇää lojtu te didxsa'c ni suspalajz guiraa beṇ guedxliuj.

¹¹ Nadxej gojl neṇ guejdx xten toDavid, tej ni guslaa bejn neṇ dojl, laani najc Crist ni najc Dad.

¹² Dee najc te seen lojtu, sidxälto bāze'ga nadejbnini neṇ te xzuudni, naga'ni cadro rusälreni guijxh rajw reguidxaa.

¹³ Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

¹⁴ Collä'p xpala'n Dios ni yu' xhaguibaali.

Suchu yälrbecdxilajz lo reben guedxliuj ni balazlajzni.

¹⁵ Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

¹⁶ Rusquenduxhrenei sääreni, dxejc bidxälreni Marii näjza José näjza baze' ni naga' nen cadro rusälreni guijxh rajw reguidxaa.

¹⁷ Cheni bahuiireni loj rebejn ga, bijreni diidx xhi räjp rexangl Dios lojreni xcuent baze'ga.

¹⁸ Niluxh guiraa reni biejn diajg rediidxre bidxeloduxhrenei xtidx rebaxtoorga.

¹⁹ Niluxh Marii gulucheeni guiraa rediidx ni biejn diajgni nen lastooni, rujntisni xhigab xcuent rediidxga.

²⁰ Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

²¹ Che gudejd xhujn dxej, huinäreni baze'ga chuni bee, dxejc gulälajreni Jesús, lagajc laj ni räjp xangl Dios loj Marii guirilajni galooli guuni bázga.

²² Che basa' redxej ni gac naya te nan si'cni gunibee to Moisés loj xquijtzni, huinäreni baze'ga guedx Jerusalén, nen guidoro gunabreni gacnäj Diosni par tejpas.

²³ Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios.

²⁴ Bidzujnreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombáz.”

²⁵ Nen redxejga, nen guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzni jääd te bejn ni guslaa rexpejn Israel. Rbäjz Sprit Dxaan xten Dios nen lastoo Simeón.

²⁶ Sprit Dxaan abejn gacbeenini dini guet ansde fini loj Crist ni guxhal Dios.

²⁷ Dxejcti räjp Sprit Dxaan xten Dios lojni chääni guidoro. La'ni yu'ni nen guidoo, bidzujn José con Marii, biädnäreni báz Jesús, te gunnäjreni Jesús nani rnibee xtidx Dios gunreni.

²⁸ Dxejc gudääz Simeón baze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yälrbecdxilajz,

sa'csi abasooblu nani bia'n diidx gunnäjlu xmoslu.

³⁰ Sa'csi abahuiloä nani siädguslaa nuurnu nen dojl,

³¹ ni abasujlu nez loj guiraa reben guedxliuj.

³² Laani najc bianij ni susanij loj rebejn ni di gac xpejn Israel,

näjza nani gac xpala'n rexpejnlu guedx Israel, lajdxlu.

³³ Bidxeloj José näjza xnan Jesús rediidx ni canii Simeón xcuent baze'ga.

³⁴ Dxejc benle' Simeón yejcreni, dxejc räjpni lo Marii xnan Jesús:

—Bahuii gan; baze're biäd te loj rexpejn Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejn,

³⁵ te si'c jienloj xhi xhigab rujn cade tej rexpejn Israel nen lastooreni. Dxejcti par luj sajcnini asdoo chääz te spaad lastoolu, sa'csi gac-huinduxh lastoolu.

³⁶ Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famil xten Aser. Anajcni bengolduxh. Bachnaani che najcni dxaphuin, luxh gajdzis ijz guläznäjni chäälni che bia'nni biuud.

³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbecdx-rniab lo Dios.

38 Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

Che gubi'reni guedx Nazare't

39 Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni.

40 Gunís biuxe'ga, guc nadaanni, guc nasinruzani sa'csi cayacnäj Diosni.

Che biu' Jesús guidoro

41 Casob ijz rij rexuczajn Jesús guedx Jerusalén te rinäreni te gojn xten lanij pascw.

42 Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga.

43 Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni.

44 Bejnreni xhigab pet siädsanäjni rebeñsa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni,

45 direni nidxälni. Dxejc gubisacreni guedx Jerusalén te huitiilrenini ro'c.

46 Chon dxej gudiilrenini dxejc bidxälrenini neñ guidoro, sobga'ni nez galäii rebejn ni najn leii, cacuadiajgni xtiidxreni, cayujnzani yälgunabdiidx lojreni.

47 Luxh guiraareni cacuadiajg xtiidxni, cadxeloduxhreni yälñajñ xtenni, näjza rediidx ni cagudzu'ni lojreni.

48 Che bahuii rexuczajnni lojni, bidxelojreni. Dxejc räjp xnanni lojni:
—Xi'nä, ¿xhicuent bennäjlu nuurnu scree? Narä näjza xtaclu cayunduxhnu xhigab caguiilnu luj nezree, nezre'c.

49 Dxejcti räjp Jesús lojreni:

—¿Xhicuent caguiiltu narä? ¿La ditu gan riäjñ gunä xtzun Xtadä, ä?

50 Luxh laareni direni niacbee rediidx ni guniini lojreni.

51 Dxejcti gubinäjñireni guedx Nazare't, sanuuni rusoobni xtiidxreni. Luxh Marii gulucheetisni guiraa recosre neñ lastooni.

52 Duurtis gunís Jesús, caroobruza xcälñajnni. Sanälajz Diosni, sanälajzza guiraa rebejnñi.

3

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

1 Neñ redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia.

2 Lagajc neñ redxejga Anás näjza Caifás najc rebixhojzro xten guidoro guedx Jerusalén. Neñ redxejga biääd xtidx Dios lo Juan, xi'n Zacarii cheni rbäjzñi nez lo reyubijdz.

3 Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechlajz, yälrobnis ni nanab gunreni te gudzucaj Dios xtojñreni.

4 Si'cni caj lo xquijtz Isaías, dade' ni gunii xtidx Dios, cadre räjpñi:
Riejñ xse' te ni rbedxa' nez loj reyubijdz:

“Colyunsa'c xnezyuj Dad, colslie rexnezyulajzñi.”

5 Guiraa cadre sojb gueed sidxe'ni,
guiraa relom sibicajreni,
guiraa renezyuj ni xhet naliidi, siliireni,

guiraa renezyudxuudx, sacsa'creni.

⁶ Dxejcti guiralii bejn suhuui loj nani guxhal Dios.

⁷ Che bahuii Juan siääd xhidalduxh bejn te guirobnisreni, räjpni lojreni:
—¡La'tu benguijdx ni najc si'c bälñialajz! ¿Chuni'c baliidxtu guxuntu loj xcälrdxe'ch Dios ni siädgajxh, ä?

⁸ Colguchaa xmoodtu te si'c fii bejn guliini abasiechlajztu. Na'c cuentis rniitu lagajc neñ lastootu “Abram najc xtadnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdoo toAbram.

⁹ Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹ Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaurení, quisrenini loj ni xheti xhi gauni.

¹² Näjza gaii bejn nani rusquijx xcuent reimpuet bidzujñ lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejn maazdi ni nungäjñ quiixreni.

¹⁴ Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

¹⁵ Cadxeloj rebejn, cayujñreni xhigabduxh, naareni, “pet Juan najc Crist ni jiääd.”

¹⁶ Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcrú loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neñ lastootu näjza con guiboo, sa'csi rajpruni yälñibee loä.

¹⁷ Aca'ni pal te gusiani triuu te cuääni triusa'c lo guijxh te cucheeni triuu neñ ngodx xtenni, dxejcti reguixhtriuuga suze'cnini lo bajl ni rejc par tejpas.

¹⁸ Rediidxre näjza xhidajñ yälñulijdx gunii Juan te basule'ni redidxcoob loj rebejn.

¹⁹ Näjza lo Herodes ni najc gobernadoor basule' Juan diidx, gudilñajnini sa'csi xhet laadi cayujñni, sa'csi rbäznäjni Herodías, chääñ bejtzni Felipe, näjza xcuent sgaii dojl ni bejnini.

²⁰ Di Herodes niu xtidx Juan, alga bejnini stee dojl, basälñi Juan neñ latzguiib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa,

²² dxejc biäjñ Sprit Dxan xten Dios si'c te palom, bidzujñni cadre suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³ Yu' Jesús galbitzú ijz che gusloj cayujñni dzuun ni badeed Dios gunni. Rchalo rebejn najcni xi'n José, xi'n Elí.

²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José.

²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai.

²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá.

²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri.

²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er.

²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat.

³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim.

³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán.

³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón.

³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá.

³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor.

³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala.

³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec.

³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán.

³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj beṇdxab loj Jesús

(Mt. 4:1-11; Mr. 1:12-13)

¹ Jesús, sa'csi rbäjz Sprit Dxañ xten Dios lastooni, biunejzni gueu Jordán, dxejc huinā Sprit Dxañ xten Diosni lo reyubijdz.

² Ro'c bia'nni tiuu gubijdx, tiuu guxhijñ. Ro'c bidzujñ beṇdxab ni rnibee te rlajzni gunni gusoob Jesús xtiidxni. Luxh calaan Jesús, sa'csi gajdñi gau guiraa neñ redxejga.

³ Dxejc räjp beṇdxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjpni:

—Acáj loj reguijtz xcuent Dios: “Xhet ganaxdi yätxtiil gun sajc guibajñ bejñ, näjza guiraa diidx nani rnii Dios sujn guibajñ bejñ.”

⁵ Dxejcti huinā beṇdxab Jesús jiaa yejc te dajñ. Teratbäztis baluilojni guiraa reguedxro ni tre' lo guedxliuj.

⁶ Dxejc räjp beṇdxab lojni:

—Narä sunidxä guiraa yälrnibee näjza reyäl'nasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä.

⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

⁹ Dxejcti huinā bendxabni lo guedx Jerusalén, huinānini jiaa yejc xques guidoro. Dxejc räjp bendxab lojni:

—Palga guliilu najclu Xi'n Dios, gutiäjs lo yuj

¹⁰ sa'csi si'c caj loj rexquijtz Dios:

Suxhal Dios rexangni te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux bendxab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujñ stee dxej te gusacsíruni Jesús.

Gusloj Jesús cayujñ xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpni yälrnibee xten Sprit Dxi. Bire'ch diidx xcuentni guiraa neñ reguejdx ni tre' nejjga.

¹⁵ Ruluini neñ reguidobáz luxh guiraa rebejn rliä'p xpala'nini.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadre gulaani. Che gojl dxej ni rusilajz rexejn Israel, biu'ni neñ guidobáz sigajc ni rujnpacni, dxejc huisuliini te bilni

¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxälni cadre rni scree:

¹⁸ Sprit Dxi xten Dios suganäj narä, sa'csi agule Dios narä te gusule'ä xtidxcoobni lo rebenprob.

Baxhalni narä te gusiaca lastoo renani di lastooreni cuexi,

te gusule'ä yälruslaa lo rebejn ni yu' lo dojl,

te gusiaca baloj reben lotiä'p, te guslaä reben ni cadejd trabajw,

¹⁹ te gusule'ä abiu' ijzsa'c che rulaslajz Dios rebejn.

²⁰ Dxejc basäu Jesús reguijtzga, badeednini loj bejn ni cayacnäj neñ guidooga, dxejc gurejni. Sa'csi guiraa rebejn ni sobga' neñ guidooga cahuidzu'tzreni lojni,

²¹ gusloj guniini, räjpni lojreni:

—Lagajc nadxej guzobj rediidx ni caj lo reguijtzre nez loj guiraatu.

²² Guiraareni sarú guniireni xcuent Jesús, bedxeloduxhazreni redixsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä: “Doctor, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadre najc lajdxlu.”

²⁴ Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rni xtidx Dios, di reben lajdxreni jiu xtiidxni.

²⁵ Luxh rniliä lojtu, che gubajn Elías lo guedxliuj, guyu' xhidajl gunabiud guedx Israel che di nisguij niajb chon ijz garol, dxejc guyu' yälrianduxh guideb guejdxga.

²⁶ Luxh di Dios nuxhal Elías rolijz nicla tej regunabiud ni guläjz guedx Israel, alga baxhalnini lo benzijt, rolijz te gunabiud ni rbäjz Sarepta, gajxh guedx Sidón.

²⁷ Sigajcza che gubajñ Eliseo lo guedxliuj, guyu' xhidajl beñ racxhuu ni ral tiejxhrene guedx Israel, luxh dini nusajc nicla tejrene, alga basiajcnide' ni laa Naamán, ni siäd te guedxzijñ ni laa Siria.

²⁸ Che bieñ diajg reni sobga' neñ guidoo rextidx Jesús, bidxecheduxhrene,
²⁹ huisuliireni, guläärenini neñ guejdxga. Dxejc huinärenini yejc dajñ cadro tre' guejdxga cadro yu' te balaro, te ro'c rlanjrene nustejbrenini.

³⁰ Dxejc Jesús sigaj gudejñni galäiireni, sä'tini ste'ca lajt.

Guläa Jesús beñxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejñ che gojl dxej ni rusilajz rexpejñ Israel.

³² Bidxeloduxhrene xtiidxni sa'csi rusule'ni si'c te beñnajn, si'c te ni rnibee.

³³ Neñ guidooğa suga' te dade' ni rbäjz te beñxab neñ lastooni. Guredxa'ni

³⁴ räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siäd Nasare't? ¿La siädldu te gunitlojlu nuurnu, ä? Narä numbeälu, nanä najclu Xin Dxañ Dios.

³⁵ Gudidxa' Jesús lo beñxabga, räjpni lojni:

—Basäu ro'lu, birii lastoo niguiire.

Dxejcti beñxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejñdini dade'ga.

³⁶ Bidxeloduxh rebejñga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeñxab con yälrnibee, luxh rusoo rebeñxab xtiidxni, riireni lastoo bejñ.

³⁷ Dxejc gusäab xtidx Jesús lo guiraa reguejdx ni tre' guideb gabi guejdxga.

Rusiajç Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrene lojni te gusiajcnini.

³⁹ Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujñni mandaad, cahuiinireni.

Rusiajç Jesús xhidajl yälracxhuu

(Mt. 8:16-17; Mr. 1:32-34)

⁴⁰ Lañ ni cayäz gubijdx, guiraa reni rajp beñracxhuu ni rajc garen garen yälracxhuu biädñareni rebejñga lo Jesús. Dxejc laani batzuubni ñaani yejc tejjareni, dxejc biajç rebeñracxhuuga.

⁴¹ Loj rebeñracxhuuga, yu'reni birii rebeñxab neñ lastooreni, rbedxa'reni räjpreni:

—Luj najclu Xi'n Dios.

Luxh Jesús gudilñajni rebeñxab, dini nusaa niniireni sa'csi laareni najñreni najcni Crist ni cabäjzrene.

Rusule' Jesús xtidx Dios

(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil rebejñni, dxejc bidzujñreni cadro suga'ni. Rlanjrene nuscuääzrenini te di nuiini.

⁴³ Dxejc Jesús räjp lojrene:

—Nanab cha'a chasule'ä rextidx xcuent xcälrnibee Dios xhidajlruza guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios neñ guiraa reguidobäz neñ reguejdx xten Galilee.

5

*Che gunaazreni xhidajl bäjl**(Mt. 4:18-22; Mr. 1:16-20)*

¹ Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios.

² Dxejc bahuii Jesús tio'p barcw ni suga' ro' nisga, rud yu'di nenreni sa'csi rebejn ni rniaz bäjl abiriireni nen rebarcw te caguibreni xquijxhreni ro' nisga.

³ Dxejc biu' Jesús nen te barcw ni najc xten Simón, dxejc gunab Jesús cháa barcwga lo nis te la', te guibicajni ro' yuj. Dxejc gurej Jesús nen barcwga, ro'cli guslojni caguluiini rebejn.

⁴ Che gulujx xtiidxni, räjpni loj Simón:

—Huinä barcw cadro jiättru, colcuaa xquijxhtu lo nis te guiniaaztu bäjl.

⁵ Räjp Simón lojni:

—Mastr, guideb yääl biennu dzuun, luxh dinu niniaz nicla tej bäjl, niluxh naj agunibeelu gusälsacnu guijxh lo nis.

⁶ Cheni basälreni xquijxhreni lo nis, gunaazreni xhidalduxh bäjl, dxejc guslojli caräjs xquijxhreni.

⁷ Dxejc bejnreni seen loj resa'reni ni yu' nen stee barcwga te jiädyacnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni nen nis.

⁸ Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te bendojl.

⁹ Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäjl.

¹⁰ Näjza Jacob näjza Juan, rexi'n Zebedeo, ni runnäj Simón dzuun, näjzaren bidxejbreni. Per Jesús räjp lo Simón:

—Na'c guidxejblu, najli gusloj cuedxlu bejn lacuaa ni guiniaazlu bäjl.

¹¹ Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

*Basiajc Jesús te bejn ni ral tiejxhni**(Mt. 8:1-4; Mr. 1:40-45)*

¹² Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

¹³ Dxejc batzuub Jesús naani yejcnä räjpni lojni:

—Rlazä jiajclu. Susiacälu.

Che guniini rediidxre, biacgajc ben racxhuuga.

¹⁴ Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

¹⁵ Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpa xhidalduxh bejn te gucua diajgreni xtidx Jesús näjza te gusiajcnä yälracxhuu xtenreni.

¹⁶ Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

*Basiajc Jesús te bejn ni digacdi guiniib**(Mt. 9:1-8; Mr. 2:1-12)*

¹⁷ Te dxej lalni caguluiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siädreni guideb nez reguejdx xten Galilee,

nājza regiön Judea, nājza guedx Jerusalén. Dxejc huenliisi rluijoj suganāj xcälrnibee Dios Jesús te rajc russiajcnj rebenracxhuu.

¹⁸ Dxejc bidzujñ gajj dade' nuureni lo te lonbäz te bejn ni di gacdi guiniib, rlanjreni gusiu'renini neñ yu' te quixhnenini nez loj Jesús.

¹⁹ Niluxh direni nidxäl canejz niu'reni sa'csi nadäduhx ro'c sa'csi tre' xhidajl rebejn. Dxejc huäpnäjrenini yejc yu'ga, badzucajreni gajj tej, dxejc basajbreni xloon benracxhuuga yejcli yu'ga te gujc bidzujñni nez loj Jesús.

²⁰ Che bahuii Jesús yälirilajz xtenreni, räjpni loj benracxhuuga:
—Dade', agubicaj xtojllu.

²¹ Dxejc rebejn ni ruluii leii nājza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajz gudzucaj xtojñ rebejn, Diostis rudzucaj dojl.”

²² Dxejc gucbee Jesús xhi xhigab cayujnreni, ni'c räjpni lojreni:
—¿Xhicuent rujntu xhigab si'c neñ lastootu?

²³ ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä?

²⁴ Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yälñadip lo guedxliujre te gudzucajni xtojñ rebejn.

Dxejc räjpni lo bejnğa ni digacdi guiniib:
—Lojlu rniä, jhuistie, guläs xloonlu, huij rolijzlu!

²⁵ Lagajc dxejc nez lojreni huistiegajc bejn ni digacdi guiniib, guläsni xlooni cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhneni recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huisu Leví, basa'nni guiraa recosga, dxejc sanajlni Jesús.

²⁹ Dxejc bejn Leví te lanij rolijzni par Jesús. Biääd xhidajl bejn ni rusquijx xcuent impuest nājza sgajj bejn; sobganäjnirenini lo mex.

³⁰ Dxejcti refarisee nājza rebejn ni ruluii leii guslojreni cayeinäjreni rexpejn pac Jesús, räjpreni:

—¿Xhicuent raunäjtu, ränäjtu rebejn ni rusquijx impuest nājza reben DOJL, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiiinreni te doctoor.

³² Dina niädtedxä reben sa'c, narä biädtedxä reben DOJL te gusiechlajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxejc gunabdiidx rebejnğa loj Jesús, räjpreni:

—¿Xhicuent lacti rucua'n rexpejn Juan nājza rexpen refarisee, lacti rbedxniabreni loj Dios; niluxh rexpejn pac lu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajz gucua'n rebejn ni yu' lo te sa' lañni yunäjreni bi'n, ä?

³⁵ Niluxh sidzujñ dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh.

³⁷ Di gacdi gusäl̄ni bincoob neṅ te guidbiejw sa'csi bincoobga sutiäsy'a'ni guidbiejwga dxejc sixe' binga, sixij̄nza guidbiejwga.

³⁸ Ni'cni nanab gusäl̄ni bincoob neṅ guidcoob si'c sigucheeza guiro'preni.

³⁹ Luxh nicla tej bej̄n ni agu' bin ni yu' agujc xchej r̄lajz yä bincoob, sa'csi säjbni: “Bin ni yu' agujc xchej najc huenru.”

6

Rutie' rexpej̄n Jesús triuu dxej nani rusilajzreni

(Mt. 12:1-8; Mr. 2:23-28)

¹ Te dxej ni rusilajz rexpej̄n Israel sasaj Jesús näjza rexpej̄npacni nez loj reyuj cadro naga' triuu. Dxejc, sa'csi calaanreni gusloj calääd̄xreni doj lo triuu te cayajwrenini.

² Dxejc gunabdiid̄x gaii refarisee ni najc beṅguidoo, räjp̄reni lojreni:

—¿Xhicuent rujntu dzuun ni di nungäjl̄ guntu che rajl dxej ni rusilajznu?

³ Dxejc räjp̄ Jesús lojreni:

—¿La gajdtu goj̄ loj reguijtz xhi bej̄n toDavid cheni calannäj̄ni rebej̄n nani sanäni, ä?

⁴ Biu'ni neṅ xquidoo Dios, gudajw̄ni yät̄xtiil nani di nungäjl̄ gau bej̄n sa'csi xtebtis rebixhojz rajc rajw̄ni, luxh badeedni yät̄xtiilga gudajw̄ res'a'ni.

⁵ Räjp̄za Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz ñaani

(Mt. 12:9-14; Mr. 3:1-6)

⁶ Che goj̄l stee dxej ni rusilajz rexpej̄n Israel, biu'ni neṅ te guidobäz, dxejc guslojni caguluiini rebej̄n. Lagajc ro'c sobga' te dade' ni nabijdz ñaani ladbee.

⁷ Dxejc remastr xten leii näjza refarisee cagula'tzreni te don la susiaj̄cni bej̄nga dxej ni rusilajzreni, sa'csi caguilreni xho gucuaquijreni Jesús.

⁸ Niluxh laani naj̄nni xhi xhigab cayuj̄nreni, dxejc guniini lo dade' ni nabijdz ñaani, räjp̄ni:

—¡Huisulii! ¡Gudaa nez galäiire!

Dxejc huisulii bej̄nga, gubigni lojni.

⁹ Dxejc räjp̄ Jesús lojreni:

—Rlazä guiniabdid̄xä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguij̄dx? ¿La gacnäj̄nu bej̄n laa xcäl̄nabaj̄nni o la gudzucaj̄nu yäl̄nabaj̄nni, ä?

¹⁰ Che guluj̄x bahuii Jesús loj guiraa rebej̄n ni tre' guideb gabini, räjp̄ni loj bej̄n ni nabijdz ñaani:

—¡Baslii ñaalu!

Dxejc bej̄nni si'c, luxh biacgajc ñaani.

¹¹ Dxejc bidxechduhx rebej̄n ni tre' ro'c, gusloj canabdiid̄xreni lo sa'reni xhi gunnäj̄reni Jesús.

Gule Jesús guitzubitio'p rexpej̄npacni

(Mt. 10:1-4; Mr. 3:13-19)

¹² Neṅ redxejga, huij Jesús loj te dajn te huininäj̄ni Xtadni Dios. Ro'c gudej̄d̄ni yääl cabed̄x-canabni lo Dios.

¹³ Che bianij lo yuj, gurej̄dxni rexpej̄nni. Ro'c guleni tzubitio'preni te gacreni xpej̄npacni. Gulälaj̄nireni reapost.

¹⁴ Renani guleni najc Simón ni gulälajni Pedr; Andrés, bejtz Simón; Jacoob; Juan; Felipe; Bartolomé;

¹⁵ Mateo; Tomás; Jacoob xi'n Alfeo; Simón ni nagab loj rexpen cananista;

¹⁶ Judas, bejtz Jacoob; näjza Judas Iscariote ni guto' Jesús loj rebixhojz.

Ruluii Jesús xhidajl bejn

(Mt. 4:23-25)

¹⁷ Che biätnäj Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejnnga bidzujnreni te gucuadiajgreni xtidx Jesús, te gusiajczanireni xcälracxhuureni.

¹⁸ Guiraa ni rdejdza trabajw yu' benḁxab neḁ lastooreni näjza reni'c biajc.

¹⁹ Guiraa rebejn rlazj caan Jesús, sa'csi rusiajzni guiraareni con xcälrnibeeni.

Balijdx Jesús rebejn

(Mt. 5:1-12)

²⁰ Dxejc bahuii Jesús loj rexpejnḁpacni räjpni lojreni:

—Chicbaatu, bejn nani xheti xhixtentu, sa'csi xtentu najc cadre rnibee Dios xhaguibaa.

²¹ 'Chicbaatu, bejn nani calaan ḁaj, sa'csi suniidx Dios lojtu nani rniabtu.

'Chicbaatu, bejn nani roon ḁaj sa'csi susiäjḁ Dios lajztu dxejcru suxhijztu.

²² 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii.

²³ Colguibalajz neḁ redxejga, na'c gac-huin lastootu sa'csi sunidxdxh Dios xhi xtentu xhaguibaa. Sigajcza basacsí retoxtadgoldooreni rebejn nani gunii xtidx Dios galoo.

²⁴ 'Probe'zatu, la'tu benrajḁ, sa'csi agojptu xcälḁnasa'ctu, xcälrbalajztu lo guedxliujre.

²⁵ 'Probe'tu nani rajḁ guiraloj xhixtentu ḁaj, sa'csi sidejdtu yälḁriaan.

'Proobzatu ni ruxhijztu ḁaj, sa'csi sonduxhtu sidejdtu yälḁhuinduxh, yälḁnalas.

²⁶ 'Probe'tu palga rliä'p rebejn xpala'ntu ḁaj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

Chanälajzni rebejn nani rdxe'ch lojni

(Mt. 5:38-48; 7:12)

²⁷ Räjḁzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu.

²⁸ Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu.

²⁹ Palga yu' chu rlazj quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni.

³⁰ Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni.

³¹ Sigajc ni rlazzlu gunnäj bejn la'tu, si'cza la'tu colyennäj bejn.

³² 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojḁ.

³³ Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajḁ neḁ dojḁ.

³⁴ Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendoj_l rudedlaazareni loj rebejn ni najnreni siguixsac ni nasääbreni.

³⁵ La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendoj_l.

³⁶ Colgulaslajz resa'tu si'c rulaslajz Xtdnu Dios guiraa rebejn.

Colgulaslajz sa'tu

(Mt. 7:1-5)

³⁷ Räjpzani:

—Na'c guntu yälguxhtis nani rujn bejn, naatu xhet laadi rujnni; te na'cza gun Dios yälguxhtis rextoj_ltu. Na'c gucuaquijtu bejn te sigajcza di Dios gucuaquij la'tu. Colgusiäj_l-lajz dojl ni rujn sa'tu, te si'cza gusiäj_l-lajz Dios rextoj_ltu.

³⁸ Colgudeed loj bejn ni rquiinreni te si'cza guzalajz Dios ni rquiintu. Sunidxreni xca'tu te mediid guidxadoo, sibetijp ni yu' nen_ni, cupe'tlini gusälreni nen xpolstu. Dios suniidx lojtu lagajc con mediid ni rudeedtu loj rebejn.

³⁹ Guniiza Jesús stee cuent räjpni:

—¿La sajc guluii te beñ lotiä'p nez yuj lo stee beñ lotiä'p, ä? ¿La di guiro'preni guitejb nen te gueed, ä?

⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcn_i si'cni najc mastr xtenni.

⁴¹ '¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu?

⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gachee yu' te yagro balojlu, ä? ¡Beñguijdx! Guläxgaa yagro ni yu' balojlu, dxejc sajc fisa'clu te cuäälü guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg

(Mt. 7:17-20; 12:34-35)

⁴³ Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c.

⁴⁴ Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrej_n.

⁴⁵ Rebeñsa'c rnii didxsa'c, sa'csi xhigabsa'c yu' nen lastooni. Niluxh rebeñguijdx rnii ganax didxguijdx sa'csi xhigabguijdx yu' nen lastooni, sa'csi ro'ni rnii nani yu' nen lastooni.

Tio'p bejn ni benchee tio'p yu'

(Mt. 7:24-27)

⁴⁶ Räjpzani:

—¿Xhicuent rniitu loä: “Dad, Dad,” luxh ditu gun nani rniä guntu?

⁴⁷ Guiniä lojtu chuni'c najc si'c bejn ni riääd loä, rucua diajgni xtidxä luxh rusoo_bni xtidxä.

⁴⁸ Najcni si'c te bejn ni benchee rolijzni, ganid gudäänni jäät, dxejcti bejn_ni cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadz_u'tz yejc te guilaj.

⁴⁹ Niluxh reni rcuadiajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujn cimient xten yu'ga. Dxejcn biäjt nisro, bidijnni cuä' yu'ga, dxejc li gurebä'n yu'ga, gunitlojtini.

7

Basiajc Jesús xmos te bejn roman ni rnibee

(Mt. 8:5-13)

¹ Che gulujx gunii Jesús loj rebejn, huijni te guejdx ni laa Capernaum.

² Ro'c yu' te bejn roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni.

³ Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajnneni Jesús jiädni te gusiajcn xmos dade'ga.

⁴ Che gubigreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäjl gacnäjluni

⁵ sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siäddzujungaxhreni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gotalä xtzunlu. ¿Chu narä te jiu'lu rolizä? Xhet sacädi.

⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni.

⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcnini.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädnajlni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolijz capitán, bahuiireni abiajc xmosni.

Baspañsac Jesús xi'n te gunabiuud

¹¹ Nen redxejga, huij Jesús te guejdx ni laa Naín. Huinäni rexpejnpacni näjza xhidajl bejn ni sanajlni.

¹² Che bidzujnni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni.

¹³ Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

¹⁴ Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

¹⁵ Dxejc huistie bengutga, sobga'ni guslojni caniini. Dxejc badeed Jesúsni lo xnanni.

¹⁶ Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujn nez loonu.

Caniizaren:

—Lagajc Guejb Dios abiädhuii rexpejnni.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre'nejzga.

*Xpejn Juan ni rutiobnis huinabdiidx loj Jesús
(Mt. 11:2-19)*

¹⁸ Rexpejn_{pac} Juan ni rutiobnis bij rediidxga lojni che yu'ni latzguiib.

¹⁹ Dxejc baxhal_{ni} gaiireni lo Jesús te sanabdiidxreni: “¿La guliipac najclu Crist ni jiääd o sibäjznu chu stee bejn, ä?”

²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhal_{nuurnu} te guiniabdiidxnu lojlu: “¿La luj najc Crist ni jiääd o la sibäjznu chu stee bejn?”

²¹ Lagajc dxejc che bidzuj_{reni}, basiajc Jesús xhidajl bejn ni rajc garen-garen yälguidx, ni yu'za reben_{xab} lastooreni, basiajczani baloj ni di fii.

²² Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; reben_{coj} rsiasa'c; reben_{ni} ral_{guejdx} tiejxhni, abiajc tiejxhni; rediagcua't riensac diajgreni; reben_{gut}, agubansacreni; luxh loj reben_{proob} nani cabäjz xcäl_{racnäj} Dios riejn diajgreni rsiule' xtidx Dios xcuent xho laa bejn lo dojl.

²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniini xcuent Juan loj rebejn, räjpni: —¿Chuni'c huihuiitu nez lo reyubijdz? ¿La te nijt ni rusniib bej, ä?

²⁵ ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni naba_{nsa}'c, roliz re_{reii} yu'reni.

²⁶ ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios.

²⁷ Juan najc niguii ni ruzä't rexquijtz Dios cadre caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

²⁸ Rniliäpac, loj guiraa rexinga_{an} regunaa, nicla tejni gajd guiricaj ni najc te bensacduxhru nez loj Dios si'c najc Juan ni rutiobnis. Niluxh nani guxiiru sajc lo xcäl_{rnibee} Dios ni jiääd, sajcruni loj Juan.

²⁹ Che biejn diajg rebejn näjza reni rusquijx impuest rextiidxni xcuent Juan, gucbeereni rujn Dios yäl_{guxhtissa}'c, sa'csi abatiobnis Juanreni.

³⁰ Niluxh refarisee näjza rebejn ni ruluii leii gulälazreni nani niujn Dios par laareni, sa'csi direni nicäjb nutiobnis Juanreni.

³¹ Räjpza Jesús lojreni:

—¿Xhocha guiniä najc rebejn nani tre' naj?

³² Najcreni si'c rebiuxbäs nani rguijt nez lo guii cadre rdo', rbedxa'reni loj sa'reni, rniireni: “Biel_{nu} te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.”

³³ Sa'csi che biääd Juan, dini niauxha't, dizani niä' bin, luxh räjp_{tu}: “Yu' bendxab lastooni.”

³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc räjp_{tu}: “Bahuilaare, dade're rauxha't, rä'zani, najcni xamiigw reben_{dojl} näjza rebejn ni rusquijx reimpu_{est} xten gubier.”

³⁵ Ni'cni xcäl_{najn} Dios huenliisi rien_{loj} loj dzuun ni rujn rebejn ni najn.

Jesús huij roliz Simón ni najc farisee

³⁶ Dxejc tej refarisee gunii loj Jesús, räjpni:

—Jiääd_{lu} rolizä te guidaunu.

Dxejc huij Jesús rolizni, ro'c gurejni lo mex.

³⁷ Rbäjz te gunagubejxh lo guejdxga. Che biejn diajgni satajw Jesús roliz fariseega, bidzun_{najni} te bo't guidxa se't nejxh, luxh bo'tga najc si'c onix, botsa'cni.

³⁸ Che biu' gunaaga, bidzuj_nni lo ni' Jesús, guslojni cayo_onni. Con nisbee caguiibni ni' Jesús, dxejc caguspj_idzni ni'ni con xquidxej_cni. Dxejc bachagro'ni ni'ni bazaazani setnejxhga ni' Jesús.

³⁹ Che bahuii farisee ni gurejdx Jesús rolijz_ni, recosre, bejni xhigab: “Palga gulii najc niguiire Xi'n Dios, sacbeeni chu najc nájza xho najc gunaare ni cagaj_n ni'ni, sacbeezani najcni te gunado_lduxh.”

⁴⁰ Dxejc gunii Jesús loj fariseega, ráj_pni:

—Simón, yu' xhi rlazä guiniä lojlu.

Dxejc ráj_p fariseega lojni:

—Guniini, Dad mastr.

⁴¹ Dxejc ráj_p Jesús lojni:

—Tio'p bej_n nazäáb meel lo te bej_n ni rudedlaa meel. Tej reni nazäáb si'cti gaiigayuu meel. Steeni nazäáb si'cti tiubitzuu meel.

⁴² Cheni di niajcdi niguijxreni xti'nreni, basiäl lajz_ni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidxre lojni, ráj_pni:

—Rchaloä bej_n ni nazääbru lojni.

Dxejc ráj_p Jesús:

—Laaca rniilu.

⁴⁴ Dxejc gubiré Jesús, bahuiini loj gunaaga. Dxejc ráj_pni loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnájni ni'ä nisbee ni birii balojni, dxejc baspijdzni ni'ä con xquidxej_cni.

⁴⁵ Dilu nuchagro' narä, luxh laani cheli biu'ä ree, gajdni cuääz guchagro'ni ni'ä.

⁴⁶ Dilu nusäl se't yecä, niluxh laani basäl_ni se't ni rlianexhduxh ni'ä.

⁴⁷ Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajz_ni Dios. Luxh rebej_n ni rudzucaj Dios guxii xtoj_lreni, guxiiza sanälajzreni Dios.

⁴⁸ Dxejcti ráj_pni loj gunaaga:

—Agubica_j rextoj_llu.

⁴⁹ Dxejc rebej_n ni sobga' lo mex con laani, che biejn diajg_nreni rediidxre, gusloj canii lo sa'reni, ráj_preni:

—¿Chuchani'c najc niguiire, ni'cni rudzucaj_lni xtoj_l bej_n, ä?

⁵⁰ Ráj_p Jesús loj gunaaga:

—Agulaalu lo xtoj_llu sa'csi ahuililajzlu; huij naj, bascuexi lajzlu.

8

Regunaa ni gucnäj Jesús

¹ Dxejcti gusloj huij Jesús guiraa reguejdx nájza rerench, cagusule'ni xtidx Dios, caguluiini xcu_ent xcäl_rnibee Dios loj rebej_n. Sanäni rexpej_npacni

² nájza gaii gunaa ni abasiaj_cni, agulääni rebendxab lastooreni, nájza basi-ajcni xcälguijdxreni. Tejni laa Marii ni laaza Magdalen, ni gulää Jesús gajdz bendxab neñ lastooni.

³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajx hixtenreni te rio' recos ni rquiinreni.

Xcu_ent bej_n ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidaj_l bej_n lojni ni birii xhidaj_l reguejdx. Lojreni gunii Jesús con te cu_ent ni ruluii, ráj_pni:

5 —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini.

6 Yu'za lajt bitejb binijga nen reguij cadre xheti xhidajl yuj. Che gulejn binijga, gubidzgajcni sa'csi xheti xcojp ro'c.

7 Yu'za lajt bitejbni nez nen reyaguejch. Che gulejnni, di reyaguejch nusaan niroob gäjlgä.

8 Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

9 Dxejcti gunabdiidx rexpejn pacni lojni räjpreni:

—¿Xhi säloj cuentre?

10 Dxejc räjpni lojreni:

—Lojtu ni najc rexpejnä suniidx Dios yälñajn te gacbeetu reyälxhiga'tz xten xcälñibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gacbesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

11 Räjpzani:

—Scree säloj cuentre, rebini najc si'c xtidx Dios.

12 Binij ni biajb lo nezyuj najc si'c rebejn ni rucuadiajg xtidx Dios. Dxejc riääd bendxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl.

13 Binij ni biajb nen reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios.

14 Binij ni biajb nen reyaguejch najc si'c rebejn ni rucuadiajg xtidx Dios, per lañ ni sanuureni xnejzreni, rijia'nreni lo recos guedxliuj, lo yälñasa'c ni ruhuiireni, näjza rujnreni si'ctis ni rñajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios.

15 Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yälñasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas

(Mr. 4:21-25)

16 Räjpzani:

—Ruti te bejn ni rucuaguij te bajl dxejc rusäuni te caj yejc bajlga, dizani gusujnini dejtz te loon. Alga rusoobnini nen candilieer loj te mex te guzanijni guideb nen yu'ga te reni jiu' fiireni lo bajlga.

17 Xhet yu'di ni yuchetzu'tzdi ni di guidzujñ dxej guiluiini; xhet yu'diza ni naga'tz ñaj ni di guidzujñ dxej gacbee bejnñi.

18 'Ni'cni colcuadiagsa'c diidx; sa'csi guiraa rebejn ni rajp yälñachee, sajprureni yälñajn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najnni.

Xnan Jesús con rebejtzni
(Mt. 12:46-50; Mr. 3:31-35)

¹⁹ Dxejc bidzujñ xnan Jesús nájza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c.

²⁰ Dxejcti huisa'n te bejn diidx loj Jesús, rájpní:

—Xnan guejblu nájza rebejtz guejblu suga' rolá', luxh rlanjzreni fiireni lo guejblu.

²¹ Badzu' Jesús diidxre lojreni, rájpní:

—Xnaná nájza rebetzá najc rebejn ni rucuardiajg, ni ruzoobza xtidx Dios.

Basiacdxi Jesús te beduxh
(Mt. 8:23-27; Mr. 4:35-41)

²² Te dxej biu' Jesús nájza rexpejnñpacni neñ te barcw. Dxejc rájpní lojreni:

—Colcho' stelaad ro' nisre.

Basyu'reni barcw lo nis, sä'tireni.

²³ Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jiääz barcwga lo nis.

²⁴ Dxejcti huicuäänreni Jesús, rájpreni lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga nájza lo nis ni cayäsjaia. Dxejc gulájz bejga, guredxiza nisga.

²⁵ Dxejc rájpní lojreni:

—¿Con xcälirililajztu, ä?

Per laareni bidxejbreni, bidxeloduxhreni, canabdiidxreni lo sa'reni:

—¿Chuni'c najc niguiire te rnibeeni bej nájza nis, luxh rusobdiajg bej nájza nis xtiidxni?

Te beñ Gadara ni guyu' rexsprit beñdxab lastooni
(Mt. 8:28-34; Mr. 5:1-20)

²⁶ Bidzujñtireni lo yuj xten Gadara ni tre' stelaad ro' nis nez loj reyuj xten Galilee.

²⁷ Cheni biäjñ Jesús neñ barcw baläjñi lo yuj, gubig te bejn ni siääd guejdxga lojni. Agujc xchej yu' rebeñdxab neñ lastooni. Dini gacw xhajbñi, dizani cuääz neñ yu', alga rbäjñi cadro yu' rebaa.

²⁸ Che bahuiini loj Jesús bazuxhijbñi nez lojni, guredxa'ni rájpní:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebeñdxabga neñ lastoo bejnre. Agujc xchero cazob rniaaz rebeñdxabga bejnnga ruliib rebejn ni'ni, ñaani con cadeñguiib te guilibdzu'tzñi, te xhet gundini bejn. Niluxh laani rutiugya'ni recadeñ, dxejc rebeñdxabga rinärenini nez lo reyubijdz.

³⁰ Jesús gunabdiidx lojni, rájpní:

—¿Chu laalu?

Dxejc badzu'ni diidxre loj Jesús rájpní:

—Legión najc laä.

Si'c guniini sa'csi xhidalduxh najc rebeñdxab ni yu' neñ lastooni.

³¹ Dxejc gunabduxhreni loj Jesús na'c guxhañsacñireni cadro biriireni.

³² Lagajc dxejc suga' xhidajñ cuch cayajwreni guixa' lagajc nejzga lo te bala'. Dxejc gunab rebeñdxabga loj Jesús te gusaanni jiu'reni neñ recuchga. Che cuäjñ Jesús,

³³ birii reben_{dx}abga nen lastoo dade'ga, biugajcreni nen recuchga. Che biu'reni nen recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nreni diidx lo reben_{guejdx}ga najza lo reben_{rench}.

³⁵ Dxejc biadhuii rebejn xhini'c gujc ro'c. Che bidzujnreni cadre suga' Jesús, bahuiireni loj bejn ni birii ben_{dx}ab lastooni. Sobga'ni cuä' ni' Jesús, najcwni xhajbni, luxh xhetru rajcde yejcn; dxejc bidxebduxh rebejn_{ga}.

³⁶ Sas reni bahuiloj xho gujcn, bijreni diidx xho basiajc Jesús bejn ni guyu' reben_{dx}abre lastooni.

³⁷ Dxejc guiraa reben Gadara najza reguejdx ni tre' nejjza, gunabreni jiunejz Jesús ro'c sa'csi cadxebduxhreni. Ni'cni biu' Jesús nen barcw te gubisacni nejj cadre siädni.

³⁸ Dade' ni birii reben_{dx}ab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹ —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo najza te gunaa ni gudajn xhajb Jesús

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjpacreni guibisacni.

⁴¹ Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni

⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. La'si sää Jesús rolijzni, birinajl xhida_{ld}uxh bejn_{ni}, catäälirenini.

⁴³ Loj rebejn_{ga} nadxaag te gunaa ni agujc tzubito'p ijz cayacxhuuni, caya-jcni yälguidxbäii. Xlia'si abanijt_{ni} guiraa xhixt_{enni} cua' renani rujn remeed.

⁴⁴ Gubig gunaaga dejt_z Jesús te gudajnni ro' xhajbni. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basiajc xcäl_{rn}ibeä.

⁴⁷ Che gucbee gunaaga anajn Jesús gudajnni xhajbni, bidxejbni, racsejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni najza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ La_{lni} canii Jesús si'c bidzujn te bejn ni siäd rolijz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtz_{uun} Dad Mastr.

⁵⁰ Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

⁵¹ Che bidzujnreni rolijzni, xtebtis Pedr, Jacoob, Juan najza xcuzaj_n dxape'ga biunäj_{ni} nen yu'ga. Peta rebejn ni siäd_{najl}ni bia'nreni rolä'.

⁵² Cayonduxh guiraa rebejn ni sobga' nen yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³ Alga baxhiznäjrenini, sa'csi anajnreni agujt dxape'ga.

⁵⁴ Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

⁵⁵ Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajjni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejñpacni (Mt. 10:5-15; Mr. 6:7-13)

¹ Batie' Jesús guitzubitio'p rexpejñpacni te badeedni yälrnibee lojreni te cuääreni reben_{dxab} lastoo rebejn, näjza te gusiajcreni reben_{racxhuu}.

² Baxhalnireni te gusule'reni diidx xcuent xcälrnibee Dios näjza te gusiajcreni reben_{racxhuu}.

³ Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajtju; tejtisni chanätu.

⁴ Chutis rolijz bejn cadro guidzujntu, ro'c coljia'n cheni guiriilitu lo guejdxga.

⁵ Palga direni gusaan jiu'tu rolijzreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni reben_{racxhuu} cadrotis rdzujñreni.

Xho gujt Juan ni rutiobnis (Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo reben_{gut}.

⁸ Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac.

⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlajzpac Herodes fii lojni.

Bayaan Jesús gaii miļ bejn (Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejñpacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida.

¹¹ Che gucbee rebejn caro sääreni, huinajlrenini bidxälrenini. Che siäädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

¹² Che gusloj cayäaz gubijdx, gubig rexpejñpacni loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadro tedreni guxhijn lo rerench, neñ reguedxbäz, sa'csi ree xhet yu'di.

¹³ Dxejcti räjp Jesús loj rexpejñpacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau rebeñ xhidajlre.

¹⁴ Luxh najc rebeñga si'cti gaii miñ niguii. Dxejc räjp Jesús loj rexpeñpacni: —Colyejtz lojreni cuereni xcua-xcuaareni, si'cti tiuubitzugajreni te cuaa.

¹⁵ Si'c bejnrenini, sas gurej guiraa rebeñga si'c.

¹⁶ Dxejc cua' Jesús gaii yätxtiilga näjza tio'p bäjlga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlgga, dxejc sanuutis badeednini loj rexpeñpacni te gudisrenini loj rebeñga.

¹⁷ Guiraa rebeñ xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

*Gunii Pedr Jesús najc Crist
(Mt. 16:13-19; Mr. 8:27-29)*

¹⁸ Te dxej lañi cabedx-canab Jesús lo Dios, xtebni näjza rexpeñpacni, gunabdiidxni lojreni, räjpni:

—¿Chuni'c rnii rebeñ nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zarenini rnii najclu Elías; sgaiireni rnii najclu stee niguii ni gunii xtidx Dios galoo ni agubañsac.

²⁰ Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabäaznu.

*Jesús rnixgaa xho guetni
(Mt. 16:20-28; Mr. 8:30-9:1)*

²¹ Dxejc gunibee Jesús lojreni, räjpni:

—Na'c gäbtu si'c lo rebeñ.

²² Räjpzani lojreni:

—Nanab ted Xi'n Niguii trabajwduxh; rebeñgool xten guidoo, näjza rebixhojz, näjza rebeñ ni ruluii xleii Moisés sibälazreni narä, naareni dina gacä Crist ni cabäaznu. Sugu'treni narä Xi'n Dios ni gujc Niguii, niluxh sibañsacä ni riojñ dxej.

²³ Dxejc räjpni loj guiraareni:

—Palga chu tejtü rlañz guirinajl narä, nanab jiälajzni xhixtënni, te guixee guixee guntisni nani gudedä gunni.

²⁴ Sa'csi nani rlañz guiniazdzu'tzni xcälñabajñni, sunijtni yälñabajñ lo Dios; luxh nani runijt xcälñabajñni xcuent xtidxä, sica'ni yälñabajñ par tejpas.

²⁵ Sa'csi ¿xhi gaan gun te beñ palga xca'ni guideb guedxliuj, luxh gunijtni xcälñabajñni lo Dios?

²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäazani cheni jiälä si'c reii guideb yälrdimbicha' xten Xtadä näjza rexanglni.

²⁷ Guliipac rniä lojtu, yu' gaii reni suga' ree, ni di guet, suhuixgaareni xcälñabee Dios.

*Bachaa xho rluiloj Jesús
(Mt. 17:1-8; Mr. 9:2-8)*

²⁸ Gudejdti xhujñ dxej gunii Jesús diidxre, dxejcru huinä Jesús Pedr näjza Jacob näjza Juan, huijreni jiaa yejc te dajn te guredx-gunabni loj Dios.

²⁹ Lañi cabedx-canab Jesús lo Dios, bidxaa xho ruluii lojni; dxejc xhajbni gujc nolbäj, rdimbicha'lini.

³⁰ Biricajza tio'p dade' caninäjrenini. Redade'ga najc toMoisés nājza Elías.

³¹ Rdimbicha'za redade'ga. Caninäjreni Jesús xcuent xho guetni guedx Jerusalén.

³² Luxh Pedr nājza resa'ni guyuduxh bacal lojreni; che bire'ch bacal lojreni bahuiireni lo yälrdimbicha' xten Jesús nājza loj guiro'p redade' ni caninäjni.

³³ Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choṇ yue', tejni par luj, tejni par Moisés, steeni par Elías.

Luxh di Pedr gaan xhini'c caniini.

³⁴ Lalni caniini si'c, bire' te za gusloj cayäjt yejcreni, dxejc bidxejbreni che biu'reni neṇ zaga.

³⁵ Dxejcti biejn diajgreni neṇ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni neṇ redxejga, rut lojdi bijreni diidx xcuent ni bahuiireni ro'c.

Basiajc Jesús te biuux ni guyu' beṇdxab lastooni

(Mt. 17:14-21; Mr. 9:14-29)

³⁷ Barayäl cheni biäjtreni yejc dajnga, xhidalduxh bejn cabäjz Jesús.

³⁸ Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä.

³⁹ Luxh beṇdxab rniaazni, sas ruscuedxa'nini, rajcni si'c yälguidxbej, rbääni bitzuṇ ro'ni, rusacsíduhxnini, luxh dini gusaanni.

⁴⁰ Agunabä loj rexpejnpaclu nibääreni beṇdxabga, luxh di niajcdini.

⁴¹ Dxejc badzu' Jesús diidxre, räjpni:

—¡Bejn ni di chalilajz, beṅguijdx! ¿Gucli chunäätu, gucli gunä huant la'tu? ¡Gudanä xi'nlu ree!

⁴² Dxejc che cabig biuuxga lojni, basälta' beṇdxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj beṇdxabga, basiacgajcni biuuxga, dxejc badeednini lo xtadni.

⁴³ Guiraa rebejn bidxeloduxh yälrnibeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

Lalni cadxeloj rebejn lo recos ni bejn Jesús, räjpni loj rexpejnpacni:

⁴⁴ —Colcuadiajgsa'c rediidxre, na'cza jlällajztureni, sa'csi sutedreni narä Xi'n Dios ni gujc Niguui ladzṇaa rebejn.

⁴⁵ Niluxh di rexpejnpacni niachee xhi säloj rextiidxni, sa'csi Dios bacua'tznini lojreni te di niacheerenini. Bidxejzbareni niniabdiidxreni loj Jesús xhi säloj rediidxga.

Chuni'c sajcru

(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷ Per guchee Jesús xhi xhigab cayujnreni. Dxejc cua'ni te biuxbäz, bazu-jnini cuä'ni,

⁴⁸ räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhal narä. Ni najc maazru nadolajz lojtu, ni'c najc ni sajcru.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpēdxab neñ lastoo bejn con xcäl̄rnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacoob näjza Juan

⁵¹ Che siäddzujñ redxej ni chää Jesús xhaguibaa, bejn ni xhigab chääpacni guedx Jerusalén.

⁵² Baxhal̄ni gaii bejn gunijd lojni chääreni te guejdx xten Samaria te satiilreni cadre jia'nreni ro'c.

⁵³ Luxh rebejn samaritan di rlajzreni gudedlaareni te lajt cadre jia'nreni, sa'csi najnreni chääreni guedx Jerusalén.

⁵⁴ Che biejn diajg Jacoob näj Juan, tio'p xpejn̄pacni, si'c, sas räjpreni loj Jesús:
—Dad, ¿La rlajzlu guinibeenu jäjt guiboo xhaguibaali te guze'cni guiraa rebeñguejdxga si'cni bejn Elías?

⁵⁵ Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu.

⁵⁶ Sa'csi narä Xi'n Dios ni gujc Niguui dina niälä te gudzucaä xcäl̄nabajn rebejn. Narä biälä te guslääreni lo dojl.

Dxejcti huijreni garenca guejdx.

Reni rlajz nirinajl Jesús

(Mt. 8:19-22)

⁵⁷ Lal̄ni sääreni lo nezyuj, biääd te bejn gunii loj Jesús, räjpni:

—Dad, narä rlazä jäädnalä guejblu cadrotis chää guejblu.

⁵⁸ Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguui, dina gapä nicla te lajt cadre guscugä yecä.

⁵⁹ Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxaä xtadä, dxejcru jäädnalä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c beñgut, resabeñgutreni. Per luj, huij, huisule' diidx xcuent xcäl̄rnibee Dios.

⁶¹ Dxejc räjp steeni lojni:

—Dad, rlazä jäädnalälu, niluxh basanxgaa chasadixä resa'ä ni tre' rolizä.

⁶² Dxejc räjp Jesús lojni:

—Nani ruzuj ñaani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl̄rnibee Dios.

10

Ruxhal̄ Jesús regayon̄bitzuu

¹ Che gulujx reni'c, gule Jesús gayon̄bitzuu bejn, baxhal̄nireni tio'pgajreni te basnijdnireni lojni loj reguejdx cadre nanab tedni.

² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni col̄guiniab lo baxhuaan xten cose'ch te guxhal̄ni xhidajlru bejn ni gun dzuun gutie' xcese'chni.

³ Col̄chäj la'tu; col̄huii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rlajzreni.

⁴ Na'c chanätu ngodx, ni claza guijxh, ni claza xcura'chtu, luxh na'c sudxitu guininäitu bejn lo nejz.

⁵ Cheni jiu'tu rolijz te bejn, ganiddoo colye'tz: "Sucuedxilajz reni rbäz ree."

⁶ Palga najcni te bejn ni rdxagljaz yälrbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu.

⁷ Coljia'n lagajc rolijz bejn cadre guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäj l xca'ni xcuent dzuunga. Coljia'n tejtis lajt dxejtis ni chutu lo guejdxga.

⁸ Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu.

⁹ Colgusajc rebenracxhuu ni yu' ro'c, colye'tz lojreni: "Abidzujngajxh xcälrnibee Dios."

¹⁰ Palga jiu'tu te guejdx cadre di rlajzreni gucuadiajgreni xtiidxtu, colrii lo nezyuj, ro'c colye'tz lojreni:

¹¹ "Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzujngajxh xcälrnibee Dios lojtu."

¹² Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist

(Mt. 11:20-24)

¹³ Räj pzani:

—jProbe'tu bejn guedx Corazín! jProbe'zatu bejn guedx Betsaida! Paru nuhuii rebenzajt ni gubajn guedx Tiro näjza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzaren lo cobdäj si'c te seen abasiechlajzreni.

¹⁴ Che gun Dios fis rextolj rebejn guedxliuj, guxiiru gac xfis Dios lo rebenzajt ni gubajn guedx Tiro näjza Sidón. Fisroru gun Dios reguedx Corazín näjza Betsaida.

¹⁵ Luxh luj guedx Capernaum, rchalolu siäjslu xhaguibaa, alga siajblu gabijlli, cadre gaclu fisro xten Dios.

¹⁶ Räj pzani lo rexpejnpacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtidx ni baxhal narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhal Jesús, rbaduxh lajzreni, räj pren:

—Dad, näjza reben dxab rusobdiajg xtiidxnu che rusä'tnu lajlu.

¹⁸ Räj Jesús lojreni:

—O'n. Ni'cni narä bahuiä che gunijt xcälrnibee ben dxab, bitejbni xhaguibaa si'c bianij xten guzii.

¹⁹ Colgacbee. Narä runidxä yälrnibee lojtu te guläitu yejc bäl näjza yejc naxejb; runidxäza yälrnibee te guntu gaan lo xcälrnibee ben dxab. Xhetliidi gun daan la'tu.

²⁰ Na'c guibalajztistu sa'csi rusobdiajg reben dxab xtiidxtu; colguibalajzru sa'csi acuaj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznä Jesús Sprit Dzan xten Dios, dxejc räj pni lo Dios:

—Rliä'pä xpala'nlu Xtäädä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtäädä, sa'csi si'c rlajzlu gunlu.

22 'Guiraa recosre abaniidxlu loä Xtadä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtadä, xtebtis narä ni najc Xi'nlu, con rebejn ni rlazä gumbee luj.

23 Dxejc bahuii Jesús loj rexpejn pacni, räjpni lojtisreni:

—Chicbaa la'tu näjza renani ruhuii guiraa nani cahuilojtu.

24 Sa'csi rniliä lojtu, balti redade' ni gunii xtidx Dios galoo, baltiza rereii rlazj nuhuiireni guiraa ni cahuilojtu, niluxh direni nuhuiini. Rlazjreni niejn diajgreni rediidxre ni cayejn diajgtu, luxh di diajgreni niejnni.

Xcuent te behuen ni siääd Samaria

25 Dxejc huisulii te maestr xten leii, huininäjni Jesús, rlazjni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibañnäá Dios par tejpas?

26 Sas räjp Jesús lojni:

—¿Xhini'c caj lo guijtzt xten leii? ¿Xho rolluni?

27 Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälajzza resa'lu si'ctis ni sanälajzlu lagajc luj.

28 Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yäl nabajre.

29 Per maestr xten leii, rlazjni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

30 Dxejc räjp Jesús lojni:

—Te beñ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini.

31 Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

32 Gudejdza te levita, bejn ni rujnza dzuun neñ guidoo. Che bidzujñni cadre naga' bejnga, gudejdni stelaad, sä'tini.

33 Dxejcti te beñ Samaria, lañi sääni biaj, gudejdni nezyujga, bidzujñni cadre naga' bejnga. Che bahuiini lojni, balaslajznini.

34 Gubigni loj bejnga, basälñi se't näjza bin loj bejn ni nadxälguijdx, dxejc batejbnini te la' lajd. Dxejc bascuibnini dejtzt lagajc xmanni, huinänini cadre rudedlaareni yu', ro'c cuanäjnini.

35 Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

36 Dxejc räjp Jesús lo maestr xten leii:

—¿Chu tej lo guidxon rebejnnga najc si'c sa' xten dade' ni biajb ladzña gubaan?

37 Dxejc räjpni loj Jesús:

—Ni balaslajz bejnga.

Dxejc räjp Jesús lojni:

—Huij te sigajcza chayejnlu.

Bidzujñ Jesús roliz Mart näjza Marii

38 Lañi huinuu xnezyujni, bidzujñni te guejdx. Ro'c bidxaagni te gunaa ni laa Mart ni huinänini rolizni.

39 Yu' te bäjl Mart ni laa Marii, luxh laani gurejni cuä' ni' Jesús te cacuadiajgn xtiidxni.

40 Mart cagusquejñni cayujñni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¡Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos,

⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11

Rului Jesús xho guiniabni lo Dios

(Mt. 6:9-15; 7:7-11)

¹ Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejn̄pacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejn̄pacni.

² Dxejc räjp Jesús lojreni:

—Che cuedx-guiniabtu lo Dios, scree col̄nii:

Xtadnu ni yu' xhaguibaa,

suchä'p xpala'nlu, sujiääd xcäl̄rnibeelu.

Sugac si'ctisni r̄lajzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni r̄quiinnuni.

⁴ Basiäj̄l lajzlu redojl̄ xtenu si'cni riäj̄l lajznu redojl̄ ni rujn̄ rebejn̄ loonu.

Na'c gusaanlu jiajbnu lo xcäl̄rnibee beñdxab.

Bas̄laa nuurnu lo dojl̄.

⁵ Dxejc räjpza Jesús lojreni:

—Paru tejt̄u yu' te xamiigwni, luxh guidzuj̄ni rolijz̄ni garol yääl, gäbni: “Xamigwä, banid̄xlaa choñ̄ yät̄xtiil,

⁶ sa'csi bidzuj̄n̄ te xamigwä rolizä ni bazaj biaj, luxh xhet ra'pädi te gudedä xhi gauni.”

⁷ Xhixh sinii ni naga' neñ̄ xyu'ni, gäbni: “Na'c riädtie'chlu bacal̄ loä. Niäu rolä' luxh rexi'nä naga' cuä'ä, digacdi chästieä te gunid̄xä xhi gunid̄xä lojlu.”

⁸ Rniliä lojtu, mase dini chastie te gudeedni sa'csi najcni xamiigwni, sistieni, sudeedni nani r̄quiintisni te na'cru gutie'chni bacal̄ni.

⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu.

¹⁰ Sa'csi chutis ni rniab, rca'ni nani rniabni; chutis ni r̄guuil xhi cos, rdxäl̄nini; nani rusejz rolä', suxhalzarenini lojni.

¹¹ 'Paru tejt̄u ni najc dad, jiääd te xi'ntu guiniabni te yät̄xtiil lojtu, ¿la sudeedtu te guij, ä? O palga guiniabni te bäj̄l, ¿la sudeedtu te bäl, ä?

¹² O palga guiniabni te tzutbejt, ¿la sudeedtu te naxejb, ä?

¹³ Palga la'tu, ni najc beñdojl̄, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenu loj renani rniabni lojni.

Rucuaquijreni Jesús, rniireni rajpni yäl̄rnibee xten beñdxab

(Mt. 12:22-30; Mr. 3:19-27)

¹⁴ Guläa Jesús te beñdxabgop lastoo te bejn̄. Che birii beñdxabga lastoo bejn̄ga, guslogajc canii bejn̄ga, dxejc bidxeloduxh reben̄ xhidaalga.

¹⁵ Dxejc yu' reni räjp:

—Niguiire rbää rebeñdxab con yäl̄rnibee xten Beelzebú ni rnibee loj rebeñdxab.

¹⁶ Sgaiireni r̄lajz guquuilrenini, ni'c canabreni gunni te seen ni siääd xhaguibaali.

¹⁷ Niluxh laani gucbeeni xhi xhigab cayuj̄nreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäj te cuaani stee cuaaga, di gac_laa sinij_t gubierga lo guedxliuj. Palga te famil_l rdil_näj lagajc sa'ni, di gac_laa sinitloj famil_lga.

¹⁸ Palga guiliä' sa' rebendxab, ¿xho mood chanuu xcäl_rnibeereni? Dee rniä sa'csi la'tu rniitu narä rbää rebendxab con lagajc yäl_rnibee xten Beelzebú.

¹⁹ Palga si'c najcni, ¿chumi'c rudeed yäl_rnibee loj rexpejntu te rbääreni bendxab? Lagajc laareni ruluu xhet laadi rujntu xhigab.

²⁰ Palga narä rbää rebendxab con xcäl_rnibee Dios, ni'cni ruluiloj abidzujn xcäl_rnibee Dios lojtu.

²¹ 'Cheni suga' te bendaan, ca'ni guib, canäjni rolizni, rutliidi ruhualdi rexhixteni.

²² Niluxh che jiaäd stee ni nadipru lo bendaanga, rudxagdij_lnini, rujnni gaanni, dxejc rudzucajni xquibni ni badeed yäl_bendaan lojni, dxejc sajc chanäni guiraa rexhixteni.

²³ Reni xhet yu'di xladä, rdxe'chreni loä. Ni di gutopnäj narä, rutie'chni.

²⁴ Räjpzani:

—Cheni rii te bendxab neñ lastoo te bejn, ricansajni nez lo reyubijdz, cagui-
ilni cadro gusilajzni. Che cad rdxäldini, rujnni xhigab, naani: “Guibisacä
rolizä cadro biriä.”

²⁵ Cheni guibi'ni, rdxäl_ni lastoo bejn_ga si'c te yu' ni entis gulujx bilioobni, suchesa'cni.

²⁶ Dxejcti rixiini sgajdz bendxab ni rujnru latsiaj lojni. Dxejc riu'reni neñ lastoo bejn_ga, dxejc nalasru ria'n bejn_ga loj ni guj_cni galoo.

Chicbaa renani riu xtidx Dios

²⁷ La_l ni canii Jesús rediidxre, te nane' ni yu' lo reben_l xhidaalga dipli guniini, räj_pni:

—¿Chicbaa nan ni biäd_nälu guedxliuj! Chicbaaza nani bas_laa luj.

²⁸ Luxh laani räj_pni:

—Xhet si'c di najcni; chicbaaru rebejn ni rucuaiajg xtidx Dios, ni ruzoobza xtiidxni.

Rebenguidx rniab te milagwr si'c te seen

(Mt. 12:38-42; Mr. 8:12)

²⁹ Sanuutis cadojp rebejn gabi Jesús, dxejc guslojni caniini, räj_pni:

—Rebejn ni yu' naj be_{ng}uidxduxh_reni, rniabzaren_e te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni.

³⁰ Lagajc si'c ni guj_c Jonás te seen loj rebejn guedx Nínive, si'cza narä, Xi'n Dios ni guj_c Niguii, gacä te seen lo rebejn ni nabaj_n naj.

³¹ Cheni guidzuj_n dxej ni gac fis sistie te nane' ni guj_c rein lo reyuj ni tre' ladbäj_gw, sucuaquijni rebejn ni tre' guedxliuj naj sa'csi laani biriini zitduxh te bacuaiajgpacni yäl_naj_n xten Salomón. Ree suga' galäiitu tej ni sacduxhru lo Salomón,

³² luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabaj_n naj neñ redxej ni gac fis. Dxejc sucuaquijreni rebejn ni nabaj_n naj sa'csi laareni, che huinäli Jonás xtidx Dios lojreni, basiechlajzreni, basa'nreni xtoj_lreni. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³ Räjpzani:

—Rut rucua_guidi te baj_l, te gusujnini te lat xhiga'tz, niclaza neñ te caj. Susujni baj_lga jiaa te rajc ruhuisa'c chutis ni riu' neñ yu'.

³⁴ Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäy.

³⁵ Gunatiro te di gac xpianijlu yälñacäy.

³⁶ Palga guideb xcäriejnlu yu' bianijtis, xheti te lajt nacäy, sajc fisa'clu guira'ti, si'c najc che rusani j te bajl neñ yu'.

Rucuaquij Jesús refarisee näjza rebejn ni najn leii

(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajñ te farisee Jesús chääni rolijzni te chata-jwni. Sä'tireni. Che biu' Jesús, gurejni lo mex.

³⁸ Bidxeloj fariseega sa'csi dini niguiib ñaani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios.

³⁹ Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yälgubaan näjza yällatsiaj.

⁴⁰ ¡Beñ nadduxh! ¿La ditu gacbee? Nani benchee dejtzni, bencheeza neñni.

⁴¹ Colyajc nadolajz, colyacnä j rebejn con ni rniitu, dxejc guiraa recos sajc naya par la'tu.

⁴² '¡Probe'zatu, beñ farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, nä j guiraa recuane' ni rajptu lo le', niluxh ditu jiu xcäl'guxhtis Dios näjza xcäl'rinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ '¡Proobza la'tu rebeñ farisee! Rchagljajztu rbejtu lo reyagxhil xten rebejn ni sajc neñ reguidobäz; rchagljajztu saru rni rebejn “xchan Dad” lojtu che rijtu lo guii.

⁴⁴ '¡Probe'zatu! La'tu najctu si'c rebaa ni di guzeñ, rsiaj rebejn yejc cadre naga'reni luxh direni gan.

⁴⁵ Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

⁴⁶ Dxejc räjp Jesús lojreni:

—¡Probe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rrajztu faltuni nicla con te bicuenabäztu.

⁴⁷ '¡Proobzatu! Sa'csi runcheetu xpaa redade' ni gunii xtidx Dios galoo, luxh najctu rexajg renani bagu't redade'ga.

⁴⁸ Ni'cni najnpactu xhi gusajcreni, rchagljajzzatu redzuun ni bejn retoxtad-goldootu; si'cza gunnä jtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ 'Ni'cni gunii Dios, sa'csi yuduxh xcäl'najnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.”

⁵⁰ Loj rebejn ni nabajn ñaj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj.

⁵¹ Guislojni xtiejn toAbel, näjza xtiejnli Zacarías ni bagu'treni galäii nez lodxan neñ guidoro. Ni'cni rniä lojtu, siniab Dios cuent xten xcäl'gujt guiraareni loj rebejn ni nabajn ñaj.

⁵² '¡Probe'za la'tu, rebejn ni ruluii leii! Sa'csi rniitu la'tistu rajptu yäl'najn, luxh di rrajztu chalilajztu xtidx Dios, dizatu gusaan chalilajz rebejn ni rrajz chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx,

⁵⁴ te cagula'tzreni don la sajc guiga'ni lo xhitis te diidx ni guiniini.

12

Jesús ruluii xcuent levaduur

¹ Laḷ ni caniini, bidojp xhidajl miḷ bejn ro'c, calaro'li sa'reni. Dxejc gusloj canixgaa Jesús loj rexpejnpacni, räjpni lojreni:

—Colnati levaduur xten refarisee, rusgueereni rniitisreni xhidajl diidx luxh direni gunni.

² Sa'csi xheti xhi niäu lojni ni di guxal lojni luxh xheti xhi naga'tz ni di jienloj.

³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu nen reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjzani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni.

⁵ Guiniä lojtu chuni'c nanab guidxejbtu. Colguidxejb nani che abadzucajni yäl nabajn räjpni yäl rnibee gusäl ni la'tu gabijl lo bajl ni cayejc par tejpas. Ni'csii colguidxejb.

⁶ 'Anajntu sajc jio' gaii mane' tio'p melbäz, luxh di Dios jiällajz nicla tej remane'ga.

⁷ Rexquidxejcti abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjzani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios.

⁹ Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit Dxan xten Dios, di Dios gusiäjllajz xtojlni.

¹¹ 'Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu,

¹² sa'csi che guidzujn or ni guiniitu, Sprit Dxan xten Dios suluiini xhini'c guiniitu.

Reyäl nasa'c rusajb bejn nen dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yälguxhtis o gacä abogaad lojlu, ä?

¹⁵ Dxejc räjp sac Jesús lojreni:

—Colnatiro, colgantzu' te di rlaiztistu ga'ptu yäl nasa'ctis sa'csi xcäl nabajn bejn dini gac yälrajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te ben rapduxh. Racduxh cose'ch lo rexcäjlni.

¹⁷ Dxejcti gusloj bejn xhigab: “¿Xhocha gunä? Dina gapä cadre cucheä recose'ch.”

18 Sas bejnni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxix-tenä.”

19 Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.”

20 Dxejc räjp Dios lojni: “¡Ben najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?”

21 Si'c sisiajc guiraa rebejn ni rguiltis xcäl'nasa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

22 Che gojl stera't, räjp Jesús loj rexpejn pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu.

23 Yäl'nabajn sajcruni lo yäl'rajw; tiejxhni sajcruni lo lajd ni rajcw bejn.

24 ¡Col'huii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä?

25 Luxh ¿Chu tejtü palga runduxhni xhigab sajc tioobruni sgarol metr?

26 Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

27 ¡Col'huii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla rei Salomón con guiraa xcäl'nasa'cni, dini nisiuchee si'c rsiuchee reguiiga.

28 Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcní lo däj, aticaxh Dios suniidx xhi gacw la'tu, ¡bejn nani guxii rililajz!

29 Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'.

30 Si'ctis rujn rebenguedxliuj guideb xtijpreni rguilreni rehxicosre. Niluxh xtadtü ni yu' xhaguibaa anajnni xhini'c rquiintu.

31 La'tu col'quiiltis xcäl'nabee Dios, dxejcti laani suniidxzani guiraa recos ni rquiintu.

Yäl'nasa'c ni yu' xhaguibaa

(Mt. 6:19-21)

32 Räjnzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl'guxhtis lo xcäl'nibeeni.

33 Col'guto' xhixtentu, col'gudeedni loj rebejn ni caquinduxhni, te si'c guntu te bols ni di jiuixh, te chu yäl'nasa'c nenñi xhaguibaa cadre di gubaan jiu' niclaza xcabäj rehxicos.

34 Sa'csi cadre rajptu xcäl'nasa'ctu, ro'cza yu' lastootu.

Nanab susintu

35 Räjnzani:

—¡Col'susin! ¡Col'hualguij rebajl!

36 Col'yujn si'c remos ni cabäjz guibi' xlamreni ni sää te sa', te cheni guibi'ni guxhalgajcreni rolä'.

37 Chicbaa remos ni susin che guibi' xlamreni. Rniliäpac lojtu, lagajc xlamreni sajcwñi xhajbñi sibe'cni rexmosni lo mex, dxejc lagajc laani sudeedni xhi gaureni.

³⁸ Mase guidzuj_{nni} garol yääl, mase guidzuj_{nni} cäjyru, palga guidxäl_{ni} arexmosni susi_n, ¡chicbaa remosga!

³⁹ Colyacbeepac, paru gacbee baxhuaan xten yu' xhi or guidzuj_n gubaan rolijz_{ni}, dini gusaan guxhalreni rolijz_{ni} te cuanreni xhixt_{enni}.

⁴⁰ Näjza la'tu col_{susi}n, sa'csi or ni ditu gun xhigab jiäd_{ni}, sidzuj_n Xi'n Dios ni gujc Niguii.

Te mos gujdx

(Mt. 24:45-51)

⁴¹ Dxejc gunabdiid_x Pedr loj_{ni}, räjp_{ni}:

—Dad, ¿la lootisnu rujylu cuentre o la najc_{ni} par guiraa rebej_n?

⁴² Dxejc räjp Jesús loj_{reni}:

—¿Chuni'c najc mos hueen, mos nasi_n, ni rusannäj xlam_{ni} guiraa rexmosni te gudeed_{ni} xhi gaureni che gal oor, ä?

⁴³ Chicbaa mosga palga laaca cayuj_{nni} che guibi' xlam_{ni}.

⁴⁴ Rniliäpac lojtu, lamga sudeed guiraa rexhixt_{enni} te xcanäj mosgani.

⁴⁵ Per palga gun mosga xhigab ne_n lastooni: “Sac_{laa} guibi' xlam_ä”, sas guisloj_{ni} gusacs_{ni} resamosni, gunaa sigajc niguii, dxejc guisloj gauni, yäni, sooz_{ni};

⁴⁶ sibi' xlam_{ni} te dxej ni xhet cabäjzdinini, or ni dini gun xhigab guidzuj_{nni}. Dxejc sii sudeed_{ni} te castigwro loj_{ni}, sutiäj_{ni} te duu dejt_{zni} dxejc sinibeeni jiini, guidxaagni rebej_n ni di gusobdiajg diid_x.

⁴⁷ 'Mosga ni najn xhini'c r_{lajz} xlam_{ni} gac, luxh dini susi_n, dizani guzoob xtiid_{xni}, sutiälduxh_{reni} duu dejt_{zni}.

⁴⁸ Niluxh mos ni di gan xhi r_{lajz} xlam_{ni} gac, ni'c ruj_{nni} redzuun ni di xlam_{ni} guidxag_{lajz} gac, guxiiru castiigw gac_{ni}. Reni rca' xhidaj_l, xhidaj_{lza} riäj_l gudeed_{reni}; loj reni rca' yäl_{rnibeduxh}, xhiroobza siniab_{ni} loj_{ni}.

Rlia' Jesús bej_n lo sa'ni

(Mt. 10:34-36)

⁴⁹ Räjpza Jesús:

—Narä biälä te gucuaguiä guedxliuj_{re}; ¡malaii alagusloj cayej_{cni}!

⁵⁰ Niluxh nanab tedä te yäl_{robnis} ni säloj te trabajwduxh, ni'c cayuduxhä yärsia' cheni chale'lini.

⁵¹ ¿La rujntu xhigab biälä te jiäd_{nää} yäl_{rbedxi} loj guedxliuj, ä? Rniä lojtu, dini gac si'c. Alga biälä te guilia'ä bej_n lo sa'reni.

⁵² Silia' sa' te famil; loj gai_{reni}, sidxe'ch cho_{nreni} loj tio'pre_{ni}, luxh tio'pre_{ni} sidxe'chza lo cho_{nreni}.

⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtad_{ni}; nane' sidxe'ch lo xindxa'p_{ni}, luxh xindxa'pga sidxe'chzani lo xnanni; nansuegr sidxe'ch_{ni} lo xculijz_{ni}, luxh gulijzga sidxe'ch lo xnansuegr_{ni}.

Reseen xten retie_{mp}

(Mt. 16:1-4; Mr. 8:11-13)

⁵⁴ Caniiza Jesús lo rebe_n xhidaj_{lga}, räjp_{ni}:

—Cheni rhuiitu räjs reza nez lad jiät, rniitu: “Siajb nisguij.” Luxh riajb_{ni}.

⁵⁵ Che rbi' bej nez lad danbäg_w, rniitu: “Sac_{nalaa} nadxej”, luxh si'c rajc_{ni}.

⁵⁶ ¡Bej_n ni rusguee! La'tu racbeetu xhi säloj rese_{en} ni rien lo guedxliuj näjza xhaguibaa, ¿xhicuent ditu gan xhi säloj retie_{mp} ni dxunnu naj, ä?

Basiäj_l diid_x con rebej_n ni rdxe'ch lojlu

(Mt. 5:25-26)

⁵⁷ Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni?

⁵⁸ Sa'csi palga yu' chuni'c chale'c xquejlu lo guxhtis, la_lni sanäni luj ro jusgaad, basiäjl diidx con laani lo ne_j, te na'c chanäni luj lo reguxhtis, sa'csi dxejc reguxhtis sutedreni luj lo reguixhajg te gusaureni luj ne_n latzguiib.

⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiejch lajztu te di guettu

¹ Lagajc dxejc, gubig gaii reni huisa'nreni diidx loj Jesús xcuent gaii be_n Galilee ni bagu't Pila't ne_n guidoo, bagu'chni xtiejnreni con xtiejn reman ni siädnäreni si'c gojn lo Dios.

² Sas räjp Jesús lojreni:

—¿La rujntu xhigab si'c gusajc rebe_n Galileega sa'csi najcrureni be_ndojl lo rebejn lajdxreni?

³ Narä rniä, dini gac si'c. Palga di'tu gusiechlajz sigajcza sejt guiragajctu.

⁴ O xcuent guitzunchon rebejn nani gujt che gubixh te or ni laa Siloé yejreni, ¿La rujntu xhigab najcrureni be_n dojl lo rebejn ni rbäjz guedx Jerusalén, ä?

⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxäl_ni.

⁷ Dxejc räjpni loj bejn ni canäj xyujni, agujc cho_n ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj!

⁸ Luxh xmosni räjp lojni: “Dad, basaanni steb ijz, guslää yuj ni'ni, gusälä abonni.

⁹ Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusiajc Jesús te gunaa

¹⁰ Te dxej ni rusilajz rexpejn Israel caguluii Jesús ne_n te guidobäz.

¹¹ Ro'c suga' te nane' ni agujc tzunbichon ijz racxhuuni. Be_ndxab cagusoodni, niluxh di gacdi sulini.

¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

¹³ Che basujni naani yejcni, lagajc dxejc gujc gusulii nane'ga. Dxejc guslojni calä'pni xpala'n Dios.

¹⁴ Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajgun bejn dzuun; ne_n redxejga sajgun jiaä_ndu te jiajctu, per na'c jiaä_ndu dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—¡Be_n rusguee! ¿La di chutis tejtuguxhec xconni o xpurni te chanänini yäni nis, mase najcni dxej ni rusilajz bejn, ä?

¹⁶ Luxh nane're najc te xagdoo toAbram, nani numbee Dios, ni agujc tzunbichon ijz baliib be_ndxabni, ¿la digacdi guixecni lo xcälguijdxni mase najcni dxej ni rusilajz bejn, ä?

¹⁷ Che gunii Jesús rediidxre, bianxtujy rebejn ni rdxe'ch loj Jesús, luxh rebe_n xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas
(Mt. 13:31-32; Mr. 4:30-32)

18 Ni'cni räjp Jesús lojreni:

—¿Xhocha najc xcäl̄rnibee Dios? ¿Xhicha cojn guiniä najcni tebloj?

19 Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhajcwni.

Xcuent cojb ni rusaguij
(Mt. 13:33)

20 Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcäl̄rnibee Dios?

21 Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

Dää rolä' cadre jiu'ni xhaguibaa
(Mt. 7:13-14, 21-23)

22 Huinuu Jesús xnejzni sääni guedx Jerusalén. Lañi sadejdni reguejdx näjza rerench caguluiini rebejn.

23 Dxejc gunabdiidx te bejn lojni, räjpni:

—Dad, ¿la guxii najc rebejn ni calaa loj rextojlreni, ä?

Dxejc räjpni lojreni:

24 —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlanj jiu'reni ro'c, niluxh direni gun gaan.

25 Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä'”, dxejc laani sudzu'ni diidx, siniini: “Dina ganä caro siäädту.”

26 Dxejc guislojtu guiniitu: “Bidxunnäanu, bidaunäanu, bidunnäanu luj, baseedlu nuurnu lo xnezyuunu.”

27 Dxejc siniini lojtu: “Rniliä lojtu, dipacnä gumbeä la'tu. Coljij guiraatu, benlatsiaj.”

28 Dxejcti sonduxhtu, chubejli läjyту che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcäl̄rnibee Dios xhaguibaa, luxh la'tu di gacdi jiu'tu.

29 Dxejga sidzujñ xhidajl beñzijt ni siääd ladjiaa, ladjiat, ladbäjgw, näjza ladbee, te jiu'reni lo xcäl̄rnibee Dios xhaguibaa, ro'c sibejzareni lo mex.

30 Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

Jesús biin xcuent guedx Jerusalén
(Mt. 23:37-39)

31 Lagajc dxejga, bidzujñ gaii refarisee, räjpreni lojni:

—Huij, biunejz ree, sa'csi Herodes rlanj ju'tlu.

32 Dxejc laani badzu'ni diidxre lojreni, räjpni:

—Gojz lo bäjzga, beñ rusguee: “¡Bahuii! cabää rebeñdxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä xtzunä.”

33 Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxiti Jerusalén sajc guetni.

34 ¡Probe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp.

³⁵ Bahuii xho bianxteb xquidootu. Ni'cni arnixgaä lojtu, dirutu fii loä cheni guidzujñli dxej ni guiniitu loä: “Chicbaa ni siääd xcuent Dios.”

14

Rusiajc Jesús te bejn ni guidxa guij

¹ Che gojñ te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús,

² sa'csi nez loj Jesús suga' te dade' ni guidxa guij tiejxhni.

³ Dxejc gunabdiidx Jesús lo rebejn ni ruluu leii näjza lo refarisee, räjpni lojreni:

—¿La sajc gusiajñni te beñracxhuu dxej ni rusilajz bejn o la di gacdini?

⁴ Per laareni dxitis suga'reni, niäutis ro'reni. Dxejc cua' Jesús beñracxhuuga, basiajñni, gunibeezani biunejñni.

⁵ Dxejc räjpni loj refarisee:

—Chu la'tu ni rajp te bur o te gon, palga jiajbni neñ te bisie, ¿la ditu chalägajñni mase najcni dxej ni rusilajz bejn, ä?

⁶ Dxejc di niajñni nudzu'reni diidx lojñi.

Reni bidon chää sa'

⁷ Cheni bahuii Jesús xho rchaglaz rebejn rbereni latsa'c te cuereni cuä' rebejnro, bijni te cuent ni ruluu lojreni, räjpni:

⁸ —Cheni guidontu chäätu te sa', na'c guntu te cuetu cuä' rebenro, te di guidzujñ te beñroru lojlu,

⁹ dxejc jiääd bejn ni cayujñ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li.

¹⁰ Maazru hueen, cheni guidonlu chäälu te sa', huicue lo mex ni zuj lo le' te che guidzujñ bejn ni cayujñ lanij, naani lojlu: “Xamigwä, gudaa cuelu neñ yu' cadre rbej rebenro.” Si'c sä'p xpala'nlu nez loj guiraa rebejn ni sobganäjlu lo mex.

¹¹ Sa'csi ni rlajz chä'p xpala'nñi nez loj rebejn, sianxtujyñi nez lojreni. Luxh bejn ni najc nadolajz, sä'p xpala'nñi nez loj guiraa rebejn.

¹² Räjpzani loj bejn ni cagudeed xhi gaureni:

—Cheni gunlu te lanij o guteedlu bejn lo xmexlu, na'c cueedxtislu reexamigwlu con rebejtzlu, con resa'lu, niclaza rexpisñlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni.

¹³ Che gunlu te lanij, alga gurejdx rebenproob, rebencoj, näjza rebenlotiä'p,

¹⁴ dxejti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibañsac rebejn loj rebenjut.

Xcuent te laniro

¹⁵ Che bieñ diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadre rnibee Dios.

¹⁶ Dxejc räjp Jesús lojñi:

—Guyu' te dade' ni bejn te laniro rolijñni. Gunibeeni bidon xhidajñ bejn te jiädaunäjreni.

¹⁷ Che bidzujñ or ni gaureni, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.”

¹⁸ Dxejc guiragajcñeni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.”

¹⁹ Steeni räjp: “Gusiä gaii nejs gon, luxh nanab chahuiä xho rujñreni dzuun. Goslaa di gacdi jiälä.”

²⁰ Steeni räjp: “Entis bachnaä ni'cni di gacdi jiälä.”

²¹ Che gubi' mosga, badeedni diidx lo xlamni xhi räjp rebejnnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebennatiujnc.”

²² Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.”

²³ Dxejc räjp lamga lo xmosni: “Huij lo renezyuj ni sii loj reguedxzij, gudanäj rebejn ni guidxaaglu nejzga, te cha bejn rolizä.

²⁴ Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

²⁵ Laḷ sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

²⁶ —Palga yu' chu tej ni jiääd loä, ni di cuälaz xtadni, xnanni, chääl, nni, rebejtzni, näjza rebisiajn, nni, nägajcza xcälh nabaj, nni, di gacdi gacni te rexpenä.

²⁷ Palga yu' chutis tej ni di rlazj tedni trabajw te jiädnajlni narä, di gacdi gacni te rexpenäpac.

²⁸ Chu tejtü ni rlazj gun te yuro, ni di gunxgaa xhigab lacti meel chanä yu'ga, te guidon la sajc guluuxnini.

²⁹ Didi cheni abejn, nni recimient, di gacdi guluuxnini, dxejc guiraa reni fii lojni suxhiznäjnreni,

³⁰ säjpreni: “¡Bahulaare! Bejnre gusloj bencheeni te yu' per di niajcdi nuluuxnini.”

³¹ ¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu mil soldaad loj stee reii ni siääd con gajl mil soldaad, ä?

³² Palga di gacdi gucuanäjnini, che gacbeeni zijtli siääd stee reiiiga, suxhalni te xpejn, nni chanab yälbedxi lojni.

³³ Ni'cni palga chutis tejtü di gusaan rehxixtenni te jiädnajlni narä, di gacdi gacni te rexpenäpac.

Che diru sejd gac nadzujy

(Mt. 5:13; Mr. 9:50)

³⁴ Räjpszani:

—Huen najc sejd. Per cheni diruni gac nadzujy, ¿xho gacru gac nadzujyni?

³⁵ Xhetru sajcdini, nicla te chääni loj yuj, niclaza te chääni lo abon. Gusäl'tis bejn sejdga. Reni rlazj gucua diajg xtidxä, sucua dia gsa'creni.

15

Xcuent xiil ni gunij

(Mt. 18:10-14)

¹ Guiraa reni rusquijx impuest näjza reben DOJl cabigreni loj Jesús, te cuadi-ajgreni rextiidxni.

² Refarisee näjza rebejn ni ruluii leii gusloj camojmreni, räjpreni:

—Bejnre rusaan rbig reben DOJl lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴ —Chutejtü ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunij, hasta guidxällinini, ä?

⁵ Luxh che guidxäl, nni sibaduxh lajzni, dxejc sutzuubnini ro xhajcwni.

⁶ Che guidzuj, nni rolijzni sutojpni rexamiigwni näjza rexpis, nni te gäbni lojreni: “Colguibalaznäjn narä sa'csi abidxälä xile' ni gunij.”

⁷ Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquiin gusiechlazreni xtojlni.

Xcuent meel ni gunijt

⁸ Räjzani:

—Sigajcza te gunaa ni rajp tzuu meel, palga chasälni tejni, çla dini gusanij te bajl te guloobni nen yu' hasta guidxältni, ä?

⁹ Luxh che guidxältni, sutojpnri rexamiigwni näjza rexpisiñni, säjpnri lojreni: “Colguibalaznäjä narä sa'csi abidxälä meel ni gunijt.”

¹⁰ Rniäza lojtu, sigajcza sibalajz rexangl Dios xhaguibaa xcuent te beñdojl ni rusiechlajzni.

Te bejn ni baxun te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni.

¹² Dxejc xi'nni ni najc huinruga, räjpni lo xtadni: “Dad, baniidx yälñasa'c nani nungäjln xca'a.” Sas badeed xtadni xerensni.

¹³ Di niacaa, balsi dxej gudejd, chela bato' xihuinni guiraa xhixtenni, dx-ejc sääni, bidzujñni te guedxzij. Ro'c banijtni guiraa xmeelni lo recoguijdx.

¹⁴ Che abanijtni guiraa xhixtenni, biääd te gubinduxh guedxzijga cadre yu'ni. Sas guslojzani calaanni.

¹⁵ Dxejc huitiilni dzuun lo te beñguejdxga. Baxhal bejngani te huigajpnri cuch lo xyuj dade'ga.

¹⁶ Luxh calanduxhni bejnri xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi najwñni.

¹⁷ Lal ni cadejdni trabajwga, bianij xcäriejnri bejnri xhigab, naani: “Balti rexmos xtadä rausa'c, ria'nru xhi gaurenri. Luxh narä ree calanduxhä, ameerli guetä.

¹⁸ Guibi'älis ladxä, rolijz xtadä, gäpä lojni, Dad, banitä lo Dios näjza lojlu.

¹⁹ Diru nungäjln guirilaä xi'nlu. Cua' narä si'c te xmoslu.”

²⁰ Dxejc gunazgajcni nejz te gubi'ni rolijz xtadni.

'Cheni zijtru siäädni, bahuii xtadni lojni. Dxejc balaslajznri, ruxunlnri, huichaglojnri, sas gudäänri, bachagro'ni lojni.

²¹ Dxejc räjp xi'nni lojni: “Dad, abanitä lo Dios näjza lojlu. Diru nungäjln guirilaä xi'nlu.”

²² Per räjp xtadni loj rexmosni: “Coltanä te ladsa'c, colshuajcwnri xi'nä, colgusal te niil bicueñaani, xcajza te gura'ch ni'ni.

²³ Coltanä te biser ni guro' colgu'tni. çColsqejn te guidaunu, jiennu te lanij!

²⁴ Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnreni te lanij.

²⁵ 'Lal ni cayajç dee, xingangalooni cayujn dzuun lo niaa. Che gubi'ni, siäddzunçajxhri rolijzni, che biejn diajgni cayel rolijzni, caguya'zarenri.

²⁶ Dxejcti gurejdxni te mos, gunabdiidxni lojni xhi cayajç royu'.

²⁷ Dxejc räjp mosga lojni: “Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni.”

²⁸ Dxejc bidxe'ch xingangalooni. Naadtini jiu'ni rolijzni. Che gucbee xtadni naadtini jiu'ni, bihuii xtadnri te gunabni jiu'gani.

²⁹ Dxejc räjpni lo xtadni: “çBahuilare! Agujç xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' löä te gunä te lanij con rexamigwä.

³⁰ Luxh naj ni abidzujñ xi'n lure, ni baniñt xmeellu con regunadxab, xhoxh bagu'tlu te biser guro' te cayujñlu xlanijñi."

³¹ Dxejc räjp xtadni lojni: "Xi'nä, sugagajclu loä, luxh guiraa ni rapä najc xtenlu.

³² Niluxh naj riäjlpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjñi."

16

Xcuent te ni rnibee loj remos

¹ Dxejc cayujyza Jesús stee cuent loj rexpejñpacni, räjpni:

—Guyu' te beñrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpñeni: "Bejñ ni rnibee loj rexmoslu xhetlaadi cayujñni cagunijtni rexhixtenlu."

² Dxejcti gurejdx xlamñini, räjpni lojni: "¿Xhi dee ni rieñ diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä."

³ Dxejc bejñga bejñ xhigab: "¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojñ.

⁴ Ananä xhini'c gunä te che dirunä ga'pä dzuun, sibejdx reexamigwä narä rolizreni."

⁵ Dxejcti gurejdxni tebgajreni rebejñ ni nazääb lo xlamñi, dxejc räjpni loj ni bidzunxgaa: "¿Lac nazääblu lo xlamä?"

⁶ Dxejc räjpni: "Nazäbä si'c te gayuu baril se't." Dxejc räjpni lojni: "Basquejñ, cua' guijtzre, bacuaa tiubitzuutis baril nazääblu lojni."

⁷ Dxejc gunabdiidxni loj steeni, räjpni: "¿Luj a'? ¿Lac nazääblu lo xlamä?" Dxejc räjpni lojni: "Te gayuu dximro triuu." Dxejc räjpñani: "Aree xquijtzlu; bacuaa tajtis dximro."

⁸ Bidxeloj xlamñi, gulä'pni xpala'n beñguijdxga ni gunibee sa'csi bisinñi bejñni recosga. Dxejc räjpza Jesús, rebejñ ni di gumbee xtidx Dios nadxällajzreni lo rextzuunreni con sa'reni loj rebejñ ni arumbee xtidx Dios.

⁹ Rniä lojtu, colquuil rexamiigwtu con reyälñasa'c ni räjpñtu loj guedxliujre, te che abaraj xhixtentu, sica' Diostu xhaguibaa cadre yu' roliztu par tejpas.

¹⁰ Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'creni dzuun lo te dzunro.

¹¹ Ni'cni palga xhetlaadi cuarälñäjtü reyälñasa'c xten guedxliuj, jxho guniidx Dios reyälñasa'c xtenni lojtu!

¹² Palga xhetlaadi cuarälñäjtü xhixten bejñ, ¿chu guniidx lojtu ni gac xtenpactu, ä?

¹³ Nicla tej mos di gacdi gunni dzuun lo tio'p lam, sa'csi sidxe'chni lo tejñi, steeni sinälajzñi o susobdiajgpacni xtidx tejñi, sibälazñi steeni. Di gacdi gun bejñ xtzun Dios lañ ni sanälajztisni xcälñasa'cni.

¹⁴ Mbaj naj, refarisee, sa'csi rchaglazduxhñeni meel, cacuadiagdzu'tzreni xtiidxni, dxejc caguxhisñäjreni Jesús.

¹⁵ Dxejcti räjp Jesús lojreni:

—La'tu najctu bejñ ni ruhuii rebejñ lojtu, naareni beñsacduxhtu, niluxh acanajñ Dios xhi xhigab rujñtu neñ lastootu. Sa'csi guiraa ni rchalojtu najc yälñasacduxh, guiraa ni'c rbixhlañz Diosni.

Xleii Moisés con xcälñrñibee Dios

¹⁶ Räjpñani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcälrnibee Dios, ni'cni xhidajl bejn cagusutijp lajzni te jiu'reni loj yälrnibeega.

¹⁷ 'Per guyasiru nitloj xhaguibaa näjza guedxliuj quela di jialoj guirali rediidx ni bacuaa Moisés; nicla tej diidxga di nitloj.

Rului Jesús xcuent ruo'n sa' bejn
(Mt. 19:1-12; Mr. 10:1-12)

¹⁸ Räjzani:

—Palga guo'n te bejn chäälni, dxejc guchnaani stee gunaa, rujnni dojl, luxh nani ruchnaa te gunaa ni abaro'n chäälhini, niguiiga rujnzani dojl.

Te benrajp näjza Lázaro

¹⁹ Räjzani:

—Guyu' te benrajp ni rchaglaz rajcwni ganax reladsacduxh, luxh guixee guixee rujnni laniro.

²⁰ Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni.

²¹ Rlajzni maläii xho gunni gauni nani rtejb loj xmex benrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni.

²² Guyu'ti te dxej gujt benproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza benrajpga gujt, huicua'tztirenini.

²³ Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro.

²⁴ Dxejcti guredxaduxh benrajpga, räjzani lo Abram: “iXtadä Abram! Bala-lajz narä, baxhal Lázaro guhuajdxni yejc bicuenaani nis te gusiälyujni ludxä, sa'csi ree cadedä trabajwduxh lo guiboo.”

²⁵ Luxh räjp Abram lojni: “Xi'nä, basaa lajzlu che gubajnu lo guedxliuj gojplu guira'ti xhixtenlu, luxh sigajza Lázaro gudejdni trabajwduxh. Per naj ree casilajzni, naj luj cadejdlu trabajwduxh.”

²⁶ Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.”

²⁷ Dxejcti räjp benrajpga lojni: “Rniabduxhä lojlu, xtadä, baxhalaa Lázaro chääni rolijz xtadä,

²⁸ sa'csi ro'c yu' gaii betzä, te chaliidxni laareni, te gusiechlazreni, te di näjza laareni jäädreni ree cadro rdejd bejn trabajwduxh.”

²⁹ Dxejc räjp Abram lojni: “Arajpreni guijt cadro caj xleii Moisés näjza xtidx redade' ni gunii xtidx Dios, sugusobiajgreni rediidxga.”

³⁰ Luxh benrajpga badzu' diidxre, räjzani lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechlazreni.”

³¹ Dxejc räjp Abram lojni: “Palga direni gusobiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibansac loj rebengut.”

17

Riesgw jiajbni lo dojl
(Mt. 18:6-7, 21-22; Mr. 9:42)

¹ Räjzani Jesús loj rexpejnpacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl.

² Maaz guliibni te guij xten molin guejnni, gusäl bejnni lo nisdoo cadro jiätro quela gunni jiajb rexi'nä ni ahuililajz xtidxä.

³ ¡Col̄susin!

⁴ Palga gun bejtzlu dojl̄ lojlu, balijdxni. Palga gusiechlajzni, basiäj̄l̄ diidx con laani.

⁵ Masque gajdz huält nen̄ teb dxej gunni dojl̄ lojlu, palga jiädniini lojlu gajdz huält, naani: “Xhet laadi benä, basiäj̄l̄ lajzlu”, basiäj̄l̄ lajz con laani.

Bastioob xcäl̄rililaaznu

⁶ Gunii rexpejn̄pacni lo Jesús, räjpreni:

—Dad, baniidxru yäl̄rililajz loonu.

⁷ Dxejc räjp Jesús lojreni:

—Palga rajptu yäl̄rililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxa' ro'c, guzuj galäii nisdoo”, susobdiajg yajgga xtiidxtu.

Ni riäj̄l̄ gun te mos

⁸ Räjpszani:

—¿Chu tejt̄u ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”?

⁹ Dini gäb si'c. Niluxh säjpn̄i lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu.”

¹⁰ Dini gudeed xquixtios lo mosga sa'csi rujnni recos ni gunibeeni sa'csi si'c riäj̄l̄ gunni.

¹¹ Sigajcza la'tu, che luux guntu guiraa redzuun ni guniä guntu, riäj̄l̄ guiniitu lo Dios: “Najcnu mos ni xhet sajc̄di, nani riäj̄l̄ jiennu, ni'ctis biennu.”

Basiajc Jesús tzuu bejn̄ ni ral̄ tiejxhreni

¹² Lal̄ ni sasaj Jesús nez guedx Jerusalén, gudejdni loj región Samaria näjza región Galilee.

¹³ Che biu'ni tej reguejdxga, huichagloj Jesús tzuu bejn̄ ni rajc te yäl̄guijdx ni ral̄ tiejxhreni, niluxh zijtru guzujreni.

¹⁴ Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁵ Che bahuii Jesús lojreni, räjpni lojreni:

—Colchäj, te fii rebixhojz abiajctu.

Lal̄ ni sääreni, bia tiejxhreni.

¹⁶ Dxejc tejreni, che bahuiini abiajcni, gubiguxuñni, cabedxa'ni calä'pni xpala'n Dios.

¹⁷ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejn̄re najc te beñzijt, te beñ Samaria.

¹⁸ Dxejcti räjp Jesús lojni:

—¿La et tzuudi najc reni biajc, ä? ¿Con sgaareni?

¹⁹ ¿La rutru gubi'di loä te guiliä'preni xpala'n Dios, xtebtis beñzijt, ä?

²⁰ Dxejc räjp Jesús loj bejn̄re:

—¡Huisulii, huij! Abiajclu sa'csi huililajzlu.

Xho guidzujñ xcäl̄rnibee Dios

(Mt. 24:23-28, 36-41)

²¹ Dxejc, sa'csi agunabdiidx refarisee loj Jesús guc guidzujñ xcäl̄rnibee Dios, badzu'ni diidxre, räjpni lojreni:

—Di xcäl̄rnibee Dios guidzujñ con seen ni sajc fiitu.

²² Diza bejn̄ naa: “Bahuii, aniree”, o “Anirec”, sa'csi abidzujñ xcäl̄rnibee Dios lojtu.

22 Dxejc räjp Jesús lo rexpejn pacni:
—Sidzujn dxej rlanjgatu fiitu te dxej sa' ni chu che jiädsac Xi'n Dios ni gujc Niguui, luxh ditu fini.

23 Luxh siniireni lojtu: “Aniree”, o “Anirec”, per na'c chäätu, na'cza chana-jltu reni rihuii.

24 Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguui, che gal dxej guibi'ä.

25 Luxh ganiddoo sidedä trabajwduxh, sa'csi sibälaz reben guedxliuj ni tre' naj narä.

26 Si'cni gujc neñ redxej cheni gubajn toNoé, si'cza gac neñ redxej che jiälä narä, Xi'n Dios ni gujc Niguui.

27 Neñ redxej ni gubajn toNoé gudajwreni, gu'reni, bachnaareni, badeedzareni xindxa'preni guchnaa bejn, bidzujnli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis.

28 Sigajcza gujc neñ redxej ni gubajn toLo't: gudajwreni, gu'reni, gusiireni, bato'reni, gule'creni binij, bencheezareni rolizreni.

29 Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn dojl, huejcreni.

30 Sigajcza gac neñ redxej cheni jiälä narä, Xi'n Dios ni gujc Niguui.

31 'Dxejga, palga yu' chu niä'p yejc yu', diru galdi jiäjtne te chalääni rexhixtenni ni yuchee neñ yu'; palga yu' chu suga' nezjiät, di galdiruni guibi'ni rolizni.

32 Colgusnaj lajztu xhi gujc chääl toLo't.

33 Ni rlanj ga'p xcäl nabajnni lo guedxliujre, sunijtnini, nani gunijt xcäl nabajnni lo guedxliujre xcuent rextidxä, xcäl nabajnni rajpni xhaguibaa.

34 'Rniä lojtu, guxhijnga ni jiälä lo tio'p reni naga' lo te da', chää tejni, steeni jia'n.

35 Lo tio'p gunaa ni cayo't, chää tejni, steeni jia'n.

36 Lo tio'p bejn ni yu' lo niaa, chää tejni, steeni jia'n.

37 Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

18

Xcuent te gunabiuud con te juejz

1 Bijza Jesús te cuent ni ruluii lojreni, te guisieedreni xho riajl cuedxguiniabreni lo Dios lacuaa gac-huin lajzreni,

2 räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn.

3 Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni.

4 Balti dxej naadti juejzga gun yälguxhtisga. Dxejcti bejnna xhigab, naani: “Mase dina guidxebä Dios, dizana jiuä rebejn,

5 sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusieedni narä.”

6 Dxejc räjp Jesús lojreni:

—Riejn diajgtu xtidx juezguijdxga,

7 Naj ¿xho di Dios, ni najc hueen, gucua diajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni.

⁸ Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälni bejn ni rililajz xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni ruluii loj rebejn ni rluiisi najc bensa'c, ni rchalo xhet sajcdi resabejnreni. Räjpn:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest.

¹¹ Sulii fariseega lal ni canabni lo Dios, räjpn: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc bejn nadiplajz, ni najc bendojl, dizana gacä si'c najc bejnre ni rusquijx impuest.

¹² Rucua'nä tio'p huält nen te xmaan, luxh rudedä te tzuu lo te beex loj guiraa ni runä gaan.”

¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälñaatisni lastooni, caniini lo Dios, räjpn: “Dad, Dios, ¿balaslajz narä, nacä te bendojl!”

¹⁴ Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextojlni, niluxh di Dios nudzucaj rextojl bejn farisee. Sa'csi guiraa rebejn ni rlajz guiliä'p lagajc xpala'nni, susanxtiuj Diosreni, dxejc reni di rlajz guiliä'p lagajc xpala'nreni, siliä'p Dios xpala'nreni.

Benle' Jesús yejc rebiuxbäz

(Mt. 19:13-15; Mr. 10:13-16)

¹⁵ Yu'reni siädnä rexpuixbäzreni loj Jesús te guzujni naani yejcreni. Che bahuii rexpejn pacni si'c, gusloj cadildiidxreni con rebejn te na'c jäädnäreni rebiuxe'.

¹⁶ Dxejc gurejdx Jesúsreni, räjpn lojreni:
—Colgusaan jääd rebiuxe' loä, na'c gudxojtntureni, sa'csi xcälrnibee Dios najc xten reni najc nadolajz si'c rebiuxbäze're.

¹⁷ Rniliäpac lojtu, chutis ni rlajz jiu' lo xcälrnibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpn:
—Dad, mastrsa'c, ¿xhini'c nanab gunä te xca'ä yäl nabajn par tejpas?

¹⁹ Dxejc räjpn Jesús lojni:
—¿Xhicuent rniilu narä: “Mastrsa'c”? Rutru najcdi bensa'c, xtebtis Dios.

²⁰ Anajnlu xho najc remandamient ni caj lo xleii Moisés: “Na'c guesnäjlun gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtadlu, xnanlu, bahuiizaren.”

²¹ Dxejc räjpn bi'nga lojni:
—Guiraa remandamientre rusobä cheni gucäli biuux.

²² Che biejn diajg Jesús xtiidxni, räjpn lojni:
—Tejtis cayäädx gunlu. Bato' guiraa rexhixtenlu, gudisni loj rebejn ni xhet rajpdi dxejc sajplu xcäl'nasa'clu xhaguibaa. Dxejc gudanajl narä.

²³ Che biejn diajg bi'nga rediidxre, guc-huinuxh lajzni, sa'csi najcni te bejn ni rapduxh.

²⁴ Dxejc rdxelajtis Jesús lojni, guc-huinza lajzni räjpn:
—Naganduxh jiu' rebenrajp lo xcälrnibee Dios.

²⁵ Guyasiru ted te cameii ni' te guux lo ni jiu' rebenrajp lo xcälrnibee Dios.

²⁶ Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

²⁷ Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸ Dxejc räjp Pedr lojni:

—Dad, nuurnu abasa'nnu guiraa rehxixtenu te siopnalnu luj.

²⁹ Dxejc badzu' Jesús diidxre lojni, räjpni:

—Rniliäpac lojtu, chutis ni gusaan rolijzni näjza rexcuzajnni, rebejtzni, chäälni, xi'nni xcuent xcälrnibee Dios,

³⁰ sica'ni xhiroobru lo guedxliujre, luxh sica'ni yäl nabajn par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

³¹ Gurejdx Jesús rexpejn pacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii.

³² Sutedrenini ladz naa rebenzjt, suxhiznäjrenini, susacsírenini, sutiobxhejnlireni lojni,

³³ luxh che luux quininrenini, dxejc sugu'trenini, luxh ni riojn dxej sibansacni loj reben gut.

³⁴ Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gachebereni.

Rusiajc Jesús te beñ lotiä'p

(Mt. 20:29-34; Mr. 10:46-52)

³⁵ Cheni sadzujn Jesús te guejdx ni laa Jericó, sobga' te beñ lotiä'p ro' nezyuj, canabni gojn.

³⁶ Che biejn diajgni cadejd xhidajl bejn lo nezyujga, gunabdiidx beñ lotiä'pga xhini'c cayajc.

³⁷ Dxejc räjpreni:

—Jesús ni siääd Nazare't cadejdni nezga.

³⁸ Dxejc guredxa'ni räjpni:

—¡Jesús, xi'n toDavid, balaslajz narä!

³⁹ Rebejn ni nijd lojreni gudiñäjreni beñ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

⁴⁰ Dxejc guzudxi Jesús ro'c, gunibeeni jiädnäreni bejn ga lojni. Che bidzujnni lojni, gunabdiidx Jesús lojni, räjpni:

⁴¹ —¿Xhini'c rlajzlu gunnäã luj?

Badzu' beñ lotiä'pga diidxre, räjpni:

—Dad, rlazä jien loä.

⁴² Dxejc räjp Jesús lojni:

—¡Sujien balojlu! Abiajclu sa'csi huililajzlu.

⁴³ Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

19

Huij Jesús rolijz te bejn ni laa Zaqueo

¹ Dxejc biu' Jesús guedx Jericó, sadejdzani guejdxga.

² Ro'c rbäjz te beñ rapduxh, ni laa Zaqueo, ni rnibee lo reni rusquijx xcuent impuest.

³ Rlajz Zaqueo fini loj Jesús te gumbeenini, per digacdi fini lojni sa'csi najcni te beñxhate', luxh xhidajl bejn siädsaj guideb gabi Jesús.

⁴ Ni'c baxunni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús.

⁵ Che gudejd Jesús nejzga, guläsni lojni jiaa, bahuini cadro sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolijzlu.

⁶ Dxejcti biätguxun Zaqueo lo yajgga, rbalazduxhni huinäni Jesús rolijzni.

⁷ Che bahuii guiraa rebejn xhi gujc, gusloj camojmreni, direni jiulajz, räjpreni:

—Jesús sajia'n rolijz te bendojl.

⁸ Dxejcti huisulii Zaqueo, räjpni loj Jesús:

—Bahuilaa, Dad, gala' xhixtenä gudedä loj rebenproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

⁹ Räjp Jesús lojni:

—Lagajc nadxej gubicaj xtojllu näjza xtojlni reni rbäjz rolijzlu, sa'csi guliipac najclu te xagdoo toAbram.

¹⁰ Pues Xi'n Dios ni gujc Niguui biädtil rebendojl te guslaani rebejnnga ni gunijt nen dojl.

Xcuent tzuu meel

¹¹ Lal ni cagucua diajgreni xtidx Jesús, bijzani te cuent ni ruluii, sa'csi asiäddzujngajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzujnni guejdxga.

¹² Dxejc räjpni lojreni:

—Guyu' te bejn, benrajpni, huijni te guejdx zijtro te gacni reii, dxejc guibisacni.

¹³ Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn dzuun con meelre che guibisacäli.” Sä'tini.

¹⁴ Per reben lajdxni dipacreni guichagljaz bejnnga, ni'c baxhalreni gaii bejn te saye'tzreni: “Di rlazdzinu gacni xreinu.”

¹⁵ Luxh empac gujcnii reii, dxejc gubisacni lajdxni. Che bidzujnni gurejdxni rexmosni ni badeedni meel cua'reni, te gacbeeni lac bejn tebgajreni gaan.

¹⁶ Ni bidzujn ganid räjpni lojni: “Dad, xmeellu bejn gaan stzuu meel.”

¹⁷ Dxejc räjp reii lojni: “Hueenca, luj najclu te mossac, sa'csi laaca bejnlu dzuun lo te dzunbäz, naj sunidxä guinibeelu loj tzuu guejdx.”

¹⁸ Bidzujn stee mos lojni, räjpni: “Dad, xmeellu bejn gaan gaii meel.”

¹⁹ Dxejcti räjpni lojni: “Luj guinibeelu loj gaii guejdx.”

²⁰ Bidzujnti stee mos lojni, räjpni: “Dad, aree xmeellu, guluchedzu'tzäni nen te baii

²¹ sa'csi bidxebä guejblu, sa'csi najc guejblu te ben nadiplajz, rutojp guejblu cadro di guejblu nuzuj, luxh rliäs guejblu cose'ch cadro di guejblu nibe'c.”

²² Dxejcti räjp reii lojni: “¡Mosguijdx! lagajc ro'lu birii diidx ni gunälu yälguhtis. Palga najnlu nacä te ben nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä,

²³ ¿xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?”

²⁴ Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.”

²⁵ Laareni räjpreni: “Dad, per laani arajpni tzuu meel.”

²⁶ Dxejc badzu' reii diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbäz ni rajpreni.

²⁷ Luxh xcuent reni rdxe'ch loä, ni di rlaiz niacä reii lojreni, coltanäreni ree, colgugu'treni nez loä.”

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸ Che gulujx guniini guiraa rediidxre, huinuuni xnejzni, sääni nez lo guejdx Jerusalén.

²⁹ Che asadzun_gajxhni reguejdx ni laa Betfagé näjza Betania, gajxh lo dajñ ni laa Oliib, baxhalni tio'p rexpejn_pacni,

³⁰ räjpni lojreni:

—Colchäj lo guejdx' ni suga' lad rec. Che guidzujntu, guidxäلتu caduu te bur huin ni gajd bejn cuib. Colguxhecni, coltanäni ree.

³¹ Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

³² Sä'ti rexpejn_pacni nani baxhalni, bidxälreni manga sigajctisni räjp Jesús.

³³ Cheni caguxhecreni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhajbreni dejtzni, te gubijb Jesúsni.

³⁶ Guideb cadre gudejd Jesús gudixhreni xhajbreni lo nezyuj cadre tedni.

³⁷ Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remi-lagwr ni bejn.

³⁸ Räjpreni:

Chicbaa reii ni siääd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädnaillu te na'cru guiniireni si'c.

⁴⁰ Dxejc Jesús räjp lojreni:

—Rniliä lojtu, palga redee gusaü ro'reni, sixedxa' reguijre.

⁴¹ Che bidzujñni gajxh, che bahuiini guedx Jerusalén, biin Jesús xcuent guejdxga,

⁴² räjpni:

—¡Maläii gacbeelu, masque neñ redxejre, xhini'c sajc guniidx yäl_rbedxilajz lojlu! Per naj naga'tzni, luxh digacdi filu lojni.

⁴³ Sidzujñ dxejga lojlu, cheni jiääd reni rdxe'ch lojlu sujñreni si'c te guralyuj guideb gabilu, nez lojlu sigajc nez dejtzlu sisiujreni.

⁴⁴ Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuiilu.

Rusia Jesús neñ guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús neñ guidoro, guslojni cabääni rebejn ni caguto' näjza reni casii.

⁴⁶ Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadre jiädnahtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee cagului Jesús neñ guidoro, luxh reni rnibee loj rebixhojz näjza rebejn ni ruluii leii, näjza rebeñgool xte guejdxga caguuilreni mood te ju'trenini,

48 luxh direni nidxäjl xho niujnrenini sa'csi guiraa rebejn cacuadi-agdzu'tzreni xtiidxni.

20

Xcälrnibee Jesús

(Mt. 21:23-27; Mr. 11:27-33)

1 Te dxej suga' Jesús neñ guidoro, caguluiini rebejn, cagusule'zani diidxxcuent xho guibicaj xtojreni, che bidzujn reni rnibee loj rebixhojz näjza rebejn ni ruluu leii näjza rebeñgool,

2 räjpreni lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

3 Dxejcti räjp Jesús lojreni:

—Narä sigajcza gunä te yälgunabdiidx lojtu, colgudzu' diidxre loä,

4 ¿chuni'c baxhal Juan te gutiobnisni rebejn? ¿La Dios o la rebejn, ä?

5 Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhuent ditu ninilajz xtiidxni?”

6 Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

7 Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

8 Dxejc räjp Jesús lojreni:

—Dizana guiniä xhi yälrnibee rapä te runä recosre.

Xcuent remosguijdx

(Mt. 21:33-44; Mr. 12:1-11)

9 Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c.

10 Che bidzujn dxej ni guidojp cose'ch, baxhalni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanäni lo xpaxhuaan yujga.

11 Dxejcti baxhalni stee mos lojreni. Dxejc sigajcza gudilnäjrenini, gudijnrenini, luxh xhetza badeeddireni lojni, ganaxni gubi'ni lo xlamni.

12 Dxejcti baxhalni ni riojn mos lojreni, per sigajcza gudinduxhrenini, barilaagwrenini.

13 'Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.”

14 Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu.”

15 Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnä xpaxhuaan yujga rebeñ guiidxre, ä?

16 Sidzujni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

17 Bahuii Jesús lojreni, dxejc räjpni:

—¿Xhixhni'c caj lo guiitz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcn siujy-pacni, li däj gacni.

Xcuent reimpuest

(Mt. 21:45-46; 22:15-22; Mr. 12:12-17)

¹⁹ Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn.

²⁰ Dxejc cagula'tztisrenini, baxhala'reni gaii bejn te gunsireni si'c ni najczeni bendxan, te gucuadiajgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte gubernadoor.

²¹ Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixгаа la yu' chu najc bejn, ruluisa'c guejblu xnez lo Dios.

²² Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree?

²⁴ Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

Rniabdiidxreni xcuent yälrbansac lo rebenꞑut

(Mt. 22:23-33; Mr. 12:18-27)

²⁷ Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebenꞑut. Ni'cni gunabdiidxreni loj Jesús,

²⁸ räjpreni:

—Dad, Mastr, basa'n Moisés guiitz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.”

²⁹ Guyu' gajdz niguii, bejtz najczeni. Sas cua' niguigalooga chäälni. Che gujtni ruti xi'nni.

³⁰ Dxejcti cua' ni rojꞑga gunaaga. Che gujtni, rutiza xi'nni.

³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'.

³² Dxejcti näj gunaaga gujt.

³³ Guigajdzreni guläsnäjreni gunaare, ni'cni, che guibansacreni lo rebenꞑut, ¿chu chääl gacni, ä?

³⁴ Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxa'preni ruchnaa.

³⁵ Niluxh rebejn ni agule Dios te chääreni xhaguibaa, näjza te guibansacreni loj rebenꞑut, di reni'c guchnaa, dizaren i gudeed xindxa'preni guchnaa,

³⁶ sa'csi diru gac guetreni, anajczeni si'c najc rexangl Dios. Laareni najc xi'n Dios sa'csi abaspansac Diosreni.

³⁷ Moisésli basule' xcuent ni rbansac rebenꞑ loj rebenꞑut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacob”, ni'cni nabajnpacreni lo Dios.

³⁸ Sa'csi di Dios gac Xtios rebengut; najcni Xtios rebejn ni nabajn par tejpas, sa'csi par laani guiraa rebejn nabajn.

³⁹ Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

⁴⁰ Sa'csi dirureni niajx niniabdiidxrureni lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—¿Xho mood rniireni Crist najc xi'n toDavid, ä?

⁴² Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

⁴³ “Gurej xladbeä cheni guidzujnli dxej ni gudzugä guiraa ni rdxe'ch lojlu te gachebereni luj rnibeelu guira'ti.”

⁴⁴ ¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluii leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebejn cagucuadiajg che räjp Jesús loj rexpejn pacni:

⁴⁶ —Colyajp cuidaad reni ruluii leii, sa'csi rdxagljazreni rajcwreni lajd siool, rlajzreni saru guinii guiraa rebejn “xchan” lojreni, rlajzreni jiu bejnreni nez loguii, rlajzreni cuereni lo reyagxhilsa'c neñ reguidobäz, näjza cadre rajc lanij.

⁴⁷ Rudzucajzarení rexhixten regunabiuud, dxejc rolreni rele' siolduxh che rniabreni lo Dios te fii rebejn, te naa bejn najczeni beñdxan, luxh lojreni suxhal Dios te castigwroru.

21

Gojn xten te gunabiuud

(Mr. 12:41-44)

¹ Neñ guidoro bahuii Jesús cagusäl rebenrajp gojn neñ te guiñ cadre rdojp gojn.

² Bahuiizani lo te gunabiuud, lacti proobni. Basälñi xcojñni neñ guijnga, tio'ptis melbäz basälñi.

³ Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn,

⁴ sa'csi guiraa redéc ni cagusäl xcojñni casälreni tudxe'nsi xmeelreni, niluxh gunaare loj xcälproobni, basälñi guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵ Yu' reni cayujy diidx xcuent guidoro, räjpreni:

—Lacti sacruduxh rieñni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

⁶ —Sidzujn dxej sibijl guiralii ni cahuiitu, nicla tej guiñ di jia'n yejc sa'ni, guiragajcni sibijl.

Reseen ni chu che nitloj guedxliuj

(Mt. 24:3-28; Mr. 13:3-23)

⁷ Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸ Räjp Jesús lojreni:

—¡Col̄susin te na'c gusgueerēni la'tu! Sa'csi xhidajl reni jiäd sinii: “Narä nacä Crist”, o “Asiädgajxh redxēj che jiädni”, per na'c chalilajztu xtiidxreni, na'cza chanajlturenī.

⁹ Luxh che jiejn diajgtu cayajc guer cadilnäj sa' bejn, na'c guidxējbtu, sa'csi ganid recosga gac, luxh gad galdi nitloj guedxliuj.

¹⁰ Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn.

¹¹ Sajcza xuro, su' gubijn, su'za yälgujdx nez ree nez rec. Luxh xhaguibaali sien guiraloj ni ruchejb näjza seenro.

¹² 'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo rebejn guidobäz, susälzarenī la'tu neñ latzguib, sinäzarenī la'tu nez loj reii näjza gubernadoor sa'csi rinälajztu xtidxä.

¹³ Luxh guiraa dee sajctū te gac gusule'tu xtidxä lojreni.

¹⁴ Na'c gunxgaatu xhigab neñ lastootu xhini'c guiniitu lojreni,

¹⁵ sa'csi narä sunidxä diidx guiniitu, sunidxäza yälñajn lojtu te digac gudzu'reni diidx lojtu niclaza gacdi guiniyajreni xtiidxtu.

¹⁶ Näjza rexcuzajntu sibire lojtu, suto'reni la'tu, sigajcza rebejztu, resa'tu, rexamiigwtu, luxh yu'tu sugu'treni.

¹⁷ Guiraa rebejn guedxliuj sibälaz la'tu sa'csi rinälajztu xtidxä.

¹⁸ Niluxh ni'cla tej xquidxējctū di nitloj.

¹⁹ Luxh palga sutijptis lajztu, sajptu yälñabajn par tejpas.

²⁰ 'Che fiitu tre' xhidajl soldaad guideb gabi guedx Jerusalén colyacbee abidzujn dxej ni guibijlñi.

²¹ Dxejc reni yu' guedx Judea, nanab guxunreni chacuatzlojreni neñ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga,

²² sa'csi neñ redxejga sujn Dios fis lo guejdxga te soob rediidx ni caj lo reguijtz xten Dios.

²³ Probe'za regunaa ni nuu bāz neñ redxejga, nājza regunaa ni ca' bāz, sa'csi su' yälhuinuxh lo guedxliuj, nājza fis ni gun Dios loj rebejnğa.

²⁴ Yu'reni guet lo guer, yu'zarenī chāā pres, sijreni balti guedxzijt. Dxejc rebejzjt sinibee guedx Jerusalén che guiza'li redxēj ni gusaan Dios guinibee rebejn ni di gac xpejn Israel.

Cheni jiäd Xi'n Niguii

(Mt. 24:29-35, 42-44; Mr. 13:24-37)

²⁵ Räjpzani:

—Dxejc su' seen lo gubijdx nājza lo bäii, nājza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo, säsduxh nis ni räjs lo nisdoo.

²⁶ Sitiol rebejn xcuent yälrdxebduxh che gunreni xhigab xhicharuni'c gac lo guedxliuj, sa'csi nāj guideb guibaa sinibsejs.

²⁷ Dxejcti suhuiireni lo Xi'n Dios ni gujc Niguii, siädni lo te za guideb xcälrnibeeni, nājza yälrdimbichaduxh.

²⁸ Che guisloj gac recosre, colsutijp lajztu, colguiliäs yejctū, colguibalajz sa'csi asadzujn dxej gusilajztu.

²⁹ Guniizani stee cuent lojreni, räjpni:

—¡Colhuii lo yagiigw nājza lo guiraa reyajg!

³⁰ Che fiitu acabääni be'n, colyacbee lagajc la'tu, abidzujgajxh bäii nisguij.

31 Sigajcza che fiitu agusloj cayajc recosre, colyacbee asiäddzujñ xcälrnibee Dios.

32 'Rniliäpac lojtu, guiraa recosre sajc ansde guet rebejn ni yu' naj.

33 Guibaa näjza guedxliuj sinitloj, rextidxä dini nitloj.

34 'iCol̄susin̄ lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujñ dxejga.

35 Sa'csi si'c sidzujñ dxejga loj guiraa reben̄ guedxliuj.

36 Col̄susin̄, col̄bejdx, col̄guiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

37 Rdxee ruluii Jesús nen̄ guidoro dxejc guxhijn̄ sajia'nni yejc dan Oliib.

38 Rsilru ristie rebejn̄ te rdzujñreni lo Jesús nen̄ guidoro casob rsil, te gucuadiajgreni rextiidxni.

22

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

1 Siäddzujñgajxh dxe lanij che rajwreni yätxtiil ni di säguij, laaza lanijga pascw.

2 Dxejc reni rnibee loj rebixhojz näjza rebejn̄ ni ruluii leii caguiilreni xho gunreni te ju'treni Jesús, sa'csi rdxejbreni reben̄guejdx.

3 Dxejc biu' ben̄dxab lastoo Judas ni laaza Iscariote, ni najc tej retzubitio'p xpejn̄pacni.

4 Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni.

5 Dxejc bibalajzreni, bia'nreni diidx gudeedreni meel lojni.

6 Cuäjbtı Judas, dxejcnı guslojni caguiilni xho gunni guteedni Jesús ladzñaareni che rut bejn̄di suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

7 Bidzujñ dxe lanij che rajwreni yätxtiil ni di säguij, che rugu'tzarenı te xiil si'c ni caj lo xleii toMoisés.

8 Dxejc baxhal̄ Jesús Pedr näjza Juan, räjpni lojreni:

—Col̄chayejn̄ xchej xten pascw te guidaununi.

9 Dxejc laareni gunabdiidxreni lojni, räjpreni:

—¿Caro rlajzlu choyennuni?

10 Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Col̄chanajlni, col̄jiu' rolijz bejn̄ cadre jiu'ni laani.

11 Dxejc col̄ye'tz lo bejn̄ ni najc rolijzni ro'c: “Si'c naj Dad Mastr: ¿Con yu' cadre sajc gauxchenää rexpenä naj pascw?”

12 Dxejc guluiini lojtu te yu' ni sojb jiaa yejc stee yu'. Asuchexgaa yu'ga. Ro'c col̄yejn̄ xhi guidaunu.

13 Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

14 Che bidzujñ or̄, gurenäj Jesús rexpejn̄pacni lo mex.

15 Dxejc räjpni lojreni:

—Guyuduxhä gaan gaunääpactu xchej xten pascw ansde tedä trabajwduxh.

16 Sa'csi rniä lojtu, diruna gaunää la'tu pascw cheni guidzujñli dxej ni gacni lo xcälrnibee Dios.

17 Dxejc cua'ni te co'p, badeedni xquixtios lo Dios, räjpni:

—Colyā' dee, colgudeedni lo sa'tu.

¹⁸ Sa'csi rniā lojtu, diruna yā'ä nis ni rii yejc uub stehuält cheni guidzujñli xcälrnibee Dios.

¹⁹ Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

²⁰ Si'cza bennäjni co'p che gulujx gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

²¹ 'Per bahuilaare, bejn ni guto' narä sobganäj narä lo mexre.

²² Guliipacni, Xi'n Dios ni gujc Niguui sinuu tedni loj nezyuj ni abaluii Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guibee gac beñro lojreni.

²⁵ Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebeñguejdxga rnii lacti hueen najc rereiiiga.

²⁶ Per la'tu na'c gactu si'c. Nani najc beñgoolru lojtu, ni'c riäjñ gacni si'c najc ni huinru lojtu. Luxh nani rnibee riäjñ gacni si'c mos.

²⁷ ¿Chuni'c saj cru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ 'La'tu najctu ni gusunäj narä guideb ni gudedä retrabajw ni gudedä.

²⁹ Ni'cni narä runidxä yälrnibee lojtu sigajc ni baniidx xtad yälrnibee loä,

³⁰ te gautu, yätu lo xmexä xhaguibaa, te cuezatu lo yagxhil cadro guntu yälguxhtis loj rexpejn guitzubitio'p rexagdoo Israel.

Räpxgaa Jesús di Pedr guicäjp numbeeni (Mt. 26:31-35; Mr. 14:27-31; Jn. 13:36-38)

³¹ Räjp Jesús loj Simón:

—Simón, Simón, agunab beñdxab ni laa Satanás luj te gusniibni luj si'c rusniib bejn xob te jiani.

³² Narä agunabä lo Dios xcuentlu te na'c jiäädx xcälrlilajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räjp Simón lojni:

—Dad, narä sirinalälu; mase gusäureni luj latzguiib, näjza narä siäunäälü; mase ju'treni luj, näjza narä setnäälü.

³⁴ Dxejcti räjp Jesús loj Simón:

—Pedr, rniä lojlu, nicla gajd guidgarii cuedxa' nadxej niluxh luj alaräjplu choñli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biquiintu, xhi biäädx lojtu, ä?

Dxejc räjpreni:

—Xheti.

³⁶ Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espad, guto'ni xchamarni te siini tejni.

³⁷ Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räjpreni lojni:

—Dad, aree tio'p espad.

Dxejc räjpni lojreni:

—Sajl reni'c.

Rbedx-rniab Jesús loj Dios

(Mt. 26:36-46; Mr. 14:32-42)

³⁹ Dxejti birii Jesús, si'cni rujnpacni, sääni nez dajn ni laa Oliib. Dxejc sanajl rexpejn pacni.

⁴⁰ Che bidzujñreni ro'c, räjpni lojreni:

—Colcuejdx, colnab lo Dios te na'c jiajbtu lo dojl.

⁴¹ Dxejc gubicaj Jesús lojreni, huijni te lajt zite' cadre suga'reni, si'cti cadre rdzujñ te guij che rucuaanini. Ro'c bazuxhijbni, gurejdx-gunabni lo Dios,

⁴² räjpni:

—Xtä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejc biricaj te xangl Dios lojni te badeedni yälrutiplajzni.

⁴⁴ Lañi cadejdni trabajwduxh, cayac-huinduxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadre suga' rexpejn pacni. Ro'c bidxälñireni nagayejs guiraareni sa'csi cayac-huin lajzreni.

⁴⁶ Dxejc räjpni lojreni:

—¿Xhicuent nagajejstu? ¡Colchastie! ¡Colnab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn. 18:2-11)

⁴⁷ Lañi canii Jesús lojreni, bidzujñ xhidajl bejn. Tej rexpejn pacni ni laa Judas, nijdni nez loj rebejn ga. Dxejti gubigni loj Jesús, te bachagro'ni lo Jesús.

⁴⁸ Dxejc räjp Jesús lojni:

—Judas, ¿la con te yälrchagro' rutedlu Xi'n Dios ni gujc Niguui ladzña rebejnre, ä?

⁴⁹ Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn Jesús gudilñäj te mos xten ni rnibee loj rebixhojz, batiu'ni diajgni ladbee.

⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini.

⁵² Gunigajc Jesús loj reni rnibee loj rebixhojz näjza reni najc guixhajg xten guidoo näjza rebengool, guiraa reni siädxiinini, räjpni:

—¿La siädñätu spaad näjza garo't, astoocanu siädxiitu te gubaan, ä?

⁵³ Cheni suga'a lojtu guixe-guixee nen guidoo, ditu nuhual narä. Per dee najc xortu, luxh arnibee yälñacäy la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädnäjł Pedrni zit-zijt.

⁵⁵ Che bidzujnreni gule'creni guiboo galäiı lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c.

⁵⁶ Dxejc te gunaa ni rujn dzuun ro'c, che bahuiini sobga' Pedr ro'c, rdxelotjisni lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuiiı stee bejn lojni, räjpni lojni:

—Näj luj najclu te rexpejnıni.

Per Pedr räjp lojni:

—Gurniälojlu, Dad, dina gacä xpejnıni.

⁵⁹ Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te bejn Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lalni canii Pedr rediidxre, guredxa' te guidgäiı,

⁶¹ luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajd guidgäiı cuedxa', abazuni'lu chojn huält, räjp lu dilu gumbee najrä.”

⁶² Dxejcti guc-huin lajz Pedr, biriini ro'c, ronduxhni.

Rnijajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj caguxhisnäjrenini, caguijnzarenini.

⁶⁴ Dxejc basäureni lojni, gudajpreni lojni, räjpreni lojni:

—ıGunii chuni'c gudijnlu!

⁶⁵ Luxh guiraloj cayäjbreni lojni, caniyaduxhrenini.

Bidzunnäjreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee, näjza reni rnibee loj rebixhojz, näjza rebejn ni ruluiı leiı, huinäreni Jesús te suuni nez lojreni nejn yu' cadre rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz.

⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga loä.

⁶⁹ Per najli sibej Xi'n Dios ni gujc Niguiiı xladbee Gueb Dios ni yu' xhaguibaa.

⁷⁰ Dxejc gunabdiidx guiraareni lojni, räjpreni:

—Mbaj pues, ıla luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—ıXhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraareni, huinäreni Jesús nez loj Pila't.

² Ro'c guslojreni cabe'creni xquejni, räjpreni:

—Bidxälnu bejnre cayujnni bieju lo rexpejnnu. Räjpzani xhet nanabdi quiixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälrluiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni: “¿La Galilee siäd bejnğa?”

⁷ Cheni räjpreni ro'c siädni, baxhalnini loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén.

⁸ Che bahuii Herodes loj Jesús, bibalajzni sa'csi agujc xchej rlajzni fiini lojni, sa'csi abiejn diagni diidx xcuent ni cayujnni. Luxh rlajzni fiini gunni te milaagwr.

⁹ Xhidajl yälgunabdiidx bejn Herodes, luxh xhet guniidi Jesús.

¹⁰ Ro'c suga'za reni rnibee loj rebixhojz näjza rebejn ni ruluii leii, cabecduxhrueni xquejni.

¹¹ Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't.

¹² Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dxejc gurejdx Pila't reni rnibee loj bixhojz, näjza reben_gool ni najc guxhtis, näjza reben_guejdx.

¹⁴ Dxejc räjpni lojreni:

—La'tu biädnätu bejnre loä, najtu caguquılni rebejn gunreni bieju, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni.

¹⁵ Niclaza Herodes di nidxäl nicla tej dojl, ni'cni baxhalsacnini loonu, luxh abahuiitu xhet dojldi bejnni te guetni.

¹⁶ Ni'cni quinäni, dxjecti guslääni.

¹⁷ Najc costumbr rusläa Pila't te bejn ni yu' neñ latzguiib casob rajc lanijre.

¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, basläa Barrabás!

¹⁹ Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni.

²⁰ Rlajzpac Pila't gusläani Jesús, ni'c gunisacni lojreni,

²¹ niluxh rebejn dipru guredxa'reni, räjpreni:

—¡Bacuaani lo crujz, bacuaani lo crujz!

²² Riojn gunisac Pila't lojreni, räjpni:

—¿Xhi dolduxh bejnni? Xhetlidi dojl rdxälä bejnni te guetni. Ni'cni siguinäni dxejc suslääni.

²³ Luxh laareni sanuutis guredxa'reni, gunabreni xcajni lo cruzj. Luxh sa'csi guredxa'tisreni, bejntireni gaan gujc si'c ni rlajzreni.

²⁴ Dxejc cuäjb Pila't gunibeeni gac si'c ni gunabreni.

²⁵ Dxejc baslaani bejn ni yu' latzguiib sa'csi bejni biejj, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

Che cuaj Jesús lo cruzj

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo cruzj, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini cruzj, siädnaajtini dejtj Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús.

²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu.

²⁹ Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.”

³⁰ Dxejc guisloj rebejn gäb loj redajn: “Coljiajb yejcnu”, säjzbareni loj relom: “Colgucua'tz nuurnu.”

³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzarenio'p benguijdx xcajzarenio'p loj recruzj, guetnäjreni Jesús.

³³ Che bidzujnreni te lajt ni laa Calabeer, ro'c bacuaareni Jesús lo te cruzj, bacuaazarenio'p rebenguijdxga lo stio'p cruzj, tejni xladbee, steeni xladbäjgwni.

³⁴ Cheni cagucuaa rebejn reni lo cruzj, gunii Jesús, räjpni:

—Xtadä, badzucaj xtoj l rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cua'renini.

³⁵ Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badeedreni bin-nii yäni.

³⁷ Dxejc räjpreni lojni:

—Palga guli najclu rei xten rexpejn Israel, baslaa lagajc luj.

³⁸ Luxh bacuaareni gaii diidx loj te baräjd ni cuaj yejc cruzj. Con didx griegw, con didx latin, näjza didx hebreo, bacuaareni scree: “Dee najc Reii xten rexpejn Israel.”

³⁹ Te reben guijdx ni najl lo te cruzj ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

⁴⁰ Per benguijdx ni najl lo cruzj stelaadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? ¡Ni cayajczalu tejsi castiigw!

⁴¹ Per nuurnu cayajcnu castiigw ni riäj l gacnu te guidiixnu redojl ni biennu. Luxh laani xhet dojl di bejnini.

⁴² Dxejc räjpni loj Jesús:

—Bazalajzlu narä che guidzujnlu lo xcälrnibeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

*Che gujt Jesús**(Mt. 27:45-56; Mr. 15:33-41; Jn. 19:28-30)*

⁴⁴ Agojl si'cti läidxej. Dxejc bicäy guideb guedxliuj, si'c bianxcäy si'cti rcachonti.

⁴⁵ Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'.

⁴⁶ Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojl di bejn bejnre.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayääzreni lagajc lastooreni.

⁴⁹ Luxh guiraa reni rumbee Jesús, näjza regunaa ni biädnajni che biriilini Galilee, zijtru bia'nreni cahuiireni guiraa recos ni cayajcre.

*Che biga'tz Jesús**(Mt. 27:57-61; Mr. 15:42-47; Jn. 19:38-42)*

⁵⁰ Guyu' te bejn ni laa José, lacti huen najcni, luxh laaca rujnni guira'ti. Siädni guedx Arimatea, región Judea. Nadxaagzani loj reni rnibee neñ guidoro xten rexpejn Israel.

⁵¹ Cabäjzza José jiäd yälrnibee xten Dios, ni'cni dini nidxaglazj nani bejn resa'ni.

⁵² Dxejcti huijni lo Pila't, gunabni tiejxh Jesús.

⁵³ Che gulätnini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c.

⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga neñ baa.

⁵⁶ Che gubi'reni rolizreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24*Che gubañsac Jesús lo rebengut**(Mt. 28:1-10; Mr. 16:1-8; Jn. 20:1-10)*

¹ Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni.

² Che bidzujnreni, bahuiireni agubicaj guij ni rusäu ro' baa.

³ Dxejc che biu'reni neñ baaga, direni nidxäl tiejxh Jesús.

⁴ Lañ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajibreni.

⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiltu te bejn ni nabajn lo rebengut, ä?

⁶ Rutini ree. Agubañsacni. Colgusnaj lajztu rediidx ni guniini cheni guyusijcni Galilee,

⁷ che najni lojtu: “Riäjñ jiajb Xi'n Dios ni gujc Niguui ladzña rebendojl, xcajzani lo cruzj, dxejc ni riojn dxejga sibañsacni loj rebengut.”

⁸ Dxejc banaj lajz regunaa xtidx Jesús,

⁹ biriireni robaa, gubi'tireni te bijreni diidx lo retzubiteeb rexpejn_{pacni} näjza loj rebejn ni yunäjreni.

¹⁰ Reni huisa'n diidx loj rexpejn_{pac} Jesús najc redee: Marii Magdalen, näjza Xuan, näjza Marii xnan Jacoob, näjza sgaii gunaa.

¹¹ Niluxh rexpejn_{pacni} bejn xhigab didxnayääl_{ni}, direni nililajz xtidx regunaaga.

¹² Dxejc huisu Pedr, ruxun_{lini} huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolijzni, rdxelojtisni xcuent ni gujc.

Ni guzajc lo nezyuj ni sii guedx Emaús

(Mr. 16:12-13)

¹³ Lagajc dxejga, tio'p rexpejn_{pacni} sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén.

¹⁴ La_l ni sasajreni lo nezyujga, cayujyreni diidx xcuent reni gujc ro'c.

¹⁵ La_l ni caniireni gubig Jesús lojreni, gusloj sasanäjnireni.

¹⁶ Luxh mase cahuiireni lojni, yu' xhi badxojn niembeerreni.

¹⁷ Dxejc gunabdiidx Jesús lojreni, räjpni:

—¿Xhini'c rujytu la_l ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpni:

—Guiraasi bejn najn xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siäd guedx Nazare't, ni gujc te niguii ni gunii xtidx Dios, rajpni yäl_{rnibeduxh} xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn.

²⁰ Näjza xho bejn reni rnibee loj rebixhojz näjza rexcuxhtisnu, bateedrenini ladz_{naa} reni gunibee guetni, dxejc bacuaarenini lo crujs.

²¹ Niluxh nuurnu cabääznu laani gacni nani nus_{laa} rexpejn Israel ladz_{naa} rebenzijt. Naj agujc choñ dxej ni gujc recosre.

²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni,

²³ direni nidxäl tiejxhni. Biädsan_{reni} diidx loonu najreni bahuiireni lo tio'p xangl Dios ni räjp lojreni, agubansac Jesús lo rebeñgut.

²⁴ Dxejcti huihuii gaii sa'nu robaa, bahuiizarenini najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc räjp Jesús lojreni:

—¡Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist.

²⁶ ¿La di nungäj_l tedxgaa Crist retrabajwduxhre dxejcti jiu'ni lo xcäl_{rdimbicha'} Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzujn_{reni} guejdx cadre sääreni, bejn Jesús si'cni chanuuni chääni lo nezyuj.

²⁹ Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxej, agojl jiu' guxhijñ.

Dxejcti biu' Jesús te jiannäjnireni.

³⁰ Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni.

³¹ Lagajc dxejc, baxhal Dios balojreni, biembeereni Jesús, dxejc laani gunitlojni lojreni.

³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirureni nibäjz ro'c, alga gunasgajcreni nez, gubi'reni guedx Jerusalén. Ro'c bidxälreni abidojp xpejn̄pac Jesús näjza sgaii bejn̄.

³⁴ Dxejcti bijreni diidx loj guiro'preni bidzujn̄, räjpreni:

—Guliipac gubañsac Jesucrist, luxh baluilojni loj Simón.

³⁵ Dxejc guiro'p reni bidzujn̄ bijzaren diidx ni gusajcreni lo nezyuj, näj xho biembeereni Jesús che gula'ni yätxtiil.

Baluiloj Jesús loj rexpejn̄pacni

(Mt. 28:16-20; Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Col̄cuedx̄i lajztu!

³⁷ Per laareni rdxelojreni bidxejbreni, naareni cahuiireni lo te sprit.

³⁸ Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu?

³⁹ ¡Col̄huui reñaä, näjza reni'ä! Lagajc naräni. Col̄cajn narä te fiipactu laa naräni, sa'csi anajntu di te sprit ga'p bäǟl niclaza tzujt si'c rapä narä.

⁴⁰ Che guniini rediidxga, baluigajcni reñaani näjza reni'ni.

⁴¹ Lāl ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', näjza te la' seer ni yu' tzujn.

⁴³ Ni'c cua'ni gudajwnini nez lojreni.

⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäj̄l soob guiraa rediidx xcuentä ni caj lo xleii Moisés, näjza lo rexquijtz redade' ni guni xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni.

⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn̄ dxej, guibañsacni loj rebeñgut.

⁴⁷ Sire'chza diidx xcuent xho rus̄laa Crist rebejn̄ neñ̄ dojl̄ che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

⁴⁸ La'tu najctu testiigw guiraa recosre.

⁴⁹ Narä suxhalä Sprit Dxañ xten Dios lojtu, ni'c col̄jia'n guedx Jerusalén cheni jiäd̄lajzlini neñ̄ lastootu, guniidxni yäl̄rnibee ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ñaani, benle'ni yejcreni.

⁵¹ Lāl ni cayujnni si'c, gubicajni lojreni, huäjsni xhaguibaa.

⁵² Peta laareni guluju gojnrenini, dxejc cabalazduxhreni gubi'reni guedx Jerusalén.

⁵³ Ro'c guixe-guixee guyu'reni neḡ guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Niguui

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios.

² Che gajd gac-cheeli guedxliuj, yunäjni Dios.

³ Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini.

⁴ Laani gojp yäl'nabajñ. Yäl'nabajnga najc bianij xten rebejn.

⁵ Luxh bianijga rdimbicha' nez lo yäl'cäjy, niluxh yäl'cäjyga di niajcdi nusui-inini.

⁶ Guyu' te niguui birilaj Juan, ni baxhaļ Dios.

⁷ Laani biädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij.

⁸ Laani dini gac bianij, laani biädsule'ni diidx xcuent bianij.

⁹ Laa bianijpacga ni rusanij lastoo guiraa rebejn, luxh ñaj abiädni lo guedxliujre.

¹⁰ Nani najc Diidxga guyu' lo guedxliujre, xcuent laazani gac-chee guedxliujre, luxh di reben guedxliujre nililajz chu najni najcni.

¹¹ Biädni loj rexpen Israel, niluxh rexpejni direni nicäjb niu'ni lojreni.

¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl'nibee gacreni xi'n Dios.

¹³ Laa reni'c ni di gac si'c xi'n ben guedxliuj, ni gojl sa'csi rlaz te biniet chu xi'nni, dee najcpacreni Xi'n Dios sa'csi sudeedni yäl'nabajñ par tejpas lojreni.

¹⁴ Diidxga gujc te ben guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtadni, laani najcpacni nani sanälajz nuurnu, nani rnii didxlii loonu.

¹⁵ Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabajñni loä.

¹⁶ Sa'csi guiraanu cua'nu xcäl'nasacduxhni, yäl'racnäj detz yäl'racnäj.

¹⁷ Leii xten Dios biädni toMoisés, niluxh yäl'racnäj näjza redidxlii biädni Jesucrist.

¹⁸ Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist

(Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxhaļ rexpejn Israel rebixhojz näjza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiäd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäznu jiäd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhaļ nuure. ¿Xhi rniilu, chuxhni'c najclu?

²³ Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

²⁴ Rebejn ni baxhaļ redee najc reni rniireni “farisee”.

²⁵ Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabäáznu jiääd, ä?

²⁶ Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee.

²⁷ Laa dee ni siääd detzä niluxh di nungäjl nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuii Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtojļ reben guedxliuj.

³⁰ Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabajñni.”

³¹ Luxh dina niembeäni, per biädtiobnisä con nis te guluiä lo rexpejn Israel chu najcni.

³² Guniiiza Juan stee diidx xcuentni, räjpni:

—Narä bahuiä biäjt Sprit Dxan xten Dios xhaguibaa si'c te palom guzudxini yejcti.

³³ Dina niembeäni, per nani baxhaļ narä gutiobnisä con nis, laani najcni loä: “Cheni fiilu jiäjt Sprit Dxan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxan xten Dios.”

³⁴ Narä abahuiä lojni, ni'cni rniliä: “Dee ni najc Xi'n Dios.”

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejñni.

³⁶ Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

³⁷ Biejn diajg guiro'p rexpejñpac Juan diidxga, dxejc sanajlreni Jesús.

³⁸ Che gubiré Jesús bahuiini siädnaļreni, dxejc räjpni:

—¿Xhi caguiiltu?

Räjp rebejnğa:

—Mastr, ¿caro rbäjzlu?

³⁹ Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjļni Jesús.

⁴¹ Ganiddoo huitiilni bejtzni, dxejc räjpni lojni:

—Abidxälnu Mesías nani sälojza Crist ni cabäáznu jiääd.

⁴² Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälga rlaiz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

⁴⁴ Felipe siääd guedx Betsaida, guedxro ni najcza lajdx Andrés näjza Pedr.

⁴⁵ Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶ Räjp Natanael:

—¿La sajc guirii te beñsa'c guedx Nazare't, ä?

Räjp Felipe lojni:

—Gudaa, te filu.

⁴⁷ Che bahuii Jesús siääd Natanael nez lojni, räjpni:

—Colhuii te beñ Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

⁵⁰ Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

2

Te sa' ni guyu' guedx Caná xten Galilee

¹ Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús.

² Huijza Jesús näjza rexpejn pacni, sa'csi bidonreni chääreni lo sa'ga.

³ Gubijdz bin. Dxejc räjp xnan Jesús lojni:

—Dirureni ga'p bin.

⁴ Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujñ.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejn Israel te racnaryareni te si'c guisa' xleii toMoisés. Neñ tejga guesguijga ru' si'cti te gayuu litr nis.

⁷ Räjp Jesús loj remos:

—Colguchaj reguesguijre nis.

Dxejcti bachadoo rebejn gani.

⁸ Dxejcti räjp Jesús lojreni:

—Colca' che'nni naj te colchanäni lo nani cahuii cayajc sa're.

Dxejc huinä remosga che'n bin lojni.

⁹ Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n.

¹⁰ Dxejcti räjpni:

—Guiraa rebejn rudeedreni binsa'c räxgaa rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazäbdiidx yälrnibee xtenni luxh ni'cni huililajz rexpejn pacni xtiidxni.

¹² Che gudejd sa'ga, huijni guedx Capernaum con xnanni, rebejtzni näjza rexpejn pacni. Ro'c bia'nreni tio'p-chon dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzungejxh lanij pascw xten rexpejn Israel cheni rnalajzreni guxhijn ni gudejd guixhajg xten yälgujt neñ Egipto, ni'c sää Jesús guedx Jerusalén.

¹⁴ Neñ guidoro bidxälni xhidajl bejn nani ruto' gon, xiil, palom näjza reni sobga' caguchaa melzajt.

¹⁵ Dxejc bejn te chico't con gaii duu, gulääni regon con rexiiil neñ guidoo. Batie'chni xcoobr rebejn nani ruchaa melzajt, barexh-xhätni rexmexreni.

¹⁶ Räjpzani loj reni caguto' repalom:

—Colcuää redee, na'c rujntu rolijz xtadä si'c te guii cadro rdo' guiraloj.

¹⁷ Dxejcti banajlajz rexpejn pacni xhi caj lo reguijtz ni bacuaa redade' ni gunii xtidx Dios: “Gucnaj lazä xcuent ni runnäjreni rolijzlu.”

¹⁸ Dxejcti gunabdiidx reni najc xpejn Israel lojni, räjpreni:

—¿Xhi seen guluiilu loonu naj te finu arajplu yälrnibee te abejnlu recosre?

¹⁹ Badzu' Jesús diidxre räjpni:

—Colgutzujl guidoore, luxh narä neñ chontis dxej sunchesacäni.

²⁰ Räjp rexpejn Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni neñ chontis dxej, ä?

²¹ Niluxh laani caniini xcuent guidoo ni najc lagajc tiejxhni.

²² Ni'cni cheni gubansacni loj rebengut, banajlajz rexpejn pacni rediidxre ni guniini, dxejc huililajzreni nani caj lo rexquijtz Dios näjza rediidx ni gunii Jesús.

Numbee Jesús guiraa rebejn

²³ Cheni guyu' Jesús guedx Jerusalén cadro cayajc lanij pascw, lañ ni cayajc lanijga, xhidajl rebejn huililajz xtiidxni, bahuiizareni remilagwr ni bejnne.

²⁴ Luxh di Jesús nililajz xtidx rebejn ga, sa'csi arumbeeni xho najc rebejn.

²⁵ Niluxh dini niqiiin chu gäb lojni xho najc bejn, sa'csi lagajc laani anancheeni xho najc lastoo tejga bejn.

3

Jesús con Nicodem

¹ Guyu' te niguii lo rexpejn refarisee ni laa Nicodem, najcni te benroru loj reni rnibee rexpejn Israel.

² Te guxhijn biädxhiga'tzni nez loj Jesús, räjpni lojni:

—Mastr, nadonnu lo Dios siäädli si'c te ni ruluii, sa'csi rut rajcni rujn sa' remilagwr nani rujnlu palga di Dios sunäjni.

³ Dxejcti räjp Jesús lojni:

—Rniliäpac lojlu, nani di gaal stehuält, di gacdi fini xcälrnibee Dios xh-aguibaa.

⁴ Dxejcti räjp Nicodem lojni:

—¿Xho gac gaal te bejn stehuält niluxh anajcni beṅgool? ¿Xhixh sajc chusacni xque' xnanni stehuält te galsacni, ä?

⁵ Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit Dxaṅ xten Dios, di gacdi jiu'ni lo xcäl̄rnibee Dios xhaguibaa.

⁶ Nani rajl xi'n beṅ guedxliujre, ni'c najctisni beṅ guedxliuj, luxh nani rajl por Sprit Dxaṅ xten Dios, Spritza najcni.

⁷ Na'c rdxeløjlu sa'csi rniä: “Nanabpac gaallu stehuält.”

⁸ Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxaṅ xten Dios.

⁹ Badzu' Nicodem diidxre, räjpni:

—¿Xho mood sajc gac recosre?

¹⁰ Räjp Jesús lojni:

—¿La najclu te mastr xten rexpejn Israel luxh dilu gan recosre, ä?

¹¹ Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu.

¹² Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

¹³ 'Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii.

¹⁴ Lagajc si'cni guläsjaaa to Moisés bäl̄ guiib lo yajg neṅ reyubijdz, sigajcza nanab chäs Xi'n Dios ni gujc Niguii jiaa;

¹⁵ te guiraa renani chalilajz xtiidxni direni nit lo Dios, sica'reni yäl̄nabajn par tejpas.

Xho huinälajz Dios rebeṅ guedxliuj

¹⁶ 'Sa'csi huinälazduh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl̄nabajn par tejpas.

¹⁷ Sa'csi di Dios nuxhaḷ xi'nni te gusnijtni rebejn guedxliuj, alga baxhaḷnini te laa rebejn neṅ xtoj̄lreni xcuentni.

¹⁸ 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios.

¹⁹ Ni'cni dee najc yäl̄nijtga: abiääd bianijga loj guedxliuj, biädnä Xi'n Diosni, niluxh rebejn guedxliuj bidxagljazruren̄i yäl̄nacäy cadro tre'reni, gulälazreni bianijga sa'csi xhet laadi najc xtzunreni.

²⁰ Guiraa reni rujn dzunguijdx, rbälaz bianijga, dizaren̄i guibig loj bianijga, didi guluiloj bianijga rextzunguijdxreni.

²¹ Luxh reni rusoob didxlii, rbigreni loj bianijga, te bianijga ruluiloj najc rextzunreni redzunsa'c xten Dios.

Rnisac Juan ni rutiobnis xcuent Jesús

²² Dxejcti biääd Jesús näjza rexpejn pacni nez lo reyuj xten Judea. Ro'c guyunäjniren̄i, batiobnisza rexpejn pacni rebejn.

²³ Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c sää rebejn lojni te cagutiobnisniren̄i.

²⁴ Dxejc gajdreni gusäu Juan neṅ latzguiib.

²⁵ Dxejcti gusloj rexpejn Juan cayujy diidx con gaii xpejn Israel xcuent yäl̄rdiib ṅaaren̄i ni najc xcostumbr rexpejn Israel.

²⁶ Dxejc biäädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

²⁷ Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni.

²⁸ Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.”

²⁹ Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni.

³⁰ Nanab gacni laani beñroru, beñsajcru, biädla narä riajl gacä beñhuinru, ni guxiiru sajc lojni.

Nani siääd Xhaguibaa

³¹ 'Nani siääd jiaali, ni'c rnibee guiralii, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii.

³² Nani bahuiini, nani biejn diajgni, ni'c rusule'ni niluxh guxii rililajzreni xtiidxni.

³³ Nani rililajz diidx ni rusule'ni, bejnga ruluiloj guliipac najc xtidx Dios.

³⁴ Nani baxhaļ Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini.

³⁵ Dad Dios sanälajzni xingaanni, abadeedzani guiraliiti chu ladzñaani.

³⁶ Nani rililajz xtidx xingaanni arajp yälñabajñ par tejpas, luxh ni di chalilajz xtidx xi'nni, dini fii yälñabajñ, siääd xcälrdxe'ch Dios yejcnii, sujn Dios castiigwni.

4

Rdxaag Jesús te gunaa Samaria

¹ Che gucbee Jesús abiejn diajg refarisee xhidajlru bejn sanajl Jesús luxh guxiiru sanajlreni Juan, luxh cagutiobnisreni,

² (niluxh xhet Jesúsdi cagutiobnis. Rexpejñni ni catiobnis), dxejc

³ biriini Judea gubisacni nez Galilee.

⁴ Laļ ni sasajni, nanab tedni nez Samaria.

⁵ Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed toJacob lo xi'nni toJosé.

⁶ Ro'c sojb te bisie ni rniireni “xpisie Jacob”. Sa'csi abadxajg Jesús siädsajni, gurejni ro bisiega. Agojl läidxej.

⁷ Bidzujñ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

⁸ Sa'csi rexpejñpacni asääreni guejdxga sasiireni xhi gaureni.

⁹ Räjpni guna samaritaᅇga lo Jesús:

—¿Xho mood rniablu nis loä, luj ni najc te beñ Israel luxh narä nacä gunaa samaritan?

(Sa'csi di rexpejñ Israel chanä sa'reni rebejn Samaria.)

¹⁰ Räjp Jesús lojni:

—Paru najnlu xhini'c najc yälñulasajz xten Dios, paru numbeelu chuni'c canab nis lojlu, luj siniablu lojni te laani guniidxni nisñabajñ lojlu.

¹¹ Räjpni gunaaga lojni:

—Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nisñabajñga, ä?

¹² ¿La beñrorulu lo toxtadgoldoonu Jacob ni basa'n bisiere cadre huä'p nis gu'ni, gu'za rexi'nni, näjza rexquidxaani, ä?

¹³ Badzu' Jesús diidxre lojni, räjpni:

- Guiraa reni rä' nis bisiere, siojlreni stehuält.
- ¹⁴ Luxh nani yä nis nani gudedä, diruni jiojĵ, sa'csi nis nani gudedä nen lastooni sajcnĵ si'c te bisie nani rdatis nisni te gudeedni yäl_nabaj_n par tejpas.
- ¹⁵ Dxejcti räjp gunaaga lojni:
—Dad, baniidx nisga yä'ä, te na'cru jioĵä, te na'cruza guibi'ä jiädlä'pä nis ree.
- ¹⁶ Räjp Jesús:
—Huij, huitejdx chääl_u gudanäni ree.
- ¹⁷ Räjp gunaa loj Jesús:
—Ruti chälä.
Räjp Jesús lojni:
—Laaca guniilu,
- ¹⁸ sa'csi aguyu' gaiili chäällu. Luxh nani rbäznäjlu naj dini gac chäällu; guliica najlu.
- ¹⁹ Che biejn diajg gunaaga si'c, räjpni:
—Dad, rchaloä najclu te niguii ni rnii xtidx Dios.
- ²⁰ Retoxtagoldoonu goj_nreni Dios lo dajnre, luxh la'tu rniitu guedx Jerusalén najc cadro nanab ganni Dios.
- ²¹ Räjp Jesús lojni:
—Gunaa, huililajz xtidxä, sidzuj_n or cheni nicla lo dajnre, niclaza guedx Jerusalén ditu chagaj_n Dad Dios.
- ²² La'tu rajntu Dios nani ditu gumbee, nuunu raj_nnu Dios nani rumbeenu; sa'csi yäl_rus_laa bej_n lo dojĵ siäd xcuent rexpej_n Israel.
- ²³ Niluxh sidzuj_n or, luxh alabidzuj_nni, che reni guliipac raj_n Dad, reni'c nen lastooreni, lo xcäriejnreni saj_nreni Dios. Sa'csi sa' bej_nre rguil Dad Dios te ga_nrenini.
- ²⁴ Dios najc te Sprit. Reni raj_n Dios nanab ga_nrenini nen lastooreni, lo xcäriejnreni, guideb xtijpreni sa'csi rumbeerenini.
- ²⁵ Räjp gunaa lojni:
—Ananä siäd Mesías ni laaza Crist. Cheni jiädni, laani susule'ni guiraliiti loonu.
- ²⁶ Räjp Jesús lojni:
—Narä ni caniä lojlu, nacä laani.
- ²⁷ Dxejc bidzuj_n rexpej_npacni, bidxeløjreni sa'csi gunii Jesús lo gunaaga, niluxh rut gunabdiidxdi xhi rĵajzni, niclaza rut gunabdiidxdi xhini'c caninäjni gunaaga.
- ²⁸ Dxejcti basa'n gunaaga xtie'ni, sä'tini guedxroga. Dxejcti räjpni loj rebej_n:
- ²⁹ —Col_taa, fiitu te niguii ni gunii loä guira'ti nani abenä. ¿La et laadi dee Crist ni cabääznu jiäd, ä?
- ³⁰ Dxejc birii rebej_nguejdxga, bidzuj_ntireni lojni.
- ³¹ Reni najc rexpej_npacni canabduxhreni gau Jesús, räjpreni:
—Mastr, gudajw.
- ³² Laani räjpni:
—Narä rapä xhi gauä nani ditu gumbee.
- ³³ Dxejcti räjp rexpej_npacni lo sa'reni:
—¿Xhaa yu' chu abiäd_{nä} xhi gudajw_{ni}, ä?
- ³⁴ Räjp Jesús:
—Yäl_rajw xtenä najc gunä si'cni rĵajz nani baxhaĵ narä, näj guluxä xtzu_{unni}.
- ³⁵ La'tu rniitu riäd_x tajp bäii te guire' cose'ch. Narä rniä col_guiliäs lojtu, col_fisa'c loniaa, abiquijt_z regäĵĵ, agojĵ guire' cose'ch.

³⁶ Nani rujn dzuun rutie' cose'ch rca'ni xcuentni, luxh ni caca'ni najc par yä_nabaj_n par tejpas, te tejsi guibalaznäj nani gule'c binij näj nani batie' cose'ch.

³⁷ Sa'csi gulii najc diidx nani rnii bejn, rniireni: “Tejni rbe'c binij, ste'cani rutie'ni.”

³⁸ Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

³⁹ Xhidajl reben Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.”

⁴⁰ Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej.

⁴¹ Dxejc xhidajlrureni huililajz xtiidxni ni guniini lojpacreni.

⁴² Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni rus_laa rebejn guedxliuj loj dojl. Laani najc Crist ni cabääznu jääd.

Basiajc Jesús xi'n te bejn ni rujn xtzuun gubier

⁴³ Che gudejd tio'p dxej, biriini guedx Samaria, huinuuni xnezyujni nez Galilee.

⁴⁴ Sa'csi lagajc Jesús gunii, räjpni: Te bejn nani rnii xtidx Dios di reben lajdxpacni chanälajz xtiidxni.

⁴⁵ Che bidzuj_nni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejn.

⁴⁶ Gubisacni, bidzuj_nni guedx Caná xten Galilee cadre bejn bidxaa nis guj_nni bin. Dxejcti guyu' te dade' nani rujn xtzuun rei. Guedx Capernaum naga' te xi'nni cayacxhuu.

⁴⁷ Che biejn diajg dade'ga abirii Jesús Judea, abidzuj_nni nez Galilee, huijni lo Jesús, gunabduxhni lojni chääni te gusiaj_nni xi'nni nani naga' cuentro, ameerli guetni.

⁴⁸ Dxejcti räjp Jesús lojni:

—Paru ditu fii reseem, remilagwr, ditu chalilajz chuni'c nacä narä.

⁴⁹ Dade' ni rujn xtzuun rei, gunii lojni, räjpni:

—Do'o Dad, te di guet xi'nä.

⁵⁰ Räjp Jesús lojni:

—Huij. Di xi'nlu guet.

Huililajz dade'ga, sä'tini.

⁵¹ Che gubi'ni rolijz_nni, birii rexmosni, huichaglojni, badeedreni diidx nabaj_n xi'nni.

⁵² Dxejcti gunabdiidxni:

—¿Corti gusloj cayaj_nni?

Räjpreni lojni:

—Naii si'cti rcatej gudxej biriini xliaa.

⁵³ Dxejcti guchee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijz_nni huililajzreni Jesús najc ni cabäzreni jääd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejn Betesda nani naxu'n

¹ Che gujcti recosre, guyu' te lanij xten rexpejn Israel, dxejc huij Jesús guedx Jerusalén.

² Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor.

³ Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga

⁴ sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcnì lo xhitis yälgujdx ni rajcni.

⁵ Ro'c guyu' te beñ racxhuu nani agujc galbitzubixhujn ijz cayacxhuuni.

⁶ Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlanjlu jiajclu?

⁷ —Dad —räjp beñ racxhuuga lojni—, dina gapä chu gusal narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸ Räjp Jesús lojni:

—Huistie, guläs xta'lu, guszaj, huij.

⁹ Lagajc dxejc biajc bejnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel,

¹⁰ ni'c räjp rexpejn Israel lo bejn ni biajcga:

—Nadxej najc dxej ni rusilajz bejn. Di gacdi guulu xta'lu.

¹¹ Laani räjpni:

—Nani basiajc narä, laani naj loä: “Guläs xta'lu, guszaj.”

¹² Dxejc gunabdiidxreni lojni:

—¿Chuni'c naj lojlu “Guläs xta'lu, guszaj”?

¹³ Dxejcti beñ racxhuu ni biajcga dini gaan, sa'csi gunitloj Jesús, biriini ro'c laj ni tre' xhidajl bejn lajtga.

¹⁴ Che bidxaagni Jesús stehuält neñ guidoro, räjp Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuentroru.

¹⁵ Sä'ti bejnga, huiye'tzni loj rexpejn Israel laa Jesús ni basiajcni.

¹⁶ Ni'cni gusloj rexpejn Israel carinajlreni Jesús, rlanjreni guiga'ni te ju'trenini, sa'csi rujnni redzuunga dxej ni rusilajzreni.

¹⁷ Luxh räjp Jesús lojreni:

—Xtadä Dios najli cayujnni dzuun, ni'cni näjza narä cayunä dzuun.

¹⁸ Ni'cni rlanjru rexpejn Israel ju'tni, xhet ganaxdi sa'csi rujnni dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

Yälrnibee xten Xi'n Dios

¹⁹ Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujn Xtadni dzuunga, sa'csi guira'tis dzuun ni rujn Xtadni, dzuunga rujnza Xi'nni sigajc rujn Xtadni.

²⁰ Sa'csi rinälajz Dad xi'nni, ruluiini lo xi'nni guiraa redzuun nani rujnni, luxh dzunroruza suluiini lojni gunni, te guidxelojtu.

²¹ Sigajc ni rliäs Dios rebengut, rudeedni yälñabajn lojreni, sigajcza sudeed xi'nni yälñabajn lo renani rlanjztisni.

²² Nicla Dad di gun yälguxhtis, alga badeedni guiralii yälguxhtis gun Xi'nni,

²³ te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhañni biäädni.

24 'Rniliä, rniliäpac lojtu, nani rucuardiajg xtidxä, ni chalilajzzani nani baxhal narä, ni'c rajpni yäl nabajñ par tejpas; niluxh dini ted lo yäl guxhtis, alga abiriini lo yäl gujt, agudejdni lo yäl nabajñ.

25 Rniliä, rniliäpac, sidzujñ or, luxh alabidzujñni, cheni siejn diajg rebengut xse' Xi'n Dios, luxh reni riejn diajgni diidxga sibañsacreni lo rebengut.

26 Si'cni rajp Dad Dios yäl nabajñ lagajcsi laani, sigajcza badeedni lo Xi'nni ga'pni yäl nabajñ lagajcsi laazani.

27 Badeedzani lojni yäl rnibee te gunni yäl guxhtis, sa'csi najcni Xi'n Dios ni gujc Niguui.

28 Na'c rdxelojtu rediidxre, sa'csi sidzujñ or cheni guiraa reni yu' neñ baa siejn diajgreni xse'ni

29 siriizareni neñ baa. Reni bejn dzunsa'c siriireni te guibañsacreni loj yäl nabansa'c, niluxh reni bejn dzunguijdx, siriireni te guibañsacreni te tedreni lo xcäl guxhtis Dios.

Nani ruluiloj yäl rnibee ni rajp Jesús

30 'Xhet rajcdi runä lagajcsi narä. Sigajc ni riejn diagä, sigajcza runä yäl guxhtis. Luxh yäl guxhtis ni runä laaca najcni sa'csi dina quilä gunä nani rlazätis, rguilätis gunä si'c ni rlaz Dad nani baxhal narä.

31 Palga narätis rniä diidx lagajc xcuentä, xhet sajcdi diidxga.

32 Yu' stee nani rnili diidx xcuentä, luxh nancheä diidx ni rniini xcuentä sacduxhni, guliipacni.

33 La'tu abaxhaltu chu huij loj Juan, huinabdiidxreni lojni "chu najc bejnga", niluxh badzu'ni diidx lojreni guniini diidx guliipac xcuent chu nacä.

34 Narä dina jiuä diidx nani rnii rebejñ xcuentä luxh canisacä rediidxre te laatu lo xtojtu.

35 Juan gujc si'c te bajl ni ralguij, basanijzani. Luxh la'tu huihuiituni bibalajztu lo xpianijni balsi dxej.

36 Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtadä gunä, lagajc redzuun ni runä, huenliisi ruluilojreni Xtadä Dios baxhal narä.

37 Xtadä ni baxhal narä lojtu agunilii chu nacä. Gajdpactu jiejn diajg xse'ni, gajdzatu fii lojni.

38 Dizatu ga'p xtiidxni neñ lastootu, sa'csi di lajztu chalii xtiidx nani baxhal narä.

39 La'tu rolduxhtu reguijtz xten Dios sa'csi rchalotu si'c sidxältu yäl nabajñ par tejpas, luxh lagajc reguijtzga rusule' chu narä.

40 Naadditu jiäädte loä te ga'ptu yäl nabajñ par tejpas.

41 'Narä dina quilä chu bejñ guiliä'p xpala'nä nez loä.

42 Luxh narä anumbeätu, ananä ditu chanälajz Dios neñ lastootu.

43 Narä biälä xcuent Xtadä, luxh ditu gucuardiajg xtidxä; paru jiäädte chu stee bejñ xcuentcani, ni'c sii sucuardiajgtu xtiidxni.

44 Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu.

45 Di naatu pet narä ni chale'cä xquejtu lo Xtadä. ToMoisés ni chale'cä xquejtu, luxh rujntu xhigab lagajc xleiini gacnä j la'tu.

46 Paru la'tu nililajzactu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz.

47 Palga ditu chalilajz nani bacuaani lo reguijtz, ¿xho chalilajztu rediidx nani cania lojtu, ä?

6

*Bayaan Jesús gaa mil niguii**(Mt. 14:13-21; Mr. 6:30-44; Lc. 9:10-17)*

¹ Che gulujx gujc recosre, dxejc sää Jesús stelaad nezro' nisdoo xten Galilee, nani rñizareni nisdoo xten Tiberias.

² Sanajl xhidajl bejn ni sa'csi rhuiireni remilagwr ni rujni lo rebenracxhuu.

³ Dxejcti huä'p Jesús yejc te dajn, ro'c gurenäjni rexpejn pacni.

⁴ Niluxh ameer gac lanij pascw xten rexpejn Israel, cheni rudeedreni xquixhtios lo Dios xcuent dxej ni biriireni Egipto.

⁵ Cheni guläs Jesús lojni, bahuiini siääd xhidalduxh bejn, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

⁶ Dxejc räjpzani si'c te don xhi xhigab gun Felipe, luxh laani anajni xho gunni.

⁷ Räjp Felipe lojni:

—Di tio'p gayuu beex yätxtiil gal te gaureni tlagaj.

⁸ Tej rexpejn pacni ni laa Andrés, bejtz Simón Pedr, räjp lojni:

⁹ —Ree suga' te biuux ca' gaa yätxtiil con tio'p bäjl, ¿xhixh sajł ni'c gau reben xhidajlre?

¹⁰ Dxejcti räjp Jesús:

—Colyejtz loj rebejnre cuereni.

Yuduxh guixa' ro'c. Dxejcti gurej reniguii. Si'cti gaa mil najc reniguii.

¹¹ Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejn pacni. Dxejcti rexpejn pacni gudisrenini loj rebejn nani sobga'. Sigajcza gudisreni rebäjl si'ctisni rlajzreni gaureni.

¹² Che gulujx gudajwreni, gudxaj xque'reni, dxejcti räjp Jesús loj rexpejn pacni:

—Colgutie' guiraa reyätxtilbiujy nani bia'n te xhet nitdi.

¹³ Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaa yätxtiilga nani gula' gudajwreni.

¹⁴ Che bahuii rebejn ga reseen, remilagwr nani bejn Jesús, dxejc räjpreni:

—Gului pacni, laa dee ni najc niguii ni rñii xtidx Dios nani cabäaznu jiääd lo guedxliuj.

¹⁵ Sas che guchee Jesús cayujnreni xhigab jiädnaazrenini te niujnreni gacni rei te guinibeeni lojreni, biriini ro'c, xtebni gubisacni neñ dajn.

*Gusaj Jesús lo nisdoo**(Mt. 14:22-27; Mr. 6:45-52)*

¹⁶ Che gojl guxhijñ, bidzujñ rexpejn pacni lo nisdoo.

¹⁷ Biu'reni neñ te barcw te tedreni lo nisdoo nez guedx Capernaum. Abicäjy lo yuj niluxh gajd Jesús guibi' lojreni te chääni.

¹⁸ Gusloj cayäjs nisdoo xcuent te beduxh nani cabi'.

¹⁹ Ni'cni che gusajreni si'cti gaa o xho'p kilómetro, bahuiireni siäddzungajxh Jesús lo barcw, lo nisdoo siädsajni. Bidxebduxhreni.

²⁰ Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreni biu'ni neñ barcw. Dxejcti bidzungajczeni stelaad lo yuj cadro sääreni.

Caguil rebejn Jesús

²² Che bara yääl, rebejn nani bia'n stelaad ro' nisdoo, bahuiireni asanä rexpejn pacni barcwbäz nani suga' ro'c, niluxh di Jesús nij, xtebsireni sääreni.

²³ Luxh bidzungejajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixtios lo Dad.

²⁴ Che bahuii rebejn ruti Jesús ro'c, ni claza rexpejni, biu'reni neñ rebarcw, sääreni guedx Capernaum satiilreni Jesús.

Jesús najc yätxtiil xten yälñabajn

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä.

²⁷ Na'c guntu dzuun ganax par yälrajw nani rnitloj. Colyejn dzuun par yälrajw nani di nitloj, ni runiidx yälñabajn par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rlanj Dios?

²⁹ Räjp Jesús lojreni:

—Dee najc ni rlanj Dios guntu: chalilajztu xtidx narä, nani baxhalñi.

³⁰ Räjpreni lojni:

—¿Xhi seen gunlu te guihuiinu xcälñnibeelu te cholilajznu xtiidxlu? ¿Xhi dzuun rujñlu?

³¹ Retoxtadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

³² Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siäädpac xhaguibaa.

³³ Sa'csi yätxtiil xten Dios najc bejn ni siääd xhaguibaa, niluxh laani rudeedni yälñabajn par tejpas loj reben guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yälñabajn nani riäjñl jiääd; chutis ni jiääd loä diruni guiliaan, niluxh chutis ni rililajz xtidxä diruni jiojñl par tejpas.

³⁶ Aguniä lojtu, la'tu ditu chalilajz, luxh abahuiitu loä.

³⁷ Guiraa renani abaniidx Xtadä loä, siäädni loä, niluxh chutis ni jiääd loä dina cuälazäni.

³⁸ Sa'csi narä siälä xhaguibaali te gunä si'c ni rlanj Xtadä, xhet si'cni ni rlazädi.

³⁹ Dee najc ni rlanj Xtadä nani baxhalñ narä: na'c nit nicla tej renani baniidxni loä, te guspansacä guiragajcreni che gal dxej lult ni riäjñl jiääd.

⁴⁰ Scree rlanj nani baxhalñ narä: guiraa renani fii lo Xi'n Dios, näj chalilajzreni xtiidxni, xca'reni yälñabajn par tejpas niluxh narä suspansacäreni che gal dxej lult ni riäjñl jiääd.

⁴¹ Rediidxre bejn gusloj casiey rexpejn Israel xcuent Jesús sa'csi räjpni: “Narä nacä yätxtiil ni biäjt xhaguibaa.”

⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh niini xhaguibaa biäjtñi?

⁴³ Dxejc räjp Jesús lojreni:

—Na'c rusieinäj sa'tu.

⁴⁴ Rut rajcni riääd loä palga di Xtadä ni baxhalñ narä jiädnäni loä, te guspansacäni che gal dxej lult ni riäjñl jiääd.

⁴⁵ Loj reguijtz ni bacuaa redade' ni gunii xtidx Dios caj scree: “Suliii Dios guiraareni.” Ni'cni guiraa reni rucudiajg xtidx Xtadä, reni rsieed lojni, reni'c ni jiääd loä.

⁴⁶ 'Dinä guiniä yu' chu abahuii lo Dios; tejtis ni abahuii lojni: nani baxhal Dios, ni'ctis abahuii lojni.

⁴⁷ Rniliä lojtu che rniä: nani chalilajz xtidxä, ni'c rajp yäl_nabaj_n par tejpas.

⁴⁸ Narä nacä yätxtiil nani rudeed yäl_nabaj_n.

⁴⁹ Retoxtadtu gudajw mana ni bastejb Dios lo reyubijdz, dxejcti gujtzareni.

⁵⁰ Dee najc yätxtiil ni siääd xhaguibaa, te chutis ni gau yätxtiilga dini guet.

⁵¹ Narä nacä yätxtiilbaj_n ni siääd xhaguibaa. Palga yu' chu gau yätxtiilre, sibaj_nni par tejpas. Yätxtiil nani runidxä narä te xca' rebe_n guedxliuj yäl_nabaj_n najc lagajc bältiexhä.

⁵² Dxejcti gusloj casiejy rexpej_n Israel räjpreni:

—¿Xho gac guniidx dee bältiejxhni guidaunu, ä?

⁵³ Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiej_nni, digacdi ga'ptu yäl_nabaj_n.

⁵⁴ Nani gau bältiexhä, nani yäza xtienä, ni'c rajp yäl_nabaj_n par tejpas, niluxh suspansacäni che gal redxej lult.

⁵⁵ Sa'csi bältiexhä najc te yäl_rausa'cpac, xtienä najcza te yäl_räsa'cpac.

⁵⁶ Nani gau bältiexhä, nani yäza xtienä, ni'c yu'pac con narä, luxh narä yu'äza con laani.

⁵⁷ Xtadä ni baxhal narä rajp yäl_nabaj_n par tejpas. Narä naba_nä xcuent laani. Sigajcza nani rajw narä, sibaj_nzani xcuent narä.

⁵⁸ Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibaj_nni par tejpas.

⁵⁹ Recosre baluii Jesús ne_n te guidobäz la_l ni guyu'ni guedx Capernaum.

Diidx xten yäl_nabaj_n par tejpas

⁶⁰ Che biejn diajgreni si'c, xhidajl rexpej_npacni räjp:

—Naganduxh najc rextiidxni. ¿Chu laa nani gac cuadiajgni?

⁶¹ Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä?

⁶² ¿Xhicha guntu paru fiitu chä'p Xi'n Dios ni gujc Niguii cadre guyu'ni galoo?

⁶³ Sprit xten Dios najc ni rudeed yäl_nabaj_n; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yäl_nabaj_n par tejpas.

⁶⁴ Luxh la_tis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, gutedni laani ladz_naa rebe_n dojl.

⁶⁵ Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtadä jiädnäni loä.

⁶⁶ Lagajc dxejc gusloj cabicaj xhidajl rebej_n ni agujc xchej gusanäj Jesús, dirureni nisianäj Jesús.

⁶⁷ Dxejcti räjp Jesús loj guidzubitio'p rexpej_npacni:

—¿La nägajcza la'tu rlajztu jiitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yäl_nabaj_n par tejpas.

⁶⁹ Nuure abiolilaaznu, anajnnu najclu Crist Xi'n Dios nani nabaj_n.

⁷⁰ Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtü najc beñdxab.

⁷¹ Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejn̄pac Jesús.

7

Di rebejtz Jesús chalilajz

¹ Che gujcti recosre, cansaj Jesús nez reyuj xten Galilee, di rlajzni jia'nni nez reguedx Judea sa'csi rlajz reben̄ ro'c ju'tni.

² Luxh ameer gal̄ lanij xten cose'ch xten guidoguijd, te relanij xten rexpejn̄ Israel.

³ Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejn̄pacu fii redzunro nani rujnlu.

⁴ Sa'csi rut rujndi xtzuumni xhiga'tz palga rlajzni gacbee bejn̄ xhi dzuun rujnni, te gumbee bejn̄ni. Palga rujnpacu redzuunre, baluini lo guiraa reben̄ guedxliuj.

⁵ Guniireni si'c lojni sa'csi nicla rebejtzni di chalilajz xtiidxni.

⁶ Dxejcti räjp Jesús lojreni:

—Gajd xhorä guidzujn̄, niluxh par la'tu xhitis or̄ najc hueen.

⁷ Di gacdi guidxe'ch reben̄ guedxliuj lojtu, luxh rdxe'chreni loä sa'csi narä rniliä xcuentreni: dzunguijdx najc xtzuumreni.

⁸ La'tu colchäj lanij; narä dina cha'a lanijga sa'csi gajd xhorä gal̄.

⁹ Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰ Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni.

¹¹ Dxejcti caguiil rexpejn̄ Israelni lo lanijga, räjpreni:

—¿Concha niguiiga?

¹² Lo rebejn̄ xhidaalga yu' xhidajl bejn̄ ni cagusieyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni reben̄guejdx.”

¹³ Nicla tejreni xhet casäbdiidxdiren̄i xhini'c caniireni. Direni guinii dip sa'csi rdxejbreni rexpejn̄ Israel nani rnibee.

¹⁴ Agurojl lanij, che biu' Jesús nen̄ guidoro. Dxejcti gusloj caguluiini.

¹⁵ Dxejcti rdxejoj rexpejn̄ Israel nani rnibee, räjpreni:

—¿Xho najn̄ dee guiraloj, niluxh dini nisieed xleii toMoisés?

¹⁶ Badzu' Jesús diidxre, räjpni:

—Yäl̄ruluii nani caluiyä et xtenädini, xten nani baxhaļ naräni.

¹⁷ Palga yu' chu rlajz gun nani rlajz Dios, sacbeeni la xten Dios najc reyäl̄ruluii xtenä, o la lagajcsi narä rbää diidx ni caguluiä.

¹⁸ Nani rusule'ni diidx nani lagajc laani rbääni, ni'c rniini diidxga te guiliä'p rebejn̄ xpala'nni, luxh nani rguuil chä'p xpala'n nani baxhaļni, ni'c ni rnü didxlii, xheti yäl̄rusguee nen̄ lastooni.

¹⁹ ¿La di toMoises nuniidx leii lojtu, ä? Niluxh nicla tejtü di gusoob xtidx leiiga. ¿Xhicuent rlajztu ju'ttu narä, pes?

²⁰ Badzu' reben̄ xhidajlga diidxre, räjpreni:

—¿Xp̄rit beñdxab yu' lastoolu! ¿Chuni'c rlajz ju'tlu?

²¹ Badzu' Jesús diidxre lojreni, räjpni:

—Tejtis dzuun benä con xcäl̄rnibeä, dxejc guiraatu cadxejojtu sa'csi benäni dxej ni rusilajztu.

22 Ni'cni baniidx to Moisés lojtu yälru'tu bee, luxh etlaadini guläxtiejnini, agac guläxtiej retoxtadgoldootuni. La'tu rusäl'tu bee rebiuux mase najcni dxej nani rusilajztu.

23 Mbaj pes, palga rajc rusäl'tu bee bejn te dxej nani rusilajztu didi nit xleii Moisés, ¿xhicuent rdxe'chtu loä sa'csi basiacäpac te bejn te dxej nani rusilajztu, ä?

24 Na'c rujntu yälguxhtis si'ctis ni rlaiztu. Colyejn yälguxhtis con yälguxhtis xten Dios.

Rusule' Jesús casiädni

25 Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguiilreni te ju'trenini, ä?

26 Ani asuga', caniini nez loj guiraa reben'guejdx, niluxh rut rudxoindini. ¿Xhaa ahuililajz reguxhtis, regubier laani najcpacni Crist, ä?

27 Niluxh nuure nadoncheenu caro siäd niguire, niluxh che jiaäd Crist, rut gacbeedi caro siädni.

28 Caguluii Jesús nen guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajni, luxh la'tu ditu gumbeeni.

29 Luxh narä numbeäni, sa'csi lojni biriä, laani baxhalzani narä.

30 Dxejc rlaizreni niniaazrenini, niluxh rut gunaazdini, sa'csi gajd xhorni gal.

31 Xhidajl bejn lo reben xhidajlga huililajz xtiidxni, dxejcti räjpreni:

—Cheni jiaäd Crist, ¿xhixh sujnruni milagwr loj nani rujn dee, ä?

Ruxhal refarisee guixhajg guiniaaz Jesús te jiauni

32 Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jiauni.

33 Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä.

34 Siguiiltu narä, niluxh ditu guidxäl narä, sa'csi cadre cha'ä digacdi jiaädtu.

35 Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxäl nuni? ¿Xhaa sijni loj rexpejn Israel nani nare'ch nez lajdx regriegos te guluiini regriegos?

36 ¿Xhi säloj diidxre nani guniini loonu: “Siguiiltu narä, niluxh ditu guidxäl narä, sa'csi cadre cha'ä di gacdi jiaädtu”?

Regueu nisnabajn

37 Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiaädni loä te yäni.

38 Nani chalilajz xtidxä si'cni caj lo rexquijtz Dios nen lastoolini siliejn nisnabajn.

39 Rediidxre guniini xcuent Sprit Dyan nani churu jiadläjz nen lastoo reni rililajz xtiidxni, sa'csi gajd Sprit Dyan jiaäd, sa'csi gajd Jesús guibañsac lo reben'gut.

Gucgala' rebejn

40 Lo reben xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siäd, si'c ni rnii xtidx Dios.

41 Yu'zarenini räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jiääd Crist nez Galilee.

⁴² Ni loj rexquijtz Dios caj riäjlpac gac Crist te rexagdoo torei David, jiäädzani guedx Belén, lagajc guejdx cadre siääd torei David.

⁴³ Dxejcti gucgala' rebejn xcuent Jesús.

⁴⁴ Yu'reni rlanj chääni pres luxh rut biajxdi gunaazni.

Di reguxhtis chalilajz biääd Crist

⁴⁵ Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

⁴⁶ Badzu' reguixhajg diidxre, räjpreni:

—¡Gajdpac te bejn guinii si'cni rnii bejnnga!

⁴⁷ Dxejc räjp refarisee:

—¿La näj la'tu abasgueeni, ä?

⁴⁸ ¿Xhixh loj regubier o loj refarisee yu' chu tej ni ahuililajz xtiidxni, ä?

⁴⁹ Rebejn xhidajlre ni di gan xleii to Moisés, reni'c agunijtpac.

⁵⁰ Nicodem, nani huij lojni te guxhijn, najc te refarisee. Laani räjpni lojreni:

⁵¹ —Lo xleiiu caj: digacdi guntu yälguxhtis te bejn palga gajdte gucuadi-agxgaa xtiidxni, te don xhi bejn.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Biłsa'c xhi caj lo xquijtz Dios, suhuiilu nicla tej niguii nani rnii xtidx Dios di jiääd nez Galilee.

Gunaa nani biga' carälguijxh con te niguii

⁵³ Dxejc cade tejreni sii rolijzreni.

8

¹ Dxejcti huij Jesús nez dan Oliib.

² Rsilru gubi'ni, bui'ni nejn guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluiinireni.

³ Dxejcti biääd refarisee näjza rebejn najn, biädnäreni te gunaa nani biga' carälguijxh con te niguii. Basujrenini galäii reni suga' ro'c.

⁴ Räjpreni loj Jesús:

—Mastr, gunaare biganäj te niguii carälguijxhreni, niluxh yu' chäälni.

⁵ Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶ Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani.

⁷ Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

⁸ Basabsac lojni lo yuj sanuutis cagucuaani con bicueñaani lo yuj.

⁹ Luxh laareni che biejn diajgreni diidxga, sa'csi yu' xtojlni, gusloj biri-ireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni suga' galäiireni.

¹⁰ Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquiidiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹² Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiädnajl narä dini sa lo yäl_nacäyj, sica'ni bianij ni rudeedpac yäl_nabaj_n.

¹³ Dxejcti räjp refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä.

¹⁵ La'tu rujntu yäl_guxhtis si'c najctis rehxigab xten be_n guedxliuj. Narä rut lojdi runä yäl_guxhtis.

¹⁶ Palga gunä yäl_guxhtis, yäl_guxhtis xtenä laaca najcni, sa'csi et xtebädi runä yäl_guxhtis, sa'csi narä näj Xta_{dä} ni baxha_l narä rien_nnuni.

¹⁷ Luxh lo xleiiitu caj diidxre: “Che rni_i tio'p be_n tejsi diidx, didxliini, colchalilaj_nni.”

¹⁸ Narä rniliäpac diidx lagajc xcuentä, dxejcti Xta_{dä} nani baxha_l narä rniliizani diidx xcuentä.

¹⁹ Räjpreni loj Jesús:

—¿Caro yu' xta_dlu?

Räjp Jesús lojreni:

—Ditu gumbee nicla narä, niclaza Xta_{dä}; paru niembeetu narä, niem-beezatu Xta_{dä}.

²⁰ Rediidxre gunii Jesús cadre re' gojn, la_l ni caguluiini ne_n guidoro niluxh rut gunaazdini sa'csi gajd xho_rni guidzuj_n.

Cadro cha'ä, la'tu digacdi jiääd_tu

²¹ Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtoj_ltu sejt_tu. Cadre cha'ä di gacdi jiääd_tu.

²² Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadre chääni?

²³ Räjp Jesús lojreni:

—La'tu najctu be_n lo yuj. Narä nacä be_n ni siääd jiaa. La'tu najctu be_n guedxliujre. Luxh narä dina gacätis be_n guedxliujre.

²⁴ Ni'cni guniä lojtu, sejt_tu lo xtoj_ltu sa'csi palga ditu chalilajz nacä chu nacä, sejt_pactu lo xtoj_ltu.

²⁵ Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli?

²⁶ Xhidajl diidx rlazä guiniä, xhidajlza yäl_guxhtis rlazä gunä xcuenttu sa'csi ditu chalilajz, per nani baxha_l narä najc be_n guliipac; nani biejn diagä guniini, rediidxga rniä loj rebe_n guedxliuj.

²⁷ Luxh laareni direni niacbee la xcuent Dad Dios ni caniini.

²⁸ Ni'cni räjp Jesús lojreni:

—Cheni guiliästu Xi'n Niguui jiaa, dxejc sacbeetu laa narä ni baxha_lni, luxh xhetliidi runä lagajcsi xcuentä. Si'cni baluii Dad narä, si'ctis rniä.

²⁹ Nani baxha_l narä suganäj_ni narä. Gajd Dad gusanxteb narä, sa'csi runätis ganax redzuun nani rchaglaj_ni.

³⁰ La_l ni caniini si'c, xhidajlreni huililajz xtiidxni.

Rexi'n Dios con remos xten dojl

- ³¹ Dxejcti räjp Jesús lo rexpejn Israel nani huililajzga:
—Palga la'tu sutijptu, guzoobtu xtidxä, dxejc guliipac najctu xpenä.
- ³² Sumbeezatu nani najc didxgulii, niluxh didx guliiga suslaa la'tu lo xtojltu.
- ³³ Räjpreni lojni:
—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?
- ³⁴ Räjöp Jesús:
—Riniliä, rniliäpac lojtu, chutis ni rujn dojl najc mos xten dojl.
- ³⁵ Nani najc mos, dini jia'n rolijz xlamni guideb guibajnni, niluxh nani najc xi'n lamga, ni'c sii sia'n rolijz xtadni guideb guibajnni.
- ³⁶ Ni'cni, palga ruslaa xi'nni la'tu lo dojl, dxejcsii apac gulaatu.
- ³⁷ Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu.
- ³⁸ Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.
- ³⁹ Badzu'reni diidxre, räjpreni lojni:
—Xtadnu najc toAbraham.
Dxejc räjp Jesús lojreni:
—Palga la'tu najcpactu xi'n toAbraham, sujntu sa' dzuun ni bejn toAbraham.
- ⁴⁰ Luxh naj rlanjtu ju'ttu narä, sa'csi rniliä rediidx nani baluii Dios loä. ¡Di toAbraham niujn si'c!
- ⁴¹ La'tu rujntu xtzuum xtadtu.
Dxejc räjpreni lojni:
—Nuure dinu gac xi'n chälbejnndi; nuure tejtis xtadnu yu', laani najc Dios.
- ⁴² Dxejcti räjp Jesús:
—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhal narä.
- ⁴³ ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidxä.
- ⁴⁴ Xtadtu najc bejdxab. La'tu najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtad didx-xhii.
- ⁴⁵ Niluxh narä rniä didxlii, ni'c ditu chalilajz xtidxä.
- ⁴⁶ ¿Chu tejtü sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä?
- ⁴⁷ Nani najc xpejn Dios, ni'c rucuardiajg xtidx Dios. Sa'csi la'tu ditu gac xpejn Dios, ni'cni ditu gucuadiajg xtidxä.

Ansde toAbraham, agac nabajn Crist

- ⁴⁸ Dxejcti badzu' rexpejn Israel diidxre, räjpreni lojni:
—Laaca rniinu luj najclu te bejn ni siääd Samaria, bejdxab yu' lastoolu.
- ⁴⁹ Räjöp Jesús lojreni:
—Xhet bejdxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä.
- ⁵⁰ Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani rujnni yalguxhtis.
- ⁵¹ Rniliäpac lojtu, nani riu, nani rusob xtidxä, dipacni guet.
- ⁵² Dxejcti räjp rexpejn Israel lojni:

—Naj agucebeepacnu yu' bendxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.”

⁵³ ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtiostu.

⁵⁵ Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni.

⁵⁶ ToAbraham toxtadgoldootu, bibalajzni sa'csi nuhuiini dxej nani jiälä, niluxh bahuiinini dxejc bibalazduxhni.

⁵⁷ Dxejcti räjp rexpejn Israel lojni:

—Nicla gajdlu chu tiubituu ijz, ¿xho naalu abahuiilu lo toAbraham?

⁵⁸ Räjp Jesús lojreni:

—Rniliäpac lojtu, che gajdli guibajn toAbraham, agac nabañä narä.

⁵⁹ Dxejcti cua'reni guij te nucuaareni yejc Jesús, per di Jesús niga', biriini nen guidoro, gudejdni galäiireni. Sä'tini.

9

Basiajc Jesús te bejn ni natiä'p balojni che gojllini

¹ Che cadejd Jesús te lajt, bahuiini sobga' te bejn ni che gojlli bejnga agajc natiä'p balojni.

² Dxejc gunabdiidx rexpejnpacni lojni, räjpreni:

—Mastr, ¿chuni'c bejn dojl, la bejnre o la xcuzajnni, ni'c natiä'p balojni che gojlni, ä?

³ Räjp Jesús:

—Nicla laani, niclaza xcuzajnni di niujn dojl. Si'c gojlni te xcuent ni sajc bejnre suhuii bejn xho najc xtzuun Dios.

⁴ Nanab gunä xtzuun nani baxhal narä naj ni najc rdxee, sa'csi cheni guidzujn guxhijn rut gacdi gun dzuun.

⁵ Lalni yu'ä lo rebejn guedxliuj, nacä xpianij guedxliuj.

⁶ Che gulujx guniini si'c, batiobxhejnni lo yuj, bejnni bajn con xhejnni, gudääbnini con bicuenaani lo rebaloj lotiä'pga.

⁷ Dxejcti räjpni:

—Huij, huitiib lojlu nen nis ni laa Siloé. Laj nisga sälojza “baxhalni”.

Dxejcti huijni. Huitiibni lojni. Che gubi'ni, aruhuiini.

⁸ Dxejcti rexpisijn lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arien balojlu?

¹¹ Dxejcti räjp dade'ga nani gujc lotiä'p:

—Dade' ni laa Jesús bejn bajn, gudääbnini baloä, dxejcti najni: “Huitiib lojlu nen te nis ni laa Siloé”, dxejcti che huitibä loä, lagajc dxejc bien loä.

¹² Dxejcti räjpreni lojni:

—¿Con dade'ga naj?

Räjpiti bejnnga:

—Dina ganä.

Reben farisee bejn yälgunabdiidx lo dad lotiä'p nani biajc lojni

¹³ Huinäreni nani gujc lotiä'pga nez loj refarisee.

¹⁴ Luxh sa'csi najcni dxej ni rusilajzreni che bejn Jesús bajn ni gudääbni loj lotiä'pga te biajc balojni,

¹⁵ gunabdiidxsac refarisee loj dade' nani biajc balojni, xho mood arien balojni naj.

Laani räjpni lojreni:

—Bajn gudääbni loä, dxejc gudibä loä, naj aruhuiä.

¹⁶ Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni beñ dojl?

Ni'cni gula' sa'reni, gujcreni tio'p gala'.

¹⁷ Dxejcti gunabdidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn nani rnii xtidx Dios.

¹⁸ Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzajn dade' ni gujc lotiä'pga.

¹⁹ Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni.

²¹ Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, anajcni beñgool, lagajc laani sajc guiniini xhi gusajcni.

²² Si'c gunii xcuzajnni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' nen guidoo chutis te bejn ni naa Jesús najc Crist nani abiääd.

²³ Ni'cni räjp rexcuzajnni:

—Anajcni bi'n ni ayu' xcäriejnmi. Lojni colguiniabdiidx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu beñ dojl najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni beñ dojl o la dini gac. Tejtis nanä: gucä lotiä'p, luxh naj arien baloä.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejnmi basiajcni balojlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh näj la'tu rlanjtu gactu xpejn pacni, ä?

²⁸ Dxejc gudilnäjrenini, räjpreni:

—Luj najclu xpejnmi, per nuure najcnu xpejn to Moisés.

²⁹ Anadonnu guninäj Dios to Moisés, niluxh dade're dinu guidon casiädni.

³⁰ Dxejcti räjp dade' lojreni:

—Dee najc te cos ni guidxeloj bejn: la'tu ditu gan casiädni, jniluxh laani basiajcnj baloä!

³¹ Nadoncheenu di Dios cuadiajg xtidx reben dojl; palga yu' chu rajn Dios, ni rusoobza xtiidxni, rucuardiajg Dios xtidx sa' bejnga.

³² Che guslojli guedxliuj gajd diajgnu jiejn xcuent te bejn nani rusiajc balo te ben lotiä'p nani natiä'p lojni cheni gojllini.

³³ Palga xhet lo Diosdi siäd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluuilu nuure?

Dxejcti guläärenini nen guidoro, barilaagwrenini.

³⁵ Biejn diajg Jesús guläärenini nen guidoro, che bidxälhini, räjpni lojni:

—¿La rililajzlu xtidx ni najc Xi'n Dios ni gujc Niguui, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷ Räjp Jesús:

—Abahuiilu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojnnini.

³⁹ Räjp Jesús:

—Par yälguhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

⁴⁰ Refarisee nani suganäjreni, che biejn diajgreni diidxre, räjpreni:

—¿Xhixh najczanu ben lotiä'p, ä?

⁴¹ Räjp Jesús:

—Paru najctu lotiä'p, rut gucuaquijditu xtojltu, naj sa'csi rniitu rien lojtu, sicaquijtu rextojltu.

10

Jesús najc te baxtorsa'c

¹ 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan.

² Nani riu' nez ro' gurajl xten rexiil, laani najc xpaxtoorreni.

³ Che guidzujn baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbejdxni rexiilga, tebgaj xiilga yu' lajni, rinäzanireni cadre naga' guixasa'c.

⁴ Che rii rexiilga nen gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga.

⁵ Luxh dipacreni chanä te baxtoor nani direni gumbee, ruxunreni lojni sa'csi direni gumbee xse' garenca bejn.

⁶ Bij Jesús rediidxga lojreni, niluxh direni niacbee xhi säloj ni guniini.

⁷ Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil.

⁸ Guiraa reni abiäd galoo, najcreni ganax gubaan luxh di rexiil nucuadiajg xse'ni.

⁹ Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälni guixasa'c gauni.

¹⁰ 'Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yälhabañsa'c, yälhabajn par tejpas.

¹¹ Narä nacä baxtorsa'c; luxh baxtorsa'c sudeed lagajc xcäl̄nabaj̄n̄ni xcuent rexiilni.

¹² Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxun̄ni, li rbälazni rexiil. Dxejc rniaaz cuyo't rexiil, rutie'chzani rexiil.

¹³ Mosga ruxun̄ sa'csi najcni mostis, luxh dini jiu xhi rsiajc rexiil.

¹⁴ 'Narä nacä baxtorsa'c; numbeä reni najcpac rexilä; rexilä numbeezareni narä

¹⁵ sigajc numbee Xtadä narä, sigajc numbeäza Xtadä; luxh sudedä xcäl̄nabañä xcuent rexiilga.

¹⁶ Rapäza ste cuaa xiil, ni di gac xten gurajlre; näjza laareni nanab chaxiä, te gusbodijgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

¹⁷ 'Narä siguixäza xcäl̄nabañä, guetä, te dxejcru siliässacä xcäl̄nabañä, guibansacä, ni'cni sanälajz Xtadä narä.

¹⁸ Rut sajcdi ju't narä, lagajc narä gudedä xcäl̄nabañä, guetä. Rapä yäl̄rnibee te gudedä xcäl̄nabañä, guetä, rapäza yäl̄rnibee te xcasacä xcäl̄nabañä te guibansacä, sa'csi dee najc yäl̄rnibee ni baniidx Xtadä loä.

¹⁹ Xcuent rediidxre gula' sa' rexpejn̄ Israel, gujcreni tio'p gala'.

²⁰ Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcni rajc. Xhigac rcuadiajgtu xtiidxni.

²¹ Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotiä'p, ä?

Rdxe'ch rebejn̄ loj Jesucrist

²² Lagajc neñ redxejga gujc lanij xten xquidoo rexpejn̄ Israel guedx Jerusalén.

²³ Najcni bäi najl. Biu' Jesús guidoro, sasajni nez neñ cordoor ni laa xten Salomón.

²⁴ Gubig rexpejn̄ Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiääd, guiniliini loonu tejpas.

²⁵ Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl̄rnibee Xtadä, huenliisi ruluilojreni chuni'c nacä.

²⁶ La'tu ditu chalilajz sa'csi ditu gac rexilä.

²⁷ Rexilä numbee xse'ä, luxh narä numbeäzareni, riädnajlzareni narä.

²⁸ Narä rudedä yäl̄nabaj̄n̄ par tejpas loj rexilä, luxh direni nitloj par tejpas. Rutza laadi nani sajg gudzucajreni ladz̄naä.

²⁹ Xtadä baniidxreni loä, laani najcni guroobru, nadipru loj guiraareni. Rut laadi nani sajg gudzucajreni ladz̄naa Xtadä.

³⁰ Narä näjza Xtadä najcnu tejsi.

³¹ Dxejc gulässac rexpejn̄ Israel guij, te nucuaareni yejc Jesús.

³² Dxejcti räjp Jesús lojreni:

—Xhidajl dzuun xten Xtadä abaluiä lojtu, ¿lo redzuunga, xhi tej dzuun rujn gucuaatu guij yecä?

³³ Dxejcti räjp rexpejn̄ Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

³⁴ Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”?

³⁵ Nancheenu digacdi guidxaa xquijtz Dios. Palga gulalajni redios rebejn nani bejn yälguxhtis loj rexpejn Israel, dxejc

³⁶ naj ¿xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhałni narä lo guedxliujre.

³⁷ Palga dina gunä redzuun xten Xtaďä, na'c chalilajztu rextidxä.

³⁸ Luxh palga runnäni, mascä ditu chalilajz xtidxä, colchalilajz ni ruluii reyälmilagwr nani runä, te gacbeetu par tejpas, Xtaďä yunäj narä, narä yunääza laani.

³⁹ Che rlajzreni niniaazrenini stehuält, laani biriini ladzñaareni.

⁴⁰ Dxejcti sääni, gubisacni nez stelaad gueu Jordán, nejzga huijia'nni, cadre gusloj batiobnis Juan.

⁴¹ Xhidajl bejn bidzujn lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

⁴² Xhidalduxhreni huililajz xtiidxni ro'c.

11

Gujt Larz

¹ Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart.

² Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcn.

³ Ni'cni baxhał guiro'p bäljre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcälrnibee Dios. Te guluilojza yälracxhuure xcälrnibee Xi'n Dios.

⁵ Sanälajz Jesús Mart, bäljni, näjza Larz,

⁶ che räjpreni lojni cayacxhuu Larz, bia'nni stio'p dxej cadre yu'ni.

⁷ Dxejcti räjpni loj rexpejn pacni:

—Colcho', chonnu stehuält región Judea.

⁸ Räjpx rexpejn ni lojni:

—Mastr, gajď gac xchej rlajz rexpejn Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

⁹ Dxejcti räjp Jesús lojreni:

—¿La xhet tzubitio'p orđi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre.

¹⁰ Palga chasajni guxhijn, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejc räjp rexpejn pacni lojni:

—Dad, palga agudiesni, pet siajcn.

¹³ Jesús canii lojreni agujt Larz, niluxh rexpejn pacni bejn xhigab caniini xcuent yälrejs xten bacaltis.

¹⁴ Ni'cni guniliipac Jesús räjpni lojreni:

—Agujt Larz.

¹⁵ Rbalazä sa'csi rutinu ro'c, te chalilajztu xtidxä. Colcho' te chohuiinuni.

¹⁶ Dxejcti Tomás ni rniizareni “cua'ch”, räjpni loj resa'ni:

—Colcho' te guetnăzanuni.

Jesús najc yälrbansac lo yälgujt

17 Che bidzujn Jesús lo guejdxga, agujc tajp dxej biga'tz Larz.

18 Guedx Betania tre' gajxh lo guedx Jerusalén, si'cti tio'p garol kilómetro.

19 Xhidajl rexpejn Israel abidzujn, siädhuiireni Mart, näjza Marii, te di gac-huin lajzreni sa'csi gujt bisiajnreni.

20 Che gucbee Mart abidzujn Jesús, biriini huichaglojnini; niluxh Marii bia'n rolijzreni.

21 Dxejcti räjp Mart lo Jesús:

—Dad, paru suga'lu ree, di bisianä niejt.

22 Narä nanä suniidx Dios guiraa nani guiniablu lojni.

23 Jesús räjpni lojni:

—Sibansac bisiajnlu.

24 Räjp Mart lojni:

—Acananä sibansacni che guidzujn dxej ni guibansac bejn loj rebengut dxej lult che gun Dios yälguxhtis.

25 Dxejc räjp Jesús lojni:

—Narä nacä yälruspansac bejn loj rebengut, näjza yälhabajn par tejpas. Nani rililajz rextidxä, masä agujt, sibansacni.

26 Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

27 Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhał Dios lo guedxliujre.

Biin Jesús cuä' xpaal Larz

28 Che guluux gunii Mart, huitejdxni bäjlni Marii, xhiga'tz räjpni lojni:

—Abidzujn Mastr. Cabejdxzani luj.

29 Che biejn diajg Marii rediidxga, huisugajcni, sahuuini Jesús.

30 Gajd Jesús jiu' guejdxga, laltis suga'ni cadro bidxaagni Mart.

31 Rexpejn Israel nani biädcuenäj Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

32 Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

33 Che bahuii Jesús cayoon Marii, näjza rexpejn Israel ni siädnajl Marii, gac-huin lastooni, biääd te rsliajz lastooni.

34 Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te filu.

35 Dxejcti biin Jesús.

36 Ni'cni cayäjp rexpejn Israel:

—Colhuii, lacti sanälajznini.

37 Yu'zareni räjp:

—Dade're basiajc beñ lotiä'p. ¿Xha di niajcdi nusiajcni bejnre te di niejtni, ä?

Gubansac Larz

38 Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni.

39 Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

⁴⁰ Dxejc räjp Jesús lojni:

—¿Et rniä lojlu, palga rililajztu, suhuiilu xcälrnibee Dios, ä?

⁴¹ Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä.

⁴² Narä nanä guliica rucuardiajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

⁴³ Che gulujx guniini rediidxga, guredxa'ni räjpni:

—¡Larz! ¡Gudaa ree!

⁴⁴ Dxejc birii bengutga nen biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

⁴⁵ Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús.

⁴⁶ Yu' reni huihuii loj rexpejn Israel ni laa farisee, bijreni diidx xhi bejn Jesús.

⁴⁷ Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzareni:

—¿Xho jiennu? Niguiire cayujn xhidajl milagwr.

⁴⁸ Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlzareni lajdxnu.

⁴⁹ Dxejc Caifás, bixhojzro ni riäjil gunibeeni lo rebixhojz ijzga, räjpni lojreni:

—La'tu xhetliidi najnditu.

⁵⁰ Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹ Niluxh Caifás dini ninii diidxre xcuentcani. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel.

⁵² Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre.

⁵³ Ni'cni dxejliga bachaag rebejnnga diidx te don xho gunreni gugu'treni Jesús.

⁵⁴ Ni'cni diru Jesús nisij nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejn pacni.

⁵⁵ Guxii dxej cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw.

⁵⁶ Cansajreni caguilreni Jesús; che yu'zareni nen guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷ Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

12

Gudääb te gunaa se't ni' Jesús

(Mt. 26:6-13; Mr. 14:3-9)

¹ Che riäädx xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebeñgut.

² Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex.

³ Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxejcti. Guideb neñ yu'ga gulanejxh se'tga.

⁴ Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, räjpni:

⁵ —¿Xhicuent di se'tre nido' choñ gayuu denar te nidis meelga loj rebeñproob? (Choñ gayuuga najc si'cti ni xca' te niguii paru gunni dzuun tzubiteb bäii.)

⁶ Guniini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadre ruchee meel, luxh rbääni meel lojga te rca'nini.

⁷ Ni'cni räjp Jesús lojni:

—Na'c gudxojn luni; subasälxgaanini, che gajd guidzujñ dxej nani guiga'tzä.

⁸ Dxej-yääl yu' rebeñproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejc che gucbee xhidajl xpejn Israel yu' Jesús rolijz Larz ni gubañsac lo rebeñgut, bidzujñreni, xhet xcuentis Jesús. Biädreni te fizareni loj Larz nani baspañsacni lo rebeñgut.

¹⁰ Dxejcti rebixhojz ni rnibee bachaagzareni diidx te ju'tzareni Larz,

¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yääl, rebejn xhidajl ni bidzujñ lanij biejn diajgreni asiäddzujñ Jesús guedx Jerusalén,

¹³ dxejcti batiu'reni naa reyagzijñ, biriireni neñ guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siäd xcuent Dad nani najc rei lo rexpejn Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejn ni rbäjz neñ guedx Sión.

¡Colhuii! Reii xtentu asiäd, bijbni dejt te burbäz.

¹⁶ Di rexpejn pacni niacbee recosga che gujcreni, niluxh che gubañsacni loj rebeñgut, dxejc banaj lajzreni recos nani caj lo guijtz xcuentni, näjza guiraa recos ni bejn rebejn lo Jesús te guzojb rediidxga.

¹⁷ Rebeñ xhidajl ni suganäjni che gurejdxni Larz te biriini neñ baa che baspañsacnini lo rebeñgut, bizareni diidx xcuent guiraa ni bahuiireni.

¹⁸ Ni'cni biädchagloj rebeñ xhidajlgani, sa'csi abiejñ diajgreni laani bejnmi milagwre.

¹⁹ Ni'cni räjp refarisee lo sa'reni:

—Aruhuiitu xhet sajcdi jieñnu. ¡Colhuii! Empac sanajl guideb guedxliujni.

Riädtil regriegw Jesús

²⁰ Yu' gaii beñgriegw nadxaag lo rebejn ni biädted lanij guedx Jerusalén.

²¹ Rebejnre bidzujn loj Felipe nani siääd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biääd Felipe, räjpni loj Andrés, dxejcti guiro'preni huiye'tzreni lo Jesús.

²³ Dxejcti räjp Jesús lojreni:

—Abidzujn or ni chä'p xpala'n Xi'n Dios ni gujc Niguui.

²⁴ Rniliäpac lojtu, palga di te xob binij jiajb lo yuj, nen xhurc cadre cueni, te rianxtebni, guetni, dini guiliejn. Luxh palga guetni, siliejnni, rajcza te nisro lojni, rajc xhidajl xob binij.

²⁵ Nani sanälajz xcäl'nabajnni, sunijtnini, luxh nani rbälaz xcäl'nabajnni lo guedxliujre, sica'ni yäl'nabajnni par tejpas.

²⁶ Palga yu' chu tej ni rlajz chu loä, sujiädnajlni xnezyuä, te cadre yu'ä, ro'cza cuäaz ni ru' loä. Palga yu' chu gun xtzunä, siliä'pza Xtadä xpala'nni.

Rnixgaa Jesús guetni

²⁷ Räjpszani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre.

²⁸ Xtadä, bejn si'cni riäjl gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

³⁰ Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini.

³¹ Naj abiääd xcäl'guxhtis Dios lo guedxliuj. Naj sibicaj xcäl'rnibee nani rnibee lo guedxliujre.

³² Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni.

³⁴ Räjp rebejn lojni:

—Nuure biejn diajgnu bil'reni lo leii, Crist ni jiääd sibajnni par tejpas. ¿Xho mood rniilu, nanab chäs Xi'n Dios ni gujc Niguui jiaa lo guedxliuj? ¿Chuxhni'c najc Xi'n Dios ni gujc Niguui ni ruzä'tlu?

³⁵ Dxejcti räjp Jesús lojreni:

—Stera'tsi yu' bianij lojtu. Col'saj laj ni rajptu bianijga, te di guiniaaz yäl'xcäjä la'tu, sa'csi ni rsiaj loj nacäjä, dini gan caro chääni.

³⁶ Laļ ni rajptu bianij, col'chalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzlojni.

Xhicient di rexpejn Israel nililajz xtidx Jesús

³⁷ Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhaļ Dios lojreni.

³⁸ Ni'cni guzojb diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcäl'rnibeduxhlu, ä?

³⁹ Ni'cni di niajcdi nililajzreni, sa'csi guniiza Isaías, räjpni:

⁴⁰ Abascäjyni lojreni,

abennajdni lastooreni,

te di rebalojreni fi,

te di lastooreni gacbee,
te di gusiejch lajzreni,
te di gusiäcäreni.

⁴¹ Rediidxre gunii Isaías, sa'csi bahuini xcälrdimbicha' Jesús xhaguibaa, dxejc guniini xcuentni.

⁴² Dxejcti gaii rebejn ni rnibee huililajz xtiidxni che räjpni abaxhal Diosni, niluxh bidxejbreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni nen guidoo.

⁴³ Sa'csi rdxaglajzruren guiliä'p rebejn xpala'nreni luxh guxiiru rlanjreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtadä nani baxhal narä rililajzni.

⁴⁵ Nani ruhuii loä, ruhuiizani loj ni baxhal narä.

⁴⁶ Narä biälä si'c bajl lo guedxliujre, te guiraa renani chalilajz xtidxä, diruren chu lo yälcäy.

⁴⁷ Nani riendiajg xtidxä, luxh dini gusoob rediidxga, dina gunä yälguxhtis lojni, sa'csi dina niälä te gunä yälguxhtis reben guedxliuj, biälä te guslää reben guedxliuj lo dojl.

⁴⁸ Nani rbälaz narä, ni di gusoob xtidxä, yu' chu gun yälguxhtis xtojlni; lagajc rediidx nani guniä gun yälguxhtis xtojlni che gal lult dxej.

⁴⁹ Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä.

⁵⁰ Luxh nancheä gunibeeni chu yäl nabajn par tejpas. Ni'cni rediidx nani rniä, rniäreni si'cpacni gunii Xtadäni loä.

13

Jesús gudiibni ni' rexpejnpacni

¹ Che gajd gal dxe lanij ni laa pascw, najn Jesús asiäddzungajxh xorni, or ni jiunejzni lo guedxliujre te chääni lo Xtadni. Luxh sa'csi agajc sanälajzni rexpejnpacni nani yu' lo guedxliujre, sinälajzanireni par tejpas.

² Ni'cni lal ni cayauxchejreni biu' bendxab nen lastoo Judas Iscariote, xi'n Simón, te guto'ni Jesús.

³ Sa'csi agucee Jesús abateed Xtadni guira'ti ladzñaani, gucbeezani loj Dios biriini, lo Dios guibi'zani,

⁴ ni'c huisu Jesús lo xchejga, gulääni xhablojiaani, gudojbni te tuäii, batejb-nini xque'ni.

⁵ Dxejcti cua'ni nis nen te chaa, guslojni gudiibni ni' rexpejnpacni, baspijdzni ni'reni con tuäiiga.

⁶ Che bidzujni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷ Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

⁸ Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

⁹ Räjp Pedr lojni:

—Dad, na'c quiiblu ni'ätis näjza nää näjza yecä gudiib.

¹⁰ Räjp Jesús lojni:

—Nani agojz di guiquiin gzasacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajnni chu guto'ni, ni'cni guniini: “Xhet guiraaditu naya.”

¹² Ni'cni che gulujx gudiibni ni' rexpeljnni, gotsacni xhajnbn, guresacni lo mex, räjpni:

—¿La najntu xhini'c benä lojtu, ä?

¹³ La'tu rniitu narä, Mastr näjza Dad. Luxh laaca rniitu sa'csi nacäni.

¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjł quiibtu ni' resa'tu.

¹⁵ Sa'csi abaluiä lojtu xho gacni, te chanuu guntu sigajc ni benä lojtu.

¹⁶ Rniliä, rniliäpac lojtu, di te mos gac beñroru lo xlamni; diza te ni rij xmandaad beñ gac beñroru loj nani baxhalni.

¹⁷ Palga najntu recosre, chicbaazatu palga si'c guntu.

¹⁸ Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzni. Scree najc rediidxga: “Nani rajw xcuxtilä, ni'c agubiréni, agulälazni narä.”

¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä.

²⁰ Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhal narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guc-huinuxh lastooni, dxejc guniliini:

—Rniliä, rniliäpac lojtu, tejtı suto' narä.

²² Dxejc gusloj cadxeloj rexpeljnni lo sa'reni, di jien chuchani'c cagusä'tni.

²³ Tej rexpeljnni nani sanälajzruni sobga' cuä'ni.

²⁴ Dxejcti bejn Simón Pedr seen lojni te guiniabdiidxni loj Jesús chu xcuent caniini.

²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlajzlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c.

²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj rebeñ ni xhet rajpdi.

³⁰ Che gudajw Judas yätxtiilga, birigajcni, luxh abiu' guxhijn.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguui, luxh lojni sienloj xcälrnibee Dios.

³² Palga suluiloj Xi'n Dios ni gujc Niguui xcälrnibee Dios, dxejc suluilojza Dios xcälrnibee Xi'n Dios ni gujc Niguui, luxh siojb gunnini.

³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpelj Israel si'cza rniä lojtu naj: Di gacdi jiäädıu cadre cha'a.

³⁴ Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu.

³⁵ Palga rinälajz sa'tu, si'c sacbee guiraa benguedxliuj najcpactu rexpēnā.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnajllu narä naj; niluxh sidzujn dxej jiäädlu ro'c.

³⁷ Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgahi cuedxa' choñ huält, säjblu dilu gumbee najrä.

14

Jesús najc nezyuj lo Dad

¹ Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä.

² Yu' xhidalduxh yu' cadre rbäyz Xtäädä. Palga xhet si'c di najcni, dizana niniä lojtu si'c. Sia'ä chasucheä reyu' par la'tu.

³ Luxh palga chasucheä cadre cuääztu, che guluxäni, sibisacä, te chanäätu ro'c, te cadre yu'ä, ro'cza chutu.

⁴ La'tu anajntu caro cha'ä, anajnzatu nezyuj ni chäätu.

⁵ Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

⁶ Räjp Jesús lojni:

—Narä nacä nezyuj. Narä nacä didxliipac, nacäza yäl nabajñ. Por narätis sajc chää bejn cadre rbäyz Xtäädä.

⁷ Palga la'tu niembeetu chuni'c nacä, niembeezatu Xtäädä. Luxh najli abiembeepactuni sa'csi acahuiitu lojni.

⁸ Räjp Felipe loj Jesús:

—Dad, basaan guihuiinu loj Xtäädlu; ni'ctis rlaaznu.

⁹ Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtäädä. ¿Xhicuent rniablu fiilu lo Xtäädä, ä?

¹⁰ ¿La dilu chalilajz najrä yunää Xtäädä, luxh Xtäädä yunäjzani narä, ä? Rediidx nani rniä dina guiniäni lagajc xcuentä, sa'csi Xtäädä ni yunäj narä laani rujn lagajc rextzuunni.

¹¹ Colchalilajz xtidxä, che rniä narä yunää Xtäädä, luxh Xtäädä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä.

¹² Rniliäpac lojtu, nani chalilajz xtidxä, sajc gunni redzuun nani runä, luxh sujnni dzunroru sa'csi sia'a cadre yu' Xtäädä.

¹³ Luxh guiraa ni guiniablu lo Xtäädä xcuentä, narä sunäni, te guluiloä xcälrnibee Xtäädä.

¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dxi

¹⁵ Räjpszani:

—Palga sanälajztu narä, susoobtu xtidxä.

¹⁶ Dxejc siniabä lo Xtäädä, te guniidxni stee nani gacnäjtü te chunäjni la'tu par tejpas.

¹⁷ Nalajznu, Xpriet Dxi xten Dios, ni rnili. Di gacdi xca' reben guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni nen lastootu.

¹⁸ Dina gusanbisiäbä la'tu; sibisacä jiädhuiä la'tu.

¹⁹ Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu.

²⁰ Nen redxejga, dxejc sabeetu yunää Xtradä, la'tu yunäjtu narä, luxh narä yunääza la'tu.

²¹ Nani numbee Xtradä, nani rusobza xtidxä, ni'c ruluiini sanälajzpacni narä. Luxh Xtradä sinälajzza nani sanälajz narä, näjza narä chanälazä bejnga, luxh suluiloä lagajc narä lojreni.

²² Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxliujdi, ä?

²³ Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jio-pläznäänuni guiro'pnu Xtradä.

²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxadini; xtidx Xtradäni ni baxhal narä.

²⁵ 'Caniä guiraa rediidxre lojtu lajni yu'ä lojtu,

²⁶ per Sprit Dxi xten Dios nani jiädyacnäjtu, nani guxhal Xtradä xcuentä, laani suluini lojtu guira'ti, näjza susnajni lajztu guiraa rediidx nani aguniä lojtu.

²⁷ Yälrbecdxilajz rusa'nä lojtu, xcälrbecdxilazä runidxä lojtu, et si'cdini runidx guedxliujdi najc nani runidxä lojtu. Na'c chutu yärsia', na'cza guidxejbtu.

²⁸ Abiejn diajgtu ni guniä lojtu: Sia'ä luxh siälsacä lojtu. Paru ninälajzfactu narä, sibalajztu xcuentä che guniä sia'ä lo Xtradä, sa'csi Xtradä najc beñroru loä.

²⁹ Scree agunixgaäni lojtu, te che soobni, dxejcru chalilajztu xtidxä.

³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä;

³¹ riäjil gac recosre te gacbee reben guedxliuj sanälazä Xtradä, rusobäza xtidx Xtradä, runä nani gunibeeni. Colchastie, colcho' jiunejznu ree.

15

Jesús najc si'c te yaguub

¹ Rāpzani:

—Narä nacä si'c te yaguub. Xtradä najc si'c nani rusuj yajgga.

² Rebejn najc si'c reṇaa yajgga. Guiraa reṇaa yajgga nani xhet cajdi lojni rutiugni. Luxh guiraa reṇaa yajgga ni caj ninejxh lojni, rusianini te xcajru ninejxh lojreni.

³ La'tu anajctu beṇnaya xcuent rediidx nani aguniä lojtu.

⁴ Colguibaṇṇäj narä, sigajc ni nabaṇṇää la'tu. Digacdi xcaj ninejxh lo te ṇaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c reṇaa yajgga. Nani riannäj narä, naräza riannäänäni, ni'c sajc runduxhni xtzunä, sa'csi che guibicajni loä, xhet sajcdi gunni.

⁶ Nani di chupac loä, sibicajni si'c reṇaa yajg nani rdin sa'csi xhetru rcajdi lojni, dxejcti rbijdzni, rusäl bejnreni lo däj te checni.

⁷ 'Palga chupactu loä, palgaza chupac xtidxä lastootu, colṇab nani rlajztistu, luxh narä sunidxäpacni.

8 Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtadä, Dios.

9 Si'cpacni sanälajz Xtadä narä, sigajcza sanälazä la'tu. Colchanuu lo xcälrinälazä.

10 Palga jiutu rextidxä, sinuutu lo xcälrinälazä, sigajc ni abasobä xtidx Xtadä, luxh rinuä lo xcälrinälajz Xtadä.

11 'Rniä rediidxre lojtu te guibalaznäjtü narä, te si'c guibalazduxhpactu.

12 Dee najc diidx ni rnibeä guntu: colchanälajz sa'tu si'cni sanälazätu.

13 Xheti te yälsanälajz ni guroobru lo yälsanälajzre, gudeed te bejn xcäl'nabajjni, guetni lacuaa resa'ni.

14 La'tu najctu resa'ä palga gusoobtu diidx nani guinibeä guntu.

15 Diruna cuälää "mos" la'tu, sa'csi di remos gan xhi rujn xlamreni. Luxh narä agulälää la'tu "rexamigwä", sa'csi guira'ti rediidx ni biejn diagä lo Xtadä aguniäza rediidxga lojtu.

16 Et la'ditu gule narä, narä guleä la'tu. Guleä la'tu te guntu xtzun Xtadä, te na'cza nitloj dzuunga. Te guira'tiza nani guiniabtu lo Xtadä por laä, ni'cza guniidxni lojtu.

17 Dee rnibeä guntu: colchanälajz sa'tu.

Rbälaz rebejn guedxliuj Jesús näjza rexpejni

18 'Palga cuälaz reben guedxliuj la'tu, anajntu agulälazxgaareni narä.

19 Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtadä, ni'cni rbälaz reben guedxliuj la'tu.

20 Colsnaj lajztu diidx nani guniä lojtu, 'di te mos gac beñroru lo xlamni'. Palga basacsireni narä, susacsízareni la'tu. Palga rusoobreni xtidxä, suoobzareni xtiidxtu.

21 Guiraa recosre sunnäjreni la'tu xcentä sa'csi direni gumbee nani baxhal narä.

22 'Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojreni.

23 Nani rbälaz narä, rbälazzani Xtadä.

24 Palga dina niunä nez lojreni remilagwrro, sa' nani rutru rajcni rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtadä.

25 Bejnreni si'c te guzojb diidx nani cuaj lo guijtz agujc xchero: "Gulälazreni narä, luxh xhetlidi benä."

26 'Che jiäd nani gacnäj la'tu, laani sinii xcuentä, chu nacä. Laani najc Sprit ni yu' lo Xtadä, siniini didxlii. Narä suxhaläni lojtu; lo Xtadä guiriini jiädni lojtu.

27 Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

16

1 'Rediidxre rnixgää lojtu, te didi yu' xhi gun jiajbtu te gunijttu lo xtidxä.

2 Sidzujn dxej sibääreni la'tu dirureni gusaan jiu'tu nen guidoro. Sidzujn or chutis ju't tejtü, suchaloni cayacnäjni Dios.

3 Guiraa recosre sujnreni sa'csi direni gumbeepac Xtadä, niclaza narä.

4 Agunixgää rediidxre lojtu, te che guidzujn orga sinaj lajztu xcuent rediidx ni guniä lojtu.

Redzuun ni rujn Sprit Dxaan xten Dios

'Dina niniä rediidxre lojtu che gusloä cagusule'ä diidx, sa'csi suganää la'tu.

⁵ Naj agojl guibi'ä loj nani baxhal narä, luxh nicla tejtü di guiniabdiidx: “¿Caro cháälu?”

⁶ Dxejc sa'csi aguniä recosre lojtu, ni'c cayac-huin lastootu.

⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaläni lojtu.

⁸ Luxh laani, che jiäädni lo guedxliujre, susanijni xcäriejn rebejn te gacheereni xcuent dojl, näjza xcuent xcäl'nabannaya Dios, näjza xcuent yälguxhtis xten Dios.

⁹ Guluiizani xcuent dojl lojreni sa'csi direni chalilajz xtidxä.

¹⁰ Guluiini xcäl'nabannaya Dios lojreni sa'csi sibisacä lo Xtääd, luxh dirutu fii loä.

¹¹ Guluiini xcuent yälguxhtis xten Dios lojreni sa'csi abejn Dios yälguxhtis loj bendxab nani rnibee lo guedxliujre.

¹² 'Yu' xhidajlru diidx rlazä guiniä lojtu, niluxh digacdi gacheetureni naj.

¹³ Che jiääd Sprit xten didxlii xten Dios, laani susanijni xcäriejntu te gacheetu guiraa redidxgulii, sa'csi dini guinii diidx xcuentcani, siniitisni ganax redidx nani gudeed Dios lojni te guiniini. Siniizani xcuent recos nani churu gac.

¹⁴ Laani siliä'pni xpala'nä sa'csi sica'ni xhixtenä, suluiinini lojtu.

¹⁵ Guiraa ni rajp Xtääd najc xtenä, ni'cni rniä suluiini xhixtenä lojtu.

Xcäl'rac-huin lajztu sibixloj ni yäl'rbalajz

¹⁶ 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtääd.

¹⁷ Dxejcti räjp rexpejnpacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtääd.

¹⁸ Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gachee xhini'c caniini.

¹⁹ Guchee Jesús xhini'c rlajzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä.

²⁰ Rniliäpac lojtu, la'tu soontu, niluxh reben guedxliujre sibalazduxhreni. Sac-huinduxh lastootu niluxh yäl'rac-huinre sibixhlojni yäl'rbalajz.

²¹ Te gunaa che gaal xi'nni, rdejdnı trabajw, dxejcti che aguyu' xi'nni, riäl lajzni gudejdnı trabajw, dxejc arbaa lajzni gojl xi'nni te niguii lo guedxliujre.

²² Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu neñ lastootu, luxh rut gacdi gudzucajdi yäl'rbalajzga.

²³ 'Neñ redxejga xhetiru xhi yäl'guiniabdiidxdi guntu loä. Rniliäpac lojtu, nani guiniabtu lo xtääd xcuentä, laani suniidxnini lojtu.

²⁴ Naj xhet canabdıtu xcuentä. Col'nabni, te xca'tuni, te guibalajztu.

Jesús, nani abejn gaan lo guedxliujre

²⁵ 'Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtääd.

²⁶ Neñ redxejga guiniabtu por laä. Luxh dizana guiniä siniabä narä loj Xtääd par la'tu,

²⁷ sa'csi lagajcza Xtääd sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj.

²⁸ Biriä lo Xtääd xhaguibaa, biälä lo guedxliujre, siunezäza lo guedxliujre, sibisacä lo Xtääd xhaguibaa.

²⁹ Räjp rexpejnpacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii.

³⁰ Naj sii gucheenu racbeelu guira'ti rexhicos, xhetru nanabdi guiniabdi idxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjɸ Jesús lojreni:

—¿La rililajzpacku naj, ä?

³² Asiäddzungenajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtadä suganäj narä.

³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijɸ lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejnɸacni

¹ Che gulujx guniini loj rexpejnɸacni rediidxga, guläsni lojni xhaguibaa, räjɸni lo Dios:

—Xtadä, abidzujn or; gulä'p xpala'n xi'nlu te guiliä'pza xi'nlu xpala'nlu,

² sigajc ni badeedlu lojni yälribee loj guiraa reben guedxliuj, te gac gudeedni yäl nabajn par tejpas lo guiraa renani badeedlu lojni.

³ Redee rajɸ yäl nabajn par tejpas; numbeereni luj ni najc tejtis GuebDios, näjza narä Jesucrist nani baxhallu lo guedxliujre.

⁴ 'Narä gulä'pä xpala'nlu lo guedxliujre, abaluxä dzuun nani baniidxlu gunä ree.

⁵ Naj Xtadä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ 'Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpacku najcreni, baniidxlureni loä, luxh rapdzu'tzreni xtiidxlu.

⁷ Naj agucbeereni guiraa rediidx ni guniä lojreni lojpacku siäädni.

⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

⁹ 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu.

¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pza'reni xpala'nä.

¹¹ 'Narä diruna jia'nä lo guedxliujre, laareni sia'nrureni lo guedxliujre. Luxh narä siälä lojlu. Xtadä ni najc Dxauro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab.

¹² Che guyunää'reni lo guedxliujre, gucnää con xtiidxlu guiraa renani baniidxlu loä, luxh nicla tejtreni di ninitloj, xtebtis nani gunijɸ te gusojb ni caj lo xtidx Dios.

¹³ 'Luxh naj sibilacä lojlu. Caniä rediidxre laɸ ni yu'ä lo guedxliujre, sa'csi rlazä guibaa lajzreni si'c ni rbaa lazä.

¹⁴ Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre.

¹⁵ Dina guiniabä cuäälureni lo guedxliujre, rniabä gudzucajlureni loj bendxab.

¹⁶ Direni gac bejn guedxliuj, sigajc ni dizana gacä narä bejn guedxliuj.

¹⁷ Basyareni con xtiidxlu, sa'csi xtiidxlu najc didxguliipac.

18 Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj.

19 Xcuentreni rudedä lagajc narä, te näj laareni gacnayareni con xtidxguli-
ipaclu.

20 Dina guiniabä xcuent laatisreni, rniabäza xcuent guiraa renani churu
chalilajz xtidxä ni gusule'reni.

21 Rlazä gun guiraareni tejsi xhigab, sigajc ni rujnlu, Xtadä, si'c runäza;
te sigajc ni yu'äza con luj, sigajcza churenä con nuurnu, te gacbee reben
guedxliuj luj baxhallu narä.

22 Yälrnibee ni baniidxlu loä, lagajc yälrnibeega badedä lojreni te gunreni
tejsi xhigab, si'cni riennu tejsi xhigab.

23 Narä cayunnääreni dzuun, luj cayunnäjlu narä dzuun, te jiennu tejsi
dzuun, te gacbee rebejn guedxliuj luj baxhallu narä, luxh sanälajzlureni si'cni
sanälajzzalu narä.

24 'Xtadä, guiraa renani baniidxlu loä, rlazäza churenä cadro chuä xh-
aguibaa, te fiireni xcälrnibeä nani baniidxlu, sa'csi huinälajzlu narä galooli
che gajdli guirixtiej guedxliujre.

25 Xtadä ni rujn cossa'tis, di rebejn guedxliuj gumbeelu, luxh narä num-
beälu, luxh redee agucbeezenä luj baxhallu narä.

26 Aräpä lojreni chu najclu; säpäzaru lojreni te chu yälsanälajz sa' ni rajplu
par narä neñ lastooreni, te cuäzäza neñ lastooreni.

18

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

1 Che gulujx gunii Jesús rediidxga, huinäni rexpejn pacni dejtz gueu Cedrón.
Ro'c yu' xhiroob yuj cadro sojb guiraloj reyajg. Ro'c biu' Jesús näjza rex-
pejn pacni.

2 Anajn Judas, nani guto' Jesús, caro rij Jesús con rexpejn pacni sa'csi si'csi-
si'c rdxaaag sa'reni ro'c.

3 Dxejcti Judas, che biääd lojni te cuaa soldad roman, näj rebixhojz ni
rnibee, näjza refarisee, huinätinireni ro'c, ca'reni balgued näjza lintern, näjza
spaad näjza lans.

4 Ni'cni Jesús, sa'csi ananxgaani xhini'c sacni, gubigni lojreni, räjpni lojreni:
—¿Chu rguiltu?

5 Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnirenä.

6 Che gunii Jesús lojreni: “Laa naräni”, biäxhanrenä, biajbrenä lo yuj.

7 Dxejcti gunabdidxsac Jesús lojreni:

—¿Chu rguiltu?

Dxejc räjpzarenä stehuält:

—Jesús nani siääd guedx Nazare't.

8 Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

9 Guniini rediidxga te gusojb rediidx nani guniini che räjpni: “Loj guiraa ni
baniidxlu, nicla tejni di ninijt.”

10 Dxejcti Simón Pedr, sa'csi ca'ni te spaad, guläänini, batiuugni diag ladbee
xten xmos bixhojzroga. Laj mosga najc Malco.

11 Dxejcti räjp Jesús lo Pedr:
—Guluchee spaad xtenlu neñ xpaguinni. ¿La dina tedä trabajwduxh nani agunibee Xtaädä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

12 Dxejcti resoldaadga näjza comandant, näjza reguxhtis ni rnibee rexpejn Israel, gūnaazreni Jesús baliibrenini.

13 Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz.

14 Caifás najc nani baliidx rexpejn Israel nanab guet te niguii xcuent rebeñguejdxga.

Cadro gunii Pedr dini gumbée Jesús

(Mt. 26:69-70; Mr. 14:66-68; Lc. 22:55-57)

15 Simón Pedr näjza stee xpejn pacni huinajł dejtz Jesús. Luxh numbee bixhojzro bejnga, biunäjzani Jesús lo xle' bixhojzro.

16 Bia'nti Pedr rolä'ga. Dxejc birii xpejn pac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga.

17 Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn pac Jesús, ä?

Räjp Pedr loj gunaaga:

—¡Xho gacäni!

18 Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

Bixhojzro cayujñ yälgunabdiidx lo Jesús

(Mt. 26:59-66; Mr. 14:55-64; Lc. 22:66-71)

19 Dxejcti gusloj cayujñ bixhojzro yälgunabdiidx loj Jesús xcuent chuni'c najc rexpejn pacni näjza xcuent xhini'c ruluini.

20 Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadre re' guiraa rexpejn Israel, nicla tej diidx dina ninixhiga'tzädi.

21 ¿Xhicuent cayujñlu yälgunabdiidxga löä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

22 Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

23 Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu löä?

24 Dxejcti guideb naliibni baxhał Anásni lo bixhojzro lo ni laa Caifás.

Gunisac Pedr dini gumbée Jesús

(Mt. 26:71-75; Mr. 14:69-72; Lc. 22:58-62)

25 Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn pac niguiiga, ä?

Badzu'ni diidxga räjpni:

—¡Xho gacäni!

26 Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

27 Dxejcti räjp Pedr stehuält:

—Nicla gumbeäni.
Cuantis guniini si'c, guredxagajc te guidgäi.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸ Dxejc birinäjreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw.

²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰ Dxejcti räjpreni lojni:

—Paru di niguiire niajc te beñ latsiaj, dinu niopnäni ladzñaä guejblu.

³¹ Räjp Pila't lojreni:

—Colchanäni, colhuii xho gunnäjtuni yälguxhtis con lagajc xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

³² Guniireni si'c te guzobj diidx nani gunii Jesús xcuent xho guetni.

³³ Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn Israel, ä?

³⁴ Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

³⁵ Dxejcti räjp Pila't lojni:

—¿Xhixh näj narä nacä te xpejn Israel? Lagajc rebeñ lajdxlu näjza rebixhojz bateedlu ladzñaä. ¿Xhi bejnlu?

³⁶ Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpenä te di tedä ladzñaä rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

³⁷ Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuadajgreni xtidxä.

³⁸ Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtojñ bejnre.

³⁹ Niluxh la'tu rajptu te costumbr, casob lani pascw, ruslaanu te bejn ni yu' neñ latzguib. ¿Xhi najtu? ¿La rlajztu guslaä ni najc reii xten rexpejn Israel, ä?

⁴⁰ Dxejcti guiragajcreni guredxa', räjpreni:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

19

¹ Ni'cni gunibee Pila't gudijnreni Jesús con duu ni yu' guechguib lojni.

² Bejn resoldaad te coronguejch, bazarrenini yejc Jesús. Dxejcti bahua-jcwrenini te ladmoraad.

³ Dxejcti gusloj gubigreni lojni, te räjpreni lojni:

—¡Gubajn par tejpas Reii xten rexpejn Israel!

Dxejc huääzreni lojni.

⁴ Dxejcti birisac Pila't, räjpni lojreni:

—¡Colhuii! Acabääni nez lojtu, te gacbeetu dina guidxäl nicla tej xtojlni.

⁵ Dxejcti birii Jesús nez lojreni, yu' coronguejch yejcní, najcwzani lad-moraadga. Dxejcti räjp Pila't lojreni:

—¡Colhuii! ¡Aree niguiire!

⁶ Ni'cni, che bahuii rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojlni.

⁷ Dxejcti räjp rexpejn Israel lo Pila't:

—Nuurnu rajpnu te leii, luxh xcuent leiiiga, nanab guetni sa'csi najni najcni Xi'n Dios.

⁸ Che biejn diajg Pila't rediidxga, bidxejbruni,

⁹ biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

¹⁰ Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

¹¹ Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

¹² Ni'cni gudiil Pila't xho nuslaani Jesús, niluxh rexpejn Israel rbedxaduxhruni, räjpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xcontraar César.

¹³ Che biejn diajg Pila't rediidxre, gulääni Jesús, dxejcti gurej Pila't lo yagxhiil cadre rujnni yälguxhtis, cadre laa Litóstroros con didx-griegw sälojni naga' guisa'c, con didx-hebreo laani Gabata.

¹⁴ Najcni dxej vispr lani pascw, si'cti läidxej, dxejcti räjpni loj rexpejn Israel:

—Colhuii, aree xreiiitu.

¹⁵ Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaä xreiiitu lo cruzj, ä?

Dxejcti räjp rebixhojz ni rnibee lojni:

—Rutru reiiidi rajpnu, Césartis najc xreiiinu.

¹⁶ Ni'cni bateed Pila't Jesús lojreni te chacuaarenini lo cruzj.

Che bacuaarenini lo cruzj

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nuuni xcruzjni, cheni bidzujnlireni te lajt ni laa lajt xten Calabeer, con didx hebreo laani Gólgota.

¹⁸ Ro'c bacuaarenini lo cruzj. Bacuaazareni tio'p niguii lo stio'p cruzj, tejgani te laad cuä' Jesús.

¹⁹ Dxejc bacuaa Pila't diidx ni chää yejcxruzjni; rediidxga najc scree: “Jesús, beñ Nazare't, Reii xten rexpejn Israel.”

²⁰ Xhidajl bejn bil diidx ni caj yejcxruzjni, sa'csi lajt cadre bacuaarenini lo cruzj najc gajxh ro' guejdxga, luxh didx hebreo, diidx griegw, näjza didx latin bacuaareni rediidxga.

21 Dxejcti räjp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

22 Dxejcti räjp Pila't lojreni:

—Nani abacuaá, abacuaá. Si'c jia'nni.

23 Dxejcti resoldaad, che gulujx bacuaareni Jesús lo cruzj, cua'reni rexb-ablojiaani bejnrenini tajp la', te cade tejreni cua'reni te la'ni. Luxh yu' stee xhajnbi ni laa tunica, nadijbni, guejnni hasta lo yuj guc-cheeni.

24 Ni'cni räjpreni lo sa'reni:

—Na'c guitiäjnuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadre caj scree: “Batiäjsreni xhablojiaä; yejca xhabä ni bia'n gudzujtreni daad.”

Ni'cni bejn resoldaad recosre.

25 Niluxh cuä' xcruz Jesús suga' xnanni, con bäjl xnanni, ni laa Marii chääl Cleofas, näjza Marii Magdalen.

26 Che bahuii Jesús loj xnanni, dxejc bahuiizani loj xpejn pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlu!

27 Dxejcti räjp Jesús loj xpejn pacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejn pacni xnan Jesús rolijz pacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

28 Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

29 Ro'c suga' te guejs vinagr, nenga bahuaidxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni.

30 Che gulujx gu' Jesús vinagra, räjpni:

—Agulujxni.

Dxejcti basajb yejcn, baslaani xaimni.

Xhi bejn te soldaad lo Jesús

31 Dxejga najc dxe vispr xte lani pascw, che ru' mandaad par lanijga. Rexpejn Israel di rlanjreni nia'n rebejn ga lo recruzj, sa'csi dxe sabdga najc dxej ni rusilajzreni. Ni'cni gunabreni lo Pila't guxhalni chu qui'ch ni'reni te guetreni, te jiäjtreni loj recruzj.

32 Dxejcti bidzujn resoldaad, gudi'chreni guiro'p ni' nani caj te laad, sigajca bennäjreni stee ni caj ste laadga.

33 Che gubigreni lo Jesús, bahuiireni alagujtni, direni nigui'ch ni'ni.

34 Tej soldaadga baqui'tzni te lans ro' xcustiini, dxejc bixe' rejn näjza nis.

35 Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni.

36 Sa'csi si'c gujc guira'ti, te guzobj xtidx Dios cadre caj: “Nicla tej xtuzjtni di guech.”

37 Sigajca lo stee guijtjz caj diidxre: “Sidxelojreni loj nani biguijtz te lans.”

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

38 Che gulujx recosga, dxejcti huij José, te bejn Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj

Pila't te laani guiliätni Jesús lo cruzj. Cuäjbza Pila't, dxejc biääd José gulätni Jesús, sanätini togoolda.

³⁹ Näjza Nicodem biääd dxejc, nani galoo huininäj Jesús te guxhijñ. Biädnäni si'cti tiuu kil te dänejh ni najc si'c yaal ni laa mirra näjza áloes.

⁴⁰ Dxejcti cua'reni Jesús batejbrenini te la' lad lino, basälzareni däjga ni laa mirra con áloes, sa'csi si'c najc xcostumbr rexpejñ Israel che rucua'tzreni te togool.

⁴¹ Gajxh cadre cuaj Jesús lo cruzj, yu' te huert, neñ huertga yu' te bacoob si'c te biliää, cadre nicla tej bejñ gajd guiga'tz.

⁴² Sa'csi abidzujñ dxej vispr lani pascw xten rexpejñ Israel, luxh gajxh suga' biliäaga, nenga gudixhrene Jesús; si'c biga'tztini.

20

Gubansac Jesús loj rebengut

(Mt. 28:1-10; Mr. 16:1-8; Lc. 24:1-12)

¹ Primer dxej xten xmaanga, cäjru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guiñ ni suga' ro' baaga.

² Dxejcti ruxuñni gubi'ni te huiye'tzni lo Simón Pedr näjza lo stee xpejñpac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

³ Dxejc biriguxuñ Pedr näjza stee bejnga, huijreni nez lo baa.

⁴ Ruxuñ guiro'preni. Niluxh stee bejnga ruxuñduxhruni loj Pedr. Laani ganid bidzujñni lo baaga.

⁵ Dxejcti guretänni te bahuiini neñ ba-biliäaga. Bahuiini te laad naga' relajdtis nani bidejb Jesús, luxh dini niu' neñ baaga.

⁶ Dxejc bidzungejñ Pedr, biugajcni neñ baaga, bahuiini naga' relajdga te laad.

⁷ Bahuiizani lajd ni guyu' yejñni, ni'c nie'tni saru, naga'ni te laad.

⁸ Dxejcti biu' stee bejnga nani bidzujñ ganid. Che bahuiini neñ baaga, huililajzni gubansac Jesús.

⁹ Sa'csi gajdreni gacbee ni caj lo reguijtz, cadre caj nanab guibansacni loj rebengut.

¹⁰ Dxejc gubisac guiro'p rexpejñpacni rolijzreni.

Baluloj Jesús loj Marii Magdalen

(Mr. 16:9-11)

¹¹ Laltis suga' Marii cuä' baaga, cayoorni. Ni'cni lañ ni cayoorni, basajb lojni te bahuiini neñ baaga.

¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadre gojt yejñ Jesús, steeni nez cadre gojt ni'ni.

¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴ Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús.

¹⁵ Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsäni te chanääni.

¹⁶ Dxejcti räjp Jesús lojni:

—¡Marii!

Dxejc gubiré Marii, räjpni nen̄ xtidx hebreo:

—¡Raboni!

(Säloj diidxga “Mastr”.)

¹⁷ Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

¹⁸ Dxejcti huij Marii Magdalen, bidzujñni loj rexpejn̄pacni badeedni didx-coob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejn̄pacni

(Mt. 28:16-20; Mr. 16:14-18; Lc. 24:36-49)

¹⁹ Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn̄pacni, sa'csi rdxejbreni rexpejn̄ Israel. Chela bidzujñ Jesús, guzujni nez galäiireni, räjpni lojreni:

—Suchu yälrbexi lastootu.

²⁰ Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejn̄pacni che bahuiireni lo Dad Jesús.

²¹ Dxejc räjp Jesús lojreni stehuält:

—Suchu yälrbexi lastootu. Si'c ni baxhal Xtadä narä, si'cza ruxhalä la'tu.

²² Che gulujx guniini rediidxga, balejbni yejcreni, räjpni, lojreni:

—Suguibajn̄ Sprit Dxaan xten Dios nen̄ lastootu.

²³ Rextojl̄ rebejn̄ nani siällajztu, sibicajreni. Rextojl̄ rebejn̄ nani ditu jiällajz, siannäjreni redojl̄ga.

Tomás bahuii lo Jesús ni gubañsac

²⁴ Tomás, ni laaza Didimo, najcni te retzubitio'p xpejn̄pac Jesús. Rutini che biääd Jesús loj rexpejn̄pacni.

²⁵ Dxejcti räjp rexpejn̄pacni lojni:

—Abihuiinu loj Jesús, agubañsacni loj rebeñgut.

Dxejcti laani räjpni lojreni:

—Palga dina fiä loj reñaani cadro caj seen xten reclaab, palga dina guqui'tzä bicueñaä cadro guyu' claabga, guqui'tzäza ñaa cadro bixal cuä'ni, di lazä chalii gubañsacni loj rebeñgut.

²⁶ Che gudejd xhujñ dxej, tresac rexpejn̄pacni nen̄ yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yälrbexi lastootu.

²⁷ Dxejcti räjpni loj Tomás:

—Baqui'tz bicueñaalu ree loj patñaä, basälza ñaalu cuä'äre, na'c ractio'p lajzlu, huililajzpac gubañsacä loj rebeñgut.

²⁸ Dxejcti räjp Tomás lojni:

—¡Xtadä, Xtioozä!

²⁹ Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

Xhicuent bacuaani reguijtzre

³⁰ Xhidalroduxhru dzuun bejn̄ Jesús nez loj rexpejn̄pacni, nani di nicaj lo guijtz.

³¹ Redzuunre nani bejn Jesús nani cuaj lo guijtze cuajni te chalilajztu diidxe: Jesús najc Crist, nani cabäjz rebejn jääd, Xi'n Dios. Luxh che chalilajz te bejn xtiidxni, sajpni yälnabajn par tejpas.

21

Jesús baluilojni lo gajdz xpejn pacni

¹ Dxejcti baluiloj Jesús loj rexpejn ni ro' nisdoo ni laa Tiberias. Scree baluilojni lojreni.

² Nadxaag sa' rebejnre: Simón Pedr, Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejn pacni.

³ Dxejcti räjp Simón Pedr loj resa'ni:

—Chanazä bäj.

Räjpreni lojni:

—Näjza nuure chonnu.

Dxejcti sääreni, huä'preni nen te barcw. Guideb guxhijnga xhet bäjldi gunaazreni.

⁴ Che acayanij loj guedxliuj, suga' Jesús ro' nisdoo, di rexpejn ni niem-beeni.

⁵ Ni'cni räjp Jesús lojreni:

—Rexi'nä, ¿la xhet bäjldi rajptu, ä?

Räjpreni lojni:

—Xhet rajpdinu.

⁶ Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäj.

⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäj, dxejcti gutiäjsni lo nisdoo.

⁸ Sgaii rexpejn pacni biädnäreni rebarcwga sa'csi ameer guidzujnreni ro' nisdoo, si'cti tegayuu metrctis cayäädx. Siädnäzarenı guijxh guidxa rebäj.

⁹ Che bidzujnreni ro' nisdoo, bahuiireni re' guiboo, ro'c dzuub te bäj näjza yätxtiil cague'.

¹⁰ Dxejcti räjp Jesús lojreni:

—Coltanä gaii bäj nani entis gunaaztu.

¹¹ Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con chon bäj nen guijxhga, niluxh dini niräsyä' mase guyu' xhidalduxh bäj nenni.

¹² Dxejcti räjp Jesús lojreni:

—Coltaa te gauxharejntu.

Nicla tej rexpejn pacni dini niabdiidx lojni: “¿Chu luj?” sa'csi anajnreni laa Jesúsni.

¹³ Dxejcti cua' Jesús yätxtiil, badeedni lojreni, sigajcza rebäj.

¹⁴ Dee najc ni riojn huält baluilojni loj rexpejn pacni, che gubansacni loj rebengut.

Jesús rninäj Simón Pedr

¹⁵ Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

¹⁶ Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

¹⁷ Räpsacni lojni ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni chon huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä.

¹⁸ Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu beṅgool, susgaatislu ṅaalu te gushuajcw ste'ca bejn xhajblu, te chanäreni luj cadre di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuini loj stee xpejn̄ni, nani sanälajzru Jesús, siädnajni dejtreni. Lagajc bejn̄re ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?”

²¹ Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejn̄ga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴ Luxh bejn̄ga najc narä, xpejn̄ Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

²⁵ Yu'ru xhidalduxh dzuun ni bejn̄ Jesús. Palga gucuaanu guiralii redzuun ni bejn̄ Jesús, nicla lo guedxliujre di gal̄ chu reguijtz cadre xcajni.

Redzuun Rexpejn̄ Dios

Siääd Sprit Dxan xten Dios te cuääzni nen̄ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist nájza nani baluui Jesucrist, che guslojlini,

² hasta dxejli ni huäjsni xhaguibaa. Gunibexgaani xhini'c gun renani guleni gac xpejn̄pacni. Sprit Dxan xten Dios baluui Jesucrist xhi guiniini lojreni.

³ Gudejd Jesucrist trabajwduxh, dxejcti gujtni. Dxejc gubansacni lo rebengut, baluilojni lo rexpejn̄pacni. Tiuu dxej baluilojni loj rexpejn̄pacni balti huält te gacheereni agubansacni. Guniizani lojreni xcuent xcäl̄rnibee Dios.

⁴ Che gudejd tiuu dxejga, batojp Jesucrist rexpejn̄pacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räj̄pni:

—Dee abiejn diajgtu guniä lojtu.

⁵ Juan batiobnis con nis, luxh n̄aj guxii dxej cayäädx dxejcru siääd Sprit Dxan xten Dios te cuääzni nen̄ lastootu. Si'c guirobnistu —räj̄pni.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La n̄aj gudedsaclu yäl̄rnibee lo rexpejn̄ Israel, ä?

⁷ Dxejcti räj̄p Jesucrist loj rexpejn̄pacni:

—Di riäj̄l gacheetu xcuent redxej nájza retiemp nani abasobxgaa Dios con xcäl̄rnibeeni.

⁸ La'tu sica'tu yäl̄rnibee che abiääd Sprit Dxan xten Dios nen̄ lastootu. Dxejc chatie'chtu xtidxä nájza rextzunä nen̄ guedx Jerusalén, nen̄ guiraa reguedx Judea, nen̄ guiraa reguedx Samaria, nájza nen̄ guideb guedxliuj —räj̄pni.

⁹ Gulujxtis gunii Jesucrist rediidxga, luxh lal̄ni cahuii rebejn̄ lojni huäjsni xhaguibaa, sa'csi gurejdx Diosni. Dxejc biääd te za, biu'ni nen̄ zaga. Ro'cti diru rebejn̄ nuhiii lojni.

¹⁰ Lal̄ni cadxelodxi rebejn̄ xhaguibaa cadre gunitloj Jesucrist, tiop angl xten Dios ni najcw ladmol suga' gajxh cadre suga'reni.

¹¹ Dxejc räj̄p reangl loj rebejn̄:

—¿Xhi rajctu ben̄ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räj̄preni.

Gulereni Matías ni najc apostcoob

¹² Dxejc birii rebejn̄ yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajc sareni dxej ni rusilajzreni.

¹³ Che biu'reni Jerusalén, bidzujn̄reni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr nájza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, nájza Judas bejtz Jacoob.

¹⁴ Ro'c yu' guiraareni nájza regunaa nájza Marii xnan Jesucrist nájza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gajl̄ bejn̄. Dxejcti huisulii Pedr galäiireni, räj̄pni loj rebejn̄:

¹⁶ —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni.

17 Gujc Judas sa'nu, bejnzani lagajc dzuun ni biennu.

18 Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnne, badeedsacni meel lojnene. Gusiireni te la' yuj. Dxejcti lagajc Judas basäl duu guejnne, guzäbnajlne lo bej, gujtni. Gusaguijni, dxejcti biräjs xque'ni birii guiraa reziini.

19 Che biejn diajg rebejn Jerusalén si'c, gulälajreni yujre Acéldama, ni säloj yurejn.

20 Neñ guijtznä laa Salmos abacuaa toDavid rediidxre:

Sujianxteb rolijzni;

na'c cuääzru bejn rolijzni;

näjza:

Suxca'za ste'ca niguii xtzuunni.

21 Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni gyunäj Jesucrist nuunu,

22 dxejli ni gusloj batiobnis Juan hasta dxej ni huäjs Jesucrist xhaguibaa. Te gacnä niguiire nuunu gusule'nu diidx gubansacpac Jesucrist lo rebengut.

23 Dxejc gulääreni tiop niguii lojnene, tejne laa José Barsabás ni rbälajreni Justo, steeni laa Matías.

24 Gurejdx, gunabreni lo Dios, räjpreni:

—Dad, Dios, ni rachee lastoo guiraa rebejn, baluii loonu con ni najc niguii ni agulelu loj guiro'p niguiire,

25 te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

26 Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnä Matías stzubiteeb reapost te gujcreni tzubitio'p apost.

2

Biääd Sprit Dxan xten Dios

1 Che bidzujn dxej ni rajc lanij xten Pentecostés, tre' guiraareni tejsi lajt neñ te yu',

2 chela gusloj cayubej xhaguibaa si'c te beroduxh, bachajni guideb neñ yu' cadre suga'reni.

3 Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c.

4 Biu'ti Sprit Dxan xten Dios neñ lastoo guiragajcreni. Dxejc gusloj canireni garen-garen didxsaj si'ctisni badeed Sprit Dxan xten Dios guiniireni.

5 Neñ redxejga, xhidajl rexpejn Israel ni sasanäjpac xtidx Dios bidzujn guedx Jerusalén. Xhidajl lajt biriireni siäädreni.

6 Che biejn diajgreni guyubej beduxhga, bidojp reben xhidaalga, bachaag sa'reni. Rdxeloduxh reben xhidalga sa'csi cayejn diajgreni canii reapost xtidxsajpac cade tejreni.

7 Cadxelojreni räjpreni:

—¡Bahuilaa! ¿La et beñ Galileedi renani canii, ä?

8 ¿Xhoxh riejn diajgnu caniireni xtiidxpacnu si'ctis ni rniinu laadxnu, ä?

9 Najcnu beñ nación Partia, beñ nación Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia.

10 Najczanu beñ distrit Frigia, beñ estad Panflia, beñ nación Egipto, näjza bejn ni siääd stelaad Cirene, te estad neñ Africa. Loj rebejn ni siääd Roma

yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel.

¹¹ Yu'za ben Creta. Yu'za ben naciõn Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn Dios.

¹² Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebejn ni baxhiznäjreni, räjpreni:

—Agusojz redee.

Gunii Pedr loj rebejn

¹⁴ Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbäjz distrit Judea näjza guedx Jerusalén. Colcuadiajg diidx nani guiniä.

¹⁵ Xhet sojzdinu si'cni cayujntu xhigab. Rsilru naj, entis gojl rcagaa.

¹⁶ Dxejc scree gunii Joel che guniini xtidx Dios agujc xchero.

¹⁷ Räjpreni Dios:

Sidzujn dxej che guxhalä Xsprit Dxañä cuääzni neñ lastoo guiraa rebejn. Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

¹⁸ Guxhalä Xsprit Dxañä loj guiraa reni siädnañ narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

²⁰ Sicäjy loj gubijdx, sajc bäi si'c rejn.

Sajc guiraa recosre,

dxejcru sidzujn dxeduxh che jiälsacä narä, Dios.

²¹ Dxejc guiraa rebejn nani cuedx guiniab gacnäj Diosreni, reni'c siliaa lo dojl.

²² Räjpreni Pedr lojreni:

—Rexpejn Israel, colcuadiajg xtidxä. Dios baluii Jesucrist, ben Nazare't, lojtu por recosro, remilagwr, reseñ nani bejnñi nez lojtu. Lagajc Dios badeed yälrnibee loj Jesucrist te bejnñi redzunroga. La'tu nancheetu dee.

²³ Galooli ananchee Dios xhi guntu loj Jesucrist Xi'nni. Basaanza Dios bateedu Jesucrist ladzñaa rebeñgujdx te bacuaareni Jesucrist lo cruz te bagu'trenini.

²⁴ Baspañsac Dios Jesucrist, baslaa Diosni ladzñaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt.

²⁵ Che gubañsac Jesucrist, guzojb diidx ni bacuaa David lo guijtzc xcuent Jesucrist. Räjpreni David lo Dios:

Guira dxej ruhuiä lojlu, Dios.

Suga'lu xladbeä cayacñajlu narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibañä par tejpas.

Sibalazduxhä sa'csi guibañää luj,

si'c räjpreni David xcuent Jesucrist.

29 Rāj̄p Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuiinu baa cadre biga'tz David.

30 Gunii David xtidx Dios. Che nabaj̄nli David bia'n diidx gudeed Dios te xaj̄gni ni guirilaj Crist, luxh laani gacni reii si'cni gujc David.

31 Sa'csi baluixгаа Dios recosre lo David, ni'c rāj̄p David sibaṅsac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni.

32 Gulās Dios Jesucrist lo rebengut. Nuure bahuiloonuni, najcnu testiigw gubaṅsacni lo rebengut.

33 Gurejdx Dios Jesucrist. Naj nabaj̄n Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujn guira'ti nani cahuiitu, nani cayejn diajgtu nadxej.

34 Di David nij xhaguibaa, sa'csi lagajc David rāj̄p: Gunii Dios lo Dad nani rnibee loä: “Gurej xladbeä

35 che guidzuj̄nli dxej gudzugä guiraa reni rdxe'ch lojlu te gacbeereni luj rnibeelu guira'ti.”

36 'Rniliāpac lojtu —rāj̄p Pedr—. La'tu bacuaatu Jesús lo cruzj. Ni'cni, colgacbee, guiraatu xpeñ Israel, abejn Dios gac Jesúsre Dad nani rnibee loonu.

37 Che biejn diajgreni laareni bacuaareni Jesús lo cruzj, guc-huinduxh lajzreni. Rāj̄preni lo Pedr nājza lo reapost ni suga' ro'c:

—Aiilu, resa'nu, ¿xhini'c jiennu naj?

38 Dxejcti rāj̄p Pedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu.

39 Si'c rlaiz Dios guniidx Xsprit Dxanni lojtu nājza loj rexi'ntu, nājza lo rebejn ni rbājz zijtru, nājza loj guiragajc rebejn nani cueedxni —si'c gunii Pedr lo rexpejn Israel.

40 Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

41 Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ miļ bejn.

42 Sanuutis rusoobreni diidx ni baluii reapost, bibalazduxhreni sa'csi bidxaaag sa'reni con rexpejn Jesucrist, gudaunāj sa'reni si'c gudaunāj Jesucrist rexpej̄pacni, bidojpreni tejsi lajt te guniireni lo Dios.

Xho gubaj̄n rexpej̄n Jesucrist galoo

43 Bidxeloduxh guiraa rebejn luxh bejn reapost redzunro, remilagwr.

44 Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni.

45 Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni.

46 Guixe-guixee bidojpreni neñ guidoro xten Israel. Tejsi najc rexhigabreni. Gudaunāj sa'reni rolijz cadetejreni, guiraareni bibalaznāduxh sa'reni.

47 Gulā'preni xpala'n Dios. Guiraa rebejn gunii rexpej̄n Jesucrist najc bensa'c. Guixe-guixee batie' Dios xhidajlru bejn nani rililajz xtiidxni, badzucajni rextojl̄reni, dxejc bachaagreni lo rexpej̄n Jesucrist.

3

Biajc niguii nani racxhuu ni'ni

1 Guyu' te dxej sää Pedr nājza Juan nez loj guidoro si'cti rcachon gudxej.

² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacru'. Ro'c rbejni rniabni gojn lojreni riu' guidoo.

³ Che bahuiini agojl jiu' Pedr najza Juan neñ guidoroga, gunabni te gojn lojreni.

⁴ Dxejcti bahuii Pedr najza Juan lojni. Räjpn Pedr lojni:

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Räjpn Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: ¡Gusulii! ¡Gusaj! —räjpn.

⁷ Dxejcti gunaaz Pedr naani, guläsnini. Biligajc ni'ni, gusutijp ni'ni.

⁸ Huisuyäl'ni, gusajni. Biunäjni Pedr najza Juan neñ guidoro. Rsiajni, rtiäsnini, calä'pni xpala'n Dios.

⁹ Bahuii xhidajl bejn lojni neñ guidoro, rsiajni, calä'pzani xpala'n Dios.

¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhrene bahuiireni xhi gusajc niguii ni gucxhuu ni'ni.

Baluii Pedr xtidx Dios neñ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr najza Juan, naztzu'tz niguiiga naareni. Ruxuñ guiraa rebejn bidzujñ neñ cordoorga. Bidxelorejreni sa'csi arsiyaj niguii ni gucxhuu ni'ni.

¹² Che bahuii Pedr lo rebejn räjpn lojreni:

—¿Xhicuent rdxeloj guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire.

¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, najza toxtadgoldoonu Jacob, lagajc Diosga abadeed yälrnibee loj Xi'nni Jesús. Niluxh la'tu bateedtuni ladznaa reguxhtis. Che rlajz Pila't ni rnibee nuslaa Jesucrist, ditu nicäjb niriini, alga guniyajtuni nez loj Pila't.

¹⁴ Niluxh la'tu baro'ntu Xi'n Dxan xten Dios nani rujñ ganax dzunsa'c. Alga gunabtu birii te niguii nani bagu't bejn.

¹⁵ Jesucrist rudeed yäl'nabajñ, luxh la'tu gunabtu bacuaareni Jesucrist lo cruzj. Gulässac Dios Jesucrist lo rebengut. Bahuiloonu nabajñ Jesucrist, najcnu testiigw gubansac Jesucrist lo rebengut.

¹⁶ Cahuiitu loj niguiire nani gucxhuu ni'ni, luxh rumbeetuni. Xcälrnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcni te najcni si'cni rhuiituni naj.

¹⁷ 'Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo cruzj.

¹⁸ Scree gujc te guzojb xtidx Dios ni cuaj lo guijt agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh.

¹⁹ Ni'cni colsiechlajztu, colguibi' loj Dios te guibicaj xtojltu. Dxejc susiälyuj Dios lastootu, sujñni gac nacoob guira'ti, si'cni bia'n diidx gacni.

²⁰ Lojtu suxhalza Dios Jesucrist nani rnibee, nani aguleni galooli.

²¹ Naj nungäjñ jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero.

²² Scree gunii toMoisés lo retoxtadgoldoonu, räjpn: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobiajg guiralii diidx nani guiniini lojtu.

²³ Renani di gusoob rextiidxni, sinitlojreni, direni gac rexpejn̄ Dios.”

²⁴ Rājpa Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, nājza guiraa reniguii ni siādñajl̄ni, xcuent recos ni cayajc neñ redxejre.

²⁵ La'tu najc xajg reniguii ni gunii xtidx Dios. La'tu biannājtu diidx nani gunii Dios loj retoxtadgoldoonu. Bia'n diidx, rājpa Dios loj toxtadgoldoonu Abram: “Jiādñajl̄ te xajglu ni guspalmazduxh rebeñ guedxliuj, sa'csi suslaanireni lo dojl̄.”

²⁶ Dxejcti ganiddoo lojtu baxhal̄ Dios Jesucrist te guibaa lajztu che gusiejch lajztu, te na'cru guntu dojl̄ —rājpa Pedr.

4

Baluu Pedr nāj Juan xtidx Dios loj reguxhtis

¹ Laḷ ni caniiireni lo rebejn̄, ro'c bidzujn̄ rebixhojz xten Israel nājza nani rnibee lo resoldaad xten guidoro nājza resaduceos.

² Bidxe'chduxhrene sa'csi cagulijdxrene rebejn̄, cayājpreni:

—Sibaṇsac rebejn̄ lo rebengut sa'csi gubaṇsac Jesucrist lo rebengut.

³ Gunaaz reguxhtisrene, biāureni sa'csi agudxej luxh abiāu jusgaad. Neñ latzguiib barareni yāäl.

⁴ Xhidajl̄ reni biejn̄ diajg xtiidxrene huililajz xtidx Dios. Si'cti gaii mil niguii huililajz xtidx Dios.

⁵ Che bara yāäl, bachaag sa' guiraa rebengool, renani rnibee guedx Jerusalén, nājza rebejn̄ ni ruluii leii,

⁶ nājza Anás ni rnibee guiraa rebixhojz, nājza xpagojzni ni laa Caifás, nājza Juan, nājza Alejandro, nājza guiraa reniguii ni najc sa' rebixhozro ni rnibee.

⁷ Gunibeereni biāäd Pedr nājza Juan gusuj galäiireni te gunabdiidxrene lojreni:

—¿Chu xcäl̄rnibee rajptu? ¿Chu laj basä'ttu te basiajcti niguiire?

⁸ Dxejcti sa'csi cayu Pedr diidx ni canii Sprit Dxan xten Dios neñ lastooni, rājpa lojreni:

—Caniä lo guejbtu, reguxhtis nājza rebengool xten rexpejn̄ Israel,

⁹ palga canabdiidxtu xhicuent gucnājnu niguii nani gucxhuu ni'ni, palga canabdiidxtu xho basiajcti niguiiga,

¹⁰ gusule'nu xcuent dee te gacheetu te gacheeza guiraa rexpejn̄ Israel. Xtidx Jesucrist najc yäl̄rnibeduxh. Diidxga abasiajcti ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebengut.

¹¹ Di'tu ninälajz xtidx Jesucrist. Laani najc si'c te guij nani rbäcajt̄u che runcheetu te yu'. Per Dios abejn̄ najc Jesucrist si'c guij nani maazru nacsac, nani guyu' squiin xte yu'.

¹² Xtebtis Jesucrist ruslaa bejn̄ lo dojl̄, ruti stee bejn̄ lo guedxliuj nani baxhal̄ Dios te guslaani bejn̄ lo dojl̄ —si'c rājpa Pedr.

¹³ Che biejn̄ diajgrene xtidx Pedr, bidxelojreni sa'csi di Pedr nājza Juan guidxejb, dizareni guitujy. Dxejcti rājpa rebixhojz ni sajcro lo sa'reni:

—Direni ganduxh guijt̄z, bejntisrene.

Dxejcti gucbeereni gusanāj redee Jesucrist, lojni bisieedrene.

¹⁴ Bahuiiza rebixhojz lo niguii ni abiajcti ni'ni, suganājni guiro'preni. Ro'cti xhetru gujcdi gunii rebixhojz sa'csi laaca bejn̄rene.

¹⁵ Dxejcti gunibee rebixhojz birii guidxojn̄rene telaad te bij rebixhojz diidx ensilaareni.

16 Rājpreni lo sa'reni:

—¿Xhi jiennäänu reniguiire? Guiraa reben Jerusalén anajn xcuent dzunro-duxhre ni cayujnreni. Digacdi gucuatzlaaznuni.

17 Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

18 Huixisac rebixhojzreni. Dxejcti rājpreni lojreni:

—Na'c guluirutu xtidx Jesucrist, na'cru guiniitu xtiidxni.

19 Dxejc gunii Pedr nājza Juan, rājpreni lojreni:

—¿Colguinii loonu chu xtiidx sajcrú guicuadaiaagnu? ¿Xtiidx la'tu, o xtiidx Dios?

20 Digacdi gusāunu ro'nu. Nanabpac gusule'nu diidx xcuent recos nani abahuiinu nājza rediidx ni abiejn diajgnu.

21 Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr nājza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c.

22 Sa'csi niguii ni basiajcreni xcuent yālmilagwr agudejdni tiuu ijz.

Guredx-gunab rexpejn Jesucrist lo Dios

23 Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nājza rebenḡool lojreni.

24 Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rājpreni:

—Xtadnu Dios, nani benchee xhaguibaa nājza guedxliuj nājza nisdoo nājza guira'ti ni yu' lojreni, nenreni,

25 nani bejn basoob toDavid xtidx Sprit Dxan te bacuaani xtiidxlu, rājpn: ¿Xhicuent guyuduxh rebenḡuedxliuj yārsia'?

¿Xhicuent bejn rexpejn Israel xhigab ni xhet sajcdi?

26 Bidxagsa' rereii lo guedxliuj nājza reguxhtis xten reguejdx te gudxojnreni xtzun Dios nājza xten Dad Crist nani baxhaḡ Dios, si'c gunii toDavid.

27 Aguzojb diidxre, sa'csi lo guejdxre bidxagsa' Herodes nājza Poncio Pila't nājza rexpejn Israel nājza rebenzijt nani di gac xpejn Israel. Bidxehnājreni Xi'nlu nani najc Crist ni baxhallu.

28 Naj abejnreni dzunguijdx si'cni galooli guniilu gac.

29 Naj Guejblu Xtiosnu, bahuii xho cagusacsíreni nuure, gucnāj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu.

30 Baniidx xcālrnibeelu loonu te guisiajcnu rebejn, te jienzanu redzunro, remilajgwr con xcālrnibee Xi'ndxanlu Jesucrist.

31 Che gulujx gurejdxreni lo Dios, gusloj canibsejz yu' cadre tre'reni, cayac si'c te xu. Dxejcti biāād Sprit Dxan xten Dios basutijpruni lastooreni. Dxejc dirurenidixejb guniireni xtidx Dios.

Rudeedreni xhixtenreni lo sa'reni

32 Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rexhixtenreni te xca' guiraarenani nani rquinreni.

33 Gucnāj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnāj Dios guiraa rexpejn Jesucrist, luxh gopduxh rebenḡuejdx respe'treni.

34 Ni'cla tejreni di niāād xhixtenni sa'csi renani gojp xyujni, rolijzni, bato'renini, dxejcti biādnäreni xcuentni,

³⁵ badeedreni meelga lo reapost. Dxejcti gudis reapost meelga lo guiraa renani rquiinni.

³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni).

³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías näj chäälni rujn dojl

¹ Guyu' stee niguii ni laa Ananías. Chäälni laa Safira. Bato'reni te la' yuj.

² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujjni.

³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo rebeñdxab, ä? ¿Xhicuent rlajzlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj.

⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni.

⁶ Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

⁷ Pet agujc chon or gujtni chela bidzujñ chääl Ananías. Dini gan agujt chäälni.

⁸ Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

⁹ Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlajztu gusgueetu Sprit Dxan xten Dios? Ro lä' siääd renani huicua'tz chäällu. Naj näjza luj chacua'tzreni neñ baa.

¹⁰ Si'ctis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatgzajcneni cuä' baa cadre biga'tz chäälni.

¹¹ Bidxebduxh guiraa rexpejn Jesucrist, näjza guiraa rebejn nani biejn diajgni recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebeñguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón.

¹³ Guyu' xhidajl bejn ni di nuchaag lo rexpejn Jesucrist sa'csi bidxebbreni guchaagreni lojreni. Rebeñguejdxga guläpduxhreni xpala'n rexpejn Jesucrist.

¹⁴ Neñ redxejga xhidalduxh rebejn huililajz xtidx Jesucrist, niguii sigajc gunaa.

¹⁵ Dxejcti gulääreni lo nezyuj rebejn nani cayacxhuu. Siädnä rebejn beñracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni.

¹⁶ Guedx Jerusalén bidzujñ xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' beñdxab neñ lastooreni. Con

xcälrnibee Jesucrist basiajc reapost reben racxhuu, gulääzarenı reben dxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnıbee, näjza renıguıı ni laa saducee, sa'csi calä'p reben guejdx xpala'n reapost sa'csi basiajcreni reben racxhuu.

¹⁸ Gunaazrenı reapost. Basäurenıni nen latzguııb.

¹⁹ Niluxh yäälga, biääd te angl xten Dios, baxhalni ro' latzguııbga. Dxejcti gulääni reapost nen latzguııb. Räjpnı lojrenı:

²⁰ —Colchäj guidoro. Ro'c colguııni lo rebejn xho gac guııban näjrenı Dios par tejpas.

²¹ Che biejn diajgrenı si'c, rsildooru biu'reni nen guidoro, ro'c baluiireni xtidx Dios lo rebejn.

Dxejc bixhojz nani rnıbee, näjza reben gool, bachagsa'reni gurejdxrenı guııraa reguxhtis xten guidoo, näjza guııraa reguxhtis xten rexpejn Israel. Dxejcti gunıbeerenı jäädnä reguııxhajg reapost nani biäu nen ladtguııb.

²² Che bidzujn reguııxhajg latzguııb, bahuiı reguııxhajg nen latzguııbga, niluxh rut yu'di nen latzguııb. Che gubi'reni biädnärenı diııdx, räjprenı loj reguxhtis:

²³ —Che bidzunnu latzguııb, niäudzu'tz ro' latzguııb luxh resoldaad ni cayajp ro' latzguııb suga' guııro'p laad. Che baxhalnu ro' latzguııb, rut yu'di nen latzguııb.

²⁴ Che biejn diajg bixhojz ni rnıbee, näjza capitán nani rnıbee resoldaad xten guidoro, näjza rebixhojz, ben tio'p lajzrenı, räjpnı lo sa'reni:

—¿Xhini'c gujc? ¿Xhoni gac naj? —räjprenı.

²⁵ Dxejcti bidzujn te nıguıı, räjpnı lojrenı:

—Renıguıı ni basäutu nen latzguııb, arenı suga' nen guidoro, luxh cagului'reni rebejn —räjpnı.

²⁶ Dxejcti sanä capitán xten resoldaad rexcuxhtis guidoro te biädnärenı reapost, luxh direni nusacsı reapost sa'csi rdxejbrenı nucuaarenı guıı yejcreni.

²⁷ Che bidzun näjrenı reapost, räjprenı suurenı nez loj reguxhtis xten Israel, sas gunıı bixhojz ni rnıbee,

²⁸ räjpnı loj reapost:

—¿Et agunıbeenu lojtu na'cru guııniıtu xtidx Jesucrist? Xhoxh naj cagutie'chtu rediııdxga lo guııraa rebejn nen guedx Jerusalén. La'tu rıajztu cuaquııjtu nuure bagu'tnu Jesucrist.

²⁹ Dxejc räjpnı Pedr näjza reapost lojrenı:

—Nanabpac gusoobnu xtidx Dios, lacuaa gusoobnu xtidx bejn.

³⁰ Bagu'ttu Jesucrist che bacuaatuni lo cruzj. Niluxh Xtios xtadgoldoonu guläsni lo reben gut.

³¹ Naj agule'c Diosni xladbeeni cadre rnıbeeni, abadeedza Dios yälrnıbee loj Jesucrist te guslaani nuure, te si'c rıajznı guııbicaj xtojı guııraa rexpejn Israel nani gusiechlajzrenı.

³² Bahuiloonu xhi bejn Dios. Ni'c cagusule'nu. Nadoncheenu Sprıt Dıan xten Dios cayacnäı nuure te gusule'nu rediııdxre. Badeed Dios Sprıt Dıan xtenni lo guııraa renanı susoob xtiııdxni.

³³ Che biejn diajg reguxhtis rediııdxga, bidxechduxhrenı, rıajzrenı nugu'trenı reapost.

³⁴ Dxejcti huıısulıı te nıguıı ni laa Gamalıel, nani najc te farısee nani ruluiı leıı xten Israel, rebejn rapduxh respe't dade'ga. Gunıbee Gamalıel guıırıı reapost nen yu'ga.

³⁵ Dxejcti räjpnı Gamalıel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguiire.

³⁶ Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn. Che bagu'trenini, bire'ch guiraa rexpejn, xhetru bejndireni.

³⁷ Neñ ijz ni guyu' cens, biriiza Judas ni siääd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni.

³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni.

³⁹ Palga xtzuun Dios ni cayujnreni, digacdi guscuääznu dzuunga, sa'csi guidilnu guidxe'ch Gueb Dios loonu.

⁴⁰ Bichagljaz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini.

⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist.

⁴² Guixe-guixee laltis baluiireni xtidx Jesucrist neñ guidoro näjza rolijz bejn. Cagusule'reni diidx lo rexpen Israel:

—Jesús najc Crist nani cabääztu jiääd.

6

Gulereni reniguii ni gudeed yäxtiil lo rexpejn Jesucrist

¹ Neñ redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud.

³ Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni.

⁴ Te si'c sajc chanuutis guiniabnu lo Dios, guiluiizanu xtidx Dios lo rebejn.

⁵ Guiralii rebejnga bidxagljazreni diidxga. Dxejcti gulereni Esteban, te niguii ni rlilajzpac xtidx Dios, rbäjzza Sprit Dxan xten Dios neñ lastooni. Gulezaren Felipe, Prócoro, Nicanor, Timón, Parmenas; gulezaren Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist.

⁶ Sas biädnä rexpejn Jesús guigajtz niguiiga lo reapost. Dxejcti guredxgunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzuunreni.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazreni Esteban sanärenini lo rebixhojz nani rnibee

⁸ Gucnäduxh Dios Esteban, bejn redzunro, remilagwr nez lo rebejn.

⁹ Dxejc reben guidoo ni laa Libertados gusloj cadilnä Esteban. Lojreni nadxaag beñ Cirene, näjza beñ Alejandría, näjza gaii beñ Cilicia, näjza sgaii bejn ni siääd reguedx Asia.

¹⁰ Reniguiire di niajcdi nuzejcreni diidx lo Esteban, sa'csi nasin_uduxhni, luxh cayacnäj Sprit D_xan xten Diosni.

¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹² Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel.

¹³ Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten toMoisés näjza guidodxanre.

¹⁴ Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulii si'c guniilu, ä?

² Räjp Esteban lojreni:

—Colgucua diajg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz neñ guedx Harán.

³ Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu”

⁴ —räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu naj.

⁵ Di Dios nuzalajz nicla tla' yuj cadre suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc.

⁶ Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.”

⁷ Räjp Dios: “Narä sunä castiigw rebejn ni gusacsíreni che najcreni mos. Narä cuää rexagdoolu ro'c, te ree guzuxhijbreni loä neñ guejdxre”, si'c räjp Dios

⁸ —räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen Israel.

⁹ Räjp Esteban:

—Guitzubiteb rexi'n Jacob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José.

¹⁰ Che gudejd José trabajwduxh, gucnäj Diosni. Badeed Dios yäl_unasin_uduxh lojni. Bejn Dios bichaglaiz reii Faraón José. Badeed reii Faraón gujnci gubernadoor xten Egipto. Gunibeeza José guira'ti xhixten reiiga.

¹¹ Räjpza Esteban:

—Che bidzujn dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu.

¹² Che biejn diajg xtagoldoonu Jacob yu' xhi gaureni nen reguejdx xten Egipto, ro'c baxhalni rexi'nni, bica'reni xhi gaureni te huält.

¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José.

¹⁴ Dxejcti baxhal José diidx jiäd xtagdni Jacob, näjza guiraa resa'ni, cuääzreni Egipto. Najc rebejnga si'cti gayonbitzubigaii bejn.

¹⁵ Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtzta retoxtadgoldoonu.

¹⁶ Dxejcti huinäreni rextzujtreni loj Siquem te biga'tzsacreni nen baa nani gusii toxtadgolnu Abram lo rexi'n Hamor nen guedx Siquem.

¹⁷ Räj Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu nen guedx Egipto.

¹⁸ Dxejcti guyu' te xreii Egipto ni di gan guiraa redzunsac nani bejn toxtadgoldoonu José.

¹⁹ Reiiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiiga basälreni guiraa rebäz niguii te di laareni, te guetreni.

²⁰ Nen redxejga, gojl Moisés. Che gujc Moisés bäz, te bäz daani, saru rujn lojni, huinälaiz Diosni. Gułaani choñ bäii rolijzni.

²¹ Dxejc huisälrenini, te guzojb xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni.

²² Bisieed Moisés guiraa ni najn reben Egipto. Gunisa'cni diidx, bensa'cni dzuun.

²³ Räj Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni.

²⁴ Dxejc bahuiini casacsí te ben Egipto te ben sa'ni. Sas bagu'tni ben Egipto.

²⁵ Bejn Moisés xhigab pet sacbee resa'ni cayacnäz Diosni te guslaani rexpenni. Luxh di resa'ni niacbee si'c.

²⁶ Che bara yääl, bahuii Moisés cadilnäz sa'reni tiop xpen Israel. Räj Moisés lojreni: “Colcuedxi, Dad. Lagajc sa'tu cadilnäjtu. ¿Xhicuent rdijltu?” si'c gunii Moisés, te na'cru tilnäz sa'reni.

²⁷ Dxejcti nani cayunniälajzga, balanaani Moisés, räjpni loj Moisés: “¿Chu baniidx yälribee lojlu te jiädnibeelu nuure?”

²⁸ ¿La rlaizlu ju'tlu narä si'c bagu'tlu ben Egipto naiti?” —räjpni—.

²⁹ Che biejn diajg Moisés rediidxga, baxunni, huijni zijt. Huiläzsiycni guedx Madián. Ro'c bachnaani, guyu' tiop xingaanni.

³⁰ Räjza Esteban:

—Che gudejd tiuu ijz, bidzujn te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl nen te yaguejch. Nen bajlga baluiloj angl xten Dios lo Moisés.

³¹ Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjpni lo Moisés:

³² “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajgga.

³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree.

³⁴ Abahuiä xho cagusacsí reben Egipto rexpänä. Abiejn diagä xho roonreni. Naj abiälä te guslaä rexpänä. Gudaa naj, suxhalälu chäälü Egipto.”

³⁵ Rāj̄p Esteban:

—Dios badeed yāl̄r̄nibee lo Moisés nani baze' retoxtadgoldoonu che rāj̄preni: “¿Chu baniid̄x yāl̄r̄nibee lojlu te j̄äd̄nibeelu nuure?” Baxha| Dios Moisés te guinibeeni xpej̄n Dios, gucnāj̄za Dios Moisés basl̄ääni rexpej̄ni neñ naciõn Egipto si'c gunii angl xten Dios che baluilojni lo Moisés neñ yaguej̄chga.

³⁶ Gulää Moisés rebej̄nga. Ganiddoo bejn Moisés redzunro, yāl̄rdxeloj neñ naciõn Egipto nāj̄za ro' nisdoo ni laa nido xniaa. Tiuu ijz cuansaj retoxtadgoldoonu neñ yubijdzroga, ro'c bejnza Moisés redzunro, remilagwr.

³⁷ Lagajc Moisésre gunii xtid̄x Dios che rāj̄pni loj rexpej̄n Israel: “Sibe Dios lo rexaj̄gtu te niguii ni najc sigac narä. Siniini xtid̄x Dios. Colgusoob xtiid̄xni.”

³⁸ Lagajc Moisés guyunāj̄ rebej̄n neñ yubidzro. Xangl Dios gunināj̄ Moisés neñ dajn xten Sinaí. Dxejcti badeed Moisés rediid̄x ni gunibee Dios lo retoxtadgoldoonu. Laareni basa'nreni diid̄xga loonu.

³⁹ Rāj̄p Esteban:

—Niluxh di retoxtadgoldoonu nusoob rextid̄x Moisés. Di r̄laj̄zreni guinibee Moisésreni. Canaduxhlaj̄zreni naciõn Egipto.

⁴⁰ Che sää Moisés dajn Sinaí, rāj̄preni loj Aarón bejtz Moisés: “Benchee banāj̄b gac xtiooznu, te nidreni loonu, te chanaj̄lnureni. Chu gan con Moisésre ni baluii nezyuj che gulääni nuure guej̄dx reEgipto.”

⁴¹ Sas bencheereni te banāj̄b ni najc si'c te gonbāz. Dxejcti bagu'treni guidxaa te badeedreni rej̄nga lo banāj̄b te bazuxhij̄breni lojni. Bibalazduxh̄reni sa'csi abencheereni banāj̄bga.

⁴² Dxejcti gubicaj Dios loj rexpej̄n Israel sa'csi bejnreni si'c. Basaan Dios goj̄nreni gubij̄dx, nāj̄za bäii, nāj̄za rebal xhaguibaa. Guj̄cni si'cni caj lo guiijtz ni bejn reniguii nani bacuaa rextid̄x Dios. Rāj̄p Dios:

La'tu beñ Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniid̄xtu xtiejnreni, ä?

⁴³ Xho gacni si'c, rāj̄p Dios.

Cuansanāj̄tu te yu' najcw guiid̄ cadro chu te banāj̄b.

Nen̄ga guyu' banāj̄b ni laa Moloc, nani najtu najc xtiostu.

Goj̄nzatu balbāze' xten xtiostu ni laa Remfán.

Redios ni bencheetistu reni'c goj̄ntu.

Ni'cni sibää la'tu ree guxha|ä la'tu stelaad gued̄x Babilonia.

⁴⁴ Guniiru Esteban, rāj̄pni lojreni:

—Neñ reyubijdz goj̄p retoxtadgoldoonu te yu' najcwni guiid̄. Guj̄cni xquidooreni. Ro'c gunināj̄reni Dios. Benchee retoxtadgoldoonu yu' najcw guiid̄ga si'cni gunibee Dios che baluiini lo Moisés xhoni gacni.

⁴⁵ Che gujt Moisés, Josué gunibee lacuaa toMoisés, huinäni retoxtadgoldoonu naciõn Canaán. Batzuj̄lreni yuro ni najcw guiid̄ te nāj̄ ni'c huinäreni Canaán. Gulää Dios rebej̄n ni gulāj̄z neñ regued̄x Canaán. Dxejcti bia'n retoxtadgoldoonu neñ reguej̄dxga. Bazuxhij̄breni lo Dios neñ yuguiid̄ ni najc xquidooreni che goj̄lli xtiemp̄ reii David.

⁴⁶ Huinäla|z Dios David. Rāj̄p David lo Dios: “Rlazä gunä te guidoo par guej̄blu, Dios xten nuure, rexpej̄n Israel.”

⁴⁷ Dxejcti di Dios nusoob xtid̄x David. Alga Salomón, xi'n David, ni'c benchee xquidoro Dios.

⁴⁸ Naj di Dios guiquiin te yu' nani runchee bej̄n. Scree bacuaa te niguii nani gunii xtid̄x Dios. Rāj̄p Dios:

⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj̄ ni' reii, si'c najc gued̄xliuj̄ nani bencheä.

Dina guiquinä guncheetu te xyu'ä.

Dina guiquinä te lajt cadre gusilazä, räjp Dios.

⁵⁰ ¿La et naädi benchee guiraa nani ruhuiitu?, räjp Dios.

⁵¹ Räjp Esteban lojreni:

—Te beṇ nadduxh najctu. Ditu jiu xtidx Dios. Niäu lastootu, niäüza diajgtu. Di'tu chanälajz xtzuun Sprit Dxan xten Dios, dizani cuäaz neṇ lastootu. Si'c beṇ retoxtadgoldootu, si'cza rujntu.

⁵² Basacsí retoxtadgoldootu guiralii reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätuni lo guxhtis te gunibeetu gujtni.

⁵³ La'tu biannäjtü leiṇ nani gunii reangl xten Dios loj Moisés, luxh la'tu ditu nucuadiajg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban.

⁵⁵ Rbäjz Sprit Dxan xten Dios neṇ lastoo Esteban, ni'cni bahuitzu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios.

⁵⁶ Räjp Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxuṇreni bixa'treni yejc Esteban.

⁵⁸ Dxejc gudobyujrenini, gulääreni Esteban neṇ guejdxga. Ro'c bacuaareni guij yejc Esteban. Che cagucuaareni guij yejcti, guläyalreni xhajbreni; te niguii ni laa Saulo biannäj xhajbreni.

⁵⁹ Lal ni cagucuaareni guij yejcti, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejṇre, na'c gucuaquiylureni. Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neṇ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban.

³ Biäädza Saulo, guixe-guixee basacsíni rebejṇ nani huililajz xtidx Dios. Biu'ni rolizreni, gunaazni reniguii näjza regunaa te basäunireni neṇ latzguuib.

Basule' rexpejn Jesucrist xtidx Dios nez región Samaria

⁴ Che bire'ch rebejṇ nani huililajz xtidx Dios, basule'reni xtidx Dios nez cadrotis sääreni.

⁵ Tej rebejṇga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jiääd.

6 Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe.

7 Gaii bejn yu' bendxab nen lastooreni. Che gunibee Felipe guirii rebejxab lastoo rebejnnga, guredxa' rebejxabga, dxejcti biriireni nen lastoo rebejnnga. Yu'za xhidajl bejn nani digacdiru guiniib, yu'za reni rajc ni'reni, naareni. Con xcälrnibee Jesucrist basiajc Felipe guiraa rebejnnga.

8 Sa'csi gujc si'c, bibalazduxh guiraa rebejn nen guejdxga.

9 Guyu' te niguii ni laa Simón nen guejdxga. Bisieedni bejn ni xhidajl redzuun yälbidxaa, basgueeni rebejguejdxga. Bidxeloduxh rebejguejdx lojni. Räjpn ni lo rebejn rutru chu stee bejn ni najc maazru benro lojni.

10 Luxh guiraa rebejn, rebiuux, rebejgool, rebenrajp, rebenproob bacuadiajgreni xtidx bidxaaga, räjpni:

—Laani rajpni yälrnibee xten Dios.

11 Xchero basgueeni rebejn, bidxelojreni rextzunyaälbidxaani. Guiraa rebejn huililajz xtiidxn.

12 Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebejguejdxga huililajz rediidx nani gunii Felipe. Dxejcti birobnisreni, niguii näjza gunaa.

13 Nägajcza Simón huililajz rediidxga dxejc gurobniszani. Dxejc gyyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

14 Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr näjza Juan ro'c.

15 Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dyan xtenni lojreni,

16 sa'csi gajd Sprit Dyan xten Dios jädläjz nen lastooreni. Che huililajzreni, gurobnisreni te guchee rebejn chuni'c najc rexejn Jesucrist.

17 Dxejc batzuub Pedr näjza Juan naareni yejc tejga renani ahuililajz xtidx Dios, dxejc badeed Dios Sprit Dyan xtenni biädläjzni nen lastooreni.

18 Che bahuii Simón biädläjz Sprit Dyan xten Dios lastoo rebejn ni batzuub reapost naani yejcreni, rlajz Simón nudeedni meel loj reapost,

19 räjpni lojreni:

—Colguniidx yälrnibee loä te si'cza gudzubä naä yejc rebejn, te jiu' Sprit Dyan xten Dios nen lastooreni.

20 Dxejcti räjp Pedr lojni:

—jSunitloj xmeellu con luj! Xho gunlu xhigab siilu Sprit Dyan xten Dios nani rudedxlia' Dios.

21 Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl nen lastoolu.

22 Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäjł lajz Dios xtojllu ni bejnl nu nen lastoolu.

23 Naj narä nanä ruguilazduxhlu, luxh runduxhlu xhigabguijdx.

24 Dxejcti räjp Simón lo guiro'preni:

—Colnab loj Dios xcuentä te na'c sacä si'cni caniiu.

25 Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe näjza te dade' ni siääd nación Etiopía

26 Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

²⁷ Sä'ti Felipe. Che bidzujñni lo nezyujga, bidxaagni te dade' ni siäd nación Etiopía. Najcni te eunuco, najczani xcuxhtis reina Candace. Laani rgucweeni guiraa xmeel reinaga. Biäd dade'ga guedx Jerusalén te sagajñni Dios.

²⁸ Siädbisacni lajdxni. Sobga'ni neñ te gare't saruduxh, cayolñi xtidx Isaías, nani bacuaa xtidx Dios agujc xchero.

²⁹ Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijtz nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijtz ni caj xtidx Dios rnii scree:

Di xiil cuedxa' che rinä bejnñni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujñ yälguxhtisni xhet laliidi bejnreni.

Xhet si'cti nunyäjñ gunreni.

¿Xho guiniinu yu' xpejnñi?

Ni abagu'trenini. Diruni guibajñ lo guedxliuj.

³⁴ Dxejcti gunabdiidx beñ Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

³⁵ Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist.

³⁶ Lañ ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:

—¡Bahuii, ree yu' nis! ¿Xhi rudxojñ tiobnisä?

³⁷ Dxejc räjp Felipe lojni:

—Palga rililajzlu xtidx Dios neñ lastoolu, sajç tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga.

³⁹ Che biriireni neñ nis, huinä Sprit Dxan xten Dios Felipe ste'ca lajt. Dxejc diru dade'ga nuhii lo Felipe. Sä'ti dade'ga lajdxni, cabalazduxhni.

⁴⁰ Dxejcti chela gucbee Felipe abidzujñni guedx Azoto. Baluiizani xtidx Dios neñ guiraa reguejdx che bidzujñlini guedx Cesarea.

9

Huililajz Saulo rextidx Jesucrist

(Hch. 22:6-16; 26:12-18)

¹ Lañtis cagusacsí Saulo rexpejn Jesucrist. Rlajzñi ju'tni guiraareni, ni'c huijñi lo bixhojz nani rnibee,

² gunabni gac te guijtz chanäni lo reguidoo neñ guedx Damasco te palga guidxälñi reni najc xpejn Jesucrist neñ reguidooga, niguii sigac gunaa, guliibnireni, jiädñänireni guedx Jerusalén te jiäurenireni.

³ La_l sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo.

⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpēna?

⁵ Rāj_p Saulo lojni:

—¿Chuluj Dad?

Rāj_pni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejc caru'ch.

⁶ Bidxebduxh Saulo, racsejsni rāj_pni:

—Dad, ¿xhini'c rlajzlu gunä?

Dxejc rāj_p Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejn ni siädnä Saulo sugadxireni, bidxeybreni sa'csi biejn diajgreni te xse' bejn, luxh rut lojdi bahuiireni.

⁸ Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco.

⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te baca_l, rāj_p Jesucrist lojni:

—Ananías.

Dxejc rāj_p Ananías lojni:

—Anaree Dad.

¹¹ Rāj_p Jesucrist lojni:

—Huistie te chääl_u lo nezyuj ni laa Ladbee cad rbäjz Judas. Ro'c guiniabdi-idxlu con te niguii ni laa Saulo, beñ Tarso. Cabejdx, canabni loä naj.

¹² Lo baca_l abahuiini siääd te niguii ni laa Ananías te gutzuubni naani yej_cni te fini stehuält.

¹³ Dxejcti rāj_p Ananías lojni:

—Dad, abiejn diagä xho basacsí niguiiga rexpejn_{lu} neñ guedx Jerusalén.

¹⁴ Luxh rebixhojz ni rnibee abadeed gui_jtz lojni te guiniaazni ree guiraa rebejn nani rbedx-rniab lojlu, chanänireni jiäureni.

¹⁵ Dxejcti rāj_p Jesucrist lojni:

—Huij, narä aguleäni te gunni xtixunä. Suluiini xtixunä loj rebenzijt nani digac xpeñ Israel, näjza loj reni rnibee renacion, näjza loj rexpejn Israel.

¹⁶ Narä suluiä lo Saulo trabajwduxh ni tedni te jiädnajlni narä.

¹⁷ Dxejcti sää Ananías, bidzuj_{nni} ro yu' cadre rbäzlaa Saulo. Batzuubni naani yejc Saulo. Dxejcti rāj_p Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siääd_{lu}, lagajc laani baxhalni narä te fiilu stehuält, te jiäd_lä_jzza Sprit Dxan xten Dios neñ lastoolu.

¹⁸ Lagajc dxejc bitejb si'c xmelbäjl yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni.

¹⁹ Dxejc gudajwni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

Gusloj basule' Saulo xtixunä Dios neñ guedx Damasco

²⁰ Dxejcti gusloj basule' Saulo xtixunä Dios neñ reguidoo xten rexpejn Israel, rāj_pni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelojreni, rāj_p lo sa'reni:

—¿La xhet laadi niguiire ni rusäu rexpejn Jesucrist nen latzguiib guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

²³ Che gudejd xhidajl dxej, bachagsa' rexpejn Israel te nugu'treni Saulo.

²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini.

²⁵ Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejt padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujn Saulo guedx Jerusalén, rlanjzi nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzni xtidx Dios.

²⁷ Dxejcti huinä Bernabéni lo reapost, bijni diidx xcuent Saulo. Räjz Bernabé lojreni:

—Baluiloj Jesucrist lo Saulo loj nezyuj. Guninäz Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist.

²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäz Saulo rexpejn Israel nani rnii didx griegw. Laareni rdxechduxhrenei, rlanjzreni nugu'treni Saulo sa'csi direni nichagljaz xtidx Jesucrist.

³⁰ Che gucbee rexpejn Jesucrist si'c, huiäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näzja nen reguedx Samaria, sa'csi diru Saulo nusacsi rexpejn Jesucrist, luxh guc xhidajlrureni. Basoobreni xtidx Jesucrist, bisiee-drureni rextiidxni, gucnäzja Sprit Dzan xten Diosreni.

Biajc Eneas

³² Che gusloj sahuu Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida.

³³ Ro'c bidxälni te niguii ni laa Eneas. Agujc xhujn ijz naga' niguiiga cayacxhuuni. Abixu'n tiejxhni, digacdiru guiliini.

³⁴ Dxejcti räjz Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcn, huistietini.

³⁵ Guiraa rebejn ni rbäjz guedx Lida, näzja reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni nen reguejdxga huililajz xtidx Dios.

Gubansac Dorcas

³⁶ Nen guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn.

³⁷ Gucxhuu gunaaga, dxejc gujtni. Che gulujx bahuajz rebejn togoalga, huitixhrenei nen te yu' ni najc jiaa yejc sa'ni.

³⁸ Sa'csi gajxh guedx Jope tre' guedx Lida, luxh biejn diajz rexpejn Jesucrist ro'c yu' Pedr, baxhalreni tiop dade' saxii Pedr. Räjz redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujnreni, huiinäreni Pedr nen yu' cadre naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajnni.

⁴⁰ Dxejcti gunibee Pedr birii guirareni nen yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoalga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni.

⁴¹ Dxejc gunaaz Pedr naani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojreni te bahuilojreni agubansacni.

⁴² Gucbegajc reben guedx Jope xhini'c gujc, dxejcti xhidajl rebejnğa huililajz xtidx Jesucrist.

⁴³ Xchejza guyu' Pedr ro'c, guläjzni rolijz dade' ni laa Simón, nani ruscoodz guijs.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac ben Israel.

² Bensacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios.

³ Te dxej, si'cti rcachon gudxej, si'c lo bacal bahuiini loj xangl Dios, räjpni loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidxelojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj.

⁵ Naj baxhal tiop niguii chää guedx Jope te chaxiireni Simón Pedr.

⁶ Rbäjzni rolijz te dade' ni laa Simón nani ruscoodz guijs. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni näjza te xsoldaadni nani sanälajz Dios.

⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyuj. Asiäddzungajxhrene guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios.

¹⁰ Calanduxh Pedr, rlanjzni gauni. Lał ni cayujnreni xhi gauxhuejni, gusloj canixcalni.

¹¹ Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr.

¹² Nen bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt.

¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleiilu najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶ Che gujc choṇ huält gujc si'c, huä'psac bariaadga xhaguibaa.

¹⁷ Laḷ ni cayujṇ Pedr xhigab xhichani'c säloj nani bahuiini, bidzujṇ reniguii ni baxhaḷ Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

¹⁸ Che bidzujṇreni rolä'ga canabdiidxreni la ro'c rbäjz te dade' ni laa Simón Pedr.

¹⁹ Laḷ ni cayujṇ Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choṇ dade' caguiillu.

²⁰ Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaḷäreni lojlu.

²¹ Dxejcti biäjt Pedr jiaaga, bidzujṇni cadre suga' redade'ga, räjpni lojreni:

—Narä nacä ni caguiiltu. ¿Xhi siäädту?

²² Räjp reniguiiga lo Pedr:

—Cornel, nani rnibee te gayuu soldaad, te beṇsa'c, te bejṇ ni rajṇ Dios, te bejṇ ni sanälajz rexpejṇ Israel, laani baxhaḷ nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejṇga, biu'reni neṇ yu'. Ro'c bia'nreni te guxhijṇ. Che bara yääl, Pedr näjza sgaii beṇ Jope ni najc xpejṇ Jesucrist, sanä redade' ni baxhaḷ Cornel.

²⁴ Che bara yääl, bidzujṇreni guedx Cesarea. Abatojp Cornel resa'ni näjza reexamigwni rolijzni. Cabäjzreni guidzujṇ Pedr.

²⁵ Che bidzujṇ Pedr ro yu', huichagloj Cornelni, bazuxhijbni lo Pedr.

²⁶ Dxejc gunaaz Pedr ṇaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni neṇ yu'. Che biu'ni bahuii Pedr nadxagsa' rebejṇ neṇ yu'.

²⁸ Räjp Pedr lojreni:

—Anajntu xhi caj lo leii xten rexpejṇ Israel: digacdi guchaag te xpejṇ Israel loj benzijt nani digac xpejṇ Israel, digacdiza jiu'ni rolijzreni. Niluxh agunii Dios loä lo te bacaḷ, te gacbeä digacdiru jiuä releiire. Abaluii Dios narä sajc guchagsa'ä chutis bejṇ.

²⁹ Ni'cni, che gurejdxtu narä biälgacä. Naj rniabdixä, ¿xhicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladmol ni rdimbicha'.

³¹ Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo rebeṇ proob, racbee Dios, di lajzni jiäl luj.

³² Ni'cni naj baxhaḷ tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guijd. Rōlijzni sojb gajxh ro' nisdoo. Che guidzujṇni, laani gusule'ni xtidx Dios lojtu.”

³³ Dxejc baxhaḷä chu biädxiilu. Xquixtiostelu biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴ Dxejcti räjp Pedr lojreni:

—Naj gucheliä tebloj rinälajz Dios guiraa bejṇ; rebenzijt sigajc rexpejṇ Israel.

³⁵ Niluxh rinälajz Dios chutis beṇ guedxliuj nani ruzuxhijb lojni, nani rusoob rextiidxni, nani laaca nabajṇ.

³⁶ Badeed Dios xtiidxni loj rexpejn Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj.

³⁷ Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea.

³⁸ Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dxiän xtenni te cuääzni neñ lastooni. Nancheetu xho bejn redzunro, remilagwr, basiajcn rebejn nani caguteed beñdxab trabajwduxh. Redzunroga bejn sa'csi bennäj Diosni dzuun.

³⁹ Bahuiloonu guiraa redzuun ni bejn Jesucrist neñ reguedx Israel näjza guedx Jerusalén. Bacuaa rexpejn Israel Jesucrist lo cruz, ro'c gujtni.

⁴⁰ Dxejcti che biojn dxej, guläs Dios Jesucrist lo rebengut, gubansacni, badeed Dios yälrnibee lojni te gujc biädluiloj Jesucrist loonu.

⁴¹ Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebengut.

⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebengut.

⁴³ Galooli bacuaa renani guni xtidx Dios lo guijt, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

Biädlajz Sprit Dxiän xten Dios neñ lastoo rebenzajt

⁴⁴ Lañ ni canii Pedr rediidxga, biädlajz Sprit Dxiän xten Dios neñ lastoo renani huililajz xtiidxni.

⁴⁵ Bidxeloj guiraa rexpejn Israel nani huinä Pedr sa'csi biädlajz Sprit Dxiän xten Dios neñ lastoo renani najc benzajt.

⁴⁶ Gucebereni biu' Sprit Dxiän xten Dios lastoo rebenzajt sa'csi bejn Sprit Dxiän guniireni stee didxsaj nani gajdreni guisieed, calä'pzareni xpala'n Dios.

⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädlajz Sprit Dxiän xten Dios neñ lastoonu, abiädlajzni neñ lastoo rebejnre.

⁴⁸ Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

11

Basule' Pedr xho biädlajz Sprit Dxiän xten Dios lastoo rebenzajt lo rexpejn Jesucrist neñ guedx Jerusalén

¹ Reapost, näjza renani huililajz xtidx Jesucrist neñ reguedx Judea, biejn diajgreni huililajz rebenzajt ni digac xpejn Israel xtidx Dios.

² Che bidzujñ Pedr guedx Jerusalén, rexpejn Israel nani rlanj chu guiraa rexpejn Jesucrist bee si'cni bejn toAbram, gudilnäjreni Pedr.

³ Räjpreni lo Pedr:

—¿Xhicuent biu'lu rolijz benzajt nani xhet yu'di bee si'c nuure? ¿Xhicuent gudaunäjlore, ä?

⁴ Dxejcti basule' Pedr diidx xho gujc huijni loj rebenzajt:

⁵ —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäini nez loä.

⁶ Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt.

⁷ Dxejcti biejn diagä naj Dios loä: “Pedr, huisu. Bagu't man gaulu.”

⁸ Dxejcti räpä: “Digacdini Dad. Nicla tej gadna gauä te man nani rnii lei xtenlu najc mandxuudx.”

⁹ Dxejc gunisac Dios loä: “Na'cru guiniilu nacdXuudx recos nani abasia Dios.”

¹⁰ Che gujc choñ huält gunii Dios si'c, huä'psac bariaadga xhaguibaa.

¹¹ Lagajc orga bidzujñ choñ dade' ro yu' cadre yu'ä. Guedx Cesarea biriireni, biädxiiireni narä.

¹² Dxejc gunii Sprit Dxan xten Dios loä: “Huinä reniguiire. Na'c gun tiop lajzlu.” Dxejcti huinä xho'p beñ Jope, dade' nani rililajz xtidx Jesucrist. Che bidzunnu guedx Cesarea, biu'nu rolijz Cornel.

¹³ Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxhal tiop dade' chää guedx Jope te chaxiireni Simón ni rniireni Pedr.

¹⁴ Laani siniini xtidx Jesucrist te gacbeelu con resa'lu xhini'c nanab gunlu te gusläa Dios la'tu lo rextojltu.”

¹⁵ Che gusloj cagusule'ä xtidx Dios lojreni, biu' Sprit Dxan xten Dios neñ lastooreni si'c biu'ni lastoonu galooli.

¹⁶ Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni neñ lastootu.”

¹⁷ Dxejc räjpza Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

¹⁸ Che biejn diajg reben Jerusalem rediidxga, biäuu ro'reni, dirureni nidiñäj Pedr. Alga gulä'preni xpala'n Dios, räjpreni:

—Näjza rebenzijt nani digac rexpejn Israel abasaan Dios gusiechlajzreni te guibanñäjreni Dios par tejpas.

Rexpejn Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel.

²⁰ Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo benzijt nani rnii didx griegw. Basule'reni lo rebenzijtga guiraa xcuent Jesucrist.

²¹ Gucnäj Diosreni caniireni xtiidxni. Xhidajl rebejnğa huililajz xtidx Jesucrist, basoobreni xtiidxni.

²² Che biejn diajg rexpejn Jesucrist ni yu' guedx Jerusalem rililajzreni, baxhalreni Bernabé guedx Antioquía.

²³ Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist.

²⁴ Bensa'c najc Bernabé. Rililazduxhni xtidx Jesucrist. Racnäjdugh Sprit Dxan xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo.

²⁶ Che bidxälni Saulo, huinäni guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidaldugh bejn. Ganid beñguejdxga gulälaj “Cristianos” renani rililajz xtidx Jesucrist.

²⁷ Neñ redxejga birii gaii dade' nani rnii xtidx Dios. Guedx Jerusalem biriireni, bidzujñreni guedx Antioquía.

²⁸ Huisulii te dade'ga ni laa Agabo. Gucnäj Sprit Dxan xten Diosni te guniini siääd te gubijn guideb guedxliuj. Luxh gujc gubijnga neñ reijz ni gunibee reii Claudio ni saj cru.

²⁹ Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea.

³⁰ Batojpreni meel, baxhalrenini lo rebengool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

12

Gujt Jacob, biäu Pedr neñ latzguiib

¹ Neñ redxejga, trabajwduxh bateed reii Herodes gaii rexpejn Jesucrist.

² Gunibeeni gujt Jacob betz Juan, biru' guejnni.

³ Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij.

⁴ Che gunaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij.

⁵ Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr neñ latzguiib

⁶ Bidzujnti dxe bispr dxej ni rlajz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj ro' latzguiib.

⁷ Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajnni. Räjpn lo Pedr:

—Basquejnga, huistie.

Dxejcti bixec recaden, bitejbreni naa Pedr.

⁸ Räjpn xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpn xangl Dios lo Pedr:

—Gojt xhablajzlu, gudanajl narä —räjpn.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejn ni xhigab pet canixcalni.

¹⁰ Gudejdreni nez loj te soldaad, gudedgajcreni nez loj steeni, dxejc bidzujnreni ro' puertguiib xten latzguiib nani caj lo nezyuj ni rdejd galäii guejdxga. Xtebca bixal puertroga, biriireni gusajreni tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj.

¹¹ Dxejc si'cni gubajpn Pedr, bejn ni xhigab:

—Naj sii nanä baxhal Dios te xanglni baslaa narä ladznäa Herodes te digacdi gun rexpejn Israel nani rlajzreni gunnäjreni narä.

¹² Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr.

¹³ Cagusejz Pedr rolä', dxejc gubig te dxa'p ni laa Rode, bacuadiajgni ro lä'.

¹⁴ Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni neñ yu', räjpn lojreni:

—Pedr suga' ro lä'.

¹⁵ Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:
—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti lahtis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr.

¹⁷ Dxejcti bazaáb Pedr naani te na'cru jiejyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib.

¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh rebeñ Tiro näjza rebeñ Sidón Herodes, ni'cni diruni gusaan guto' rebeñ nez cadro rnibeeni xhi gau rebeñ Tiro näjza rebeñ Sidón. Ni'c biääd xhidajlreni te guiniabreni jääj lajzni, te na'cru guidxe'ch Herodes lojreni. Abenxgaarení xamiigwreni Blasto, mos ni yu' lo rei Herodes, mos ni saj cru lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebejnga.

²¹ Basoobtini te dxej te guininäjnirení. Dxejga gojt Herodes xhajn reiini, gurejni lo xyacxhil reiini. Dxejcti gusloj caniini didxsa'c loj rebejnga.

²² Guredxa' rebeñ räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biääd te angl xten Dios, bejni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebeñ najcni te dios, sa'csi dini niliä'p xpala'n Dios.

²⁴ Xhidajl beñ biejn diajgni xtidx Dios, huililajzreni xtidx Dios.

²⁵ Che gulujx badeed Bernabé näjza Saulo meel ni batojp rebeñ Antioquía lo rebeñgool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxaan xten Dios Bernabé näjza Saulo

¹ Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj rei Herodes gujcti si'c bejtzni; näjza Saulo.

² Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxaan xten Dios lojreni:

—Colcue Bernabé näjza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzubbreni naarení yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

Guuro'preni baluii xtidx Dios lo rebeñ Chipre

⁴ Baxhal Sprit Dxaan xten Dios Saulo näjza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre.

⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejn Israel. Näj Marcw gucnäjreni.

⁶ Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejñ Israel. Cagusgueeni rebejñ guejdxga, räjpni xtidx Dios caniini, niluxh dini gac xtidx Dios.

⁷ Bidxaare nu'ch lo rexpejñ Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlanjñi jieñ diajñi xtidx Dios.

⁸ Dxejcti Barjesús, ni laaza Elimas, bidxagdijñi guiro'preni sa'csi di rlanjñi chalilajz Sergio Paulo xtidx Dios.

⁹ Saulo, nani laaza Pabl, bahuitzu'tz loj Barjesús. Batijp Sprit Dxaan xten Dios lastoo Pabl, räjpni loj Barjesús:

¹⁰ —Rusgueduxhlu rebejñ, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxehnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejñ xtidx Jesucrist?

¹¹ Naj siääd xcastiigw Dios yejclu. Xhidajl dxej sicäjy lojlu, xhetliidi filu —räjp Pabl.

Gujcsi räjpni si'c, bicäigajc lojñi. Dxejctiru cuansajni caguilni chu guiniaaz naani guluiini canejz chääni.

¹² Che bahuii Sergio Paulo xhi gusajcni, huililajzñi xtidx Dios, sa'csi bidxeloduxhni xcuent xcäl'ruluii Dios.

Bidzujñ Pabl näjza Bernabé guedx Antioquía xten distrit Pisidia

¹³ Che baluux Pabl näjza resa'ni xtzuunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujñreni guejdxga, gubisac Juan, ni rniireni Marcw, Jerusalén.

¹⁴ Dxejcti birinäj Pabl resa'ni guedx Perge, sääreni guedx Antioquía nen distrit Pisidia. Dxejc te dxe sabd, dxej ni rusilajz rexpejñ Israel, biu'reni nen xquidoo rexpejñ Israel, ro'c gurejreni.

¹⁵ Che gulujx bil te dade' reguijtz xten Dios ni laa leii näjza reprofte't, baxhal reguxhtis xten guidoo chu huigajñreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejñre, colguiniini.

¹⁶ Dxejc huisulii Pabl, guläsni naani bejnñi seen lo rebejñ te cuadiajgñi xtiidxni. Räjp Pabl lojreni:

—Colcuadiajg, la'tu rexpejñ Israel, guiraatu ni rajñ Dios.

¹⁷ Galooli gule Xtios rexpejñ Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjduxh Diosreni bejnñi remilagwr, te guläänireni guedx Egipto.

¹⁸ Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni.

¹⁹ Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu.

²⁰ Dxejcti badeed Dios reniguii ni gujc juejz, gunibeereni rebejñ. Tajp gayugarol ijz gunibeereni rexpejñ Israel. Samuel nani gunii xtidx Dios gujc lult juejz.

²¹ Dxejcti gunab rexpejñ Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz.

²² Che badzucaj Dios Saúl, badeedni gunibee toreii David. Räjp Dios: “Agucbeä David xi'n Isaí rujñ tejsi xhigab con narä. Susoobni xtidxä sujñni guiralii ni rlazä gac.”

²³ Räjpza Pabl:

—Galooli bia'n diidx lo rexagdoo David guxhal Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnaga, rudzucajni xtojlnu, ruslaani nuure lo dojl.

²⁴ Che gusloj cagulijdx Juan rebejn, baluiini nanabpac gusiechlajz rexepejn Israel, tiobnisreni te jia xtojlneni.

²⁵ Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhal Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

²⁶ Räjpza Pabl:

—Rniä lojtu sa'ä, rexagdoo toAbram, näjza lo chutis ni rajn Dios, loonu baxhal Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl.

²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guiitzga.

²⁸ Baliidxreni Pila't ju'tni Jesucrist, luxh xhet bejndini te guetni.

²⁹ Che bagujc guiraa ni caj lo guiitz xcuent Jesucrist, gulätreni Jesucrist lo cruzj, bacua'tzrenini neñ baa cuä' te guilaj.

³⁰ Dxejcti guläs Dios Jesucrist lo rebengut.

³¹ Balti huält baluiloj Jesucrist lo rexamigwni nani biädnajni nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³² 'Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu.

³³ Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te guinibeelu.”

³⁴ Räjpza Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.”

³⁵ Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.”

³⁶ Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid.

³⁷ Niluxh guläs Dios Jesucrist lo rebengut, ni'c di tiejxhni niujdx.

³⁸ Ni'cni colyacbee, la'tu resa'ä, Jesucristre, bejn ni caniä xcuentni, laani rudzucajni rextojlnu.

³⁹ Chutis ni rililajz xtidx Jesucrist ruslaa Jesucristni loj guiraa rextojlni nani digacdi guibicaj mascä rusoobni guiralii ni caj lo leii xten toMoisés.

⁴⁰ Colsusin te na'c sajctu recos ni caj lo guiitz ni bacuaa te niguii nani bacuaa xtidx Dios:

⁴¹ Colhuilaa, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

⁴² Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejn̄ga, xhidajl rexpejn̄ Israel, nājza xhidajl rebenz̄ij̄t nani rusooḅ xtid̄x Dios si'c rujn̄ rexpejn̄ Israel, birinajlreni Pabl nājza Bernabé. Dxejc baliidxreni rebejn̄ ni siädnajlreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejn̄ Israel, xhidalduxh re-benguejdx bire' te gucuadiajgreni guinii Pabl xtid̄x Dios.

⁴⁵ Che bahuii rexpejn̄ Israel guiraa rebejn̄ ni bire', bidxechlajzreni, gucnadareni. Dxejc gusloj cadxagdijl̄ rexpejn̄ Israel Pabl. Che rniini te diidx, laareni rniireni “didxxhiini”. Caniyajzareni Pabl nājza Bernabé, caguereni lojreni.

⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejn̄: —Nungäjl̄ ganid lojtu guiniinu xtid̄x Dios, sa'csi la'tu najctu rexpejn̄ Israel. Niluxh ditu chalilajz xtid̄x Dios, lagajc la'tu caniitu digacdi guibaññajtu Dios par tejpas. Ni'c sibiré loonu, te guiniinu xtid̄x Dios lo rebenz̄ij̄t ni digac xpejn̄ Israel.

⁴⁷ Sa'csi si'c agunibee Xtiosnu. Scree caj xtid̄x Dios lo guiijt: Suxhalätu te guluiilu rextid̄xä lo rebenz̄ij̄t ni digac xpejn̄ Israel, te chalilajz rebejn̄ga xtid̄xä, te laareni lo xtoj̄lreni, cadrotis yu'reni lo guedxliuj, räjp Dios.

⁴⁸ Che biejn̄ diajg rebenz̄ij̄t rediidxre, bibalazduxhreni, gulä'preni xpala'n xtid̄x Dios. Renani gule Dios galooli huililajz xtid̄x Dios. Xhidajl najcreni.

⁴⁹ Bire'ch xtid̄x Dios guideb nez reguejdxga.

⁵⁰ Dxejc rexpejn̄ Israel baliidx regunaa ni sajcru, nājza reniguii ni sajcru neñ guedx Antioquía, te bidxechñajreni Pabl nājza Bernabé, barilaagwreni Pabl nājza Bernabé te biunejzreni guedx Antioquía.

⁵¹ Dxejcti Pabl nājza Bernabé gubijb guxhuj ni'reni si'c te seen te gacbee rebejn̄ xhet laadi bejnreni. Sä'tireni guedx Iconio.

⁵² Baspaa Dios lajz rexpejn̄ Jesucrist guedx Antioquía xten Pisidia. Bazuti-jpza Sprit Dxan xten Dios lastooreni.

14

Guyu' Pabl nāj Bernabé guedx Iconio

¹ Che bidzujn̄ Pabl nājza Bernabé guedx Iconio, biu'reni xquidoo rexpejn̄ Israel. Basule'reni xtid̄x Dios lo rexpejn̄ Israel nājza lo rebenz̄ij̄t. Xhidajl rebejn̄ga huililajz xtid̄x Dios.

² Niluxh sgaii rexpejn̄ Israel nani di chalilajz xtid̄x Jesucrist baliidx rebenz̄ij̄t te bidxechñajreni rebejn̄ nani huililajz xtid̄x Jesucrist.

³ Ni'cni bia'n Pabl nājza Bernabé lo guejdxga balti dxej. Gusutzu'tz guiro'preni guniireni xtid̄x Jesucrist. Badeed Dios bejnreni redzunro, remi-lagwr xcuent xcäl̄rnibee Dios te bahuii bejn̄ cayacñaj Diosreni.

⁴ Guyu' tiop cuaa bejn̄ neñ guejdxga. Gala' guejdxga huililajz xtid̄x Dios nani gunii Pabl nājza Bernabé,

⁵ dxejc sgala' guejdxga bacuadiajg xtid̄x rexpejn̄ Israel. Dxejc bire' te cuaa rexpejn̄ Israel, nājza benz̄ij̄t, nājza reguxhtis, rlajzreni nidxagdijl̄reni reapost, rlajzzareni nucuaareni guij yejc Pabl nājza Bernabé.

⁶ Dxejc gucbeereni xhi rlajzreni gunreni, ni'c baxun̄reni ro'c huijreni nez reguedx Licaonia, ro'c bidzujn̄reni guedx Listra, guedx Derbe, nājza reguejdx ni re' nejzga.

⁷ Che bidzujn̄reni ro'c, cadrotis huijreni basule'reni xtid̄x Dios.

⁸ Guedx Listra guyu' te niguii ni digacdi sa, che gojllini racxhuu ni'ni.

⁹ Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni.

¹⁰ Dxejcti dip gunii Pabl lojni, räjpni:

—¡Huisulii!

Dxejcti huisuyäl̄ni, gusajni.

¹¹ Che bahuii rexpejn̄ Licaonia xhi bejn̄ Pabl, lagajc xtiidxreni guniireni, räjpreni lo sa'reni:

—¡Redios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni.

¹³ Dxejcti te bixhojz xten xquidoo Júpiter cua' tiop gon najl guii guejnreni. Biädñäni regonga ro' xquidoo Júpiter ni suga' ro' guejdxga. Rebejn̄ näjza bixhojz rlanjreni nugu'treni regon te ganreni Bernabé näjza Pabl si'c rajnreni rextiosreni.

¹⁴ Che biejn̄ diajg reapost xhi cayajc, batiäjsreni tla' xhajbreni si'c te seen direni guichagljaz xhi cayujn̄ rebejn̄ga. Ruxunreni bidzujnreni lo rebejn̄, räjpreni lo rebejn̄:

¹⁵ —Colcuadiajg xtiidxnu. ¿Xhicuent cayujn̄ guejbtu recosre? Ni lagajc sabejntu najcnu, lagajc bejn̄ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn̄, guzuxhijbtu lo Gueb Dios ni nabajn̄ par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, nenreni,

¹⁶ Galoo basaan Diosga gun reben̄ guedxliuj si'ctis ni rlanjreni.

¹⁷ Huen najc Dios, rudeedni nisguij, rudeedni rajc xhi rajw rebejn̄, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl̄ diidx̄ guniireni te chäii bejnreni gaan guredxi rebejn̄, sa'csi rlanjpac rebejn̄ nugu'treni regon.

¹⁹ Dxejcti bidzujn̄ gaii xpejn̄ Israel siädreni guedx Antioquía näjza guedx Iconio. Baquiilreni reben̄ Lистра te gucuaareni guij yejc Pabl. Bacuaareni guij yejc Pabl, gudobxhajxhrenini guläärenini ro' guejdxga, sa'csi naareni agujtni.

²⁰ Dxejc laḹ ni suga' rexpejn̄ Jesucrist guideb gabi cadro naga' Pabl, huistieni, biusacni guejdxga. Che bara yääl̄, huinäni Bernabé sääreni guedx Derbe.

²¹ Che bidzujnreni guejdxga, basule'reni rextidx Dios lo rebejn̄ga. Xhidajl̄reni huililajz xtidx Dios. Dxejc gubi'reni, biu'reni guedx Lистра, näjza guedx Iconio, näjza guedx Antioquía.

²² Balijdxreni rebejn̄ nani huililajz xtidx Dios, gucnäjreni rebejn̄ga te batiplajz rebejn̄ga, räjpreni lo rexpejn̄ Jesucrist:

—Colsnaj lajztu xtidx Dios. Susacsí rebejn̄ la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn̄ Jesucrist. Che gulujx bacua'nreni, laḹ ni guredx-gunabreni lo Dios, basadiidxreni rebejn̄, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl näjza Bernabé distrit Pisidia, bidzujnreni estad Panfilia.

²⁵ Basule'reni xtidx Dios lo reben̄ Perge, dxejcti biriireni ro'c sääreni guedx Atalia.

²⁶ Che bidzujnreni guejdxga, biu'reni nen̄ barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn̄ Jesucrist ni gunab lo Dios xcuentreni, gacnäj Diosreni, baxhalreni Pabl näjza Bernabé chasule'reni xtidx Dios nen̄ guiraa reguejdx. Naj abaluux Pabl näjza Bernabé dzuunga.

²⁷ Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejn̄ga guira'ti ni bennäj Dios laareni, nājza xho badeed Dios huililajz rebenz̄ijt nani digac rexpen Israel.

²⁸ Xchej biannäjreni rexpejn Jesucrist ro'c.

15

Bidxagsa'zareni nen̄ guedx Jerusalén

¹ Nen̄ redxejga bidzujn̄ gaii dade' ni siäd nez Judea, caguluiireni rexpejn Jesucrist, räjpreni lojreni:

—Palga ditu gusäl̄ bee si'c gunibee toMoisés, di Dios guslaatu lo xtojltu.

² Che biejn diajg Pabl nājza Bernabé rediidxga, bidxagdijl̄reni redade'ga. Dxejc gule rexpejn Jesucrist Pabl nājza Bernabé nājza sgaii rexpejn Jesucrist chääreni guedx Jerusalén te guininäjreni reapost nājza reben̄gool te guidon xho gac xcuent beega.

³ Huisunejz rexpejn Jesucrist ni najc beñ Antioquía Pabl nājza rebejn ni sanäjreni, sääreni guedx Jerusalén. Gudejdreni reguedx Fenicia, nājza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenz̄ijt xtidx Dios. Bibalazduxh rexpejn Jesucrist che biejn diajgreni rediidxga.

⁴ Che bidzujn̄reni guedx Jerusalén, huichagloj rexpejn Jesucristreni. Dxejcti bij Pabl nājza Bernabé diidx lo reapost, lo reben̄gool nani rnibee rexpejn Jesucrist, nājza lo rexpejn Jesucrist, guiraa redzunro nani cayunnäj Diosreni.

⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenz̄ijt xtidx Dios, nanab churen̄i bee, nanabza gusobreni leii xten toMoisés.

⁶ Dxejcti bachagsa' reapost nājza reben̄gool nani rnibee rexpejn Jesucrist, te don xho gunreni.

⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenz̄ijt, te chalilajzreni xtidx Dios.

⁸ Luxh Dios, nani numbechee lastoo guiralii bejn, badeed seen huililajzpac rebenz̄ijt xtiidxni. Badeed Dios Sprit Dxan xtenni lojreni si'c te seen te gacbee bejn najczeni xpejn̄ni. Sigac baniidxni Sprit Dxan xtenni loonu galoo, si'cza badeednini lo rebenz̄ijt.

⁹ Sigajc rinälajz Dios nuunu, sigajcza rinälajzni rebenz̄ijt. Che huililajz rebenz̄ijt xtiidxni, basia Dios lastooreni.

¹⁰ Naj̄ ¿xhicuent rusieedtu Dios, ä? Di niajcdi nisanäj retoxtadnu releiiga, digacdiza chosanäjnu releiiga naj̄. ¿Xhicuent rlajztu chasanäj rebenz̄ijt releiiga?

¹¹ Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenz̄ijt lo dojl̄ che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn̄, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenz̄ijt.

¹³ Che gulujx gunii guiro'preni, xhet guniidi rebejn̄. Jacobtis räjp lojreni:

—Sa'ä, colcuadiajg xtidxä.

¹⁴ Agunii Simón ni rniireni Pedr lojtu xho ganiddoo baxhal̄ Dios laani lo rebenz̄ijt te gurejdx Dios rexpejn̄ni ni nadxaag lo rebenz̄ijt.

¹⁵ Luxh si'cza caj lo guiitz. Agujc xcheroduxh bacuaa reniguui nani gunii xtidx Dios, che räjpni:

16 Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid.

Si'c gunä,

17 te jiadgajn rebejn narä te gacä Xtiosreni,

näjza guiraa rebenzijt nani najc rexpenä jiadgajn narä,

18 si'c räjp Dios nani galooli baluiloj guiraa redzuunre.

19 Dxejcti räjp Jacoob lojreni:

—Dee najc xhigab ni runä. Na'cru gusieednu rebenzijt ni cagusiechla-jzreni, renani salilajz xtidx Dios.

20 Gucuaanu te guiitz, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn.

21 Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacoob.

22 Che biejn diajg reapost näjza reben_gool nani rnibee, näjza guiraa rexpejn Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajcro loj rexpejn Jesucrist.

23 Dxejcti bejnreni guiitz huinäreni. Bacuaareni rediidxre:

“Nuure reapost, näjza reben_gool ni rnibee, näjza rexpejn xquidoo Jesucrist ruxhalnu xtixtios lojtu, resa'nu nani rbäjz guedx Antioquía näjza estad Siria näjza estad Cilicia.

24 Rucuaanu guiitzre sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jiadniireni si'c.

25 Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näjza Pabl, nani sanälaaznu.

26 Agajc balti huält rljazreni nugu'treni Bernabé näjza Pabl, luxh direni guidxejb gusule'reni xtidx Jesucrist.

27 Naj ruxhalnu Judas näjza Silas lojtu. Laareni susule'za guiraa rediidxre lojtu.

28 Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releitis nani nanab rusoobnu rucuaanu lojtu.

29 Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtü nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios.”

30 Dxejcti basadiidx rexpejn Jesucrist Judas näjza Silas huinäreni Pabl näjza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guiitzga lojreni.

31 Che biejn diajg rexpenzit Jesucrist diidx ni caj lo guiitzga, bibalaz-duxhreni sa'csi gulecdxi diidxga lastooreni.

32 Dxejcti basule' Judas näjza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist.

33 Ro'c bia'nreni xchej, dxejcru cuäjb rexpejn Jesucrist gubi'reni te gudee-dreni xtixtios loj reni baxhalreni.

34 Dxejc Silas bejn xhigab jia'nni ro'c.

³⁵ Luxh Pabl nájza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist neñ guiraa reguejdx

³⁶ Che gudejd xhidajl dxej, räjp Pabl lo Bernabé:
—Do'o guibi' lo guiraa reguejdx cadre basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlanj chanäreni Juan ni laa Marcw.

³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisanäj Pabl nájza Bernabé.

³⁹ Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni neñ barcw, sääreni Chipre ni re' galäii nisdoo.

⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäj Diosreni.

⁴¹ Laḷ ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'ruren i xtidx Jesucrist lojreni.

16

Huinä Timoteu Pabl näj Silas

¹ Bidzunḡsac Pabl nájza Silas reguedx Derbe nájza Listra. Ro'c bidxaagreni te xpeñ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw.

² Didxsa'ctis rnii rexpeñ Jesucrist ni yu' Listra nájza Iconio xcuent Timoteu.

³ Rlanj Pabl chanäni Timoteu. Dxejcti basäl Pabl bee Timoteu te gujcti si'c xpeñ Israel, te xhet naadi rexpeñ Israel, sa'csi guiraareni nanchee xtad Timoteu najc beñ griegw.

⁴ Che bidzujñreni cade tej reguejdx, basule'reni xtidx reapost nájza rebeñgool nani rnibee xpeñ Jesucrist guedx Jeurusalén, te gusoob rexpeñ Jesucrist diidx ni bacuaareni lo guijt.

⁵ Bazutijp xtidx Dios lastoo renani huililajz xtidx Jesucrist. Guixe-guixee xhidajlru beñ huililajz xtidx Dios xcuent Jesucrist.

Lo te bacal gunii te niguii lo Pabl

⁶ Che gudejdreni distrit Frigia, nájza estad Galacia, di Sprit Dxan xten Dios nusaan nusule'reni xtidx Jesucrist neñ reguedx Asia.

⁷ Bidzujñtiren i gajxh estad Misia. Dxejc rlanjreni nijreni estad Bitinia, niluxh di Sprit Dxan xten Dios nusaan nijreni ro'c.

⁸ Ni'c gudejdtiren i stelaad estad Misia, bidzujñreni guedx Troas.

⁹ Te yääl si'c lo te bacal bahuii Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlu nuunu.

¹⁰ Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhaḷ nuure te guluiini xtiidxni lo rebeñ Macedonia. Narä, Lucas, ni cagucuaä rediidxre, gusanää Pabl nájza Silas.

Che guyu' Pabl con Silas guedx Filipos

¹¹ Biu'tinu neñ barcw ro' guedx Troas. Bidzunḡnu Samotracia, te yuj ni re' neñ nisdoo. Che bara yääl bidzunḡnu guedx Neápolis. Ro'c biriinu neñ barcw,

¹² bionnu guedx Filipos, guejdx nani sajcu lo estad Macedonia. Guedx romanni. Ro'c bia'nnu tiop choñ dxej.

13 Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiaäd rexpejn Israel te guininäjreni Dios. Ro'c gurejnu, guniinu lo renane' nani bire' ro'c.

14 Lojreni nadxaag te nane' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajn gunaaga Dios si'c rajn rexpejn Israelni. Bacuadiajgni xtidx Jesucrist ni cagusule' Pabl. Gucnäjä Dios nane'ga te huililajzni xtiidxni.

15 Birobnisni, näjza guiraa reni rbäjz rolijzni. Dxejc guniini loonu:

—Palga ruhuiitu guliä rililazä xtidx Dios, coltaa rolijä te ro'c cuääztu.

Lacti gunab nane'ga nuunu, ni'c huijia'nnu rolijzni.

16 Te dxej cheni sionnu cadro rninäj bejn Dios, bidxaagnu te dxa'p nani yu' te bendxab nen lastooni. Rajp rexpaxhuaanni melduxh sa'csi rusule' dxa'pga recos ni gajd gac.

17 Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

18 Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' nen lastoo dxape'ga:

—Xcuent xcälrnibee Jesucrist rniä lojlu: “Birii nen lastoo dxape'ga.”

Lagajc dxejc birii bendxab nen lastoo dxape'ga.

19 Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhaxhreni guiro'preni nez roguii cadro suga' reguxhtis.

20 Che bidzunäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni bieje lo guejdxre.

21 Caguluiireni garenca leii nani digacdi gusoobnu sa'csi najcnu bejn roman.

22 Dxejcti bidxechnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäjlni baar guideb tiejxh guiro'preni.

23 Che gulujx gudinduxhreni Pabl näjza Silas, biäuren nejn latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

24 Basäl guixhajgreni nejn latzguiib. Guyu' ni'reni nejn te baräjd ni sojb gueed te di guxunreni.

25 Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' nejn latzguiib cayolreni.

26 Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni.

27 Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rlajzni nugu'tni lagajc laani, sa'csi naani abadxun reni niäu nejn latzguiib.

28 Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

29 Dxejc gunibee guixhajg biääd te bajl te biu'ni nejn latzguiib. Racsejsni biäädni bazuxhijbni nez loj Pabl näjza nez loj Silas.

30 Dxejcti gulää guixhajgreni nejn latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te guslaa Dios narä lo dojl?

31 Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni.

³³ Lagajc dxejc, garol yääl, huinä guixhajgreni gudiibni dejtzreni cadre batiuug baarreni. Dxejcti batiobnisreni guixhajg näjza guiraa reni yu' rolijzni.

³⁴ Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhaḷ reguxhtis stiop guixhajg räjpni lo guixhajg nani cuanäj latzguiib:

—Basḷaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis gusḷaātu. Naj colchäj, gacnäjä Dios la'tu, saru chäātu.

³⁷ Niluxh räjp Pabl loj reguixhajg:

—Nuure najczanu beḷ roman. Batiäjḷreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäuren nuure neḷ latzguiib. Leii xten roman di gusaan gac rebeḷ roman si'c. Luxh naj rḷajzreni gusḷaaren nuure xhiga'tz. ¡Dinu guirii si'c! Lagajc laaren sujiädsḷääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beḷ roman najc Pabl näjza Silas.

³⁹ Dxejcti biääd reguxhtis, gulääreni Pabl näjza Silas, gunabreni jiäjḷlajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neḷ latzguiib, huijreni rolijz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

17

Cadxecluduxh guiraa rebeḷ Tesalónica

¹ Che gudejdreni reguedx Anfípolis, näjza guedx Apolonia, bidzujḷreni guedx Tesalónica cadre yu' te xquidoo rexpejn Israel.

² Ro'c basule' Pabl xtidx Dios si'c ni rujnpacni. Choḷ sabd, dxej ni rusilajz rexpejn Israel, basule'ni xtidx Dios lojreni.

³ Basule' Pabl xtidx Dios ni caj lo guijtz ni bacuaa reniguii ni gunii xtidx Dios galooli. Caj lo guijtzga: “Nanab ted Crist trabajwduxh, guetni, niluxh sibansacni lo rebeḷgut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beḷ griegw nani rajḷ Dios näjza xhidajḷ reguna griegw ni sajcro huililajz xtiidxni.

⁵ Luxh yu' rexpejn Israel ni di chalilajz, ni bidxecludajz. Batie'reni gaii beḷploj, beḷlatsiaj, bejnreni biey nez galäii. Biu'reni rolijz Jasón caguuilreni Pabl näjza Silas te cuääreni guiro'preni nez lo rebejn.

⁶ Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujḷreni laadxnu,

⁷ luxh badeed Jasón rolijzni jia'nreni. Direni gusoob leii xten César, najreni yu' stee rei ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'.

⁹ Cua' reguxhtis meel lo Jasón nájza lo reexamigwni. Rájpe reguxhtis sudedsacreni meelga che jii Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

Che guyu' Pabl con Silas guedx Berea

¹⁰ Che biu' guxhijñ, baxhalgajc rexpejñ Jesucrist Pabl nájza Silas ste guejdx ni laa Berea. Che bidzujñreni guejdxga, biugajczeni xquidoo rexpejñ Israel.

¹¹ Hueenru najc reben Berea loj reben Tesalónica, sa'csi rbaali lajzreni bacuadiajgzeni xtidx Pabl ni guniini xcuent Jesucrist. Guixe-guixee bilreni guijt cadro caj xtidx Dios te gucbeereni la guli rextidx Pabl.

¹² Xhidajl rexpejñ Israel nájza xhidajl beñ griegw ni sajru, gunaa sigajc niguii, huililajz xtidx Dios.

¹³ Che gucbee rexpejñ Israel ni rbájz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujñreni lo guejdxga bejnreni biey ro'c.

¹⁴ Dxejcti baxhal rexpejñ Jesucrist Pabl, huijni ro' nisdoo. Niluxh Silas nájza Timoteu bia'n guedx Berea.

¹⁵ Dxejcti rebejñ ni guzanáj Pabl huinänini guedx Atenas. Ro'c rájpe Pabl lo rebejñ ni biädñani gudeedreni diidx lo Silas nájza Timoteu jiädgajczeni lojni. Dxejcti rebejñ ni sanä Pabl gubisac guedx Berea.

Guyu' Pabl guedx Atenas

¹⁶ Lal ni gulájz Pabl guedx Atenas, guyuduxhni yärsia' sa'csi bahuiini rajñ guiraa rebejñ rebanájbe nani runchee lagajc bejñ.

¹⁷ Ni'c neñ xquidooreni gudildiidx Pabl rexpejñ Israel nájza rebenzijt ni rajñ Dios si'c rajñ rexpejñ Israelni. Guixe-guixee gudildiidxni chutis bejñ ni re' lo guii.

¹⁸ Dxejcti biäd gaii bejñ lojni. Yu' reni rolduxh guijt ni bacuaa epicúreos, yu'za renani rolduxh guijt ni bacuaa estoicos, gudildiidxreni Pabl. Yu' reni rájpe lo sa'reni:

—¿Xhicha guinii bejñre loonu? Entis naxhal ro'ni.

Yu'zarení rájpe lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgzeni bazä't Pabl “Jesús” nájza “Resurreccion”, ni säloj yälgubansac lo reben gut.

¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Rájpreni lo Pabl:

—Rlaaznu gacbeenu xhi diidx ruluiilu,

²⁰ sa'csi rujylu diidx nani dinu jiabee. Ni'cni bejn huen, basule' diidxre loonu te gacbeenu xhi sälojreni —rájpreni.

²¹ Reben Atenas nájza rebenzijt ni yu' ro'c ruteedreni redxej rniireni didxcoob lo sa'reni, o rucuadiajgzeni didxcoob. Ni'cpac rchaglajzreni.

²² Galäii Areópago huisulii Pabl, rájpreni lojni:

—Colcuadiajg guejbtu, beñ Atenas. Abahuiä xho randuxhtu xhidajl banájbe.

²³ Che siädsää lo guejdxre, bahuiä lo rexpanájbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Rájpe Pabl:

—Diosre benchee guedxliuj nájza guiralii ni yu' lo guedxliuj, sa'csi rnibeeni xhaguibaa nájza guedxliuj. Di Diosre cuääz lo piään niclaza neñ reguidoo ni runchee bejñ.

²⁵ Diza Diosre guiquiin chu gacnäjni sa'csi lagajc Diosre rudeed yäl_nabajn, yäl_nadaan, näjza guiralii nani rquuin reben_guedxliuj.

²⁶ Räj_pabl:

—Guiralii reben_guedxliuj najc rexagdoo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga.

²⁷ Benchee Dios guiraa reben_guedxliuj te quiilreni Dios te chalilajzreni xtiidxni. Luxh suga' Dios gajxh cadetejnu,

²⁸ sa'csi Dios rujn nabajnnu lo guedxliuj, runiidxni rsiaanu lo guedxliuj, runiidxzani rdajlru xcäl_nabañnu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.”

²⁹ Ni'cni, sa'csi najcnu xi'n Dios, di nungäj_l jiennu xhigab najc Dios si'c rebanäj_b ni nac-chee pla't, o guij, o yajg si'ctis ni runchee bejn_rexpanäjbtu.

³⁰ Nen_redxej ni di bejn_niembee Dios, diza Dios niujn castiigwreni. Niluxh naj_gunibee Dios gusiech_lajz guiraa rebejn,

³¹ sa'csi abasoobni te dxej cheni gac Jesús juejz lo guiraa reben_guedxliuj. Agule Diosni gacni juejz, sa'csi rumbechee Jesucrist chu najc ben_guijdx, chuza najc bensa'c. Rnilii Jesucrist rediidx ni najc guliitis. Guläs Dios Jesucrist, baspañsacnini lo rebengut, te gacbeenu rajp Jesucrist yäl_rnibee lo guiraa recos.

³² Che biejn diajg rebejn_ga gubañsac Jesucrist lo rebengut yu' reni baxhiznä_j xtiidxni. Yu'za reni räj_p:

—Sucuadiajgrunu xcuent ni rusule'lu.

³³ Dxejcti birii Pabl lojreni.

³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto.

² Ro'c bidxaagni te dade' ni najc ben_Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpelj Israel guedx Roma. Birinä_j Aquila Priscila chäälni. Biriireni Italia, biäd_dreni guedx Corinto. Bihuii Pablreni,

³ sa'csi lagajc dzuun ni rujnreni rujnzani. Tejsi lajt guläjzreni te bejn_jionreni tejsi dzuun. Runcheereni yuguijd.

⁴ Gasob sabd, dxej ni rusilajz rexpelj Israel, basule' Pabl xtidx Dios nen_xquidoo rexpelj Israel. Rlajzni chalilajz rexpelj Israel näjza ben_griegw ni digac xpejn Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpelj Israel:

—Jesús najc Crist ni runloj rexpeljntu guxha_l Dios.

⁶ Dxejc bidxehnäj rexpelj Israelni, guniyajzreni xtiidxni. Dxejcti gubijb Pabl xhajbni si'c te seen diruni jiureni, cagu_õ'nnireni. Räj_pzani lo rexpelj Israel:

—Lagajc la'tu rajptu dojl_nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac ben_Israel gusule'ä xtidx Jesucrist —räjpni.

⁷ Dxejcti biriini lojreni, huijni rolijz Justo, te bejn ni rajn Dios si'c rajn rexpelj Israelni. Rolijzni sojb cuä' xquidoo rexpelj Israel.

⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolijzni. Xhidajlza ben Corinto huililajz xtidx Jesucrist, dxejcti birobnisreni.

⁹ Gojl te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu,

¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon.

¹³ Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

¹⁴ Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu.

¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶ Gunibee Galíon barilaagw resoldaad rexpejn Israel.

¹⁷ Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

Chon huält huihui Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni nen barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcní si'c te seen yu' xhi diidx bia'nni con Dios.

¹⁹ Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel.

²⁰ Dxejcti che gunabreni jia'n Pabl ro'c xchej, naaddini jia'nni.

²¹ Badeedni xtixtios, räjpni lojreni:

—Nungäjlpac chatedä laníro guedx Jerusalén. Siälsacä ree palga gusaan Dios jiälä.

Biusacni nen barcw, biriini guedx Éfeso.

²² Che bidzujnreni guedx Cesarea, biriini nen barcw, huijni guedx Jerusalén. Che bidzujnreni, guniini xchan lo reapost näjza lo rexpejn Jesucrist. Dxejc huijni guedx Antioquia xten Siria.

²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Nen cade tej reguejdxga, balijdxni rexpejn Jesucrist te gutijpru lajzreni.

Baluii Apolos xtidx Dios nen guedx Éfeso

²⁴ Nen redxejga, te dade' ni laa Apolos bidzujnreni guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios.

²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcäl nabajnni rinälajzni Dios. Niluxh xcuent Jesucrist najntisni yälrobnis xten Juan.

²⁶ Nicla nidxejb Apolos gusloj caniini nen guidoo xten rexpejn Israel. Che biejn diajg Priscila näjza Aquila xtiidxní, huinärenini rolijzreni. Ro'c basule'rurení xtidx Dios nani gajdni gan.

²⁷ Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guijt lo rexpejn Jesucrist ni yu' nen reguejdxga te gacnäjreni Apolos. Gucnäduhx Apolos rebejn nani badeed Dios huililajz xtidx Dios nen reguejdxga,

²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: "Jesús najc Crist nani cayunlojtu guxhal Dios."

19

Guyu' Pabl guedx Éfeso

¹ Laḷ ni guyu' Apolos guedx Corinto, huij Pabl xhidajl reguejdx nen región Asia, dxejcti bidzujñni guedx Éfeso cadre bidxaagni gaii bejn nani huililajz xtidx Dios.

² Gunabdiidx Pabl lojreni:

—Che huililajztu xtidx Dios, ¿la biädlajz Sprit Dxan xten Dios nen lastootu, ä?

Räjpreni lojni:

—Nicla gajd diajgnu jiejn la yu' te Sprit Dxan xten Dios.

³ Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

⁴ Dxejcti räjp Pabl lojreni:

—Guliica bastiobnis Juan che basiejch lajz rebejn xtojḷreni. Räjpza Juan lo rebejn: "Colchalilajz xtidx bejn ni siääd detzä." Bejn ni basä'tni najc Jesucrist —räjp Pabl.

⁵ Che biejn diajgreni rextidx Pabl birobnisreni te gacbee rebejn najczeni xpejn Jesucrist.

⁶ Che batzuub Pabl naani yejczeni, biu' Sprit Dxan xten Dios nen lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni.

⁷ Si'c tzubitio'p dade' gusajc si'c.

⁸ Si'c choñ bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn nen xquidoo rexpejn Israel. Dini nidxejb guniini loj rebejn.

⁹ Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejñni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni.

¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios.

¹¹ Gucnäj Dios Pabl bejñni xhidajl dzunro, remilagwr.

¹² Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebenḷxab lastoo renani yu' benḷxab.

¹³ Dxejcti guyu' gaii beñ Israel nani entis rcansaj, direni cuääz tejsi guejdx. Najczeni bejn ni rbää benḷxab lastoo rebejn. Bejn redee xhigabcoob, naareni cuääreni benḷxab xcuent laj Jesucrist, ni'cni räjpreni lo renani yu' benḷxab nen lastooni:

—Xcuent xcälrnibee Jesucrist nani ruluii Pabl rnibeenu guiriilu neṅ lastoo bejṅga —räjpreni.

¹⁴ Guyu' gajdz xi'n Esceva, te beṅ Israel, nani sajcro lo rebixhojz. Rujn redee dzuun rbääreni rebeṅxab neṅ lastoo rebejṅ.

¹⁵ Che gunii rexi'n Esceva loj beṅxabga si'c, räjp beṅxab ni yu' neṅ lastoo bejṅga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶ Dxejcti bixa't niguii nani yu' beṅxab neṅ lastooni yejc rexi'n Esceva, gudinduxhnireni, basälta'nireni, batiäjsni xhajbreni. Dxejcti baxunreni biriireni neṅ yu'ga, bidxälguijdxzarenı biräsyä' xhajbreni.

¹⁷ Dxejcti guiraa reben Éfeso, rexpejṅ Israel sigajc beṅ griegw, gucbee xho bennäj beṅxab reniguiiga. Bidxebduxh rebejṅga, luxh huä'p xpala'n Jesucrist.

¹⁸ Xhidalduxh reni huililajz xtidx Dios biääd lo rexpejṅ Jesucrist. Cacäjpreni guiraa recos xhet laadi nani rujnreni.

¹⁹ Xhidajl reni najc bidxaa biädnä reguijtz cadre caj yälṅajn xten rebidxaa. Dxejcti base'creni reguijtzga nez loj guiraa rebejṅ. Bejnreni cuent lacti meel sajz reguijtzga. Sajczeni tiubitzuu miḷ melpla't.

²⁰ Xhidalduxh rebejṅ huililajz xtidx Dios. Batijp Dios lastoo rexpejṅni. Gulä'p guiraareni xpala'n Dios.

²¹ Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxechduxh reben Éfeso

²³ Neṅ redxejga, guyuduxh rebejṅ yärsia' sa'csi baluii Pabl xtidx Dios. Direni nichagljaz care'ch xtidx Dios.

²⁴ Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c.

²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu.

²⁶ Abahuiitu niguiire ni laa Pabl. Abiejnza diajgtu xtiidxni. Räjpni lo rebejṅ: “Xhet diosdi najc reni racchee con naa bejṅ.” Guedx Éfeso näjza guideb nación Asia cagusiejchni lajz bejṅ, xhidalduxh bejṅ salilajz xtiidxni.

²⁷ Ni'c ries nitloj xtzunnu palga diru bejṅ sii ni'ch ni riencheenu. Luxh rieszä diru bejṅ jädgajṅ Diana neṅ xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcro, niluxh palga diru rebejṅ gan Diana, pet sinitlojni —räjpni.

²⁸ Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios reben Éfeso.

²⁹ Guideb guejdx guyu' biejy. Dxejcti ruxunreni bidxagsa'reni lo yuj cadre rajc rexjuntreni. Gunaazreni Gayo näjza Aristarco, beṅ Macedonia ni rinajl Pabl.

³⁰ Rlajz Pabl niu'ni cadre bidxagsa' rebejṅ, niluxh di rexpejṅ Jesucrist nusaanni.

³¹ Gaii guxhtis ni rnibee Asia, sa'csi najczeni xamijgw Pabl, baxhalreni diidx lo Pabl, räjpreni:

—Na'c chäälu cadre nadxagsa' rebejn̄ga —räjpreni.

³² Lo rebejn̄ ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejn̄ga nicla gan xhicuent bidxagsa'reni.

³³ Dxejcti gulää rexpejn̄ Israel te dade' ni laa Alejandro lo reben̄ xhidaalga, te guiniini lo rebejn̄. Dxejcti basääbni naani lo rebejn̄ te gac dxi rebejn̄. Rlajz Alejandro guiniini xcuent rexpejn̄ Israel loj guiraa rebejn̄, te di guidxe'chreni lo rexpejn̄ Israel.

³⁴ Niluxh che gucbee rebejn̄ najc Alejandro ben̄ Israel, tiop or guredxaduxhreni, räjpreni:

—Sacduxh Diana xtios reben̄ Éfeso.

³⁵ Dxejcti biääd secretaar xten guejdxga lo rebejn̄, gunibeeni guc dxi rebejn̄, te räjpni lojreni:

—Colcuadiajg, la'tu ben̄ Éfeso, caguidxäj̄l te ben̄ guedxliuj ni di gacbee reben̄ guedx Éfeso rajnpac Diana, nani xhaguibaali bitejb lo guedxliuj.

³⁶ Sa'csi rediidxre najc gulii, nungäj̄l cuedxitu, na'c guntu recos guiidxre.

³⁷ ¿Xhicuent gunaaztu reniguii ni siädñätu ree? Direni gac gubaan ni rbajn̄ recos guidoo, dizareni niniyaj xtiosnu.

³⁸ Naj palga rlajz Demetrio näjza rebejn̄ ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

³⁹ Niluxh palga yu' xhi stee, nanab gac te junt xte reben̄guejdx si'c ni caj lo xleinu.

⁴⁰ Ries jii xquejnu lo gubier, naareni bidojpn̄u te guidxagdil̄nu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn̄, biunejzreni ro'c.

20

Huihuisac Pabl rexpejn̄ Jesucrist ni yu' Macedonia näjza Grecia

¹ Che bire'ch rebejn̄, gurejdx Pabl rexpejn̄ Jesucrist biääd lojni, te bali-jdxnireni. Badeedni xtixtios lojreni. Sä'tini nez reguedx Macedonia.

² Guiraa reguejdxga cadre gudejdni, balijdxni rexpejn̄ Jesucrist, basule'runi xtidx Dios lojreni. Dxejc sääni reguedx Grecia.

³ Che bidzujñni Grecia, bia'nni ro'c choñ bäii. Dxejcti niu' Pabl nen̄ barcw te nijni reguejdx Siria. Niluxh che biejn̄ diajgni cabäz-xhiga'tz rexpejn̄ Israelni te guiniaazrenini, gunaazni nezyuj, gubi'ni nez Macedonia.

⁴ Huinäni Sópater, xi'n Pirios, te ben̄ guedx Berea; näj Aristarco näjza Secondo, ben̄ guedx Tesalónica; näj Gayo, ben̄ guedx Derbe; näj Timoteu; näj Tíquico näjza Trófimo, ben̄ Asia.

⁵ Guiraa redee gunijd loonu, huiläjzreni nuure guedx Troas.

⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn̄ Israel che rajwreni yätxtiil ni di saguij. Biriitinu guejdxga, biu'nu nen̄ barcw te sonnu nez guedx Troas. Gaii dxej gusaanu nen̄ barcw, dxejc bidzujñnu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn̄ Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn̄pacni galoo che gajdni guet. Abejn̄ Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli.

⁸ Yu' cadre bidxagsa'nu najc jiaa yejc stiop yu'. Xhidalduxh balgandeeel cagusanij ro'c.

⁹ Sobga' te bi'n ni laa Eutico ro' te bentaan. La_l ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni.

¹⁰ Dxejcti biäjt Pabl lo yuj cadre bitejb bi'nga. Bazuxhijb Pabl cadre naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni.

¹² Xhetliiduru rajcni bi'nga nani gubañsac, nani guläs Pabl. Bibalazduxhrenei, huisa'nrenini rolijzni.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidx-aagnu Pabl, sa'csi abejn Pabl xhigab ni'ni jiini guejdxga, ro'cli jiu'ni neñ barcw.

¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzuñnu guedx Mitilene.

¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzuñnu guedx Samos. Guedx Trogilio basilaaznu. Che bara stee yääl, bidzuñnu guedx Mileto.

¹⁶ Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzni guidzuñnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷ Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee.

¹⁸ Che bidzujñreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzuñä, nabañnä Dios.

¹⁹ La'tu najntu xho runä xtuun Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh.

²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtü huiluiä xtidx Dios lojtu.

²¹ Basule'ä xtidx Dios lo rexpejn Israel näjza lo rebenzijt ni di gac xpejn Israel. Räpä lojreni nanab gusiechlajzreni, gusa'nreni xtojñreni, nanab chalilajzreni xtidx Jesucrist te gudzucaj Dios xtojñreni.

²² Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c.

²³ Niluxh nanä cade tej reguejdx cadre rdedä rnii Sprit Dxan xten Dios loä sidedä trabajwduxh, siäuä neñ latzguiib guedx Jerusalén.

²⁴ Niluxh dina guidxebä, dizana chanälazduxhä xcälñabañätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojñreni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucbeä dirutu fisac loä, la'tu nani basule'ä xcälñrñibee Dios lojtu.

²⁶ Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni.

²⁷ Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlajz Dios guibanu.

²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruzj te gac gudzucaj Dios xtojlni.

²⁹ Anancheä che rutdiru narä, siäd bejn nani rlajz chalilajztu ste'ca diidx, na'c chalilajztu niclaza jiuu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiiil.

³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlni redee ni rusguee.

³¹ Colhuii te di gusgueereni la'tu. Di jial-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räjpa Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejnni.

³³ Dina niniabä meel, niclaza xhabä che baluiä xtidx Jesucrist lojtu.

³⁴ Anajntu lagajc narä benä dzuun con ñä te bio' xhi gudaunä rexam-igwä.

³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpn.

³⁶ Che gulujx gunii Pabl rediidxga, bazuxhibnäjni rebejnga, guredx-gunabni lo Dios.

³⁷ Dxejcti ronduxh guiraareni gudääzreni guejn Pabl, bachagro'renini.

³⁸ Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'tinu rexpejn Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara.

² Che bidzunu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c.

³ Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunu guedx Tiro cadre gule'creni cargw ni nuu barcwga.

⁴ Ro'c bidxälnu rexpejn Jesucrist. Biannänureni gajdz dxej. Baluii Sprit Dxan xten Diosreni te guniireni lo Pabl, räjpreni:

—Na'c chäälu guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regu-naa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

⁶ Che abazadiidxnu sa'nu, nuure biu'nu neñ barcw, biädla laareni gubisacreni rolizreni.

⁷ Biriitinu guedx Tiro. Che bidzunu ro' guedx Tolemaida, gulujx xpiajnu biäjtnu neñ barcw. Dxejc biohuiinu rexpejn Jesucrist ni yu' guejdxga, biannänureni tejtis yääl.

⁸ Che bara yääl, biriinu guejdxga, sonnu guedx Cesarea. Che bidzunnu guejdxga, bionnu rolijz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolijzni huijia'nnu.

⁹ Yu' tajp xindxapxteb Felipe. Dios badeed diidx guiniireni lo bejn.

¹⁰ Xhidajl dxej guläjznu rolijz Felipe. Lał ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejn ni te guiniini xtidx Dios.

¹¹ Che bidzujn ni loonu, cua' Agabo xsindoor Pabl, baliibni lagajc reni'ni näjza reñaani, najni loonu:

—Anaj Sprit Dxan xten Dios: “Scree sulib rexpejn Israel ni yu' guedx Jerusalén niguii ni najc xtenni sindoorre te gutedrenini ladznāa rebenzijt.”

¹² Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén.

¹³ Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä neñ latzguuib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴ Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlajztis Dios.

¹⁵ Che gudejd redxejga, bilucheenu rexhixtennu, biriinu guejdxga, sontinu guedx Jerusalén.

¹⁶ Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure rolijz te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolijzni, ro'c gulääznu.

Huihui Pabl Jacob

¹⁷ Che bidzunnu guedx Jerusalén, bibalazduxh rexpejn Jesucrist sa'csi siopnu ro'c.

¹⁸ Che bara yääl huinänu Pabl lo Jacob näjza lo renani rnibee guidoo xten rexpejn Jesucrist.

¹⁹ Dxejc gudääz Pablreni, bijni diidx xcuent tebgaj redzuun nani badeed Dios bejn ni che guyunäjni rebenzijt nani di gac xpejn Israel, te biejn diajgrenti xtidx Dios.

²⁰ Che biejn diajgrenti xtidx Pabl, gulä'preni xpala'n Dios, räjpzaren ni lo Pabl: —Guejblu, sa'nu, anajnl lacti xhidalduxh xpejn Israel yu' nani rililajz xtidx Jesucrist luxh rapdaduxhrenti leii xten toMoisés.

²¹ Abiejn diajg rebejnre xcuentlu. Abiejn diajgrenti garenca ruluiilu guiraa rexpejn Israel nani rbäjz neñ reguejdx xten rebenzijt, rulijdxluren ni na'c gusalreni bee rexi'nreni, na'cza chazanäjruren rexcostumbrnu.

²² ¿Xhini'c jiennu? Siejn diajgrenti abidzujnlu ree, dxejc suchagsa'reni te jiädreni lojlu.

²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios.

²⁴ Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgrenti xcuentlu. Te gacbeereni laaca rusooblu xleii toMoisés.

²⁵ Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz neñ guidoo xhi dxej jiädnä tejpgareni te man te ju't rebixhojz remanga lo Díos.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siädä Asia lo Pabl neñ guidoroga. Gunaazreni Pabl, dxejcti gusloj cayujnreni bieje,

²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaare! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrureni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree beñ griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siädä guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

³⁰ Guideb guejdxga guyu' yärsia', bire' beñguixhuj, bixa'treni yejc Pabl, gunaazrenini, gudobxhaxhreni Pabl, gulägajcrenini neñ guidoroga. Biägajc repuetro xten guidoro.

³¹ Lal ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl.

³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc bieje sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni.

³⁵ Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlanjzreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxsaä!

³⁸ An dilu gac niguii ni siädä nación Egipto, nani gudilnäjä gubier, nani huinä lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu bengool, guejbtu resa'ä, näjza la'tu dade'. Gucuadajgtu rextidä —räjpn.

² Che biejn diajgreni caniini didx hebreo, dxidujru guzuj rebejn. Räjp Pabl lojreni:

³ —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj.

⁴ Dxejcti bidxechduxhä loj renani huililajz xtidx Jesucrist, bagu'täzareni. Balibä xhidajl bejn, niguii näjza gunaa, con cadenguiib. Basäuäreni nen latzguiib.

⁵ Bixhojz ni sajcro näjza guiraa rebengool ni sajcro nen xquidootu, sajcu guinii xhini'c benä. Laareni baniidxreni guijt loä. Ni'c huinäa lo rexpejn Israel ni yu' guedx Damasco, cadre hua'a te niniäzä rebejn nani huililajz xtidx Jesucrist. Benä xhigab jädnääreni guedx Jerusalén te jäüreni nen latzguiib, te gusacsíreni rebejn ga.

Gunii Pabl xho huililajzni xtidx Jesucrist (Hch. 9:1-19; 26:12-18)

⁶ Räjzani:

—Dxejc hua'a guedx Damasco. Laidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga.

⁷ Biabrloä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpenä?” najni.

⁸ Dxejcti räpä lojni: “¿Chuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.”

⁹ Rebejn ni sanää bahuiloj bajlga, bidxebreni, niluxh di diajgreni niejn xse' nani gunii loä.

¹⁰ Räpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.”

¹¹ Bastujxh bajlga loä, diru loä nien, ni'cni gunaaz resa'ä naä, sontinu guedx Damasco.

¹² Räjp Pabl:

—Guejdxga guläz te niguii ni laa Ananías. Rusoobni guiraa releii xten toMoisés. Guiraa rexpejn Israel rnii nadalajz lo dade'ga. Biääd Ananías loä.

¹³ Cuä'ä guzujni najni loä: “¡Saulo, betzä, bahuisc!” Lagajc dxejc biajc loä, bahuiä lojni.

¹⁴ Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjzni gunlu, te filojlu Jesucrist, Xindxan Dios, te jiejnza diajglu rextidxpac Jesucrist.

¹⁵ Loj guiraa bejn susule'lu guiraa ni bahuiilu näjza nani biejn diajglu.

¹⁶ ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluiini xtidx Dios lo rebenzajt

¹⁷ 'Che gubi'ä guedx Jerusalén, biu'ä nen guidoro xten rexpejn Israel te guredx-gunabä lo Dios. Lał ni cabedx-canabä lo Dios, astoo gunixcalä,

¹⁸ dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.”

¹⁹ Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni nen latzguiib.

20 Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajn xten renani bagu't Esteban laḷ ni bacuaareni guij."

21 Dxejcti naj Jesucrist loä: "Huij. Suxhalä luj zitduxh. Chäälü lo guiraa rebenzajt ni di gac xpejn Israel."

Bia'n Pabl nen rolijzro xten resoldaad

22 Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjḷ guibajnruni.

23 Sanuutis cabedxa'reni. Gulääreni xcamangwreni, cacuaazareni yuyolḷ jiaa.

24 Dxejcti gunibee comandant lo resoldaad, räjpni:

—Colchanä Pabl nen yuro xtenu. Ro'c colquiin Pabl te guiniini didxgulii, te gacheenu xhicient rbedxaduxh rebejn lojni.

25 Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beḷ roman che gajdtu gachee xhi dojlḷ bejnni, ä? Et si'cti caj lo xleilu.

26 Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beḷ roman.

27 Biädguxuḷ comandant lo Pabl, räjpni:

—¿La gulii najclu beḷ roman, ä?

Räjp Pabl lojni:

—Guliini.

28 Dxejcti räjp comandant:

—Narä badedä xhiroob meel te nacä beḷ roman.

Dxejcti räjp Pabl lojni:

—Narä che goḷäli nacä beḷ roman.

29 Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beḷ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

30 Che bara yääl, rrajz comandant gacheeni xhicient rrajz rexpejn Israel ju't Pabl. Ni'c gunibeeni jääd rebixhojz ni saj cru näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

23

1 Rdxelodzu'tz Pabl lo rebejn ni tre' ro'c laḷ ni räjpni lojnreni:

—Narä gusule'ä tiop diidx lo guejbtu, beḷ Israel, sa'ä. Guideb ni nabaḷnä ruzobä xtidx Dios. Di lastoä guidxejb nez lo Dios —räjp Pabl.

2 Che biejn diajg Ananías, bixhojz ni saj cru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

3 Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo lei. ¿Xhicient rujnlu nani rnii leiiga di nungäjḷ gun bejn? ¿Xhicient gunibeelu guda'preni ro'ä? —räjp Pabl.

4 Reni suga' cuä' Pabl räjp lo Pabl:

—¿La dilu gachee laa bixhojz ni saj cru xten Dios? Na'c guiniyajluni.

5 Dxejcti räjp Pabl lojnreni:

—Rexamigwä, dina niacheä caniä lo bixhojz ni saj cru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtz ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beñ saducee, yu'za reni najc beñ farisee. Dxejc guredxa' Pabl räjpni lojreni:

—Sa'ä, narä nacä te beñ farisee, xi'nza te beñ farisee narä. Rililazä sibansac beñ lo rebengut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee.

⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten beñ. Niluxh refarisee rililajz guiraa rediidxga.

⁹ Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tilnäjnu, dxejc sidxehnäj Diosnu.

¹⁰ Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni yejcn. Dxejcti gunibeeni biäjt resoldaad cadre suga' Pabl. Guideb xtijpreni gulääreni Pabl galäii rebejnnga huinäsaerenini nen yuro xtenreni.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³ Si'cti tiuu niguii bia'n diidxga.

¹⁴ Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidudinu palga dinu guigutx-gaa Pabl —räjpreni—.

¹⁵ Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jädnä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujnni, biu'ni räjpni lo Pabl rediidx ni biejn diajgni.

¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani niäu nen yuro xten resoldaad, gunab loä jädnälaa bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant naa bi'nre, huinäni te laad cadre rut jiejnru diajgni xtiidxreni, dxejc räjpni lojni:

—¿Xhini'c rlanjlu guiniilu loä?

²⁰ Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jädnä guejblu Pabl ro jusgaad guixee. Sujnsireni si'c ni rlanj jiejnru diajgreni diidx xcuent Pabl.

21 Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjtisreni guxhal guejblu diidx sinä guejblu Pabl ro jusgaad.

22 Che biejn diajg comandant diidxga, basaanni sii bi'nga rolijzni, räpxgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

23 Dxejcti gurejdx comandant tiop capitán, räjpni lojreni:

—Colgutojp tiop gayuu soldaad, cháa guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcagaa guxhijñ guiriireni ree.

24 Colquiil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

25 Dxejcti bejn comandant te guijtñ chanäreni lo gubernadoor.

26 Loj guijtñga rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu.

27 Rediidxre rucuaä lo guejblu. Gunaaz rexpejñ Israel niguiire, luxh paru dina nidzunga'cä con resoldaad, nugu'trenini. Che gucebeä najcni beñ roman, guläänuni ro'c.

28 Rlazä niacbeä xhi quej rbe'creni, ni'c huanääni lo junt xten rexpejñ Israel ni rnibee guidoro.

29 Dxejc gucebeä requej ni rbe'creni najc ganax xcuent leii xtenreni, niluxh xhet bejndini te nungäjñ guetni, niclazä nanab jiäuni neñ latzguiib.

30 Che baxhalreni diidx loä cabäzxhiga'tz rexpejñ Israelni te ju'treni dade're, baxhalga'cäni lo guejblu. Agunibeäza jiädle'c rexpejñ Israelre xquejreni lo guejblu. Ni'ctis rniä lo guejblu”, si'c caj lo guijtñ ni bejn comandant.

31 Che biu' guxhijñ, huixii resoldaad Pabl sanärenini guedx Antípatris si'cni gunibee comandant gunreni.

32 Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea.

33 Che bidzujñ redee Cesarea, badeedreni xquijtñ comandant lo gubernadoor, huinäzarenini Pabl lojni te biembeenini.

34 Che gulujñ bilni guijtñga, gunabdiidxni lo Pabl:

—¿Caro siäädlu?

Che gucebeeni siääd Pabl Cilicia,

35 räjpni lo Pabl:

—Guidzujñsi rexpejñ Israel ni cadxechnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

1 Gudejdti gaii dxej, dxejc bidzujñ Ananías, bixhojz ni sajcro, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor.

2 Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacduxh ni cayujñ guejblu.

3 Xquixtiosduxh guejblu, gubernadoor Pels, xcuent guiraa redzunsac'c ni rujñ guejblu guira nejz.

⁴ Luxh na'cru gusieednu guejblu, gucuadiaglaa guejblu tiop diidx.

⁵ Agucebeenu xho najc niguiire. Ben̄guidxduxhni. Cadrotis rijni rujnni bieje lo rexpejn̄ Israel. Laani rnibee te cuaa ni laa nasaren̄, nalajznu rebejn̄ nani rililajz xtid̄x Jesucrist ni biääd gued̄x Nasare't.

⁶ Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijznu.

⁷ Niluxh bidzujn̄ comandant Lisias näjza resoldaad. Diptis badzucajreni niguiiga ladzñaanu.

⁸ Laani gunibeeni lo guejblu jiääd reni rbe'c xquejni. Naj lagajc guejblu saj̄c guiniabdiidx lojni te gachee guejblu guli guiraa requej nani rbe'cnu xcuentni —räjp Tértulo.

⁹ Dxejcti guiraa rexpejn̄ Israel ni suga' ro'c räjp guliica xtid̄x Tértulo.

¹⁰ Dxejcti bejn̄ gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn̄ guejblu yälguxhtis nación̄ Israelre —räjp Pabl—.

¹¹ Gutzbitio'p dxejtis bidzunä gued̄x Jerusalén te saganä Dios. Najn̄ rebejn̄ xhi dxej biu'ä Jerusalén, guyasi guniidxreni diidx.

¹² Nicla tej dina nichagdilä bejn̄ nen̄ guidoro. Nicla tej dina niunä bieje nen̄ reguidobäz, nicla ro nezyuj.

¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni.

¹⁴ Rniliäpac lo guejblu: Rañä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn̄ Israel rniyaj xho basule' Jesucrist gan̄ bejn̄ Dios. Ruzobä guiraali releii xten toMoisés. Rililazä guiraa rextid̄x Dios ni bacuaa reni gunii xtid̄x Dios.

¹⁵ Rililazä xtid̄x Dios si'c rililajzza rebejn̄re xtid̄x Dios. Si'c ni najnreni, si'cza nanä sidzujn̄ te dxej che guibañsac rebeñgut, rebeñguijdx sigajc rebeñsa'c.

¹⁶ Ni'cni racheä laaca nabanä guiraa dxej, di lastoä guidxejb, nicla nez loj bejn̄ niclaza nez loj Dios, sa'csi rut rajc̄di guiliäs dixhii xcuentä.

¹⁷ Räjp Pabl:

—Agujc xchej yu'ä zijt, lajdx garenca bejn̄, naj gubinää meel ni baxhal̄ reben̄ nejzga te gudedäni lo rebejn̄ ni xhet rajpdi. Biädnääza gojn̄ xtenä gudedäni lo Dios.

¹⁸ Ni'c sanää guidoro. Ro'c bidxäjl̄ rexpejn̄ Israel ni siääd Asia narä. Agucnayaä si'c ni rnibee xleiinu. Xhet ben̄xhidajldi suganää, xhetza biejejd̄i cayunä.

¹⁹ ¿Con rebejn̄ga naj? Te cue'creni quej lo guejblu palga yu' xhini'c rdx-echñäjreni narä.

²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebeñgool lo gued̄x Jerusalén —räjp Pabl—.

²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejn̄ lo rebeñgut, ni'c biädnätu narä lo rebejn̄re —si'c guniä lojreni.

²² Che biejn̄ diajg Pels xtid̄x Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiädli comandant Lisias dxejc gunä yälguxhtis —räjp Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlajztisni gunni. Na'cza gudxojn̄ni jiääd rexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc ben Israel. Dxejc gurejdx Pels Pabl te gusule'ru Pabl xtidx Jesucrist.

²⁵ Gunii Pabl xho nanab guibaŋsa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fiini xhi bejnreni. Racslesli Pels tant bidxejbni biejn diajgni diidxga. Räjpnj lo Pabl:

—Huij naj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini.

²⁷ Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcnj gubernadorcoob. Niluxh Pels rlanj chanälajz rexpejn Israelni, ni'c basa'nni niäusijc Pabl.

25

Gunii Pabl xtiidxni lo Festo

¹ Che biu' Festo gujcnj gubernadorcoob xten reguejdxga, bia'nni guedx Cesarea chon dxej. Dxejc biriini ro'c sääni guedx Jerusalén.

² Che bidzujnni guejdxga, rebixhojz nani rnibee näjza reniguii ni saj cru lo rexpejn Israel biäd lo Festo. Gusloj cabe'creni xquej Pabl lojni. Gunabduxhreni lo Festo.

³ sa'csi rlanjreni gunni te huen laareni, guinibeeni jädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezyuj.

⁴ Dxejcti räjp Festo lojreni:

—Suniäu Pabl guedx Cesarea. Di gaclaa guibi'ä guedx Cesarea.

⁵ Suchää reniguii ni saj cru lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnni —räjpnj.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biäd Pabl lojni.

⁷ Che bidzujn Pabl lojni, biäd rexpejn Israel nani biäd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlanjni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjł cue'creni xquejä lo guejblu, xhet guedx Jerusaléni. Ananchee guejblu xhet latsiajdi benä lo rexpejn Israel.

¹¹ Palga nacä te beŋguijdx, o palga yu' xhi latsiaj benä te nungäjł guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi saj guted narä ladzŋaareni. Suchale'creni xquejä lo César nani najc reii xten reben roman —räjp Pabl.

¹² Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäälu loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujn reii Agripa näjza chäälni Berenice guedx Cesarea. Biädhuiireni gubernadoor Festo.

¹⁴ Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels.

¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni.

¹⁶ Röpä lojreni: “Di leii xten nación roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.”

¹⁷ Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä.

¹⁸ Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl.

¹⁹ Alga cadilnäjrenini xcuent xleiireni, xcostumbrreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut.

²⁰ Guxii nanä xcuent sa' diidxre, ni'cni gunabdixä lo Pabl top sicäjbni chanääni guedx Jerusalén te ro'c cue'c rexpejn Israel xquejni.

²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni la ni gac guxhaläni lo César —räjp Festo.

²² Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpn.

²³ Che bara yääl, biääd Agripa näjza Berenice, luxh sucheduxhreni. Näjza recapitän ni sajcro näjza rebejn ni sajcro lo guejdxga biu'reni nen yuro xten Festo. Dxejc gunibee Festo biääd Pabl.

²⁴ Dxejcti räjp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni.

²⁵ Niluxh narä rchaloä xhet bejndini te nungäjł guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni.

²⁶ Naj dina ganä xhini'c gucuaä lo guiitz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guiitz ni chää lo César.

²⁷ Narä runä xhigab di nungäjł guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpn:

² —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel.

³ Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gucua-diaglaa guejblu guiraa rextidxä.

⁴ Rāj̄pza Pabl:

—Guiraa rexpejn̄ Israel nan̄chee xho nacä che gucäli biuux guedx Jerusalén. Galooli najc guedx Jerusalén ladxä.

⁵ Galooliza numbeereni narä, malaii guicäj̄preni gucä te farisee nani bazobduxhru xleiinu si'cni rililajznu.

⁶ Naj suga'a ree, rlanjzreni jiäuä sa'csi rililazä diidx nani bia'n Dios con retoxtadgoldoonu.

⁷ Guitzubitiop cuaa rexpejn̄ Israel huililajz siliäs Dios guiraa rebengut te guibaṅsacreni. Ni'cni bazuxhijbreni lo Dios dxej-yääl. Naj rniliä lo guejblu rei Agripa, sa'csi rililazä siliäs Dios guiraa rebengut te guibaṅsacreni, ni'cni rlanjzreni gusäureni narä.

⁸ Palga abejn Dios xhigab guiliäsni guiraa rebengut te guibaṅsacreni, ¿xhicuent di lajztu chalii xtidx Dios?

⁹ Rāj̄pza Pabl:

—Narä benäza xhigab galoo nanabpac guidxe'chä loj rexpejn̄ Jesucrist ni siäd Nazare't, ni'c batedäreni trabajwduxh basäuäreni neṅ latzguiib.

¹⁰ Guiraa recosre benäza guedx Jerusalén. Baniidx rebixhojz ni rnibee guijt̄z loä te basäuä rexpejn̄ Jesucrist neṅ latzguiib. Che biäureni neṅ latzguiib, narä gule'cä xquejreni te gujtreni.

¹¹ Balti huält basacsiduxhäreni lagajc neṅ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzij̄t te ro'c huisacsíä rexpejn̄ Jesucrist.

(Hch. 9:1-19; 22:6-16)

¹² Rāj̄pza Pabl:

—Ni'c sa'a nez guedx Damasco, ca'a guijt̄z ni baniidx rebixhojz ni rnibee.

¹³ Rniliä lo guejblu, rei, si'cti läidxej, bahuiä te bajl ni siäd xhaguibaali. Rsanijruni loj gubijdx. Basanijni guideb gabi cadre suga'a näjza reni sanää.

¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuaní' yejc garu'ch.”

¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu.

¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn̄ guiraa ni bahuiilu nadxej, näjza guiraa recos ni churu guluiä lojlu.

¹⁷ Naj suxhalälu loj rexpejn̄ Israel näjza lo rebenz̄ij̄t nani di gac xpejn̄ Israel. Che gusacsí rexpejn̄ Israel näjza rebenz̄ij̄t luj, sacnäduxhälu, te di ju'treni luj.

¹⁸ Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Ben̄dxab ni rnibee reben̄dxab, sa'csi susoobreni xtidx Dios. Che chalilajzreni rextidxä, sudzucaj Dios xtoj̄lreni. Dxejcti suchaag Diosreni loj renani anajc beṅnaya sa'csi basoobreni xtidx Dios, huililajzreni xtidxä.”

¹⁹ Rāj̄pza Pabl:

—Ni'cni rniliä lo guejblu, rei Agripa, cayunä si'cni naj Jesucrist loä gunä che baluilojni loä.

²⁰ Gunixgää xtiidxni lo reben̄ Damasco. Räpä lojreni: “Colgusiechlajz, colgusoob xtidx Dios. Colyujn dzunsa'c te gacbee rebejn̄ abasiechlajztu, arusoobtu xtidx Dios.” Si'cza guniä lo reben̄ Jerusalén, näjza lo rebejn̄ ni yu' reguedx Judea, näjza lo rebenz̄ij̄t ni di gac xpejn̄ Israel.

²¹ Sa'csi benä si'c, gunaaz rexpejn̄ Israel narä neṅ guidoro, rlanjzreni nugu'treni narä.

²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtznani bacuaa to Moisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj.

²³ Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo rebengut, ganiddooza laani suluini loj rexpejn Israel näjza loj guiraa rebenzajt guliipac xtidx Dios, sibañsac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ Lañ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtznani'c cayajc yejclu.

²⁵ Dxejcti räjp Pabl lojni:

—Rniliä lo guejblu dad gubernador Festo, xhet rajpdi yecä. Ganax didxlii cania.

²⁶ Ree suga' reii Agripa. Laani nancheeni guiraa rediidxre, ni'c guyasi cania rediidxre lojni, dizana guidxebä sa'csi anajnni guli guiraa ni gujc, sa'csi xhet xhiga'tzdi gujcreni.

²⁷ Guejblu reii Agripa, ¿la rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹ Räjp Pabl lojni:

—Xhet najpdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, näjgajza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni.

³¹ Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jäuni.

³² Dxejcti räjp Agripa lo Festo:

—Paru dini niniab chääni lo César, sajcnuslaanuni.

27

Birii Pabl säa nez guedx Roma

¹ Basoobtireni dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto.

² Näjza te dade' ni laa Aristarco guzaj, siädni guedx Tesalónica xten Macedonia. Biu'nu neñ barcw ro' guedx Cesarea. Barcwga siäd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia.

³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihii Pabl reexamigwni ni yu' guejdxga te bahuiireni Pabl, badeedreni xhi rquiinni.

⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjgwnu, te guxiiru rda' bej loonu.

⁵ Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia.

⁶ Ro'c bidxäjl capitán xten resoldaad stee barcw ni siäd guedx Alejandría. Agojl chää barcwga Italia. Bateedtini guiraanu lo barcwga.

⁷ Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh

bideednu xladbäjgw yuj Creta ni tre' lo nisdoo xladbeenu. Gudejdn̄u gued̄x Salmón.

⁸ Dxejcti chäiduxh sonnu nen̄ barcw lo nisdoo nez cuä' yu Creta; si'ctis gujc bidzunn̄u te lajt ro' nisdoo ni laa Buenos Puertos cadro guxii säab bej. Gajxh ro'c tre' gued̄x Lasea.

⁹ Agujc balti dxej cayaclaanu, luxh agudejdz̄a dxej ni rucua'n rexpejn̄ Israel, guxii riääd̄x chaa ijz. Rebäire di bejn̄ chää nen̄ barcw sa'csi yuduxh riesgw lo nisdoo, ni'c balijdx̄ Pabl rebejn̄,

¹⁰ räjpni lojreni:

—Rexamigwä, runxgaä bis guejbtu, palga chonnu nen̄ barcw chanuunu xnejznu, sajc te liädx̄duxh. Sinitloj cargw, sibijxh barcw, luxh silo' xhidajl bejn̄, —räjpni.

¹¹ Niluxh di capitán xten resoldaad niu xtidx̄ Pabl. Biuruni xtidx̄ nani rusaj barcw näjza xtidx̄ baxhuaan xten barcw.

¹² Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu gued̄x Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta.

¹⁴ Niluxh di niacaa gusloj te nisguipeduxh birii nez redajn̄ xten Creta.

¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni.

¹⁶ Siädgobiuj barcw te canuu. Che bidzunn̄u stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu nen̄ barcw.

¹⁷ Che basäl̄nu canuu nen̄ barcw, cua'reni gaii duro te baliibreni barcwro, bateedreni gaii duu xque' barcw te na'c guibil̄ni. Cadxejbreni te di chachu' barcw lo yujxh ni laa Sirte ni yu' nen̄ nisdoo. Ni'c guläjtreni ladro ni rniaaz bej te rusajni barcw, gudixhreni lajdḡa nen̄ barcw. Sanäti beduxhga barcw cadrotis rlajzni.

¹⁸ Che bara yääl caguscuä' beduxh barcw lo nisdoo. Sas basäl̄reni che'n cargw lo nisdoo te bicharu barcw.

¹⁹ Ni riojn̄ dxej, lagajc laareni basäl̄reni lo nisdoo guiraa xtrast barcw.

²⁰ Che agujc balti dxej niäu lo gubijdx̄, diza rebale' nien̄ xhaguibaa sa'csi lajtis cayajb nisguipeduxhga, biennu xhigab guiraanu sejt̄nu.

²¹ Xchero rut rlajzdi gau. Dxejc gusuj Pabl galäii rebejn̄ räjpni lojreni:

—Rexamigwä, paru nucuadiajg guejbtu xtidx̄ä, na'c niriitu xyuj Creta, di liääd̄xre niajc, dizanu nidejd trabajwduxhre.

²² Niluxh colcued̄x̄i lastootu. Niclatej bejn̄ ni siääd lo barcw di guet. Barcwtis sinitloj.

²³ Nacä te xpejn̄ Dios, runä xhitis ni rnibeeni gunä. Nayääl biädsuj te xangl Dios cuä'ä,

²⁴ najni loä: “Na'c guidxejblu Pabl. Nanabpac chääl̄u lo reii César. ¡Bahuilaa! Abasalajz Dioslu reni siäd̄näl̄u; nicla tej reni yu' nen̄ barcwre di guet”, najni loä.

²⁵ Ni'cni caniä lo guejbtu, na'c guidxejbtu. Narä rililazä xtidx̄ Dios. Rililazä sioj̄b xtidx̄ Dios si'c ni naj xangl Dios loä.

²⁶ Niluxh yu' cadro chalaj barcw lo yujxh nen̄ nisdoo gajxh lo te yuje' ni tre' nen̄ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj,

²⁸ ni'c bastejbreni te guuib lo duu xhajn nisdoo, te barexhreni ro'c, dxejc gucbeereni najc nisdoo jiät si'cti galbitzubixho'p metr. Che guzaj barcw stelabäze', bastebsacreni guuib con duu xajn nisdoo, dxejc gucbeereni ro'c najc nisdoo jiät si'cti galbigajdz metr.

²⁹ Dxejc bidxejbreni te di chalay barcw yejc reguij. Bacuaatireni tajp guibro si'c guench ni naliib te caden te ru'reni nen yujxh te ruscuääzreni barcw, te jia'nni tejsi lajt. Dxejc rlanjreni malaii jianiija lo guedxliuj.

³⁰ Dxejcti gulät remos canuu lo nisdoo cayujnsireni si'cni chastejbreni stee guench guuib lo nisdoo, niluxh rlanjreni guxunreni guidon la sajc guidzujñreni ro' nisdoo.

³¹ Dxejcti räjp Pabl lo capitán näjza lo resoldaad:

—Palga di redee jia'n nen barcw, di gacdi guslaatu xcälñabajñtu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga.

³³ Che gusloj cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau.

³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

³⁵ Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini.

³⁶ Dxejc bibaa-lajzreni, näjza laareni gusloj cayajwreni.

³⁷ Nuunu najcnu tiop gayuu gayonbitzubixho'p bejn ni yu' nen barcwga.

³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahuiireni cadro rdzujñ te gueubäz ro' nisdoo cadro yu' xhiroob yujxh ro' nisdoo. Rlanjreni nusiureni barcw ro'c.

⁴⁰ Dxejcti baslaareni guidap guench guuib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo.

⁴¹ Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw.

⁴² Dxejcti rlanj resoldaad nugu't repres te di guixoobreni lo nis guxunreni.

⁴³ Niluxh di rlanj capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujñreni lo yujxh.

⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujñ guiragajc rebejn lo yujxh ro' nisdoo. Nadaanreni bidzujñreni lo yujxhga.

28

Bidzujñ Pabl lo yuj ni laa Malta ni re' lo nisdoo

¹ Che bidzujñnu lo yuj ni tre' lo nisdoo, biembeenu yujga najc ni laa Malta.

² Gucnäj rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij.

³ Ca' Pabl te däaz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni ñaa Pabl.

⁴ Che bahuui reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtnei naj.

⁵ Gubijb Pabl naani dxejcti bitejb bälga lo guiboo. Xhet gujcdi naa Pabl.

⁶ Dxejc reben ro'c cabäjz fiireni la sisiäguj naa Pabl o laa sejtnei. Xchero bidxelojreni. Che bahuireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni chon dxej. Huenduxh gujc dade'ga, baniidxni guiraa ni biquiinnu.

⁸ Naga' xtaad Publio cayacxhuuni, yu'ni xliaa, cayajczani yobrejn. Huihuui Pablni. Guredx-gunab Pabl lo Dios, dxejc batzuub Pabl naani yejcti, basiac-gajcni.

⁹ Che gucbee rebenguejdxga abasiajcti ben racxhuuga, bidzunäjreni ben racxhuu lo Pabl, basiajc Pabl guiraareni.

¹⁰ Ni'c banidx-xliaareni xhidalduxh xhicos, luxh che biriinu ro'c, baniidxreni giralii recos ni biquiinnu nen barcw.

Bidzujn Pabl guedx Roma

¹¹ Agujc chon bäii yu'nu ro'c che biu'nu nen te barcw ni siäd Alejandría. Lagajc ro'c bateed barcwga rebänajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus.

¹² Biriinu Malta sonnu nen barcw nez guedx Siracusa. Ro'c bia'nnu chon dxej.

¹³ Dxejcti biusacnu nen barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu nen barcw. Bara yääl bidzunnu guedx Puteoli.

¹⁴ Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma.

¹⁵ Che gucbee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuui Pabl lojreni, guzutijp lastooni, badeedni xquixtios lo Dios.

¹⁶ Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluu Pabl xtidx Dios lo reben Roma

¹⁷ Che gudejd chon dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejbtu rexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä nen latzguiib guedx Jerusalén, dxejcti bateedreni narä ladznaa reroman.

¹⁸ Che biejn diajgreni xtidxä, rlijz reguxhtis roman nuslaa narä sa'csi xhet benädi te nugu'treni narä.

¹⁹ Niluxh naaddi rexpejn Israel guslaareni narä, gunabätis lojpac rei César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä.

²⁰ Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac reben_gut, ni'c nalibä caden_{re}.

²¹ Dxejcti räjpreni lojni:

—Niäla tej guijt_z gajd reguxhtis xten reguedx Judea guxha_l loonu xcuentlu, gajdza rexepejn_{nu} ni bidzuj_n ree jiädsa'n diid_x xhet laadi bejnlu.

²² Rlajznu jiejn diajgnu xtiid_xlu, don xhi naalu, sa'csi racbeenu xhidaj_l lajt rniyajreni redid_xcoob xten Jesucrist —räjpreni.

²³ Guletireni te dxej guidxagsa'reni. Che bidzuj_n dxejga, bidxagsa' xhidalduxh bejn ne_n yu' cadre rbäjz Pabl. Guideb dxej basule' Pabl xtid_x Dios lojreni. Basule'ni xho rnibee Dios lojreni. Con rediid_x ni caj lo xleii toMoisés näjza diid_x ni bacuaa reniguii nani gunii xtid_x Dios basule'ni Jesús najc Crist nani galooli cabäjz reben_{re} Israel jiäd.

²⁴ Yu' reni huililajz xtid_x Pabl, yu'za reni di nililajz xtiid_xni.

²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaiás che badeed Sprit D_xan xten Dios rediid_xre guniini, räjpni lo rextadgoldoonu:

²⁶ Huij, gunii lo rebejn_{re}, scree gojz lojreni:

Siejn diajgtu xtid_xä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejn_{re} sa'csi di rlajzreni chalilajzreni xtid_xä.

Direni cuadiajg xtid_xä sa'csi di rlajzreni jiejn diajgreni diid_x ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl_l te gudzucaj Dios xtoj_lreni.

²⁸ Räjp Pabl lojreni:

—Colgacbee. Näjli sisiule' xtid_x Dios lo reben_zijt ni di gac xpejn Israel te gusiejch lajzreni, te gudzucaj Dios xtoj_lreni. Rniliäpac lojtu, sililajzreni rextid_x Dios.

²⁹ Che gulujx gunii Pabl rediid_xga lojreni, ensilaareni gusloj cadxagdij_l sa'reni la_l ni sääreni.

³⁰ Tiop ijz guläjz Pabl guejdxga ne_n yu' ni cualaani. Biuni guiralii rebejn_{re} ni biäd rolijzni.

³¹ Lo guiraa rebejn_{ga} basule'ni xho rnibee Dios lojreni. Bijzani diid_xxcuent redzuun nani bejn Jesucrist. Di lastooni nidxejb, rutza badxojndi guniini.

Guijtz Nani Bacuaa Pabl Lo Rebeņ Roman

Rucuaa Pabl lo rebeņ guidoo neņ guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebeņ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprove'tga.

³ Rediidx ni rusule'ä najc xcuent Jesucrist, Xi'n Dios, ni najc xagdoo torei David xcuent tiejxhni.

⁴ Xcuent Xsprit Dxan Dad Jesucrist, najcni Xi'npac Dios. Badeed Dios yäl̄rnibee lojni, ni'cni gubansacni lo rebeņgut.

⁵ Laani gucnäjni narä, guleni narä te gusule'ä xtiidxni te guzobiajgtu, te chalilajz rebeņ ni rej guideb guedxliuj xtiidxni.

⁶ Luxh nadxaagtu loj rebeņ ni guleni te chalilajzreni xtiidxni.

⁷ Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu beņdxan. Gacnäj Dios ni najc Xdadnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruju beņ diidx xcuent xcäl̄rililajztu.

⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist.

¹⁰ Sanuutis canabä lojni, top sajc jädhuiä lojtu si'cni rlazä gunä agujc xchejli.

¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni.

¹² Nalajznu, te gustioobnu lajz sa'nu xcäl̄rililajz xtidx Dios xten sa'nu.

¹³ Rebetzä rlazä gacbeetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru beņ xtidx Dios sigajcni salilajzreni guiralajt cadro hua'a loj rebeņ ni di gac xpen Israel.

¹⁴ Nungäj̄lpac gusule'ä xtidx Dios loj rebeņ nani rnii garen-garen didxsaj, sigajc loj rebeņ griegw, loj renani nayääl, sigajc loj rebeņ najn.

¹⁵ Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcäl̄rnibee xtidx Dios

¹⁶ Sa'csi dina guituiä xcuent xtidx Dios, sa'csi najcni yäl̄rnibee xten Dios te guslaani lo dojl̄ chutis beņ nani rlazchalilajz xtiidxni, ganidtoo reni najc rexepeņ Israel, dxejcti näjza rebeņ ni di gac xpen Israel.

¹⁷ Sa'csi xtidx Dios rusule' xho nanab chalilajz te beņ te gacni te beņsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beņ xtidx Dios, najcni te beņnaya nez lo Dios, nabaņnäjni Dios xcuent xcäl̄rililajzni."

Rextojl̄ beņ

¹⁸ Xcäl̄rdxe'ch Dios nani yu' xhaguibaa siajbni yejc rebeņ nani gun dojl̄, nani rlazgun cosguijdx, nani di gusaan guisieed sabej̄nreni didxgulii.

¹⁹ Sa'csi anancheereni nani sajc gan beņ xcuent Dios, ni'cni najnreni rajpreni dojl̄, sa'csi ruluipac Dios na'c gunreni dojl̄.

²⁰ Cheni birixtiejli guedxliuj, recos nani di gacdi fii beņ xcuent Dios, si'c xcäl̄rnibeeni ni najc par tejpas, si'c xtujxh xtenni, huenliisi ruzeņreni sa'csi ruluilojreni recos ni ruzeņ nani benchee Dios. Guiraa reni'c ruluiloj najcni

Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlaǰz Dios gunreni.

²¹ Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga guyalajz gujcreni, bicäyǰ xcäriejnreni, naareni hueen najc gunreni si'ctis ni jiajb yejcreni, si'cni rsia' laǰzreni neñ lastooreni.

²² Caniireni nanduxhreni, per direni gan, nayäälreni.

²³ Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

²⁴ Ni'cni gulälaz Diosreni, basaanni gunreni si'ctis ni rlaǰzreni. Bejnreni dojl con resa'reni.

²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbreni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujǰ xtenreni. Diru regunaa guesnäǰ niguii, lagajc sagunaareni resnäǰreni.

²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rlaǰzreni jiureni Dios, basaanti Dios suyu' cosguijdx̄tis xcäriejnreni, te chanuutisreni lo xcällatsiajreni, rujnreni recos ni xhet laadi.

²⁹ Guidxareni dojl, näjza cosguijdx̄, näǰ yälruguilajz xhixten sa'reni; rugu'treni bejn, rujnreni yälrsiäblajz, rucuanäǰreni resa'reni, rusgueereni sa'reni, rdxechnäǰreni sa'reni, rniizareni didxxhii.

³⁰ Rniyaj sa'reni, rdxe'chreni lo Dios, guyalajzreni, dipacreni guitujǰ, rliä'preni lagajc xpala'nreni, entis latsiacooob rbäxtiejreni, guyalajzreni lo xcuzajnreni,

³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjl gacni, dizareni gulaslajz sa'reni.

³² Luxh mase agucbeereni gun Dios yälguxhtis lojreni, najnzareni nungäjl guetpac renani rujn recosre, nicla jiureni, rujnreni guiraa recosguijdx̄re, luxh rbaali laǰzreni richunäǰreni rebejn ni rujnza recosguijdx̄ga.

2

Dios rujn yälguxhtis con didxguliipac

¹ Ni'cni, ¿canejz chäätu, la'tu beñguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga.

² Nancheenu sujn Dios yälguxhtissa'c loj renani rujn sa' dojlga.

³ Beñ guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguxhtis lojlu xcuent xtojllu, ä?

⁴ O ¿la rbälazlu ni rujn Dios, najcni huenduxh, lacti guroob najc xcälrulaslajzni, rapduxhzani pasens? ¿La dilu gan dee najc ni gacnäǰlu gusiechlajzlu te guibicajlu lo dojl, ä?

⁵ Luxh sa'csi nadduxhlu, di lastoolu guigoodz te gusiechlajzlu, cagutajllu yälguxhtis ni gaclu che guidzujn dxej ni gun Dios yälguxhtis loj reben guedxliuj,

⁶ siguijx Dios loj tejgatu xcuent dzuun nani bejn tejgatu.

⁷ Loj rebejn nani rlanjtisreni guibansa'c, ni gusoob xtiidxni, sudeed Dios yäl nabajn par tejpas sa'csi gudiilreni xhaniduj näjza go'preni xpala'nreni loj Dios, rlanjreni guibajnreni loj Dios par tejpas.

⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoobreni reyällatsiaj, redidxguijdx.

⁹ Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpən Israel, dxejcti näjza reben griegw.

¹⁰ Loj guiraa rebejn nani rujn cos-hueen, sudeed Dios xhaniduj, näjza bala'n, näjza yäl rbecdxi lastooreni, ganid rexpən Israel, dxejcti näjza reben griegw.

¹¹ Sa'csi tebloj najc guiraasi rebejn nez loj Dios.

¹² Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yäl guxhtisreni xcuent xtojreni.

¹³ Xhet ganaxdi renani rucuadajgtis xleii Moisés najc bennaya nez loj Dios; rebejn ni rusoobpac rexleii to Moisés, reni'c najc bennaya loj Dios.

¹⁴ Yu' xhidal bejn ni di gumbee xleii to Moisés, dizareni gac rexpən Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni.

¹⁵ Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl.

¹⁶ Guiraa recosre sajc che guidzujn dxej ni gun Dios yäl guxhtis guiraa rehxigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpən Israel näj xleii to Moisés

¹⁷ Luj ni laalu xpen Israel, ni rniilu sanäpaclu xleii to Moisés, rniduxhlu najclu xpen Dios,

¹⁸ rniilu nancheezalu xhini'c rlanj Dios gunlu, anajnzalu xhini'c najc hueenru sa'csi bisiedsa'cpaclu leii.

¹⁹ Rchalolu sajc guluiilu nezyusa'c lo rebejn nani najc si'c lotiä'p, sajc guzanijl xläriejn reni nacäy xläriejnreni.

²⁰ Rchalolu najclu maestr lo renani nayääl, najczalu maestr lo rebuux, sa'csi nansa'clu leii, luxh lojni caj guiraa yäl najn näjza guiraa didxguliipac.

²¹ Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlu?

²² Luj nani rniilu na'c guesnäjni te ni di gac chäälni, ¿la resnäjl nani di gac chäällu, ä? Rdxechlu xcuent rebanäjb, ¿xhicuent rbääl xhicos nen xquidoo rebanäjb, ä?

²³ Luj rlanjzlu chä'p xpala'nlu sa'csi najnlu leii, ¿la rusanxtujylu Dios sa'csi dilu gusoob xtidx leiiga, ä?

²⁴ Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

²⁵ Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl.

²⁶ Ni'cni palga te bejn ni di chu beega, luxh rusoobni guirliipac xtidx leiiga, ¿la di gacdi guchaagni cuent najcni si'c te nani yu' beega, ä?

²⁷ Bejn nani di chu beega, luxh rililajzni guiraliipac xtidx leiiga, sujnni yäl guxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl.

²⁸ Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga.

²⁹ Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejndi.

3

¹ ¿Xhini'c sacnäy te bejn najcni te rexpen Israel, ä? O ¿xhi sajc chuni beega?

² ¡Empac sacduxhni! Ganidtoo, sa'csi loj rexpen Israel badeed Dios xtiidxni.

³ Mase yu' renani di nililajz diidxga, ¿la ni'cni xhet sajcni diidx ni bia'n Dios loj rexpejni, ä?

⁴ ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu suluii laaca rujnlu,

te che gaclu yälguxhtis,

nicla tej xtojlu di guidxäjl.

⁵ Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujni latsiaj loonu, ä? (Caniä si'c te bejn guedxliuj naj.)

⁶ ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

⁷ Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bendojl?

⁸ Yu'za bejn ni canii didx-xhii, najreni cayäjpnu lo rebejn: “Colyejn cosguijdx te guiluilojni recoshuen.” Per rebejn ni canii si'c sidzujn dxej gacreni yälguxhtis.

Guiraanu najcnu bendojl

⁹ ¿Dxejca'? ¿La najcnu benhuenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu'reni lo dojl.

¹⁰ Si'cni caj lo guiitz:

Ruti te beñsa'c, nicla tejni.

¹¹ Ruti te bejn ni racbee,

ruti chu tej nani rguuil Dios.

¹² Guiragajcreni abirii lo xnejz Dios,

teblojsi xhet sajcdireni.

Ruti chu tej ni rujn cossa'c, nicla tejni.

¹³ Ro'reni rii ganax didxguijdx,

najcni si'c te baa ni naxal,

rusgueereni con lujdxreni,

didxlatsiaj rii ro'reni najcni si'c benen ni yu' ro' te bälñialajz.

¹⁴ Ro'reni entis cague,

entis canii didxrdxe'ch lo sa'reni.

¹⁵ Ni'reni ruxunli saxhe' xtiejn sa'reni.

¹⁶ Cadrotis rijreni rujnreni latsiaj,

ruteedreni sa'reni trabajw.

¹⁷ Direni gumbee nezyuj ni ruscuedxilajz.

¹⁸ Niclaza guidxelojreni Dios.

¹⁹ Racbeenu najc rediidx nani caj lo xleii Dios par rebejn ni rnibee leii lojreni, te jäüu ro' guiralii rebejn, te guiraa reben guedxliuj gacbeereni yu' xtojreni nez loj Dios.

²⁰ Sa'csi mase gusoob bejn guira'ti diidx ni caj lo leii, di leiiga gudzucaj xtoj_l bejn_{ga}, sa'csi leiiga najc nani guluii dojl_l ni yu' nen_l lastooni.

Ruslaa Dios lo dojl_l xcuent yäl_lrililajz xtiidxni

²¹ Naj ruluii Dios stee mood guibicaj xtoj_lnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn_l nani gunii xtidx Dios galoo.

²² Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni.

²³ Sa'csi guiralii rebejn_l guedxliuj abanijt lo Dios, direni guiga' guidzuj_lreni lo xnezyuj Dios.

²⁴ Niluxh balaslajz Dios nuunu, banidxxlia'ni loonu yäl_lnabannaya nez loj Dios sa'csi Jesucristis gudijx yäl_lguxhtis xten dojl_l che baxhe'ni xtiejni lo cruzj te badzucajni xtoj_lnu.

²⁵ Baxha_l Dios xi'nni, Jesucrist, te cuajni lo cruzj nez loj rebejn_l te si'c gudi-jxni guiraa rextoj_l chutis bejn_l ni rililajz xtidx Dios xcuent xtiejn Jesucrist. Si'c bejn Dios te guluiini xho guiban_lnaya bejn_l lojni. Galoo gojptis Dios pasens rebejn_l, dini niujn yäl_lguxhtis rextoj_lreni,

²⁶ sa'csi acanajn Dios guc gunni yäl_lguxhtis redojl_lga, te si'c guiluini xcäl_lnayani nez loj guiraa rebejn_l, te Diospac gunnaya nez lojni chutis ni rililajz xtidx Jesucrist.

²⁷ Ni'cni ¿con yäl_lnaro? ¿Con yäl_lbindaan? ¡Xhet sajc dini! ¿Xhi leii rudzucaj xtoj_lnu? ¿La leii najc ni rnii jiennu dzunsa'c, ä? ¡Dini gac si'c! Yu' tejtis leii ni rudzucaj dojl_l, nani rnii chalilajztis bejn_l xtidx Jesucrist.

²⁸ Dxejc sajc guiniä lojtu chutis bejn_l sajc gac naya nez loj Dios sa'csi rililajzni xtidx Jesucrist, xhet sa'csi rujni redzunsa'c ni caj lo leii.

²⁹ ¿La najc Dios Xtiooztis rexpenn_l Israel, ä? ¿La dini gac näjza Dios xten rebejn_l ni di gac xpen_l Israel? ¡Xho dini gac! Najcni Dios xten guirop cuaa bejn_l.

³⁰ Ruti chu stee Dios, tejtis Dios yu'. Ruslaani lo dojl_l rebejn_l ni guyu' bee sa'csi huililajzreni xtiidxni, sigajcza ruslaani lo dojl_l rebejn_l ni xhet beedi guyu' sa'csi huililajzreni xtiidxni.

³¹ ¿La rudzucajnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

4

Xcäl_lrililajz toAbram

¹ ¿Xhini'c sajc guiniinu xcuent toxtadgoldoonu, Abram?

² Paru niajc toAbram be_lnaya nez loj Dios por redzuun ni bejni, pet sajc guibalazduxhni, per xhet nez lojdi Dios.

³ ¿Xhini'c caj lo xtidx Dios? Caj rediidxre:

Huililajz toAbram xtidx Dios,

ni'c bachaag Dios cuent najcni te be_lnaya nez lojni.

⁴ Meel nani rca' te bejn_l ni rujn te dzuun, meelga najc ni riäj_l xca'ni, xhet rcaxlia'dinini.

⁵ Luxh nani rililajztis xtidx Dios ni ruslaa bejn_l lo dojl_l, lacuaa naani yu' xhi dzuun sajc gunni te guibicaj xtoj_lni, bejn_{ga} najc te be_lnaya nez loj Dios, sa'csi huililajzni xtiidxni.

⁶ Sigajcza naj toDavid, chicbaa bejn_l nani ruchaag Dios cuent najcni te be_lnaya luxh di niqtiin niujni redzuun ni caj lo leii. Räj_lpni:

⁷ Chicbaa renani abaslaa Dios lo xtoj_lreni,

renani abiäuu loj xtoj_lreni.

8 Chicbaa bejn nani diru Dios gun cuent xtojlni.

9 ¿La sajc guiniini chicbaa rebejtis nani guyu' bee, ä? ¿La et näjdiza renani di niu' bee, ä? Sa'csi rniinu: “ToAbram gujc te bejnaya nez loj Dios sa'csi huililajzni xtidx Dios.”

10 Guc bidxaag cuent najcni te bejnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee.

11 Dxejcti guyu'ni bee si'c te seen xten yäl'naya sa'csi huililajzni xtidx Dios che gajdlini chu bee te gacni xtad guiraa renani rililajz lañ ni xhet beedi yu'reni, te näjza laareni guidxaag cuent najcreni bejnaya nez loj Dios,

12 te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yäl'rililajz

13 Bia'n Dios diidx loj toAbram näjza loj rexagdooni, xca'ni guedxliujre si'c yäl'nasa'c xtenti. Xhet sa'csi gusoobni xtidx leii xca'nini, sica'nini sa'csi najc toAbram te bejnaya nez loj Dios sa'csi huililajzni xtidx Dios.

14 Sa'csi paru renani rusob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram.

15 Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlni.

16 Ni'cni balaslajz Dios nuunu, te sudzu'tz diidx ni bia'nini loj toAbram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios.

17 Si'cza caj lo xtidx Dios, caj rediidxre: “Abenä gaclu xtad xhidal renación.” Si'c bia'n Dios diidx loj toAbram, Gueb Dios nani gudeed yäl'nabajn loj rebeñgut, nani rnii xcuent recos nani gajd gac ascanu ala najcni.

18 Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcní xtad xhidajl nación, te gusojb xtidx Dios ni guniini che räjpni: “Scree gac xhidajl rexagdoolu.”

19 Di toAbram nuniyt xcäl'rililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu.

20 Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni.

21 Anajnni rajp Dios yäl'nibee te gunni guiralii nani bia'n diidx gunni.

22 Ni'c bachaag Dios cuent najcni te bejnaya nez lojni sa'csi huililajzni xtidx Dios.

23 Xhet xtebtisdi xcuent toAbram cuaj rediidxre: “Bidxaag cuent najcni te bejnaya nez loj Dios sa'csi huililajzni xtidx Dios”,

24 näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebeñgut, sidxaag cuent najcnu bejnaya nez loj Dios.

25 Bacuaareni Jesucrist lo cruzj te gudijxni rextojlnu nez loj Dios, luxh gubañsacni lo rebeñgut, te gac gacnu bejnaya nez loj Dios.

5

Xhi rsiajc bejn che najcreni bejnaya nez loj Dios

1 Ni'cni che rililajznu xtidx Dios rudzucaj Jesucrist xtojlnu rajcnu bejnaya nez loj Dios, ni'cni ruscuedxini lajznu.

² Sa'csi gujt Jesucrist, sa'csi gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yäl nabajñ, su'pacnu lo xcälrdimbicha' Dios.

³ Luxh xhet ni'ctis, sajczä guibalaaznu che tednu trabajw, sa'csi najnnu trabajwga sujn jia'pnu pasens.

⁴ Luxh che rajpnu pasens rajcnu te benguyajlrü; che anajczanu benguyajl, rililazsa'crunu.

⁵ Luxh yäl rililazsa'cnu dini gusanxtujy, sa'csi yäl sanälajz ni rajp Dios ruchaj lastoonu sa'csi nen lastoonu rbäjz Xsprit Dxan xten Dios ni baniidxni loonu.

⁶ Lañ ni xhetliidi sajcdi jiennu lagajc xcuentnu te guibicaj xtojñnu, che basa' dxej biääd Jesucrist te gujtni lo cruiz xcuent rebendojñ.

⁷ Guliipacni, naganduxh guidxälni te bejn ni xcäjb guet lacuaa te bejn ni laaca rujñni. Per sidxäjñ te bejn ni xcäjb guet lacuaa te bens'a'c.

⁸ Luxh Dios baluiloj xcäl rinälajzni xcuent nuurnu sa'csi lañ ni yugajcnu lo dojñ, gujt Jesucrist lo cruiz xcuentnu.

⁹ Aticaxh ñaj ni najcnu beñnaya nez loj Dios sa'csi baxhe'ni xtiejñni te gubicaj xtojñnu, ñaj sidedcaj gacnu xcäl guxhtis Dios.

¹⁰ Palga lañ ni rdxe'chnu lo Dios, basiäjñni lajzni xcuentnu sa'csi gujt Xi'nni lo cruiz, ñaj ni abiäjñ lajzni, suslaani nuure lo dojñ sa'csi gubansac Xi'nni loj rebengut.

¹¹ Luxh xhet ni'ctis, sibalaznäjnu Dios xcuent Dad Jesucrist, sa'csi xcuentni ara'pnu yäl rbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguii biu' dojñ lo guedxliuj, luxh xcuent dojñ biäädza yäl gujt, gudejdti yäl gujt loj guiraa rebejn, sa'csi guiraa rebejn bejnreni dojñ.

¹³ Cheni gajd xleii to Moisés chu lo guedxliujre, alabejn rebejn dojñ, per di niajcdi nucuaquijni rebejn sa'csi xheti lei.

¹⁴ Luxh empac gujt rebejn nen redxej ni gubajñ to Adán hasta redxej ni gubajñ to Moisés, mase direni niujñ lagajc dojñ nani bejn to Adán; luxh ruluiloj yu' chu stee bejn nungäjñ jiääd.

¹⁵ Luxh nani runidx-xlia' Dios dini gac si'c najc xtojñ to Adán. Dini gac si'c sa'csi palga xcuent dojñ ni bejn to Adán, gujt xhidalduxh bejn, cuantimaaz ñaj sunidx-xlia' Dios yäl nabajñ par tejpas loonu por xcäl rulaslajz Dios, nägajc por xcäl rulaslajz Dad nani laa Jesucrist.

¹⁶ Luxh nani runidx-xlia' Dios loonu dini gac si'c yäl runijt ni biääd loonu xcuent dojñ ni bejn to Adán; sa'csi xcuent tejtis dojñga biääd yäl guxhtis xten Dios, sa'csi guiraliiza rebejn guedxliujre yu' lo dojñ, per xcuent nani banidx-xlia' Dios, nalajznu, gujt Xi'nni Jesucrist lo cruiz, ni'c gujc sa'csi yuduxhtej dojñ, te xcuent ni bejn Jesucrist sajc gac bejn beñnaya nez loj Dios.

¹⁷ Palga xcuent dojñ ni bejn tejsi bejn ga gunibee yäl gujt lo guiraa bejn, cuantimaaz lo yäl nabajñ par tejpas sinibee guiraa reni rca' xcäl rulaslajz Jesucrist näjza renani rcaxlia' lojni yäl racnaya nez loj Dios.

¹⁸ Ni'cni sigajc ni biääd yäl guxhtis lo guiraa reben guedxliuj xcuent dojñ ni bejn tejsi niguii, sigajc sa'csi basoob stee niguii xtidx Dios, xhidal bejn gujc beñnaya nez loj Dios, cua'reni yäl nabajñ par tejpas.

¹⁹ Nalajznu sigajc ni baniñ xhidalduxh bejn nez loj Dios xcuent tej niguii ni di nusoob xtidx Dios, sigajc xhidalduxh bejn sajc beñnaya nez loj Dios xcuent tej niguii ni basoob xtiidx Dios.

²⁰ Ni'cni badeed Dios xleii to Moisés, te guzenru dojñ. Niluxh cadre gujuduxh dojñ, ro'c nanabza chuduxhru xcäl rulaslazduxh Dios,

²¹ te sigajc ni guinibee dojl̄ guyu' yäl̄gujt, sigajcza guinibeeru xcäl̄rulaslajz Dios te jia'cnu beñnaya nez loj Dios, te xca'nu yäl̄nabajn̄ par tejpas xcuent Xi'nni, Dad Jesucrist.

6

Agujtnu lo dojl̄ per nabannäjnu Jesucrist

¹ ¿Xhini'c guiniinu, ñaj? ¿La sajc guidxunrunu lo dojl̄ te tioobru xcäl̄rulaslajz Dios, ä?

² ¡Gurniälojtu gacni si'c! Nuurnu najcnu si'c te beñgut lo dojl̄ sa'csi rililajznu xtidx Dios; ¿xhoxh gac guibajn̄runu lo dojl̄?

³ ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist?

⁴ Sa'csi che gurobnisnu bigatznäjnuni si'c lo yäl̄gujt, te sigajcni huäjs Jesucrist lo yäl̄gujt xcuent xcäl̄rnibee Dios, sigajcza näj nuurnu sajc guidxunnu lo te yäl̄nabañcoob.

⁵ Sa'csi palga gujcnu tejsi con laani lo xcäl̄gujtni che birobnisnu, sigajcza sajcnu tejsi con laani lo yäl̄nabañsac lo rebeñgut.

⁶ Ni'cni xcärienbiejwnu cuaj lo cruz con laani, te badzucajni rextojl̄nu, te di gacdiru guinibee dojl̄ loonu.

⁷ Sa'csi nani agujt, di gacdiru guinibee dojl̄ lojni.

⁸ Palga nuurnu agujtnu con Jesucrist, rililaaznu sibañsaczanu con laani.

⁹ Sa'csi nadonpacnu gubañsac Jesucrist loj rebeñgut, ni'c diruni guet, diru yäl̄gujt ga'p yäl̄rnibee lojni.

¹⁰ Che gujt Jesucrist, gujtni xcuent dojl̄, luxh diru gacdi guinibee dojl̄ laani par tejpas; ñaj ni gubañsacni, nabajn̄ni nez loj Dios.

¹¹ Ni'cni la'tu colguchaag cuent najctu si'c te beñgut lo dojl̄, luxh nez loj Dios, colguchaag cuent nabannäjtu Jesucrist.

¹² Ni'cni na'c gusaantu guinibee dojl̄ tiejxhtu te guntu si'ctis ni rlajz tiejxhtu.

¹³ Na'cruza gusaantu jiajb guideb lagaa tiejxhtu lo dojl̄ te guntu cosguijdx. Maazru hueen colgudeed tiejxhtu lo Dios si'c te bejn̄ nani gubañsac lo rebeñgut, näjza colgudeed guideb lagaa tiejxhtu te guntu recoshueen si'c ni rlajz Dios guntu.

¹⁴ Sa'csi diru dojl̄ guinibee lojtu, sa'csi dirutu chu loj xleii toMoisés, sa'csi yu'tu lo xcäl̄rulaslajz Dios.

La'tu najc si'c remos

¹⁵ ¿Xho gacni ñaj? ¿La sajc jienrunu dojl̄ ñaj ni dirunu chu lo leii sa'csi yu'nu lo xcäl̄rulaslajz Dios, ä? ¡Xho gacni si'c!

¹⁶ La'tu nansa'ctu palga yu'tu si'c te mos loj te lam̄ te gusobdiajgtu xtiidxni, najcpactu xmos bejn̄ nani rusoobtu xtiidxni. Ni'cni, palga gusoobtu xtidx dojl̄, ni'c najc xlam̄tu, ni'c siädnä yäl̄gujt lojtu. Palga gusoobtu xtidx Dios, ni'c najc xlam̄tu. Dxejc sajctu beñnaya nez loj Dios.

¹⁷ Xquixtios lo Dios, galoo gujctu xmos dojl̄, per ñaj guideb lastootu basobdiajgtu xtidxcoob Dios, huililajztu xtiidxni ni basule'nu lojtu.

¹⁸ Luxh agulaatu lo dojl̄, biädjiajctu xmos Dios lo dzunsa'c.

¹⁹ Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl̄, guideb lagaatu bejntu dojl̄, bejntu latsiaj, luxh ni'c satajltis latsiaj ni bejntu. Ñaj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu beñnaya nez loj Dios.

²⁰ Sa'csi che gujctu xmos dojl̄, di rextidx Dios guinibee la'tu.

²¹ Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujn loj yälgujttis.

²² Per naj, sa'csi agulaatu lo dojl, abiu'tu najctu xmos Dios, sujntu sajctu beñnaya nez loj Dios, luxh xnezyuj recoscoobre rdzujn lo yälñabannäj Dios par tejpas.

²³ Xcälrajx xten dojl najc yälgujt, per nani runidx-xlia' Dios najc xcälñabannäj Dios par tejpas xcuent ni bejn Jesucrist xtadnu.

7

Yälrluui ni rudeed yälguchnaa

¹ Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajñni lo guedxlijre?

² Najcni si'c te gunaa nani bachnaa te niguii. Nanabpac cuäznäjni chäälni guideb nabajñni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni.

³ Ni'cni, laj ni nabajñ chäälni gunaaga, palga cuäznäj gunaaga ste'ca niguii, cayujñni dojl sirilajni gunaguijdx. Palga agujt chäälni gunaaga, agulaani lo leiiga, sajcti guchnaani stee niguii, xhet dojl di cayujñni, dizani guirilaj gunaguijdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujcti si'c bengut lo leii che gujt Jesucrist lo cruz, te naj sajcti jiu'tu lo ste'ca bejn, loj lagajcti Jesucrist nani gubansac loj rebengut te sajcti jiennu redzunsac ni rlanjcti Dios jiennu.

⁵ Sa'csi laj ni gubajñnu lo yälñabanbiejwga, lagajcti rediidx nani rnii leiiga di gacdi gun bejn, lagajcti recosga rlanjcti gun tiejxhnu, luxh si'c sozaatisnu lo xnezyuj yälgujt.

⁶ Naj abiriinu lo leiiga, sa'csi agujtñu lo leiiga nani gunibee loonu galoo. Naj con xpitcoob ni yu' neñ lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacheä cayunä dojl. Dina niacheä cayunä dojl che rlazä xca'a xhixten ste'ca bejn palga dina niolä lo leii rediidxre: “Na'c chuguij lajzlu rehxixten bejn.”

⁸ Ni'cni lagajcti diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtñi.

⁹ Galoo gubanä xhet leiidi nanä, luxh che biääd diidx ni rnibee leii, gucheä xhini'c najc dojl, dxejcti banitä lo Dios, si'c ni gutä.

¹⁰ Luxh baxhal Dios leiiga loonu te jiuäni, te xca'ä yälñabajñ, luxh alga bazenni benä dojl, banitä nez loj Dios, gutäti dxejcti.

¹¹ Con leiiga, basguee dojl narä, bejñni narä si'c te bengut nez loj Dios.

¹² Ni'cni, leii najc dxan, najza rediidx ni caj lo leiiga najc dxan; hueen najcni, didxguli najcni.

¹³ ¿Dxejca'? ¿La nani najc te coshuen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshuen, te lagajcti rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl.

¹⁵ Sa'csi dina gacheä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä.

16 Naj palga narä runä latsiaj nani dipacna rlazä gunä, lagajcza ni'c rului hueenca najc leii.

17 Naj, diruni gac narä ni cayujn latsiaj, sa'csi yu' dojl̄ neñ lastoä, ni'c ni cayujn runä latsiaj.

18 Sa'csi narä nanä neñ lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gacdipä te gunäpac recossa'cga.

19 Sa'csi dina gunä redzunsä'c nani rlazä gunä, alga latsiaj nani diru rlazä gunä, ni'c runä.

20 Ni'cni palga runä latsiaj nani diru rlazä gunä, xhet narädi runäni, dojl̄ ni yu' tiexhä, ni'c ni cayujn runä latsiaj.

21 Ni'cni narä, nani rlazä gunä redzunsä'c, rdxälä leiire: yu'pa dojl̄ tiexhä.

22 Sa'csi neñ lastoä, rlazäpac gusobä diidx xten xleii Dios.

23 Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladzñaa xleii dojl̄ nani yu' guideb lagaa tiexhä.

24 ¡Proobza narä! ¿Chuni'c gusläa tiexhä ni nungäj̄l̄ guet xcuent dojl̄?

25 ¡Xquixtios loj Dios sa'csi Dad Jesucrist sajc gusläa nuurnu lo dojl̄! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl̄, chuni lo xleii dojl̄.

8

Yäl̄nabajn ni najc xcuent Sprit Dxan xten Dios

1 Ni'cni naj rut rajcdi rbe'c xcäl̄quij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujnreni ni rnibee Sprit Dxan xten Dios ni rbäjz neñ lastooreni.

2 Sa'csi leii xten Sprit Dxan xten Dios ni rudeed yäl̄nabajn xcuent Jesucrist, abasläani narä lo yäl̄rnibee xten xleii dojl̄ näjza yäl̄gujt.

3 Sa'csi nani di niajcdi niujn leibiejw, sa'csi dini niajc nadip lo rebenguedxliuj te gacreni beñnaya nez loj Dios, ni'c bejn Dios che baxhal̄ni Xi'nni Jesucrist, si'c te beñ guedxliujre xcuent dojl̄, te bejnni yäl̄guxhtis lo dojl̄ ni rnibee tiejxh bejn.

4 Te si'c gac xcäl̄guxhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

5 Sa'csi renani rusoobtis nani rlazj gun tiejxhreni, rujntisreni xhigab xcuent redojl̄ga, luxh renani rusoob xtidx Sprit Dxan xten Dios rujntisreni xhigab xcuent nani rlazj Dios gunreni.

6 Sa'csi renani yu'tis yejcreni nani rlazj gun tiejxhreni, sejtreni, sinijtreni; luxh renani yu'tis yejcreni nani rnii Sprit Dxan Dios, reni'c sibecdxi lajzreni, sica'reni yäl̄nabajn lo Dios par tejpas.

7 Te xcäriejn nani riutis ni rlazj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini.

8 Renani nabajñtis te gunreni latsiaj ni rlazj gun tiejxhreni di Dios guibal-aznäjreni.

9 Luxh la'tu dirutu gun si'ctis ni rlazj gun tiejxhtu, ni'cni rujntu si'c ni rlazj Sprit Dxan xten Dios guntu, palga rbäjzni neñ lastootu. Palga yu' chu tejtü ni di Sprit Dxan cuääz neñ lastooni, di ni'c gac xpejñni.

10 Palga rbäjz Jesucrist neñ lastootu, agujt tiejxhtu xcuent dojl̄, xprittu nabajñ sa'csi anajctu beñnaya nez loj Dios.

11 Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliujre xcuent Xpritni nani yu' neñ lastoonu.

¹² Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlajz gun tiexhnu.

¹³ Sa'csi palga cayujntu si'c ni rlajztis gun tiejxhtu, sejtpactu. Palga nabajntu xcuent Sprit Dxi xten Dios ni rbäjz neñ lastootu, sibälaztu latsiaj ni rlajz gun tiejxhtu, sibannäjtü Dios par tejpas.

¹⁴ Sa'csi guiraa renani rulüi Sprit Dxi xten Dios guiraa reni'c najc rexi'n Dios.

¹⁵ Naj ditu nica' te sprit xten te mos te chusactu lo yälrdxejb, alga cua'tu sprit xten ni najc si'c te bisiäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä."

¹⁶ Sa'csi lagajc Sprit Dxi xten Dios rulüi loj xpirtu, najcpacnu xi'n Dios.

¹⁷ Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejdni xcuent xtiidxi, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdnu neñ redxejre, digacdi gun teblonureni con yälrdimbicha' nani churu guihuiinu.

¹⁹ Sa'csi guiraa recos nani benchee Dios lo guedxliujre, cabäzreni, yuduxhreni gaan fiireni dxej che gululoj Dios chuni'c najc rexi'nni.

²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlajzdi recosga, per sa'csi si'c bejn Dios, ni cabäzjtis

²¹ guslaapacni guiraa recos ni bencheeni lo guedxliujre lo xcälrnibee yälgujt, yälritloj, te dxej sajc jiu'ni lo yälrbexi xten xcälrdimbicha' xten rexi'n Dios.

²² Guiraa recos ni gulecxtiej Dios lo guedxliujre entis roonreni, guira dxej rdejdreri trabajw, si'c rdej te gunaa trabajw che rajl xi'nni.

²³ Luxh xhet nani tre'tis lo guedxliujdi, näjza nuunu ni yu' Sprit Dxi xten Dios neñ lastoonu, roonzanu cabäaznu dxej cheni xca' Dios nuure si'c rexi'nni, cheni guscoobzani tiexhnu.

²⁴ Sa'csi xcälirililaznu ni rbäaznu, ni'c bejn gulaanu luxh yälrbäjz ni guyasi rien, di ni'c gac yälrbäjz, sa'csi çchu laa ni cuääz xcuent te cos ni ala bahuiini?

²⁵ Palga cabäaznu xcuent te cos ni gajdnu guihui, rbaali laaznu, rsi-udzu'tznu rbäjznu guihuiinu gacni.

²⁶ Sigajcza racnäj Sprit Dxi xten Dios nuure cadre xheti yälrutijp laaznu sa'csi nicla guidonnu xho mood riäjl guiniab bejn lo Dios. Luxh lagajc Sprit Dxi ni yu' lastoonu rniabni lo Dios xcuent nuure con yälrbexneñ nani nicla gajd bejn gäb con diidxi xho najcni.

²⁷ Dios, nani rula'tz lastoonu, nanchee xhini'c rniab Sprit Dxi xtenni xcuent nuurnu, sa'csi rniabni si'cpac ni rlajz Dios guiniabnu xcuent rex-pejnpac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuunni rsiajcrenini te gun Dios gac recosga par xcäl'nasa'creni.

²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios.

³⁰ Renani guleni galooli, reni'c gurejdxni; renani gurejdxni, bejnzani najcreni beñnaya nez loj Dios; renani bejnna najcreni beñnaya nez loj Dios, gulä'pzani xpala'nreni.

³¹ çXhixhni'c guiniinu xcuent dee? Palga yu' Dios xlaadnu, çchuxh ni'c najc ni gun gaan loonu?

³² Dios nani di nudxojn Xi'nni, nani cuäjb cuaj Xi'nni lo cruzj te gujtni, te gudijxni xcuent xtoj_lnu, ¿xho dini guniidx loonu xcuent Xi'nni guira'ti nani rquiinnu, ä?

³³ ¿Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rnii najcnu beñnaya nez lojni.

³⁴ ¿Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadre rnibeeni; laazani cabejdx canabni lo Dios xcuentnu.

³⁵ ¿Chuni'c sajc gudzucaj nuurnu lo yälsanälajz xten Jesucrist: trabajw, o yälxliajs, o yälrusacsí, o yälrliaan, o yälxhabääl, o yälrdxejb, o te spaad, ä? Nicla tejni.

³⁶ Si'c ni caj lo guijtz ni caj xtidx Dios:
Xcuentlu, sa'csi najcnu xpejn_llu caye'tnu guixe-guixee.
Ruchaagreni cuent najcnu si'c xil ni aguro' te ju't bejn_lni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure.

³⁸ Sa'csi anancheä nicla yälgujt, niclza yäl_nabajn, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl_milaagwr,

³⁹ nicla jiaroduxh, niclaza jiäjpac, niclaza xhitis cos ni guc-chee, nicla tej redee di gacdi gudzucaj nuurnu lo xcälsanälajz Dios, yälsanälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-hii. Sprit Dxan xten Dios caguluii xcärienä laaca rniä;

² cayac-huinduxh lastoä, sanuutis yälxliajsga.

³ Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpejn Israel.

⁴ Sa'csi laareni najc xagdoo toIsrael, luxh laareni nungäjl gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen_l guidoo. Sica'reni reyäl_nasa'c xten Dios palga jiureni xtiidxni.

⁵ Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te beñ guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn_lpac Israel.

⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexagdoolu nani guigab najc reni gac xagdoo Isaac.”

⁸ Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni.

⁹ Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chääl_ni, toxtadgoolnu Isaac.

¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni,

¹² ni'c räjp Dios lo toRebeca: “Xingangaloolu gac xmos xinhuinlu.”

13 Si'cza caj lo guijtз rediidxre: “Sanälazä Jacob, niluxh bidxechnää Esau.”

14 ¿Xhini'c guiniinu naj? ¿Xhet laadi rujn Dios, ä? ¿Xho gacni si'c!

15 Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnäá chutis bejn nani rlazä gacnäá.”

16 Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn.

17 Ni'cni caj lo guijtз xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.”

18 Rulaslazjni rebejn nani rlazjtisni, runnadipzani lastoo bejn nani rlazjtisni.

19 Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlazjni gac, ä?”

20 ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?”

21 Gurniälöjlu. Bejn nani runchee guejs, ¿la di gacdi gunni si'ctisni rlazjni con bajnga, ä? ¿La di gacdi guncheeni te guesa'c nägajcза te guesyuj ni xhet sirbdi con lagajc bajnga?

22 ¿Xhiru najc, palga Dios rlazjni guluilojni xho rujni yälguxhtis, näjza rlazjni guluilojni xcälrnibeeni, gopnäjni pasens renani nungäjл gac yälguxhtis, te nitlojzarenä, ä?

23 Bejnni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni.

24 Lagajc nuurnu najcnu renä aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu.

25 Cajza lo guijtз ni bacuaa Oseas:
Renani di gac xpenä, reni'c cuälää “xpenä”.

Luxh nani dina ninälazä, sinälazäni.

26 Dxejcti lagajc cadre räjpreni lojreni:

“Ditu gac rexpenä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

27 Cajza lo guijtз ni bacuaa Isaías: “Mase najc xhidajл rexpen Israel si'c najc yujxh ni tre' ro' nisdoo, guxii gac reni laa lo dojl.

28 Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.”

29 Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoo reben tiemp,

niajcnu si'c gujc Sodoma näjza Gomorra, reguejdx ni gunitloj.

Xtidx Dios näj rexpen Israel

30 ¿Xhini'c sajc guiniinu naj? Rebejn nani di gac xpen Israel, direni niguiil xho gacreni bejnaya nez loj Dios, niluxh agujcreni bejnaya nez loj Dios sa'csi huililajzreni xtidx Jesucrist.

31 Luxh rexpen Israel, mase sanuutisreni lo xleii Moisés ni ruluii xho gac bejn bejnaya nez loj Dios, banijtreni, direni niujn gaan nusoobreni guideb leiiga.

32 ¿Xhicuent gujcnä si'c? Sa'csi direni nililajz xtidx Dios, alga rlazjreni guntisreni dzuun xten leii, naareni si'c gacreni bejnaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist.

33 Si'cza bacuaa Isaías, räjpni:

Aguleä te bejn lo guedx Siön ni gac si'c te guij cadre rtiäjĵ ni' bejn,
te guij ni rusäl'ta' bejn.
Chutis tej nani chalilajz xtiidxni, dini jianxtujy.

10

¹ Rebetzä, rlazduxhä chalilajz rexpeneä xtidx Dios. Rniabduxhä lo Dios te guslaanireni lo xtojĵreni.

² Narä rniäpac nancheä ruzuxhijb rexpene Israel lo Dios, niluxh direni gumbesa'c xhini'c rrajz Dios gunreni.

³ Sa'csi direni niacbee xcuent xho rajc te bejn te bennaya nez loj Dios, ni'c rrajzreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni.

⁴ Abasoob Jesucrist xtidx Leii, ni'cni che chalilajz bejn xtidx Jesucrist, anajcreni bennaya nez loj Dios.

⁵ ToMoisés bacuaa rediidxre: “Chutis ni rrajz gac bennaya nez loj Dios sa'csi rusoobni xtidx leii, nanab gusobsa'cpacni diidxga guideb nabajĵni lo guedxliujre.”

⁶ Xcälñayareni nez loj Dios sa'csi rililajzreni xtidx Jesucrist, rni scree: “Na'c guiniitu neñ lastootu, ĵchuni'c chä'p xhaguibaa?” nalajznu, te jiädnäsacni Jesucrist loj guedxliuj.

⁷ Na'cza gäbni: “ĵChuni'c jiäjt gabijĵ?” (nalajznu te chaxiini Jesucrist loj rebengut).

⁸ ĵXhini'c rniini naj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yälřililaaz nani cagusule'nu lojtu.

⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebengut, suslaani la'tu lo dojl.

¹⁰ Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rñibee loonu, ruslaa Diosni lo dojl.

¹¹ Sa'csi rni xtidx Dios scree: “Chutis ni rililajz xtidx Dad Jesucrist, dini jianxtujy.”

¹² Sa'csi guiraa rebejn najc tebloj nez lojni, rexpejn Israel sigajc rebenzajt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni.

¹³ Lo xtidx Dios caj rediidxre: “Chutis ni rbedx-rniab lo Dad, siliaani lo xtojĵni palga rililajzni xtidx Dios.”

¹⁴ ĵXho gac guiniabreni lo Dad, palga direni chalilajz xtiidxni? ĵXho gacza chalilajzreni xtiidxni, palga gajd diajgreni jiejn xtiidxni? ĵLuxh xho jiejn diajgreni xtiidxni palga rut rusule'di diidxga lojreni, ä?

¹⁵ Luxh ĵxhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riädnä diidx xcuent cossa'c, yälřbecdxi lajz rebejn.”

¹⁶ Xhet guiraadireni rusoob xtiidxni, sa'csi guniiza toIsaías: “Dad, ĵchuni'c chalilajz xtiidxnu?”

¹⁷ Rililajz bejn xtidx Dios che rucudiajgreni diidxga; rucudiajgzareni che yu' chu rusule' xtidx Jesucrist.

¹⁸ Naj arniä: Gajdpac diajgreni jiejn xtiidxni, o ĵla babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,
abidzujnza rextiidxreni lo guiraa reguejdx ni tre' lo guedxliujre.

¹⁹ Rniäza: Dipac rexpene Israel niacbee, o ĵla gucbeereni, ä? Galooli gunii toMoisés rediidxre:

Sunä gudxoĵntu xcuent rebejn ni di gac te guejdx,

con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre:

Renani di niguiil narä, bidxäjl narä,
baluiloäza loj renani di niniabdiidx narä.

²¹ Guniiza toIsaías xcuent rexpən Israel:

Desde galooli, dxej-yääl basgaä nää lo rebejnğa te niureni xtidxä,
luxh najcreni bejn ni di gusoob diidx, rutzu'reni didxnaj.

11

Rexpən Israel nani gulaa lo dojl

¹ Arniä: ¿La agulälaz Dios rexpən Israel, ä? ;Xho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamín.

² Di Dios nibälaz rexpejnni, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadre rnii xcuent Elías, xho gunabduxh Elías didxnaj lo Dios xcuent rexpən Israel, ä? Räjpnii scree:

³ “Dad, abagu'treni guiraa reniguii nani gunii xtiidxlu, abatzujlreni rexquidoolu, xtebtis narä bia'nä, luxh naj rlanjreni ju'treni narä.”

⁴ Luxh, ¿xhini'c räjp Dios lojni? Räjpnii: “Abalucheä gajdz mil bejn nani gajd guzuxhijb nez loj Baal.”

⁵ Si'cza naj, abia'n te chinae' rexpən Israel nani agule Dios xcuent xcälrulaslajzni.

⁶ Dxejc palga ruslaani nuure lo dojl xcuent xcälrulaslajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcälrulaslajz Dios gac yälrulaslajz.

⁷ ¿Dxejca'? Di rexpən Israel nidxäl nani caguiilreni, luxh rebejn nani agule Dios, ni'c bidxälni, luxh ste cuaareni, aguyalajzreni.

⁸ Gujcnii si'c caj lo xtidx Dios:

Bascäy Dios xcäriejnreni, näjza balojni di jien,
lo dxe najli di diajgreni jiejn.

⁹ Guniiza toDavid, scree caj lo xtidx Dios:

Sugun xmex lanijreni jiajbreni,
te gac guiga'reni,
sugacni si'c guij ni rulani' bejn, te gacreni yälguxhtis.

¹⁰ Suguscäy Dios balojreni te na'c fisa'creni,
sujie't dejtzenii, sutedreni trabajwduxh par tejpas.

Yälruslaa lo dojl xten bejn ni di gac xpen Israel

¹¹ Naj rniabdidxä: ¿La biajb rexpən Israel te gunijtreni par tejpas, ä? ;Xho gacni si'c! Sa'csi biajb rexpejn Israel, ni'cni gojl biääd yälruslaa lo dojl lo bejn ni di gac xpen Israel, te si'c guisiäblajz lajz rexpən Israel laareni lo dojl.

¹² Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijt xten rexpən Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä,

¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist.

¹⁵ Palga gulecdxireni lajz reben guedxliuj con Dios sa'csi gulälaz rexpən Israel xtidx Jesucrist, aticaxh che chalilajz rexpən Israel rextidx Jesucrist, sibansac renani najc si'c beņgut.

¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajjni con xtiejn yajg oliibga.

¹⁸ Ni'cni, na'c gactu gualajz lo renaapac yajgga. Colgusnaj lajztu, xhet la'ditu ni rudeed yalnabajn lo xlobaa yajgga, lobaaga ni runiidx yalnabajn lojtu.

¹⁹ Dxejc colguinii: "Batiuugreni naapac yajgre, te gujc biguidä cuä' yajgga."

²⁰ Guliipacni, biru' naapac yajgga sa'csi direni nililajz xtidx Dios luxh la'tu biguidtu cuä' yajgga sa'csi huililajztu xtiidxni. Na'c gactu gualajz, colguidxeb,

²¹ sa'csi palga di Dios nutedbia renaa yajgga, diza Dios gutedbia la'tu.

²² Bahuii j lacti hueen najc Dios! Luxh lacti niälajzzani; con renani banijt najcni niälajz, luxh lacti rulasajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios.

²³ Luxh sigajcza reni bidin, palga di chanuu cuälazreni xtiidxni sajc suquid-sac Diosreni lo yajgga.

²⁴ Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpen Israel lo dojl

²⁵ Rebetzä, rlazä gacbeetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios.

²⁶ Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajc ben guedx Siön,
luxh sudzucajni xtoj renani najc xagdo to Jacob.

²⁷ Dee najc diidx ni bia'nä con laareni,
che gudzucaä xtojreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtad-goldooreni.

²⁹ Sa'csi rut rajcdi rudzucaj nicla yalnasa'c ni rudeed Dios, niclaza yälrbjdx xten Dios.

³⁰ La'tu galoo ditu nusoob xtidx Dios. Naj rulasajz Dios la'tu sa'csi gulälaz rexpen Israel xtiidxni.

³¹ Sigajcza naj direni gusoob xtidx Dios, niluxh si'c najcni te gulasajz Diosreni sa'csi balaslajzzani la'tu.

³² Dios basaan biajb guiraanu lo dojl, te si'c sajc gulasajz Dios guiraanu.

³³ j Lacti guroob najc yalnasa'c xten xcäl'najn, xcäl'racbee xten Dios! Nicla tej bejn guedxliuj di gacbee guiraa rexcalguxhtisni, rudliidiza najn rexnezyujni.

³⁴ Si'c caj lo guijtz: "¿Chuni'c gucbee xcäriejn Dios? ¿Chuni'cza abaluiini? Rutliidi.

³⁵ O ¿chuni'c badedxgaa te xhi cos lojni, ä? Rutliidi."

³⁶ Sa'csi loj Dios siäd guira'ti, luxh laani bencheeni guira'ti par lagajcza laani. Suguiiä'pnu xpala'nni par tejpas. Sugacni si'c.

12

Yalnabajn rliä'p xpala'n Dios

¹ Ni'cni rulidxä la'tu rebetzä, sa'csi rulaslajz Dios nuure, colgudeed xcäl_nabajntu lo Dios te gac guiba_nsa'ctu si'cni rlajz Dios. Dee najc yälraj_npac Dios si'c ni nungäjl gantu Dios.

² Na'c rujntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rlajzni guntu, nalajznu xhini'c najc hueen, xhini'c rdxag_nlajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni.

⁴ Sa'csi sigajc najc tiejxhnu, yu' xhidal la'ni, luxh tejgareni rujn xtzun-xtzuunreni,

⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

⁶ Luxh sa'csi tejganu rajpnu garen-garen dzuun xcuent yäl_rulaslajz ni baniidx Dios loonu, sujiennu rextzuunnu screeza: nani rajc rnii xtidx Jesucrist, suguiniini, si'c ni najc xcäl_rililajzni;

⁷ nani rajc racnäy sa'ni, sugacnäy; nani rajc ruluii xtidx Dios, suguluiini;

⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl_nadolajz; nani rajc rulaslajz resa'ni, sugulaslajzni con yäl_rbalajz.

Xho nanab guiba_nnu lo xnezyuj Dios

⁹ Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac.

¹⁰ Colchanälajz resa'tu si'c rinälajz bejn rebejtzni. Colguiliä'p xpala'nreni.

¹¹ Colyejn dzunsac, na'c cuedxitu. Colyejn xtzun Jesucrist con guideb xtijptu, guideb xcäriejntu.

¹² Colguibalajz sa'csi ahuililajztu xtiidxni. Colcuedx_i lajztu che tedtu trabajw. Colcuedx-colnabtis lo Dios guideb nabajntu.

¹³ Colgacnäy rebejn nani rililajz xtidx Dios; sacru col_nii loj ni riädhuiitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäy renani rbalajz, colyonnäy renani roon.

¹⁶ Colyejn tejtis xhigab con resa'tu, na'c gactu gualajz, colguchaag loj reben nadolajz. Na'c guchalotu najctu ben_nanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn.

¹⁸ Cadrotis saj_ni, dxitis colguiba_nnäy guiraa rebejn.

¹⁹ Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yäl_guxhtis lojreni, ni'cni caj lo xquijtzni scree: "Narä gunä yäl_guxhtis, narä quixä lojreni si'c naj Dad, Dios."

²⁰ Näjza: "Palga calaan nani rdxe'ch lojtu, colgudeed xhi gauni, palga cayojl_ni, colgudeedza xhi yäni, te si'c jianxtiujni."

²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yäl_rrnibee nani di Dios nudeed, luxh guiraa reyäl_rrnibee ni yu' lo guedxliujre, lagajc Dios gule'creni.

² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yäl_guxhtis lojreni.

³ Renani rnibee di guchejb renani riu xtiidxreni, ruchejbreni renani najc beṅ guijdx ni di jiu xtiidxreni. Palga di rlanjtu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c.

⁴ Reguxhtis rujnreni lojtu xtzuun Dios te guibaṅsa'ctu. Palga guntu dzun-guijdx, colguidxejb, xhet xlia'di ca'ni spaad, sa'csi najcreni nani rujn xtzuun Dios te gunreni yälguxhtis, te quixpac renani rujn dojl.

⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnsa'c, te xcäriennaya.

⁶ Ni'cni colquix lojreni nani riäjl xca'reni sa'csi renani rnibee najc xmos Dios, luxh ni'cpac najc xtzuunreni.

⁷ Colgudeed lo guiraa bejṅ nani riäjl xca'reni. Colquix loj renani nazääbtu; colquix impuest loj ni riäjl xca'ni; colchanälajz renani riäjl chanälajztu; colguiliä'p xpala'n renani riäjl chä'p xpala'reni.

⁸ Na'c xcajlu di'n loj nicla tej bejṅ, di'ntis xten yälrinälajz sa'ni, sa'csi nani rinälajz xpisinṅni, bejṅga abasoob xleii Dios.

⁹ Sa'csi lo xleii Dios caj scree: “Na'c guesnäjl bejṅ ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.”

¹⁰ Nani rajp yälsanälajz, dini gun latsiaj lo resa'ni. Ni'cni yälsanälajz rusoob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabajṅnu ṅaj, anajntu alagojl or guibajṅnu lo bacaḷ sa'csi abidzūṅgajxhru dxej che laanu neṅ dojl lo dxej che huililajznu.

¹² Aguxhinṅduxh, asiädgajx bianij. Ni'cni cuääz jienu redzuun guijdx ni rajc lo xcäy, te jientisnu redzunsa'c ni rajc rdxee, lo bianij.

¹³ Guibansa'cnu si'c riäjl guibajṅ rebejṅ rdxee, na'c guibaṅnu lo yälrä', niclaza lo yälbiejy, na'c guidiesnäjnu bejṅ ni di gac chäälnu, na'c ga'pnu rebis, na'c guidxagdilṅnu resa'nu, na'c chuguij lajznu xhixten resa'nu.

¹⁴ Ni'cni colca' xcälrnibee Jesucrist te na'c guntu redojl ni rlanj gun tiejxhtu.

14

Na'c guiniyajtu rebejtztu

¹ Colṅni didxdoo lo rebejṅ nani di gumbesa'c xtidx Dios, na'c tilnäjturenṅni.

² Sa'csi yu' reni rililajz nani sajc gaurenṅni guira'ti xhi cos, niluxh nani gajd sutijp lo yälrililajz, ganaxtis berduur rajwni.

³ Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejṅga.

⁴ ¿Chuxh luj te guiniyajlu lo xmos te bejṅ, ä? Sugäb lagajc xlamṅni lojni la laaca rujṅni o la xhet laadi rujṅni. Luxh sujṅni laaca sa'csi Dad Jesucrist sujṅ sutijp lastooni.

⁵ Tej bejṅ naa sajru tej dxej lo stee dxej, dxejc ste'ca bejṅ rchalo guiraa redxej najc tebloj. Xhet najcdi, tejga bejṅ sugunpac lagajc xhigabni.

⁶ Nani rapda te dxej, rujṅnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajṅ xcuentcanu, nicla tejzanu dinu guet xcuentcanu.

⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lahtis najcnu rexpén Dad, Jesucrist.

⁹ Ni'cni gujt Jesucrist, ni'cni gubanşaczani, te sajc gacni Dad xten rebenğut, nájza Dad xten rebejn nani nabajn.

¹⁰ Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu.

¹¹ Sa'csi scree caj lo xtidx Dios:

Si'ctis ni nabanä, rniliäpac lojtu, räjp Dad Dios,
guiraa rebenğuedxliuj suzuxhijbreni loä,
luxh guiragajc ro'reni sicäjp narä nacä Dad Dios.

¹² Ni'cni guiraanu, tejanu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab neñ lastoonu xhetliidi jiennu ni gun jiajb resa'nu lo dojl.

¹⁴ Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen.

¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni.

¹⁶ Ni'cni na'c gusaanlu guiniyajreni nani najc te cos hueen par luj.

¹⁷ Sa'csi xcälrnibee Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl'nabannya nez loj Dios, nájza yäl'rbedxilajz con yäl'rbalajz xcuent Sprit Dxan xten Dios.

¹⁸ Sa'csi nani rujn si'c lo xtzuun Jesucrist, bejnğa rchaglajz Dios, luxh rebenğuedxliuj rniiza didxsa'c xcuent sa' bejnğa.

¹⁹ Ni'cni chanuutis guidiilnu recos nani rujn chu yäl'rbedxilajz, nájza nani rujn racnäjnü resa'nu te tioobrureni loj xnezyuj Dios.

²⁰ Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neñ dojl, ni'c najc xhet laadi.

²¹ Hueen najc na'c gautu bääl, na'cza yätu bin, na'cza guntu jiajb sa'lu neñ dojl.

²² Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.

²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl'rililajz, sa'csi xhitis ni di gac xcuent yäl'rililajz, lagajc ni'c najc dojl.

15

Huinälajz sa'lu

¹ Nuurnu ni agusutijpnu lo yäl'rililajz nanab gacnäjnü resa'nu nani gajd chalilazsa'c. Di gacdi guibanşisnu xcuentcanu.

² Tejanu nanab chonälaznu resa'nu lo xcäl'nabansa'cni te gacnäjnü chalilajzrurenü.

³ Sa'csi nicla Jesucrist dini nibajn xcuentcani, luxh si'cni caj loj xtidx Dios: "Redidxyaj ni guniyajreni lojlu biajbreni yecä."

⁴ Guiraa rediidx ni cuaj lo guijt galooli, cuajreni te guluiireni nuurnu te ga'pnu yälsutijp nájza yäl'rustioblajz te gacza guibääznu lo xtidx Dios.

⁵ Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu.

⁶ Te dxejcti tejtis gac xse'tu guiliä'ptu xpala'n Dios, Xtrad Jesucrist.

Gusule' xtidx Dios loj rebenzijt

⁷ Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios.

⁸ Sa'csi narä rniä lojtu, biääd Jesucrist te gujcnä si'c te mos loj rexpen Israel te baluini xcuent didxgulii xten Dios te gusojb rediidx nanä bia'n Dios loj retoxtadgoldoonu,

⁹ näjza par rebenzijt, te guiliä'preni xpala'n Dios sa'csi baluilojni xcäl_rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt, soläza dij lojlu.

¹⁰ Dxejcti stee lajt rniini:

La'tu benzijt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzijt, colguiliä'p xpala'n Dad, suguiliä'pza guiralii rebejn xpala'nni.

¹² Stee huält guniiza Isaías scree:

Siricaj te xagdoo toIsaí, näjza te ni chäs te guinibeeni loj rebenzijt, laani cabäz rebenzijt.

¹³ Naj rniabä lo Dios ni rudeed yälr_bäz_lajz, te laani gacnäj guibalajztu, cuedxilajztu, sa'csi salilajztu, te tioobru yälr_bäz_lajz ni rajptu sa'csi Sprit Dxaan xten Dios yu' neñ lastootu, luxh laani rajpni yälr_nibee.

¹⁴ Luxh xcuent la'tu rebetzä, anancheä nabañsa'ctu nasin_duxhtu, arajcza rulijdxtu sa'tu,

¹⁵ luxh loj guijtzre bacuaä gai didxnaj xcuent tiop-chon cos, te gusnää lajztu. Runä si'c xcuent yälr_rulaslajz ni baniidx Dios loä

¹⁶ te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni beñnaya sa'csi rbäjz Sprit Dxaan neñ lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios.

¹⁸ Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizarenä rextzuunni,

¹⁹ con yäl_milaagwr xten redzunro, resenro, ni gujc con xcäl_rnibee Sprit Dxaan xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist.

²⁰ Si'cza guyu'ä ganduxh gusule'ä xtidx Dios xhet cadre ahuisule'direni xtidx Jesucrist, alga ganax cadre gajdreni gumbee Jesucrist, te na'c gunä dzuun cadre gusloj cayujn ste'ca bejn dzuun.

²¹ Te gacni si'cni caj lo guijtz:

Renani rutliidi bij diidx xcuentni, suhuiipacreni lojni, luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²² Ni'cni balti huält badxojn Dios narä jiädhuiä lojtu.

²³ Luxh naj sa'csi abaluxä xtzunä guideb nezree, näjza sa'csi agujc balti ijj rlazduxhä jiädhuiä lojtu,

²⁴ Naj che cha'a España siädhuiäpac lojtu. Che tedä, jiädhuiäpac contu te ganid guibalaznäã la'tu, dxejcti gacnäjtü narä te cha'a España.

²⁵ Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c.

²⁶ Sa'csi rebejn Macedonia näjza reben Acaya rlajzpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén.

²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni.

²⁸ Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España.

²⁹ Luxh ananä che jiälä lojtu, li guidxa lastoä xcäl'nasa'c xtidx Jesucrist guidzunä lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcälrinälajz Sprit Dxa xten Dios, colguidxagsa'tu, te colgacnäj colcuedx-guiniabtu lo Dios xcuentä.

³¹ Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni.

³² Te cabaa lazä guidzunä lojtu, sa'csi rlajzpac Dios jiälä lojtu, te lajni yu'ä lojtu siälyuä, susilazäza con la'tu.

³³ Dios ni rbecdxilajz bejn gacnäj guiraatu. Sugacni si'c.

16

Ruxhalni xtixtios lojreni

¹ Colgacnäj bisiajnnu Febe. Nane're bejn dzunduxh nen guidoo ni tre' Cencrea.

² Colca'ni xcuent Dad, Jesucrist, si'cni riäj l gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni.

³ Ruxhalä xtixtios lo Priscila näjza lo Aquila, ni racnäj narä lo xtzuum Jesucrist.

⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzajt.

⁵ Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganiid ni huililajz xtidx Jesucrist nen guedx Acaya.

⁶ Ruxhalä xtixtios lo Marii nani benduxh dzuun lojtu.

⁷ Ruxhalä xtixtios loj reben ladxä ni laa Andrónico näjza Junias; laareni guyunäj narä nen latzguiib, najcreni benro loj reapost. Ganid laareni huililajz xtidx Jesucrist, dxejcti huililazä.

⁸ Ruxhalä xtixtios loj Amplias, ni sanälazä xcuent Jesucrist.

⁹ Ruxhalä xtixtios loj Urbano, ni runnäj nuurnu xtzuum Jesucrist. Ruxhaläza xtixtios loj Estaquis, ni sanälazä.

¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo.

¹¹ Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx Jesucrist.

¹² Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist.

¹³ Ruxhaläza xtixtios lo Rufo nani agule Dios, näjza lo xnanni, sa'csi gujčni si'c xnanäza.

¹⁴ Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni.

¹⁵ Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpən Dios nani yunäjreni ro'c.

¹⁶ Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn biey te guilia' sa' bejn, nani rlajz guntu guiraloj nani najc garenca loj yälrlulii ni bisieedtu, colguibicaj lojreni,

¹⁸ sa'csi sa' rebejnğa direni gun xtzuun Jesucrist. Laareni rlajztisreni gunreni si'c rlajz tiejxhreni; rniireni didxdoo, diidx ni rgudxguel diajg bejn te rusgueereni lastoo rebejn nani di susin.

¹⁹ Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasinduxh xcuent recoshueen, luxh si'c báz xhet ganditu xcuent recosguidx.

²⁰ Luxh Dios nani ruscuedxilajz bejn siojb guta'cwni beñdxab xhan ni'tu. Gacnäj Dad Jesucrist la'tu.

²¹ Timoteu nani racnäj narä lo dzuun, ruxhal xtixtios lojtu. Lucio, Jasón, näjza Sosípater, beñ ladxä, ruxhalza xtixtios lojtu.

²² Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

²³ Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli,

²⁶ naj abaluiloj rediidxga lojtu; näjza xcuent ni bacuaa reprofet galooli; si'c najc diidx ni bia'n Gueb Dios ni nabajn par tejpas loj rexpeljni, agusule'ni loj guiraa reben guedxliuj, te gusoobreni diidx sa'csi rililajzreni xtiidxni,

²⁷ colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijszre lojtu

² ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu.

³ Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yälruulasajz xten Dios ni cua'tu xcuent Jesucrist,

⁵ te xcuentni acua'zatu guiraa dzunsa'c, te gusule'tu xtiidxni, näjza te gachesa'ctu xtiidxni;

⁶ sigajcza con xcälhbabansa'ctu baluiitu huililajzfactu xtidx Dios xcuent Crist.

⁷ Ni'cni xhetliidi cayäädxditu loj redzunsa'c ni runiidx Dios, laḷ ni ganduxh yu'tu cabäjztu guibisac Jesucrist lo guedxliuj.

⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu.

⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtuni.

Rlia' sa'reni neñ guidoo

¹⁰ Rulidxä la'tu, rebetzä, xcuent Xtad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn.

¹¹ Sa'csi agucebeä xcuenttu, betzä ni huililajz xtidx Dios. Tej resa' Cloé biädsä'n diidx loä xcuenttu, yu' yälrdijl lojtu.

¹² Rlazä guiniä scree lojtu sa'csi yu'reni rnii: “Narä nacä te rexpejn Pabl”, näjza: “Narä nacä te rexpejn Apolos”; näjza: “Narä nacä te rexpejn Pedr”, yu'zareni rnii: “Narä nacä xpejn Crist.”

¹³ ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä?

¹⁴ Rudedä xquixtios lo Dios dina nutiobnisä nicla tejtü, xtebtis Crispo näjza Gayo,

¹⁵ te rut naadi con laä batiobnisäreni.

¹⁶ Abanaj lazä batiobnisä resa' Estéfanas. Di lazä guinaj la yu' chu stee bationnisä.

¹⁷ Di Crist nuxhal narä te gutiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

Crist najc xcälmlaagwr näjza xcälhajn Dios

¹⁸ Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni

chalilajz xtiidxni. Luxh loj rebejn ni ruslaa Dios lo dojl najc rediidxga xcämlilaagwr Dios.

¹⁹ Scree caj loj rexquijtz Dios:

Narä sutzulä yäl_nasiñ xten reben_najn, sudzucaäza xcäl_nadxällajz, xhigab rebejn ni nadxällazduhx.

²⁰ ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduhx diidx xcuent recos guedxliujre, ä? ¿La et abejndi Dios najc guiraa yäl_nasiñ xten guedxliuj si'c nayällajz nez loj Dios, ä?

²¹ Ni'cni loj xcäl_nasiñ Dios, di rebejn guedxliuj niembee Dios con xcäl_nasiñ guedxliujre, ni'c bichagljaz Dios con yäl_rusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rlazjpacreni fiireni remilaagwr; rebejn griegw rguuil yäl_nanduxh.

²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzjzt xhet sajcdi rediidxre.

²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzjzt, rediidxre najczani yäl_milaagwr najczani yäl_nasiñ xten Dios.

²⁵ Sa'csi xcäl_nayääl xten Dios si'c rchalo rebejn ni'c najc nasiñduhxru loj xcäl_nasiñ xten reben guedxliuj; luxh xcäl_rniaj xten Dios sacduxhruni loj guiraa xcäl_nadaan reben guedxliuj.

²⁶ Col_huui la'tu, betzä ni ahuililajz xtidx Dios, xho gule Dios la'tu, col_yejn xhigab guxiitu najctu ben_nasiñ loj reben guedxliuj, guxiiza rajptu yäl_rnibee, guxiizatu najctu bejn ni agojl guiga'tu bens'a'c.

²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh.

²⁸ Agule Dios rebejn ni di guiga' ben_ro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c.

²⁹ Te nicla tej bejn digacdi guiliä'p lagajc xpala'nni nez loj Dios.

³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yäl_nasiñ xten Dios, te guibañsa'cnu nez loj Dios, te gacnaya lastoonu, näjza te quiixni rextoj_lnu.

³¹ Si'c bejn Dios te soob xtiidxni cadro caj scree:

Ni rlazj guinii didxro, suguiliä'pni xpala'n dzuun ni bejn Jesucrist.

2

Rediidx xcuent Crist ni cuaj lo cruzj

¹ Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist.

² Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj.

³ Bidzunä lojtu guideb rdxagä, guideb racditä sa'csi cadxebduhxä.

⁴ Cheni basule'ä diidx lojtu, dina niniä didxro xten yäl_nasiñ xten guedxliuj, alga guniä xtiidx yäl_nasiñ xten Sprit D_xan xten Dios näjza xcäl_rnibee Dios,

⁵ te di gac xcäl_rililajztu xcuent yäl_nasiñ xten guedxliujre, te gac xcäl_rililajztu xcuent yäl_rnibee xten Dios.

Rumbee bejn Dios xcuent ni ruluii Sprit D_xan xten Dios

⁶ Rniizanu lo sa'nu ni aguyajl lo xtidx Dios rediidx xten yäl_nasiñ xten Dios, per te yäl_nasiñ ni di gac xcäl_nasiñdi guedxliuj, niclaza xten reni rnibee lo guedxliujre, sa'csi sidzujn dxej sinitlojreni.

⁷ Niluxh che rniinu yäl_{nasin} xten Dios, rniinu diidx ni rut racbex-tebdi, xcuent xho gac guidzunu cadro yu' Dios xhaguibaa. Cheni gajdli gac guedxliuj, rapcheeni yäl_{nasin}xhiga'tz xtenni. Baluiinini loonu te guibannäänuni lo xcäl_{rdimbicha}' xtenni.

⁸ Nicla tej reni rnibee lo guedxliujre gajd gacbee recosre niluxh paru ni-aceberenini, direni nucuaa lo cruzj Dad Jesucrist nani rajp xcäl_{rdimbichaduxh}.

⁹ Najcni si'cni caj lo rextidx Dios cadro rnii:

Recos ni gajdpac baloj bejn fii,

nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluii Diosreni loonu con Sprit D_{xan} xten Dios, sa'csi laani basule'nireni loonu. Sprit D_{xan} xten Dios racbesa'c guiraa rexhigab, näjza recos xhiga'tz xten Dios.

¹¹ Loj reben guedxliuj ¿chuni'c racbee rexhigab ni rujn bejn? Lagajc sprit xten bejn ni yu' nenni racbee xhi xhigab cayujnni. Sigajcza rut racbeedi rexhigab xten Dios; Sprit D_{xantis} xten Dios racbeeni.

¹² Luxh nuurnu dinu nica' yäl_{najn} xten guedxliuj, alga cua'nu Sprit D_{xan} ni siäd lo Dios te gacbeenu rexicos ni abasalajz Dios loonu.

¹³ Nuurnu rniizanu xcuent recosga, xhet diidxdi ni ruluii xcäl_{najn} guedxliujre, diidxtis ni baluii Sprit D_{xan} xten Dios loonu. Si'c ruluiinu rediidxga loj rebejn ni rbäjz Sprit D_{xan} xten Dios neñ lastooreni.

¹⁴ Niluxh reni di chalilajz xtidx Dios, direni gacbee rexhigab xten Sprit D_{xan} xten Dios, sa'csi laareni xhigabyäältis rchaloreni xcäl_{nasin} Dios. Di gac diza gabeereni rexhigabga, sa'csi Sprit D_{xan} xten Diostis rajc ruluii lo bejn rexhigab xtenni.

¹⁵ Rebejn ni ahuililajz xtidx Dios, rula'tzreni guira'ti ni ruluii Sprit D_{xan} xten Dios lojreni. Luxh rebejn ni ahuililajz rutliidi rula'tzdireni.

¹⁶ Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluiini Gueb Dios, ä?” Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.

3

Reni rujn dzuun lo Dios

¹ Rebetzä, di niajcdi niniä redixnagajn lojtu si'c ni rniä loj rebejn ni rajp yäl_{nasin} xten Sprit D_{xan} xten Dios, basule'ä ganaxtis didx guyasi lojtu, sa'csi najctu beñ guedxliuj o biuxbäz ni guxii racbeeni xcuent Crist.

² Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni,

³ sa'csi nabañsijctu si'c nabajn reben guedxliuj laltis runembiidtu, rdxechlajztu lo sa'tu, ¿la ditu gacbee nacsijctu si'c beñ guedxliuj, ä? ¿La laltis nabajntu si'c nabajn reben guedxliuj ni di gumbee xtidx Dios, ä?

⁴ Sa'csi cheni rnii tejni: “Narä nacä te xpejn Pabl”, dxejcti steeni rnii: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

⁵ ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu.

⁶ Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni.

⁷ Ni'cni nicla ni rusulexgaa diidx, niclaza nani racnä j racbeeru bejn rediidxga xhet sajcdireni; Diostis sajc nani rusanij xcäriejn rebejn.

⁸ Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguixx tejganu dzuun nani riennu.

⁹ Nuurnu najcnu si'c remos ni runnä j Dios dzuun. La'tu najctu si'c yuj cadre cayajc xtzun Dios, si'c te yu' ni cayunchee Dios.

¹⁰ Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcn. Niluxh tejga ni chanuu gun dzuun lojga, suga'pni cuidaad xho guiliäsni padeerga.

¹¹ Sa'csi di gacdi gusujreni garenca cimient loj nani najc-xgaa, ni najc Jesucrist.

¹² Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii,

¹³ sidzujn dxej sien xho najc dzuun ni bejn tejga bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcni.

¹⁴ Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnga ni riäj j xca'ni sa'csi bejn ni yusa'c.

¹⁵ Niluxh palga chec ni bejn ni yejc cimientga xhet xca' dini, xcäl nabajntisni di nit, luxh xtzuunni sejc.

¹⁶ ¿La ditu gan la'tu najctu xquidoo Dios, luxh nen lastootu rbäjz Sprit Dxaan xten Dios, ä?

¹⁷ Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸ Nicla tejtü na'c gusgueetu lagajc la'tu. Palga yu' chu rujn xhigab nanduxhni xcuent yäl nasin xten guedxliujre, nanabpac gacni si'c te bejn ni xhet najndi te xca'ni yäl nasin xten Dios te guliipac gacni te ben najn, te ben nasin.

¹⁹ Sa'csi yäl nasin xten guedxliuj xhet sajcdi nez loj Dios. Lo rexquijtz Dios caj scree: "Dios rujn rga' reni rajp yäl nasin xten guedxliuj lagajc xcuent xcäl rusgueereni ni rujn lagajc xcäl nadxäl lajzreni."

²⁰ Ste'ca lajt caj scree: "Nanchee Dios xho najc xhigab ni rujn rebejn ni rajp xcäl nasin guedxliujre, luxh xhetliidi sajcn nez loj Dios."

²¹ Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu,

²² palga najcni Pabl, o Apolos, o Pedr, o guedxliuj, o yäl nabajn, o yäl gujt, o recos ni yu' naj, o recos ni churu gac, guiraareni najc xtentu.

²³ La'tu najctu xten Crist, luxh Crist najc Xi'n Dios.

4

Xtzuun reapost

¹ Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu.

² Mbaj pues, te bejn ni cahuii te dzuun nanab gusoobreni diidx, gunreni te dzunsa'c.

³ Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios.

⁴ Entis rbedxi xcärienä, per xhet xcuent ni'cni sajcn guiniä xheti xtolä, Dad Jesucrist najc nani rula'tz narä, rhuilojni xho nacä.

⁵ Ni'cni la'tu na'c gucuacuijtu bejn che gajd guidzujn dxej; colcuäjz jiäd Jesucrist dxej laani sibääni lo bianij guiralii ni naga'tz lo nacäy, luxh suluilozani xhi xhigab yu' nen lastoo tejga rebejn, dxej lo tejganu sudeed Dios ni nungäj xca'nu.

⁶ Rebetzä, xcälhasa'ctu caniä rediidxre lojtu. Caniä xcuent Apolos näjza narä, si'c te yälrlului te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, laj ni cabälaztu steeni.

⁷ Sa'csi ¿chuni'c rnii najclu bensa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdü lojlu recos ni rajplu?

⁸ Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii guli najcpactu reii te näjzanu guinibenäjnu la'tu.

⁹ Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangl Dios najcnu si'c reben ni rdedlojtis bejn lojreni.

¹⁰ Nuurnu najcnu bejnayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu.

¹¹ Cadeednu trabajwduxh naj, rliaannu, riojlnu, xho rniaj xhajbnu, rdilnäj rebejn nuurnu, luxh xheti roliznu.

¹² Rdxaagnu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsí rebejn nuurnu, rientisnu huant.

¹³ Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuää rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä.

¹⁵ Palga ga'ptu tzuu mil bejn ni guluiitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu.

¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabanä lo yäl nabajxten Jesucrist, sigajcni ruluiä nen reguidoo guiraasi lajt.

¹⁸ Yu'tu ni acayajc guyalajz, naatu pet dina guibisacä lojtu.

¹⁹ Cabzä jädhuiätu, palga si'c rlanj Dios, dxej sacbeä chuni'c najc rebejn ni cayajc guyalajz, fiä xhipacni rujnreni, xhet xtiidxtisreni gacbeä.

²⁰ Sa'csi xcälrnibee Dios xhet ganaxtis xcuent diidx najcni, näjza dzuun ni rujnreni ruluiloj xcälrnibee Sprit Dxan xten Dios ni rajpreni.

²¹ ¿Xho rlazzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunää yäl rinälajz näjza yäl nadolajz te gulidxätu, ä?

5

Xho nanab gunnäjtu te bejn ni rujn falt lo sa'ni

¹ Agucbeä yu' tejtü ni ahuililajz xtidx Dios, cua'ni si'c chäälni te gunaa ni gujchäälni xtadni. Dee najc te dolduxh nani nicla reni di chalilajz xtidx Dios direni gun.

² Luxh la'tu gujctu guyalajz lacuaa niac-huin lastootu; te bejn nani bejn dojlga, riäj nibäätuni nez lojtu.

³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dolduxhğa, sigajc ni niunä paru suga'ä ro'c.

⁴ Con laj Dad Jesucrist, che abidxagsa'tu, luxh alastoä suganäj la'tu, con xcälrnibee Dad Jesucrist,

⁵ abenä xhigab guteednu bejnğa ladznäa bendxab te ted tiejxhni trabajw, niluxh sprit xtenni laani neñ dxej ni jiädsac Dad Jesucrist lo guedxliujre.

⁶ Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä?

⁷ Colgudzucaj cobyujxhga, te guibajntu te yäl nabannayacoob si'c te cobyä, sa'ni racchee yätxtiil ni xheti levaduur yejcnı par lanij xten pascw. Arajptu yäl nabannaya sa'csi agujt Jesucrist sigajc gujt te xile' lo lanij pascw te badzucajni rextojlnu.

⁸ Si'c nanab jiennu lanij xten pascw con yätxtiil ni xheti levaduur yejcnı, nalajznu con yäl guliipac neñ lastoonu, xhet yätxtiildi ni yu' cobyujxhga yejcnı, nalajznu na'c gunlu latsiaj.

⁹ Lo stee guijt abacuaä lojtu, na'c guchaagtu reben ni runnäj cosguijdx bejn ni di gac chäälreni.

¹⁰ Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu rebanäjb. Paru si'c gacni, nanab jiunejztu guedxliujre.

¹¹ Niluxh narä bacuaä guijtza lojtu te na'c guchagsa'tu te bejn nani rnii ahuililajzni xtidx Dios, luxh rujnrıni cosguijdx con bejn ni di gac chäälreni, o rchaglaztejni meel, o riuni rebanäjb, o rniyaj sa'ni, o rsiojzıni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnğa.

¹²⁻¹³ Sa'csi narä di gacdi gunä yäl guxhtis loj rebejn ni gajd chalilajz xtidx Dios. Gunti Dios yäl guxhtis lojreni. La'tu nungäj guntu yäl guxhtis loj rebejn ni ahuililajz xtidx Dios. Ni'cni colgudzucaj bendojlga lojtu.

6

Na'c chäätu loj rebendojl te gunreni yäl guxhtis lojtu

¹ Palga tejtı ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebendojl te gunreni yäl guxhtis lojtu? ¿Xhicuent ditu guiniab yäl guxhtis loj rebejn ni ahuililajz xtidx Dios, ä?

² ¿La ditu gan, rebejn ni ahuililajz xtidx Dios sujn yäl guxhtis lo reben guedxliuj, ä? Palga la'tu sujntu yäl guxhtis lo reben guedxliuj, ¿la di gacdi guntu yäl guxhtis lo sa'tu lo recosbäz lacuaa chäätu loj rebendojl te gunreni xcäl guxhtisreni lojtu, ä?

³ ¿La ditu gan sienzaınu yäl guxhtis lo rexangl Dios, ä? ¡Aticaxh jiennu yäl guxhtis loj recos bäze' xten sa'nu lo yäl nabajıre!

⁴ Palga la'tu cadılınäj sa'tu xcuent recos xten guedxliujre, ¿xho mood chäälu loj rebendojl ni rut najcdi loj xquidootu, te naareni lojtu xhini'c guntu, ä?

⁵ Rniä rediidxga lojtu te guitujytu. ¿La ruti nicla tej beınasıı loj guiraatu ni sajc gun yäl guxhtis lo resa'tu, ä?

⁶ ¿Xhicuent rile'c te bejn ni rililajz xtidx Dios xquej bejtzıni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanıjttu sa'csi yu' yäl rdılınäj sa'tu; colgutıjıj lajztu rebejn ni rujn dojl lojtu. Maazru huen colgusaan sucua'reni xhıxtentı.

⁸ Per dee, alga lagajc la'tu runnijttu loj lagajc resa'tu, luxh rca'tu xhıxten lagajc resa'tu.

⁹ O ¿la ditu gan reben dojl dipacreni jıu' lo xcälrnibee Dios, ä? Na'c gusaantu gusgueereni la'tu; nicla te resa' dee di jıu' lo xcälrnibee Dios: guiraa reni

richagtoo regunaa; guiraa reni rajn rebanäjb; reni resnäjb bejn ni di gac chäälni; reniguii ni rungunaa; reni najc birääx;

¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnibee Dios.

¹¹ Yu'zatu ni gujc si'c galoo, niluxh naj abasia Dios lastootu, naj anajctu bejnaya nez loj Dios sa'csi abiällajz Dios xtojltu xcuent Jesucrist, näjza xcuent Sprit Dxaan xtenni. La'tu anajctu rexpejnni.

Tiejxhnu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä.

¹³ Guliini najc yälrajw par xque'ni, luxh xque'ni najc par yälrajw, niluxh sidzujn dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu.

¹⁴ Luxh naj lagajc Dios guläs Dad Jesucrist lo rebengut, siliäsazani nuurnu con xcälrnibeduxhni.

¹⁵ ¿La ditu gan tejpgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¿Gurniälojlu jiennu si'c!

¹⁶ ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: “Guiro'preni sajc si'c tejtis bejn.”

¹⁷ Niluxh nani rudeed lastooni lo Dios anajczani tejtis con laani sa'csi rbäjz Sprit Dxaan xten Dios nejn lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nejn tiejxhni.

¹⁹ O ¿la ditu gacbee tiejxhtu najc xquidoo Sprit Dxaan ni abaniidx Dios te cuääzni nejn lastoonu, ä? Ni'cni di gacdi guinibeetu lagajc la'tu.

²⁰ Agudijx Jesucrist xtojlnu con xtiejnni lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtu.

7

Yälrulijdx xcuent yälruchnaa

¹ Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii.

² Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni.

³ Nanab niguii guchaagni chäälni che rlazj chäälni, sigajcza gunaa nanab guchaagni chäälni che ni si'c rlazj chäälni.

⁴ Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni.

⁵ Na'c gusuni' tejtü lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacsä'tu te na'c guquijl bendxabtu chunäjtu ste'ca bejn.

⁶ Rniä rediidxre lojtu te ni rlazj guchnaa sajc guchnaani, niluxh dina guiniä lojtu, nanabpac guchnaatu.

⁷ Narä rlazä maläii sajc gac guiraa bejn si'c ni nacä. Dios abadeed loj tejga bejn xho mood guibajjn. Yu'reni sajc guibajjn tej mood, yu'zarenı sajc guibajjn garenca mood.

⁸ Loj reben xteb näjza loj regunabiuud rniä, hueen najc na'c guchnaareni, gacreni si'c narä.

⁹ Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlaizreni guchaagreni te niguii o te gunaa.

¹⁰ Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni."

¹¹ Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹² Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlaiz gunaaga cuäznäjni niguiiga, na'c guro'n niguiigani.

¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlaizni cuäznäjni gunaaga, na'c guro'n gunaaga chäälni.

¹⁴ Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yälruचनाaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yälruचनाaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni.

¹⁵ Palga chäälni te gunaa o chäälni te niguii ni di chalilajz xtidx Dios luxh rlaizni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuecdxini lajznu.

¹⁶ Sa'csi ¿xho najnlu, gunaa, la suslaa Dios chäällu lo dojl xcuentlu, ä? O ¿xho najnlu, niguii, la suslaa Dios chäällu lo dojl xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini neñ guiraa reguidoo.

¹⁸ Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni.

¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios.

²⁰ Tejgani jia'n si'cni najcni cheni gurejdx Diosni.

²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi.

²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios.

²³ Guzii Cristtu con xtiejnini, ni'c na'c gusaantu guinibee bejn la'tu te gac guntu xtzun Dios.

²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵ Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä.

²⁶ Runä xhigab hueen najc palga di reniguii guchnaa sa'csi siäd yälraganduxh lo guedxliujre.

²⁷ ¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu.

²⁸ Palga guchnaalu, xhet dojl di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yalnabajnre. Ni'cni rniä na'c guchnaatu sa'csi di rlazä tedtu trabajw.

²⁹ Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtentis yäl'ruchnaa, te gac gunreni xtzuun Dios.

³⁰ Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni;

³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchnaa, riurenirextzuun Dios, näjza xho guspaareni lajz Dios.

³³ Renani abachnaa riurenirextzuun Dios, guspaani lajz chäälni,

³⁴ tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riurenirextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riurenirextzuun Dios, näjza xho guspaani lajz chäälni.

³⁵ Rniä rediidxre par xcäl'nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani.

³⁷ Palga steeni dini gun xhigab si'c nanab gunni, sajc gunni si'ctis ni rlanjzi palga abejnpacni xhigab nen lastooni di xindxa'pni guchnaa, hueenza najc si'c.

³⁸ Ni'cni nani rudeed xinda'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

³⁹ Te gunaa ni abachnaa, rajpni por guibannäjni chäälni guideb nabajn chäälni. Palga guet chäälni, jianxtebni stehuält, dxejc sajc guchnaani chutis niguii ni rlanjzi, palga najcni tej ni ahuililajz xtidx Dios.

⁴⁰ Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxan xten Dios narä.

8

Yäl'rajw ni ruzujreni lo rebanäjb

¹ Rniä lojtu xcuent reyäl'rajw ni ruzujreni lo rebanäjb. Guliini guiraanu rajpnu yalnajn xcuent recosga. Niluxh yalnajn rujn rajc bejn gualajz. Luxh yäl'rinälajz sa'ni, ni'c rujn racnäjnu resa'nu.

² Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni.

³ Palga yu' chu sanälajz Dios, Dios anumbee bejnga.

⁴ Ni'cni, xcuent reyäl'rajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios.

⁵ Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" näjza xhidajl lam ni rnibee,

⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnnu. Rajpnu tejtis Dad ni rnibee loonu, ni'c najc Jesucrist. Xcuent xcäl'rnibeeni guc-chee guiraa recos loj guedxliuj, luxh nuurnu nabajnnu xcuent Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajnreni rebanäjb, luxh rajwzareni reyälrajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhinza xcäriejnreni.

⁸ Xhet xcuent xhi rdaudinu sajc guibaṅsa'crunu lo xnejz Dios. Xhet najcdi palga guidaunu o palga dinu guidau.

⁹ Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios.

¹⁰ Palga te bejn ni gajd chalilazsa'c xtidx Dios fiini cayajwlu reyälrajw ni guzuj lo rebanäjb, luxh luj najclu te bennajn, sa'csi dee gajd gachesa'c rextidx Dios, ħla di lajzni gac nadip te näjza laani chatajwni yälrajw ni guzuj lo rebanäjb?

¹¹ Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijṅni, luxh najcni bejtzlu sa'csi näjza par laani gujt Dad Jesucrist lo cruzj.

¹² Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist.

¹³ Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

9

Xhi sajc gun te apost

¹ ħLa dina gacä te bejn ni rut lojdi yu'ä? ħLa xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios.

² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³ Diidx ni rniä scree loj reni di chalilajz nacä apost najc scree:

⁴ ħLa di riäjl xca'ä guiraa ni runiidxtu gauä näjza ni runiidxtu yä'ä?

⁵ ħLa digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr?

⁶ O ħla xtebtis Bernabé näjza narä di gacdi cuääz jiennu dzuun te guidaunu laj rusule'nu xtidx Dios?

⁷ ħChuni'c rajc soldaad luxh lagajc laani siini xhi gauni? O ħchuni'c rusuj yaguub luxh dini gau ninejxh ni rcaj lojga, ä? O ħchuni'c rajp gaii dxib, luxh dini yä le'ch ni rudeedreni, ä?

⁸ Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre.

⁹ Loj reguijtz xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” ħLa guniitis Dios rediidxre sa'csi riuni regon, ä?

¹⁰ ħDini gac! Xcälṅnasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäjl gunlojni xca'ni te yälṅnasa'c ni rajc lo xniaani.

¹¹ La'tu najctu si'c te yuj cadre gule'cnu binij sa'csi basule'nu rextidx Dios lojtu, ħla rujntu xhigab dzunro najc gacnäjtu nuurnu tudxene', ä?

¹² Palga racnäjtu ste'ca bejn ni ruluiitu, nungäjlrū gacnäjtu nuurnu.

Niluxh gajdnu guinii si'c lojtu sa'csi di rlajzdinu guidxoönnu chalilazsa'ctu rextidx Dios, ni'c chotipnu lajznu guiraa retrabajw ni cadeednu.

¹³ La'tu najntu reni rujn dzuun nen guidoro rajwreni rebääl ni risa'nreni lo Dios, sigajcza reni rujn dzuun lo dxan cadre risa'nreni xpääl reguidxaa lo Dios, näjza laareni rajwreni rebäälga.

14 Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni.

15 Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

16 Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios.

17 Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni.

18 ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjil gunreni.

19 Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios.

20 Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga.

21 Stee lajt cadro rlazä gunä gaan reni di guibajn lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist.

22 Cheni yu'ä loj reni guxii rililajz xtidx Dios, racäza si'c ni najczeni te gunä gaan chalilazsa'czeni. Narä runä sigajc rujnreni, te si'c gunä gaan chalilajz xhidajlreni xtidx Dios.

23 Runä guira'ti xcuent xtidx Dios ni ruslaa bejn lo dojl, te xca'zanu, narä näjza rebejn ni ahuililajz xtidxä, yäl'nabajn par tejpas.

24 Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan.

25 Guiraa reni rlazj guxun rapdareni tiejxhrene te ga'p tiejxhrene yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj.

26 Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäätisni lo bej.

27 Niluxh narä runä rajc tiexhä si'c xmosä te na'c gunni si'ctis ni rlazjni, te gunni nani rlazj Dios te di cheni abasule'ä xtidx Dios loj xhidajl bejn, gusanxtuju tiexhä narä.

10

Yäl'rulijdx lo xcuent rebanäjb

1 Rebetzä, di rlazä jiällajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa.

2 Gudejdreni xpalaa te za näjza gudejdreni galäii nisdoo; ni'c najc si'c te yälrobnis sa'csi sanajlreni toMoisés.

3 Sigajcza guiraareni gudajw tejtis yäl'rajw ni baxhal Dios xhaguibaali.

4 Guiraazareni gu' nis ni badeed Dios, Dios bejn birii nisga cuä' te guilaj. Luxh Xpriet Crist gusanäjreni cadrotis sääreni nez lo reyubidzroga. Luxh con xcälrnibeeni birii nis loj guilajga, Crist najc si'c guilaj ni huinäreni.

5 Dios bidxechnäj xhidajlreni, ni'c xhidajlreni gujt nez lo reyubijdzga.

6 Guiraa rediidxga najc te yäl'rulijdx loonu, te na'c guichaglazjnu jiennu lagajc redojl ni bejn retoxtadgoldoonu.

⁷ Na'cza gantu rebanäjb si'c ni bejn baltireni; acaj lo rexquijtz Dios xcuentreni: “Rebejn ni guyaa lajz gurejreni te gu'reni, gudajwreni, dxejctiru huisureni te gusloj caguijtreni.”

⁸ Na'c chunäjnu stee bejn di gac chäältu si'c bejnreni, ni'cni gujt galbichon milreni tejtis dxej.

⁹ Na'cza guche'chnu Dios con rextojlnu si'c bejn balti rebejnga, ni'cni gujtreni sa'csi gudauya' bälreni.

¹⁰ Na'cza chamojmtu xcuent ni rujn Dios si'c ni bejn rebejnga xcuent ni bejn Dios, ni'cni baxhal Dios angl xten yälgujt bagu't xhidajlreni.

¹¹ Guiraa redee gusajc retoxtadgoldoonu te ruliidxni nuurnu, cuajzaren i lo guijtz te guluii rediidxga nuurnu xho riäj l jiennu, nuurnu ni nabajnu nen redxej naj.

¹² Ni'cni chutis ni rujn xhigab nabansa'cni nez loj Dios, sudzu'tzni te di jiabsacni.

¹³ Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yälnadip yälnadaan lojtu te che tedtu trabajw sidxältu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanälazä, colbicaj lo yälrajn xten rebanäjb.

¹⁵ Rniä lojtu si'c lo te ben nasin, te bennajn: colgulatzsa'c rextidxä don la laaca najcreni.

¹⁶ Che rdaunu xchej xten Dad Jesucrist najcni te seen nabannänu Jesucrist. Che rdunnu nen co'p, rnaalajznu gudijx Dad Jesucrist xtiejnni xcuent xtojnu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu.

¹⁷ Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ ¡Bahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan nen guidoo, ni'c najcreni tejsi con guiraa rebejn nani rujn sigajc rujnreni.

¹⁹ ¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä?

²⁰ Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo rebendxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebendxab, te di chachunäjzatu rebendxab.

²¹ Sa'csi digacdi yätu co'p ni rusnaj laaznu ni bejn Dad Jesucrist lo cruzj nägajcza co'p nani rudeedreni lo rebendxab. Digacdiza guidaunu xchej xten Dad Jesucrist nägajcza xchej ni rudeedreni lo rebendxab.

²² O ¿la rlaznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios

²³ Guliicani, sajc jiennu xhitis ni rlaznu jiennu, niluxh xhet guira'ti ni rlaznu jiennu najc hueen par nuurnu. Guira'ti najc laaca, niluxh yu' reni di gacnäj gustioobnu lo xcälrililajz Dios.

²⁴ Na'c guntu xhigab quiiltistu lagajc xcälnasa'ctu; maazru hueen quiilzatu xcälnasa'c xpisintu.

²⁵ Coltajw xhitis bääl ni rdo' lo guui, na'c guiniabdiidxtu caro siädni te di gacnaj xcäriejntu.

²⁶ Lo xtidx Dios caj rediidxre: “Sa'csi guideb guedxliuj näjza guiraa ni tre' lo guedxliuj najc xten Dios.”

²⁷ Palga jädgajñ te bejn ni di chalilajz xtidx Dios luj jädtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu.

²⁸ Palga yu' chu naa lojlu: “Dee najc bääl ni bile'cnu lo rebanäjb”, na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis.

²⁹ Dina guiniä xcäriejnlu, didi gunnajni xcäriejn stee dade'ga; mbaj ñaj, ¿xhicuent riäj] gula'tzreni narä sa'csi rajc runä guira'ti porsu racnaj xcäriejn ste'ca bejn, ä?

³⁰ Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios?

³¹ Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios.

³² Na'c guche'chtu nicla rexpejn Israel niclaza rebenzajt, niclaza rexpejn xquidoo Dios.

³³ Sigajcza runä narä, runä guira'ti ni ruspaaj lajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

11

¹ Colyejn si'cni runä narä, sigajcza narä runä si'cni rujñ Jesucrist.

Xho riäj] gun regunaa neñ xquidoo Dios

² Rliä'pä xpala'ntu sa'csi lo guira'ti rñaj lajztu narä, rñajza lajztu rediidx nani baluiä lojtu, sudzu'tztu rusooctu rediidx sigajcni baluiäreni lojtu.

³ Narä rlazä gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist.

⁴ Chutis te niguii ni yu' xhumbreel yejñi lalñi cabedx-canabni lo Dios o lalñi caguluiini xtidx Dios, laani rusanxtujyñi yejñi.

⁵ Palga yu' te gunaa ni dini gusäu xpäiini yejñi che cabedx-canabni loj Dios o che caniini xtidx Dios, rusanxtujyñi yejñi sa'csi najcni sigajc najc te gunaa ni abigaj yejñi.

⁶ Palga di te gunaa gusäu xpäiini yejñi suguigaj yejñi. Palga najcni te xtujy guigaj yejñi, sugusäuni xpäiini yejñi.

⁷ Di guchaag gusäu te niguii yejñi sa'csi najcni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii.

⁸ Sa'csi di niguii nixtiej cuä' gunaa; gunaa najc ni birixtiej cuä' niguii.

⁹ Xhetza xcuent gunaa di guc-chee niguii; gunaa najc ni guc-chee xcuent niguii.

¹⁰ Ni'cni nanab jäu yejñi gunaa neñ guidoo si'c te seen lo rexangl Dios yu' chu rnibeereni.

¹¹ Niluxh nez lo Dios nicla niguii niclaza gunaa digacdi guibañ xtebreni.

¹² Sigajc galoo birixtiej gunaa cuä' niguii, sigajcza ñaj gunaa najc nani ruu báz; luxh Diostis najc nani runchee guira'ti rebejn.

¹³ Colyejn lagajc xhigabtu ñaj, ¿la laaca najcni cuedx-guiniab te gunaa lo Dios lalñi xhet niäudi yejñi, ä?

¹⁴ Loj rebeñ guedxliuj guiraa reniguii rgaj yejñi, sa'csi najcni te xtujy guigaduxh xquidxejñi.

¹⁵ Niluxh regunaa hueen najc rga' xquidxejñi te rusäuni yejñi.

¹⁶ Palga yu' chu tildiidx xcuent rediidx nani cania lojtu, nanab gacbeeni si'ctis riennu, si'ctisza rujñreni neñ guiraa rexquidoo Dios.

Xho ruxhiñreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu.

¹⁸ Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre.

¹⁹ Pet naatu nanab guntu si'c te gacheetu chureni'c sanälajzpac Dios, chureni'c sajcru lo xtzuun Dios.

²⁰ Ni'cni che rdxagsa'tu, dini gac te cuetu lo xmex xchej Dad Jesucrist,

²¹ sa'csi che agule'creni xchej lo mex, tejga bejn rlajz xcaxgaa xhi gauni, dxejc yu' reni agudxadoo xque'reni, agusozzareni, lalni yu' stee cuaa bejn calaan, gajdreni gau.

²² ¿Xho mood? ¿La xheti rolijztu cadre gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? ¡Gurniälojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcuent xho bejn ni guxhijn che gudaunäjni rexpejn ni te xchej xten pascw, guxhijn ni gudo'ni. Cua'ni yätxtiil,

²⁴ dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.”

²⁵ Si'cza bennäjni co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.”

²⁶ Che gautu yätxtiilga, che yätu nen co'pga, ruluilosactu xhi bejn Jesucrist che gudijxni xcuent rextojlnu lo cruzj; si'cza colyujn dxejli ni guibisacni lo guedxliujre.

Xho riäjlgac xchej Dad Jesucrist

²⁷ Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejn ni.

²⁸ Niluxh sugula'tz tejgatu lagajc lastooni don la yu' xhi dojl bejn ni, dxejcti sajg gauni yätxtiil, yäni co'p xten xchej Dad Jesucrist, sa'csi abaxhobdojlni.

²⁹ Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnej Dios yejcn.

³⁰ Ni'cni lacti resa'tu racxhuu, xhet nadaanreni, luxh yu'zareni agujt.

³¹ Ni'cni nanab fiinu xho najcnu, guiniabnu lo Dios gudzucajni rextojlnu te didi tednu trabajw.

³² Niluxh che rdejdnu trabajw, rdejdnu te na'c tednu trabajwduxh si'c ted reben guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuäjz resa'tu.

³⁴ Palga yu' chu tejtü ni calaan, sugauni lagajc rolijzni, te di gun Dios yälguxhtis lojtu. Guiraa rexhistee cos, che jäälä ro'c fiä don xho gacsa'cni.

12

Dzuun ni rudeed Sprit Dxaan xten Dios lo tejga ni rililajz

¹ Rebetzä, rlazä gacheetu xcuent dzuun ni rudeed Sprit Dxaan xten Dios lo tejganu.

2 La'tu najntu che gajdtu chalilajz xtidx Dios, rajntu chutis banäjb ni di gachee, ni naatis bejn gan̄tu.

3 Ni'cni rlazä gacheetu naj, nicla tejtü ni yu' Xsprit Dxan Dios neñ lastooni sajc guinii: “Xhet sajcđi Jesucrist.” Luxh rut rajcđi rnii: “Jesucrist najc Dabđid baxhuaannu”, palga di Xsprit Dxan Dios cuääz neñ lastooni.

4 Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga neñ lastoo guiragajcnu.

5 Yu'za balti cuaa dzuun nani riennu, niluxh tejsi najc Xtadđid baxhuaannu.

6 Yu' xhidajl mood rajc dzuun, niluxh tejsi Dios rujn dzuunga lastoo guiralii bejn.

7 Tejga bejn ruluiloj garen-garen xtzüun Sprit Dxan xten Dios, niluxh guira'ti redzuunga najc te gacnäjreni guiraanu.

8 Lo tej bejn rudeed Sprit Dxan yäl̄nasiñ, lo steeni rudeed lagajc Sprit Dxanga yäl̄najñ.

9 Lagajcza Sprit Dxanga rudeedzani yäl̄rililajzro lo tejni, dxejc lo steeni rudeedza lagajc Sprit Dxanga yäl̄rnibee te rusiajčni yäl̄racxhuu.

10 Loj stee bejn rudeedzani yäl̄rnibee te gunni milaagwr, loj stee bejn rudeedni yäl̄riembe te sajc guinixgaani xcuent recos ni churu gac; lo steeni rudeedni yäl̄nasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl̄racbee te rajc rniini loonu xhini'c gunii bejn ni rnii garen-garen redidxsaj.

11 Niluxh tejsi najc Sprit nani rujn guiraa redzuunre, racnäjni rujn tejganu xtzüunni si'ctis ni rlazjni.

Guiraanu najcnu te la' tejsi tiejxh

12 Sigajc ni najc tiejxhnu tejsi, mase yu' xhidajl la' xtenni, tejgareni te la' tejsi tiejxh, sigajcza najc rebejn nani huililajz xtidx Jesucrist.

13 Guiraanu, mase najcnu rexpejn Israel o beñ griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädläjz neñ lastoonu.

14 Sa'csi tiejxhnu dini gac tejsi la', najčni balti la'.

15 Paru naa ni'nu: “Sa'csi dina gacä te naa, ni'cni dina gacä te la' tiejxhre.” ¿Xhixh porsı ni'c dini gac tla' tiejxhga, ä? ¡Gurniälöjlu!

16 Palga diajgnu naa: “Dina gacä te baloj, ni'cni dina gacä te la' tiejxhre.” ¿Xhixh porsı ni'c dini gac tla' tiejxhga, ä? ¡Gurniälöjlu!

17 Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni?

18 Mbaj naj, ni'c basoob Dios guiraa rela' te guc-chee tiejxhnu si'ctis ni rlazjni gacni.

19 Paru niajc guidebni si'c tejtis la'ni, ¿xho niajcpacni te tiejxhni dxejc?

20 Niluxh naj ensilaani yu' xhidajl la' te najčni tejsi tiejxhni.

21 Te balojnu di gac gäbni lo naanu: “Dina guiquinälu”, niclaza bitiuycni di gac gäbni lo ni'ni: “Dina guiquinälu.”

22 Chucala lapacreni rquiinru nani ruzeñ lascanu xhet sajcđireni.

23 Luxh retla'ga nani rchalonu guxii sajcđireni, reni'c maazru sajc. Luxh reni rtuinäänu, niguii sigajc gunaa, reni'c riapdarunu.

24 Biätla sgaai la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc.

²⁵ Bejn̄ni si'c te di chu yälrdijl lo retla' tiejxhnu, te guiraa retla'ga gacnäjä sa'reni.

²⁶ Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni.

²⁸ Luxh abadeed Dios yälrnibee lo tejganu lo xquidooni te gunnu xtzuumxtzuunni. Ganidtoo guleni reapost; ni rojpga guleni rebejn̄ ni rnii xtidx Dios; ni riojn̄ga, guleni rebejn̄ ni ruseed; dxejcti guleni reni rujn̄ remilagwr, reni rusiajc beñracxhuu, reni racnäjä, reni rnii garen-garen redidxsaj.

²⁹ Et guiraadi rexpejn̄ Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn̄ remilagwr.

³⁰ Et guiraadireni rajc rusiajc rebeñracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga.

³¹ Nanab guideb lastootu rlajztu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

13

Yälsanälajz

¹ Palga guiniä guiraloj xtidxsaj rebejn̄, o xtidx rexangl Dios, luxh dina chanälazä rebejn̄, rubejtis xtidxä si'c te tamboor o te platii.

² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yäl̄nasiñ xten guedxliujre, palga rapä yäl̄rililazduxh te gac gäpä lo redajn̄re, "col̄guibicaj", luxh rbicajreni, niluxh xhet sanälazädi rebejn̄, rut nacädi.

³ Palga gudedä guiraa rexhixtenä nani rapä te gau rebejn̄ ni xhet rajpdi; palga gudedä tiexhä te checni, luxh xhet sanälazädi rebejn̄, xlia'si gunä guiraa redzuunga.

⁴ Rebejn̄ ni rajp yälsanälajz cabäjäzreni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz.

⁵ Direni gun recos ni di guchaag, dini quuil xcäl̄nasa'ctisni, dini guidxe'ch, dini jiu redojl̄ ni rujn̄ bejn̄ lojni.

⁶ Nani rajp yälsanälajz dini guibalajz che rujn̄ stee bejn̄ dojl̄, alga rbaa lajzni che laaca rujn̄ bejn̄.

⁷ Nani rajp yälsanälajz rujn̄ huant xhitis cos, rililajzni hueen xcuent xhitis cos, sanuutis cabäjäzni, rajc rdejdn̄i xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn̄ dxej sibäjäz rediidxga. ¿La rajc rnii bejn̄ garen-garen redidxsaj, ä? Sidzujn̄ dxej siacdx̄i redidxsajga. ¿La yu' yäl̄najn̄? Sidzujn̄ dxej sinitlojpacni.

⁹ Sa'csi naj̄ guxilii racbeenu, guxilii xtidx Dios xcuent recos ni churu gac rajc rniinu,

¹⁰ niluxh che jädsac Jesucrist ni rajp guiralii yäl̄najn̄, sinitloj xcäl̄nandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yäl̄bengol, gunitloj rexhigab biuux ni benä galoo.

¹² Sa'csi naj̄ rhuiinu si'c loj te guihuajn̄ ni nacäjä, luxh che guibañnänu Dios xhaguibaa, suhuisa'cnu si'cni ruhuii bejn̄ che suga'ni loj sa'ni cahuiinini. Naj̄ racbeenu re'cti rec, niluxh dxejc sachesa'cnu si'cpacni numbee Dios nuure.

¹³ Niluxh naj̄ ria'n yäl̄rililajz näjza yäl̄rbäzljajz, näjza yälsanälajz. Lo guidxon̄ redee, sajcr̄u yäl̄rinälajz.

14

Renani rnii rediidx

¹ Ganiddoo colquiiil yäl_rinälajz, col_nabza lo Dios te guniidxruni xhi stee dzuun, niluxh col_yejnru te xca'tu yäl_rnibesa'c te gusule'tu xtidx Dios.

² Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani ruluii Sprit D_xan xten Dios guiniini.

³ Niluxh bejn ni rusule' xtidx Dios, rustioobni xcäl_rililajz bejn ni rulijdxni, ruspaani lajz nani rac-huin lajzni.

⁴ Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobruni lastoo guiraa rebejguidoo.

⁵ Narä r_lazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini.

⁶ Mbaj naj betzä, che jiälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl_najn, o xcuent te xtidx Dios, o xcuent te yäl_ruluii.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn go_lsa'creni, ¿xho jiennu gacbeenu xhi dij cayol_reni, ä?

⁸ Sigajcza lo guerr, palga direni go_l cornet dippac, ¿xho gacbeereni agojl chatijl_reni, ä?

⁹ Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniilu, ä? Xlia'si guiniilu, lo bejtis sää xtiidxlu.

¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni.

¹¹ Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza sajc nani caninäj narä.

¹² Ni'cni la'tu ni r_lajztu xca'tu yäl_rnibee xten Sprit D_xan te guntu xhi redzuun, col_guejs, col_nab lojni xhidajl dzuun te gacnäjtu tioobru xcäl_rililajz rexpén guidoo.

¹³ Ni'cni palga yu' te bejn ni rnii garenca didxsaj, suguiniabni loj Dios yäl_rnibee te gac gusule'ni diidx ni rniini lo rebejn.

¹⁴ Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini.

¹⁵ ¿Xho ricajni dxejc? Siniab xspritä näjza xcärienä lo Dios; so_l xspritä näjza xcärienä dij.

¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu.

¹⁷ Hueenza calä'plu xpala'n Dios, per stee bejnga dini tioob loj yäl_rililajz.

¹⁸ Rudedä xquixtios lo Dios maazru rajc rniä garen-garen diidx loj guira_gajctu.

¹⁹ Niluxh ne_n guidoo maazru r_lazä guiniä con xcärienä gaiitis diidx nani gacbeetu, nani guluii la'tu, loj tzuu mi_l diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per col_yejn xhigab si'c te bejngool.

²¹ Scree caj lo xleii toMoisés: “Mase guiniä lo rebejn con garenca diidx näjza xtidx benzijt, nicla si'c direni gucuadiajg xtidxä”, naj Dad baxhuaannu.

²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl_rusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios.

²³ Palga re'tu nen guidoo dxejcti caniitu garen-garen diidx ni rut racbeedi, dxejc guidzujn tej ni di gan xtidx Dios, siniini guiraatu rajc yejctu.

²⁴ Palga re'tu nen guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniitu, sacbeeni yu' xtojlni,

²⁵ sienloj rexhigab xhiga'tz ni yu' nen lastooni, dxejcti siabrojni suzuxhijbni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu nen guidoo suxca' tejpgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcälirililajz renani ahuililajz xtidx Dios.

²⁷ Palga yu' renani rnii con garenca diidx, suguinii tio'p-chon bejn, niluxh tebgajreni, dxejcti sugusule' steeni xhi säloj ni rnii tejpgareni.

²⁸ Palga rut rajc di gusule' rediidxga, na'c guiniireni con garenca diidx nen guidoo, suguinixtebrene lo Dios.

²⁹ Si'cza renani rusule' diidx ni rudeed Dios lojreni, suguinii tio'p-chon bejn, niluxh tebgajreni, te cuadiajg stiop xchonreni donnu la laaca caniireni.

³⁰ Palga gululoj Dios te cos loj te bejn ni sobga' cacuadiajg, sucuedxisijcni, dxejcru suguiniini.

³¹ Sa'csi guiraatu sajc gusule'tu tebgajtu didx ni baniidx Dios lojtu te gac guisieedu, te tioob lastoo guiraatu lo yälirililajz.

³² Rudeed Sprit Dxan xten Dios yälrijn loj reni rusule' diidx ni rudeed Dios lojreni te acanajnreni che riäjl guiniireni o che riäjl cuedxireni,

³³ sa'csi Dios najc te Dios ni rujn guira'ti xnejz-xnejzni, dini gun bieje, niluxh rbecdxini lastoo bejn nen guiraa reguidoo xten rebejn ni ahuililajz-pac xtiidxni.

³⁴ Sucuedxi regunaa nen reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' reniguii lojreni.

³⁵ Palga rlajzreni gacbeerureni, suguiniabdiidxreni loj chäälni che guibi'reni rolizreni, sa'csi sianxtujy gunaaga palga guiniini nen guidoo.

³⁶ Colgacbee et la'ditu guläxtiejditu rextidx Dios, luxh etza xtebtis lojtu biäädni.

³⁷ Palga yu' tejtü ni rchalo rajc rniini diidx ni rudeed Dios lojni, o palga rchalon abadeed Xpirt Dxan xten Dios te dzunro lojni, sugacheepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni.

³⁸ Palga yu' chu tejtü ni di chalilajz rapä xcälrnibee Jesucrist, rutza jiudi xtiidxni.

³⁹ Ni'cni, rebetzä, colyejnru te gusule'tu diidx ni runiidx Dios lojtu, na'c gudxojtü renani rniiza garenca didxsaj.

⁴⁰ Luxh guira'ti nani rujntu, colyensa'cni, xnejz-xnejzni.

15

Gubansac Jesucrist lo rebenjut

¹ Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu,

² näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganiddoo basule'ä rediidx ni sajcrú ni bisiedä, basule'ä xho gujt Jesucrist lo cruzj, bixe' xtiejni te badzucajni rextojl_{nu}, sigajc ni caj lo xtidx Dios gac.

⁴ Basule'äza xho biga'tzni, dxejc ni rion dxej guläs Diosni, gubañsacni si'cni caj lo xtidx Dios gacni.

⁵ Cheni gubañsacni, baluilojni lo Pedr, dxejctiru loj guitzubito'p rexpejn_{pacni},

⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabañsijc, niluxh yu'za reni agujt.

⁷ Dxejcti baluilojni lo Jacoob, dxejctiru loj guiraa reapost.

⁸ Dxejcti lultpac baluilojzani loä, luxh alagudejd ruluilojni lo rexpejni dxejc.

⁹ Narä guxiiru sacä loj guiraa reapost, niclaza nungäj_l cuälajreni narä apost sa'csi basacsä rexpejn xquidoo Dios.

¹⁰ Balaslazduxh Dios narä, ni'c narä nacä si'c ni nacä _{naj}. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl_rulaslajz Dios cayacnä_j narä.

¹¹ ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibañsac rebengut

¹² Mbaj _{naj}, palga nuurnu cagusule'nu diidx xcuent ni gubañsac Crist loj rebengut, ¿xhicuent yu'tu ni rnii, xheti yäl_rbañsac loj rebengut?

¹³ Palga xheti yäl_rbañsac lo rebengut, dxejc nicla Crist di nibañsac lo rebengut.

¹⁴ Luxh palga di Crist nibañsac loj rebengut, ¡xlia'si najc diidx nani basule'nu! ¡Xlia'siza najc xcäl_ririlajztu!

¹⁵ Luxh et ni'ctis. Abiga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibañsac loj rebengut.

¹⁶ Niluxh palga di rebengut chäs, niclaza Crist di nibañsa'c lo rebengut.

¹⁷ Luxh palga di Jesucrist nibañsac loj rebengut, xhet sajcdi xcäl_ririlajztu, sanuutistu loj xtoj_{ltu}.

¹⁸ Sigajcza agunijt rebengut nani huililajz xtidx Jesucrist.

¹⁹ Palga _{naj} ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäj_l jiaduxhtej guiraa reni ruhuii loonu.

²⁰ ¡Per dini gac si'c! Guliipacni gubañsac Jesucrist loj rebengut. Laani guc ganiddoo loj guiraa rebengut ni gubañsac, luxh laani dini niejt par tejpas.

²¹ Sigajcni biääd yäl_gujt loonu xcuent tejtis niguii, sigajcza biääd yäl_rbañsac lo rebengut loonu xcuent tejtis niguii.

²² Sigajc xcuent te niguii ni laa Adán biääd yäl_gujt, sigajcza xcuent Jesucrist biääd yäl_rbañsac loj rebengut.

²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejni che jiädsacni lo guedxliujre, guiraareni suspañsacni.

²⁴ Che agujc ni'c, dxejcti siääd dxe lult che guded_{sacni} yäl_rnibee lo Dios Xtadni, che abadzuj_lni guiraa reyäl_rnibee, guiraa reyäl_guxhtis, guiraa reyäl_milagwr.

²⁵ Nungäj_lpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni.

²⁶ Lult ni rdxe'ch lojni ni gunitlojni najc yäl_gujt.

²⁷ Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni.

²⁸ Che acanibee Jesucrist guiraali recos, dxejcti sudeedni guideb yälrnibee loj Xtradni Dios, te xtebtis Dios guinibee guira'tipac.

²⁹ Palga rujntu xhigab di bejn guibaṅsac loj rebēngut, ¿xhi gun rebejn nani robnis xcuent rebēngut? Palga di bejn guibaṅsac lo rebēngut, ¿xhicuent rutiobnisreni la'tu xcuent rebēngut?

³⁰ ¿Xhicuentza rdxunnu lo casionduxh guira'ti or?

³¹ Rniliäpac lojtu, rebetzä, caläpä xpala'ntu xcuent Jesucrist Xtradnu ni cayun xtzuunni lojtu. Ni'cni guniä lojtu, guira dxej rguuilreni narä te ju'treni narä.

³² Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibaṅsac loj rebēngut, do'o jien si'c ni caj lo guijtz: “Do'o guidau, do'o guidun, sa'csi guixee empac sejtnu.”

³³ Na'c gusaantu gusgueereni la'tu, palga sachaaglu lo bēnguijdx näjza luj sajclu bēnguijdx.

³⁴ Basanij xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujytu ni'c rniä diidxre lojtu.

Xho guibaṅsac rebēngut

³⁵ Naj yu' reni rniabdiidx: “¿Xho rbaṅsac bejn loj rebēngut? ¿Xhoza gac tiejxhreni?”

³⁶ ¡Chip nayäällu! Che rbe'clu te binij, di gäjil guiliejn palga di xhobga guet, nalajznu, palga dini guechduu.

³⁷ Luxh che rbe'clu, dilu cue'c gäjilga si'cni rlanjzlu gacni, alga rbe'clu xhob o triuu o ste'ca binij,

³⁸ niluxh Dios rujn rliejnni, rustioobni gäjilga, lo tejga gäjil rudeedni xpala-jgni o tiejxhni, si'ctis ni rlanjzni.

³⁹ Xhet guiraadi retiejxhreni najc tebloj. Yu' bääl xten bejn, yu'za bääl xten reguidxaa, yu'za bääl xten reman xhaguibaa, yu'za bääl xten rebäjl.

⁴⁰ Sigajcza yu' tiejxh rebajl xhaguibaa, tiejxh rexten guedxliujre. Niluxh yälrđimbicha' xten rebajl xhaguibaa najc tej, dxejc yälrđimbicha' guedxliuj najc ste'ca.

⁴¹ Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni.

⁴² Sigajcza yälrbāṅsac loj rebēngut; che guet bejn rga'tz tiejxhni luxh rujdxni, rnitlojni. Luxh che guibaṅsacni loj rebēngut, garenca gac tiejxhni, diruni gudx, anabajnni par tejpas.

⁴³ Che rga'tzni, rujn bejn xhigab xhetru gacnäjdi tiejxhga, niluxh che guibaṅsacni, lacti sacru, lacti sajz tiejxhga. Che rga'tzni, xhetru sajcdi gunni, luxh che guibaṅsacni, anadipduxhni.

⁴⁴ Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

⁴⁵ Si'cza caj lo xtidx Dios: “Nigui galooga ni laa Adán, bejn Dios gujcni te beṅ nabajñ.” Niluxh Adán ni biääd lult, Jesucrist najc Sprit ni runiidx yälṅabaṅcoob loonu.

⁴⁶ Ganid najc yälṅabajñ xten guedxliujre, dxejctiru yu' te yälṅabaṅcoob xhaguibaali.

⁴⁷ Sigajcza niguii galooga najc beṅ guedxliujre, niluxh ni rojp niguii ni biääd najc beṅ xhaguibaali.

⁴⁸ Benchee Dios Adán con yuj, najcni beṅ guedxliuj. Xhaguibaali biääd Jesucrist, najcni beṅ xhaguibaa.

⁴⁹ Sigajcni najcnu si'c beṅ guedxliujre, sigajcza sajcnu sigajc najc beṅ ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bääl näjza rejn xhaguibaa cadre yu' Dios. Tiejxhnure nani sinitloj di gacdiza xca'ni stee tiejxh ni najc par tejpas.

⁵¹ ¡Colhuii! Rlazäza gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu

⁵² tera't bäzlule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa.

⁵³ Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacdi guetni, najcni par tejpas.

⁵⁴ Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: “Yälgujt agunitloj sa'csi beṅ Jesucrist gaan lojni.

⁵⁵ Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?”

⁵⁶ Xcäl'nayan xten yälgujt najc dojl. Xcäl'nibee dojl najc leii.

⁵⁷ Niluxh rdeednu xquixtios lo Dios, nani runiidx te yäl'nibee loonu te jiennu gaan lo yälgujt xcuent Dad Jesucrist.

⁵⁸ Ni'cni rebetzä ni sanälazduxhä, colchanuutis, col'sudzu'tz lo xtidx Dios, na'c guidxajtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejn Dios

¹ Xcuent meel nani guire' par rebejtznu, col'yejnni sigajcni räpä gun reben rexquidoo Galacia.

² Casob dumingw, nalajznu ganid dxej xmaan, tejpgatu col'cuää te meel yejc nani rujntu gaan nen te xmaan, col'cucheeni, te na'c gutie'tu meel che jiälä.

³ Te che guidzunä, guxhalä meelga, näjza tiop-choṅ guijt chanä chutis beṅ ni cuetu chasa'nni guedx Jerusalén.

⁴ Palga laaca cha'aza, sajcza chänäreni narä.

Xhigab ni bejn Pabl chääni biaj

⁵ Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c.

⁶ Dxejcti pet siannää la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a.

⁷ Sa'csi di rlazä jiädhuiätu te ladejtzsi, rlazä jiannää la'tu xchejpac, palga gusaan Dad Jesucrist gunä si'c.

⁸ Niluxh sia'nä guedx Éfeso, te ro'c tedä lanij ni rusnaj lajz beṅ che biääd Sprit Dxaan xten Dios.

⁹ Sa'csi ro'c yu' xhidajl beṅ nani rlanj guisieed xtidx Dios, niluxh ro'c yu'za xhidajl reni rdxe'ch loä.

¹⁰ Palga guidzujn Timoteu lojtu, saru col'huiini, te na'c chuni yärsia' laṅ ni yunäjni la'tu, sa'csi cayujnni xtzuun Dios sigajc runä narä.

¹¹ Na'c gusaantu chu tej ni cuälazni, colcuedx*i* lajz*ni*, dxejc colgusunejz*ni*, te jiädhuiini narä ree, sa'csi ree cabääznu laani con rebejtznu.

¹² Niluxh xcuent bejtznu Apolos, räpäza lojni niääd*pacni* lojtu con rebejtznu, niluxh di r*lajzpacni* niääd*ni* naj. Per siääd*cani* dxejtis ni gac jiääd*ni*.

*Rextixtios lult ni ruxhal*ni**

¹³ Col*susi*n, col*sudzu*'tz lo yäl*rililajz* xten Dios, col*yejn* dzuun si'c niguii, col*yajc* bendaan.

¹⁴ Xhitis ni rujntu col*yejnni* con yäl*rinälajz*.

¹⁵ La'tu rebetzä, anajntu xcuent rexfamil *Estéfanas*, nani ganid huililajz xtid*x* Dios nez regued*x* Acaya, najntu xho racnädu*xh*reni rebejtznu nani huililajz xtid*x* Dios ro'c. Naj rniabdu*xh*ä lojtu,

¹⁶ colgusoob xtid*x* rebej*n*ga, näjza xtid*x* guiraa rebej*n* ni racnä*j* rexpej*n* Dios, ni rujnza xtuun Dios.

¹⁷ Rbalazä bidzuj*n* Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu.

¹⁸ Gulecd*x*ireni lazä näjza lajztu, ni'cni, i*coljiu* sa' rebej*n*ga!

¹⁹ Rebe*n* xquidoo Dios nez regued*x* Asia ruxhal *xtixtios* lojtu. Aquila näjza chäälni Priscila näjza rebej*n* ni re' rolijzreni ruxhal*z*areni xtixtios lojtu.

²⁰ Guiraa rebejtznu ruxhal *xtixtios* lojtu. Colguinii tejgatu lo sa'tu: "Xchan, gacnä*j* Dios la'tu."

²¹ Narä Pabl, ruxhalä xtixtios lojtu, lagajc narä benä reletre.

²² Palga yu' chu tejtu ni di chanälajz Dad Jesucrist, sunitlojni. i*Dad* Jesucrist, guda*a*!

²³ Gacnä*j* xcäl*rulasajz* Jesucrist guiraatu.

²⁴ Yäl*rinälajz* ni rapä xcuent Jesucrist suchunä*j*ni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojp guiitz ni bacuaa Pabl lo guidoo xten guedx Corinto

¹ Narä Pabl nacä apost xten Jesucrist sa'csi si'c rlajz Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guiitzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya.

² Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

Trabajw ni gudejd Pabl

³ Guiliä'pnu xpala'n Dios Xtad Jesucrist, nani rulaslajz nuurnu, nani rus-toolajz nuunu.

⁴ Che rdejdnun trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu.

⁵ Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu.

⁶ Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedu lagajc trabajw ni cadejznanu.

⁷ Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnun, suscuedcxni Dios lajztu sigajcni ruscuedxini laaznu.

⁸ Rebetzä, rlazä gacheepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu.

⁹ Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac reben gut.

¹⁰ Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu,

¹¹ sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcälrlulaslajz Dios ni baniidxni loonu.

Xhicuent di Pabl nij guedx Corinto

¹² Dee najc nani ruspaä laaznu: rbedxi xcäriejnun, ni'c ruluii loonu laaca nabajnnu, con yälndolajz riennu si'cni rnibee Dios; xhet sa'csi rajpnu xcälndajn reben guedxliujdi, alga sa'csi racnäj Dios nuure. Si'cpac nabajnnu lo guedxliujre, luxh maazru che yu'nu lojtu.

¹³ Cacuaanu lojtu rediidx ni sajc gołtu, ni sajc gacheetu, luxh cabäzä sachesa'ctu guiragajc rediidx ni gucuaä,

¹⁴ lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu neñ dxej ni jääd Dad Jesucrist.

¹⁵ Ni'cni ganiddoo benä xhigab niädhuiä la'tu te nibalajztu tio'p huält.

¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea.

¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te beñ guedxliuj nani runtiop lajzni, nani tejsi diidx rniini “sia'ä” nägajcza “dina cha'a”, ä?

¹⁸ Dios guluii lojtu guliica rniä lojtu, dinu guinii tejsi diidx “sia'ä” nägajc “dina cha'a”.

¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx “sunäni” näj “dina gunäni”, niluxh laani guiraa xtiidxni najc “sunäpacni”.

²⁰ Si'cza guiraa rediidx ni bia'n Dios loonu xcuent Jesucrist najcreni “sunäpacni”; näjza xcuent laani najcreni “sugacni si'c” par nuurnu, te chä'p xpala'n Dios xcuent nuurnu.

²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuumni.

²² Abacuaazani xseenni loonu, ni'cni baniidxni Sprit Dxan xtenti te cuääzni neñ lastoonu.

²³ Rbedxä loj Dios gacbeeni xhi yu' lastoä, guliipacni te diruna gutalä xcälñajtu, ni'c dina niälsacä guedx Corinto.

²⁴ Di rlanjnu guinibeenu xho chalilajztu, alga rlanjnu gacnäänutu lo dzuun te guibaa lajztu; guliipac agusudzu'tztu lo xcälñirilajztu.

2

¹ Niluxh lagajc xcuent xcälñasa'cä benä xhigab dina jiädhuisacä la'tu che cayac-huin lazä.

² Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä guc-huin lajzni.

³ Ni'cni lagajc xcuent ni'c bacuaä lojtu, te che jiälä lojtu, di rebejñ gunhuin lazä nani riäjñ guspaa lazä. Luxh nancheä palga narä guibaa lazä, nägajc la'tu sibaaza lajztu.

⁴ Che bacuaä guijtza lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälñanälazduxh ni sanälazä la'tu.

Yälñusiäjñ lajz ni yu' par nani bejn falt

⁵ Palga yu' chu tej ni cayujñ cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh.

⁶ Alabasacsiduxh xhidajñ bejñ dade'ga, na'cru gusacsítuni naj.

⁷ Naj colñsiäjñ lajztu xcuent xtojñni, colñcuedxni lajzni didi gac-huinduxhtej lajzni.

⁸ Ni'cni rniabä lojtu, colñchanälajz bejñre si'c ni huinälajztuni galoo.

⁹ Bacuaxgaäza lojtu te gacbeä laa susoobtu xtidxä.

¹⁰ Naj renani jiäjñ lajztu xtojñni, näj narä siäjñ lazäni. Sigajcza narä, nani basiäjñ lazä, palga yu' xhi basiäjñ lazä, benäni xcuent xcälñasa'ctu, nez loj Jesucrist,

¹¹ te di gun beñdxab gaan nuure, sa'csi anajnnu xho najc latsiaj ni rujñ beñdxab.

Guyu' Pablyärsia' che bidzujñni guedx Troas

¹² Che bidzunä guedx Troas, te gusule'ä xtidx Jesucrist, bejñ Dad Jesucrist rutliidi badxojñdi narä,

¹³ niluxh guyuduxhä yärsia' sa'csi dina nidxälä Tito, bejtznu. Ni'cni basa-didxgacäreni, sa'äti nez reguedx Macedonia.

Jesucrist rujñ riennu gaan

¹⁴ Xquixtios lo Dios nani con Jesucrist racnäj nuurnu te dipacnu gunijt, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejn xtidx Dios.

¹⁵ Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni.

¹⁶ Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl'nabaꞆcoob. ¿Chu laa ni racbee sa' recosga?

¹⁷ Sa'csi dinu gac si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäj Jesucrist nez loj Dios ni cahuii xhini'c riennu.

3

Diidx nacoob ni basa'n Dios loonu

¹ Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rnii najcreni beṁsa'c. ¿La rlanjzatu guiluiinu lojtu sa' guijtzga, o guiniabnu guntu sa' guijtzga xca'nu, ä?

² La'tu najc si'c xquijtznu ni rnii xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu.

³ Huenliisi rluiløj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajṁ bacuaa rextidx Diosga, bacuaanireni lastootu.

⁴ Nadoncheenu redee, ni'cni xcuent Crist dinu guidxejb nez loj Dios.

⁵ Di gacdi jienṁ xtebnu xhitis dzuun ni riennu, riennuni sa'csi laa Dios ni racnäj nuurnu.

⁶ Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleii ni biädṁ dojl, dxejc gujtnu. Niluxh didxcoobga ni rusule'nu biädṁ Sprit Dxan xten Diosni, luxh runiidxni yäl'nabaꞆcoob loonu.

⁷ Leii baluii yu' xtojṁ bejn, riäjṁ guetreni. Xhidajl seen guyu' che bacuaa Dios rediidxga lo guij. Luxh di niajcdi nuhii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yäl'rdimbicha'ga.

⁸ Palga si'c gujc che biädṁ leii, aticaxh ṁaj su'ru xcäl'rdimbicha' xleii Sprit Dxan xten Dios, ni najc redidxcoob nani abasule'nu.

⁹ Palga xleii toMoisés ni baluiloj yäl'gujt xcuent dojl biädṁ yäl'rdimbicha', aticaxh ṁaj yu' xcäl'rdimbicha' xtidxcoob Dios ni rudzucaj dojl.

¹⁰ ṁaj dirunu fii xcäl'rdimbicha' xleii toMoisés sa'csi xtidxcoob Dios rdimbicha'ru par tejpas.

¹¹ Palga yäl'rdimbicha' nani biuii bianisesduxhni tera't, stee yäl'rdimbicha're ni najc par tejpas sidimbichasesduxhni.

¹² Luxh ni'c runiidx yäl'rbecdxi lajznu, dipacnu guidxejb che rusule'nu xtidxcoob Dios.

¹³ Dinu gac si'c toMoisés, ni basäu tla' lajd lojni te di fii rexpejn Israel cayuii yäl'rdimbicha' ni guyu' lojni.

¹⁴ Niluxh bicäjy xcäriejnreni; lo dxej ṁajli che rielṁ xleii toMoisés, najcni si'cni yu' xhi lajd rusäuu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga.

¹⁵ Lo dxe ṁajli che roṁreni xleii toMoisés, najcni si'cni ruscäjy te lajd xcäriejnreni.

¹⁶ Lo xtidx Dios rnii scree: “Niluxh che gusiechlajz te bejn, gudzuréni nez loj Dad, sibicaj lajdga”, nalajznu sacbeeni xtidx Dios.

¹⁷ Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés.

¹⁸ Niluxh nuure dinu gusäu lajd lojnu, didi guscäjyni xcäriejnnu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxaan xtenni.

4

¹ Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jiäxhan.

² Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn rsiaapacnu lo xnezyuj Dios.

³ Niluxh palga yu' chu dipac gachee rextidx Dios nani rusule'nu, najctisreni rebejn nani ala canitloj par tejpas,

⁴ sa'csi abascäy ben^{dx}ab ni rnibee guedxliujre xcäriejnreni, si'cni rujnni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rnii xcuent xhanij xten Jesucrist, ni najc xtujxh Dios.

⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist.

⁶ Che benchee Dios guedxliuj, guniini: “Lo xcäy suguirii te bajl ni gusanij.” Lagajc Diosga abasanij lastoonu te baniidxni bajl ni najc yälriembeecärlrdimbicha' Dios nez loj Jesucrist.

Xho guiba^{nnu} con yälrlilajz

⁷ Nuurnu najcnu si'c te guesyuj, xhet sajcdinu, niluxh guidxanu te yäl^{na}sacduxh, ni najc xtidx Dios xcuent Jesucrist, te guiluiloj xcäl^{na}sa'c xten xcäl^{rn}ibee Dios lacuaa xhisi te yäl^{na}dipbäz xtennu.

⁸ Rdeednu trabajw guira nejz, niluxh dinu gunij^t yäl^{rn}loj. Mase di jien^{xho} xho jiennu, dinu chu yärsia'.

⁹ Rusacsireni nuure, niluxh di Dios cuälaznu, rguij^{nnu}reni nuure, dizareni ju't nuure.

¹⁰ Cadrotis rionnu rusacsireni nuure si'c basacsireni Jesucrist, te si'c nen^{ne} tiejxhnu guluilojzani yäl^{na}ba^{ns}ac loj rebe^{ng}ut xten Jesucrist.

¹¹ Cadrotis rionnu rlajzreni ju'treni nuure sa'csi rusule'nu xtidx Jesucrist te si'c^{za} nen^{ne} tiejxhnu guluilojzani xcäl^{na}ba^{jn} Jesucrist loj rebe^{ng} guedxliujre.

¹² Ni'cni rujn yäl^gujt dzuun loonu, per yäl^{na}ba^{jn} cayujn dzuun lojtu.

¹³ Sa'csi rajpnu lagajc xsprit xten yälrlilajzga, sigajc ni caj lo xtidx Dios: “Huillilazä ni'cni basule'ä diidx.” Sigajc^{za} nuure, huillilaaznu xtidx Dios, ni'cni rusule'nuni.

¹⁴ Sa'csi nadonnu lagajc nani baspa^{ns}ac Jesucrist loj rebe^{ng}ut, lagajc^{za} laani gun guiba^{ns}acnu con Jesucrist te gunni sunäjnu la'tu nez lojni.

¹⁵ Rsiaj^{cnu} guiraa ni rsiaj^{cnu} te xcuent^{si} la'tu gudeedru bejn xquixtios lo Dios, te guiliä'pruzareni xpala'nni xcuent yäl^{rn}ulaslajz ni sanuutis care'ch lo xhidajl bejn.

¹⁶ Ni'cni dinu gunij^t yäl^{rn}loj, per mase tiejxhre acayujxh, guixe-guixee cagustioob Dios spritnu.

¹⁷ Retrabajw ni cadeednu lo yäl^{na}ba^{jn}re rdedgajc^{reni}, niluxh rujnreni ga'pnu te yäl^{rn}dimbichaduxh ni gajdnu guidon, ni najc par tejpas.

¹⁸ Dinu fiitis renani ruzen lo guedxliujre sa'csi sinitloj reni'c, alga cayenloonu renani di guzen, sa'csi renani di guzen najc^{reni} par tejpas.

5

¹ Aracbeenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas.

² Guliicani, lałni dxunnu neñ tiejxhre, rbedxneñnu rdeednu trabajw, ni'cni rrajznu maläi agojl guidxaa tiejxh guedxliujre te xca'nu te tiexhcoob ni siäd xhaguibaa.

³ Te si'c che acua'nuni, diruni gac si'cni suxhabääl xaimnu, sa'csi abicoob tiexhnu.

⁴ Lałni dxunnu neñ tiejxhre rbedxneñnu, rdeednu trabajw, sa'csi di rlaaznu suxhabääl xaimnu, rrajznu gacwnu tiexhcoobnu, te tiejxhre nani cayejt, sidebnäjni tiexhcoob ni siäd xhaguibaa.

⁵ Nani benchee nuure parpac dee najc Dios, lagajc nani runiidx Sprit Dxañ xtenni loonu si'c te seen sujnpacnini.

⁶ Ni'cni dinu guidxeb, sa'csi nadonnu lałni nabajñnu lo guedxliujre, di gacdi guibajñnu xhaguibaa loj Dadga.

⁷ Sa'csi nabajñnu xcuent nani rililajznu, xhet xcuentdi nani rajc rhuiinu.

⁸ Ni'cni rniä nabajñnu dinu guidxeb, rchaloonu hueenru guisa'nnu tiejxhnu lo guedxliujnure, te choläznänu Jesucrist xhaguibaa.

⁹ Ni'cni tejtis najc xhigabnu, palga lo guedxliujre o xhaguibaa, rrajztisnu jiennu renani gun guibaa lajzni.

¹⁰ Sa'csi guiraanu riäjł suunu nez loj yagxhiil cadre gun Jesucrist yälguxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yälrbecdxni lajzni

¹¹ Luxh sa'csi rdxejbnu (nalajznu rucuaadiaagñu xtidx) Dad Jesucrist, ruliidxnu rebejñ te chalilajzreni xtiidxni. Luxh Dios najñ xho nabajñnu; maläi näjza lo xcäriejntu guluiloj xho nabajñnu.

¹² Dinu guiliä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejñ ni rchaglaajtis ruhuii xho rien bejñ, direni gacbee xhi yu' neñ lastooreni.

¹³ Palga najcnu si'c bejñ ni rajc yejcreni, si'c najcnu par Dios, palga najcnu si'c bejñ ni nasa'c xcäriejñnu, najcnuni par la'tu.

¹⁴ Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios.

¹⁵ Luxh Jesucrist gujt xcuent guiraa rebejñ, te renani rililajz xtiidxni, na'cru guibajñreni xcuenttis laareni, alga guibajñpacreni xcuenttis Jesucrist nani gujt, nani gubañsac xcuent laareni.

¹⁶ Ni'cni nuure dinu fii lo bejñ si'cni najcreni lo guedxliujre. Galoo biembeenu Jesucrist si'cni gujñni che gubajñni lo guedxliuj, niluxh ñaj et si'cni riembeenu.

¹⁷ Ni'cni chutis bejñ, palga rililajzni xtidx Jesucrist, sujñnini te beñcoob, diruni guichaglañz gunruni nani rajc lo guedxliuj, alga guichaglañzni gunni xtzun Dios.

¹⁸ Guiraa dee siäd lo Dios, nani basiäjł lajzni xcuent Jesucrist, dxejcti baniidxni loonu rediidx xcuent xcälrusiäjł lajzni te gusule'nu rediidxga,

¹⁹ nalajznu, nanab gusule'nu diidxre: Dios guyunäj Jesucrist, cagusiäjł lajzni con rebeñ guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejç gule Dios nuure te gusule'nu rediidxpacre lo rebejñ.

²⁰ Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäj̄l lajztu, colyajc tejsi con Dios.

²¹ Di Jesucrist niujn nicla tej dojl̄, niluxh sa'csi sanälajz Dios nuunu, xcuentnu bejn Dios gujc Jesucrist si'c te bendojl̄ che gule'cni guiraa rextojl̄ guedxliuj yejc Jesucrist che cuajni lo cruzj. Si'c gujcni te sajc ga'pnu xcäl̄naya, xcäl̄nasa'c Dios xcuent Jesucrist.

6

¹ Ni'cni rniabnu lojtu, jia'cnu tejsi lo xtzun Dios, na'c cuälaztu xcäl̄racnäj Dios; palga guntu si'c, xlia'si cua'tuni.

² Sa'csi loj xtidx Dios caj scree:

Dxej nani riäj̄l̄ gunäni, bacuadiagä xtiidxtu,
dxej che gubicaj xtojltu gucnää la'tu.
¡Col̄jiejn! Naj najc te tiempsa'c,
col̄jiejnza, naj najc dxej ni guibicaj xtojltu.

³ Na'c jiennu nicla tej ni gun guidxe'ch lajz bejn, didi guiniireni xhet laadi najc xcäl̄rusule'nu.

⁴ Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsíreni nuure; che rdejdnu trabajw; che di jien̄ xho jiennu;

⁵ che rguijn̄reni nuure; che rusäuren̄i nuure nen̄ latzguiib; che rdejdnu lo bieiduxh; che rdajl̄ xtzuunnu; che re'ch bacal̄ yääl; che rucua'nnu;

⁶ guluilojza najcnu xmos Dios xcuent xcäl̄nabansa'cnu lo Dios; näjza xcäl̄nansa'c xtidx Diosnu; näjza yäl̄rajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios nen̄ lastoonu; näjza xcuent yäl̄rinälajzpac bejn;

⁷ näjza xcuent didxguliipac; näjza lo xcäl̄rnibeduxh Dios; ca'zanu si'c te madxed xcäl̄naya Dios, ca'nuni guropnaanu, ladbee, näjza ladbäjägw.

⁸ Ruluilojzanu najcnu xmos Dios palga chä'p xpala'nnu, o palgaza jianx-tujynu; palga guiniireni didxa'c xcuentnu, o palgaza guiniyajreni nuunu; palga naaren̄i najcnu benrusguee, mase najcnu bejn ni rnii didxlii.

⁹ Palga rut rlanjdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn̄; rusaan Dios rguijn̄reni nuure, niluxh dinu guet;

¹⁰ najcnu si'c bejn ni yu' xliajs, niluxh rbalaaaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

¹¹ Lojtu, ben̄ Corinto, aguniliinu lojtu guiragajc rediidx ni yu' nen̄ lastoonu.

¹² Xhetliidi diidxdi bacua'tznu lojtu, niluxh pet cacuatx lajztu diidx ni nanab guiniitu loonu.

¹³ Naj narä rulidxä la'tu si'c rulijdx te Dad rexi'nni: ¡Col̄guinii loonu rediidx ni yu' nen̄ lastootu!

Najcnu si'c xquidoo Dios ni nabajn

¹⁴ Na'c guchaagtu lo rebejn nani di chalilajz xtidx Dios, sa'csi di gacdi gun-teblojtu dzuun sa'csi tejni rlanj gun dzunsa'c, steeni rlanj gunni dzunguijdx, ¿xho gac sanäj bajl xcäjä, ä?

¹⁵ O ¿xho gac sanäj Jesucrist bendxab ni laa Satanás, ä? O ¿xho gac sanäj te bejn nani rililajz xtidx Dios te bejn ni di chalilajz xtidx Dios, ä?

¹⁶ ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn̄, lagajc si'cni gunii Dios galoo:

Cuäzä nen lastooreni, sisanääzareni.
Narä sacä Xtiosreni, laareni sajcreni rexpənä.

¹⁷ Ni'cni colr̄ii galäiireni, colguibicaj lojreni, te laad colcuääz, si'c naj Dios:
Te gac xca'ätu, na'c fałtu recosdxuudx.

¹⁸ Dxejc la'tu sajctu rexinganä, rexindxa'pä,
luxh narä gacä xtadtu,
si'c naj Gueb Dios ni rajp guiralii yälrnibee.

7

¹ Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcaj guiraa rexhigabguijdx, guiraa redojl̄, te gac sanu lo rexnezyudxan Dios con xcälrdxejb Dios.

Xho basiejch lajz reben Corinto

² ¡Colchanälajz nuunu nen lastootu! Xhet latsiajdi biennu lojtu. Rut baxhındinu. Rutza basguedinu.

³ Dina guiniä rediidxre te cue'cä xquejtu; ni aguniä lojtu galooli, la'tu yu'tu nen lastoonu palga tejsi guetnu, o palga tejsi guibajnr̄unu.

⁴ La'tu nadip lazä, rniduxhä didxsa'c xcuenttu lo bejn̄, rbedxi lastoä, rbalazduxhä loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yälrdijl̄ ni guyu' guideb gabinu, xcuentza yälrdxejb ni guyu' lastoonu.

⁶ Niluxh Dios ni racnäy rebejn̄ ni rac-huin lajzreni, gucnäy nuure, sa'csi che bidzujn̄ Tito guredxi lastoä.

⁷ Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjtu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

⁸ Acananä guc-huin lajztu che biltu guiitz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn̄ guiitzga guc-huin lajztu, xhet xchejdi guc-huin lajztu.

⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanj Dios, te di yu' xhi gunijttu xcuent nuunu.

¹⁰ Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl̄ ni'cni rbaalazä che bejn̄ni si'c. Niluxh yälrac-huin xten guedxliuj dini gun gusiejch lajz rebejn̄ rextojlreni, alga rujn̄ni nitloj bejn̄ tejpas.

¹¹ La'tu bejntu huant xliajs ni baxhal Dios si'cni rchagljaz Dios gac. Naj ¡colhuii gan! ¡Lacti xhi cossa'c bejn̄ni par la'tu! Bejn̄ni bahuisa'cpactu xhini'c gujc, te gac gusulegajctu xcuentni; dxejc bejn̄ni bidxe'chtu, näjza bejn̄ni bidxejbtu, ni'cni basaantu dojlga, dxejcti bejn̄ni rlanjzactu nuhuiitu loä, bejnzani guyu'tu yärsia' xcuentä, bejnzani rlanjztu guntu yälguxhtis bejn̄ nani bejn̄ dojlga. Guiraa redee baluiloj et la'ditu bejn̄ dojl̄.

¹² Ni'cni, che bacuaä guiitzga, dina nucuaäni loj bejn̄ ni bejn̄ dojlga, niluxh bacuaä guiitzga lojtu te guiluiloj xcälrsia'tu ni rajptu xcuent narä nez loj Dios.

¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xp̄ritni xcuent guiraatu.

¹⁴ Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxguli, sigajcza najc guiraa redidxsa'c xcuenttu ni guniä loj Tito, guliipacni.

¹⁵ Ni'cni maazru sanälajzni la'tu, che rnaj lajzni xho basoobtu diidx, xho bejntu cua'tuni che bidzuj_nnu, racejslitu cadxejbtu.

¹⁶ Naj rbaalazä sa'csi loj guira'ti la'tu nadip lazä.

8

Saru rudeedreni meel

¹ Naj bejtznu, r_lajznu guiniinu lojtu xho badeed Dios xcäl_rulaslajzni lo reben Macedonia ni huililajz xtidx Dios.

² Mase gudedduxh_reni trabajw, bibalajzreni, mase xhetliidi gojpreni, badeedreni meel si'c te be_n ni rajp.

³ Narä caniliä lojtu, badeedreni xmeelreni si'cni gojpreni, luxh badeed_ruren_reni loj ni naa bej_n sajc gudeedreni.

⁴ Gunabduxh_raren_reni loonu guisaannu gudeedreni xmeelreni te gacnä_rreni rexp_n Dios.

⁵ Niluxh direni niuj_n si'cni biennu xhigab gunreni. Ganiddoo badeedreni lagajc laaren_reni loj Dad Jesucrist, näjza loonu si'cni rnibee Dios gac.

⁶ Sa'csi batie' rexp_n Macedonia meel, ni'c naj räp_a loj Tito chanuupacni gutie'ni meel lojtu si'cni gunii Tito lojtu galoo.

⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl_naj_n; rchag_rlajz_rpactu guntu dzuun; rinälajz_rtu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

⁸ Dina guiniä lojtu colyuj_npacni; narä r_lazätis gacbeetu xho rbaalajz reni rudeed meel te gululoj don la gulii sanälajz_rpaczatu rexpej_n Dios.

⁹ Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu guj_cni si'c te bej_n ni xhet rajpdi, te xcuentni ga'ptu guiraa rexhixten Dios xhaguibaa.

¹⁰ Narä siniä lojtu xhi xhigab runä, par lagajc xcäl_nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajz_rtu r_lajz_rpactu guntuni.

¹¹ Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu.

¹² Sa'csi palga r_lajz_rduxh te bej_n gudeed lo Dios, laaca najc gudeedni si'ctis ni rajppacni. Di Dios guiniab gudeed bej_n nani dini ga'p.

¹³ Dina guiniä gudeedtejt_ru te tedtu trabajw te gapduxh stee bej_n, alga te gacteblojtistu.

¹⁴ Nani rajprulu naj ni'c colgudeed te gusalojtu ni cayääd_rxreni, te stee dxej nani rajpreni laaren_reni sajc suniid_rxaren_reni te gusalojreni nani cayääd_rx_rtu te si'c gacni tebloj.

¹⁵ Sa'csi lo xtidx Dios caj scree: “Te bej_n nani batopduxh yäl_nasa'c, xhet bia'ndiru, dxejcti nani guxii batojp yäl_nasa'c, xhet biääd_rxdi.”

Tito näjza rexcompanieerni

¹⁶ Xquixtios lo Dios nani rudeed lo Tito lagajc yärsia' ni rapä narä par la'tu.

¹⁷ Sa'csi cuäjbni gunni nani gunabä lojni gunni. Luxh sa'csi r_laz_rduxh_rpacni gunni xtzuun Dios, naj lagajc laani bejn_ni xhigab jiädhuini lojtu te luux dzuunre.

¹⁸ Caguxha_nnu xtee bejtznu chanä Tito. Guiraa rebej_n guidoo rnii didxsa'c hueen xcuent bej_nre sa'csi laaca rusule'ni xtidx Dios.

¹⁹ Ni'ctis aguleza reben_r guidooni te chunä_rni narä te gacnä_rni narä lo xtzuun Dios nani cayennu te guiliä'pni xpala'n Gueb Dad Jesucrist, te gululojza lacti r_lajz_rpacni jiennu xtzuunni.

²⁰ Ni'cni r_lazä jiapdaduxh_nu te di chu tej ni guiniyaj nuure xcuent melrore ni chosa'nnu lo rexpej_n Dios.

²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²² Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlanjpacni gunsa'cni xhidajl dzuun, luxh naj rlanjruni gunsa'cni redzuunga sa'csi nadip lajzni la'tu.

²³ Palga yu' chu guiniabdiidx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist.

²⁴ Ni'c na'c guidxejbtu che yu'tu lo rebejn reguidoo guluiipactu loj rebejnğa xho sanälajztu, näjza redzuun ni rujntu ni'c rniinu ganax didxsa'c xcuenttu.

9

Meel par rebejtznu

¹ Ni'cni dina gucuaäru lojtu xcuent dzuunre, nalajznu, yälracnäjä rexpejn Dios,

² sa'csi anancheä rlanjpactu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel.

³ Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgää lojtu.

⁴ Didi che jädnää reben Macedonia jiophuiinu la'tu, xhet rajpditu, dxejc jianxtuyä narä, näjza la'tu.

⁵ Ni'cni benä xhigab, nanabpac jädxgaa rebejtznu, jädhuiireni la'tu, te fireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlanjpactu gudeedtuni, xhet sa'csi rniinu riäjlpac gudeedtuni.

⁶ Rniliä lojtu, nani guxii rbe'c, guxiiza yälNASA'c guiliäsni, niluxh nani rbe'c xhidajl binij, xhidajlza yälNASA'c guiliäsni.

⁷ Tejgatu colhuii don lacti sajc gudeedni, dxejc si'c sugudeedni si'cti ni rlanjni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni rudeedni meel lojni.

⁸ Luxh Dios sajc guniidxru xcälracnäjni lojlu, te si'c guixe-guixee sajpļu xhidajl guiraloj rehxixtenlu, te ga'plu xhitis ni rquiinlu loj guira'ti xtzunsa'clu.

⁹ Sa'csi lo xtidx Dios caj scree:
Abadeduxhni loj reben ni xhet rajpdi luxh redzunsa'c ni rujnni, najcreni par tejpas.

¹⁰ Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yälNASA'c xten xtzunsa'ctu.

¹¹ Te si'c ga'ptu lacti yälNASA'c te gac gudeedzatu xhiroob. Luxh xcuent xtzuunnu, meel ni ruxhaltu loj rexpejn Dios sujn gudedduxhrene xquixtios lo Dios.

¹² Sa'csi che racnäjtü rebejtznu, dinu guideed ganaxtis ni rquiinreni, rujnzanu rudeedruren xquixtios lo Dios.

¹³ Che racnäjtü sa'tu si'c, ruluilojtu lacti rusoohtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtü, nalajznu xcuent meel ni badeedtu lojreni, näjza loj guiraareni.

¹⁴ Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu.

¹⁵ Xquixtiosi Dios sa'csi baniidxni yälNASA'cduxhtej loonu!

10

Yälrnibee ni rajp Pabl sa'csi najcni apost

¹ Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac beñnadolajz che biälä lojtu, niluxh che suga'a zijt lojtu, dxejc nacä beñnialajz).

² Narä canabä lojtu, colguibaṅsa'c te che jädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejñ nani rnii nabaṅä si'c te beṅguedxliuj.

³ Guliicani najcnu beṅguedxliuj, niluxh dinu gucuanäj sa'nu guiib nani rca' beṅ guedxliuj che rcuaareni.

⁴ Sa'csi reguiib ni rca'nu te guidiṅsa'nu direni gac sa' guiib ni rca' beṅ guedxliuj. Nuunu rucuaanu con xcälrnibee Dios te riennu gaan loj guiraa rexälrnibee guedxliujre.

⁵ Ni'cni cagutzujñnu guiraa rehxigabguijdxreni, näjza nani rchaloreni najc xhigabro nani rlanjreni guiniyajreni yälrumbree Dios, luxh caca'nu guiralii rehxigabnu cagutednureni ladzṅaa Jesucrist te gusoobnu rextidx Jesucrist.

⁶ Cabäätisnu te gunnu yälguxhtis loj chutis bejñ ni dini gusoob xtidx Dios, che abasoob guiragajctu xtidx Dios.

⁷ La'tu cahuiitu redzuun ni rien. Palga yu' chu tejtu ni rchaloni najcni xpejñ Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajzzanuni.

⁸ Sa'csi mase guiliä'päru xpala'nä xcuent yälrnibee ni rapä, ni baniidx Dios te gustiobä xcälrililajztu, et te guxhinädi la'tu, nicla si'c dina guituiä.

⁹ Dina rlazä guchalotu rlazä guchebä la'tu con rexquitzä.

¹⁰ Sa'csi rniireni: “Lo rexquijtzni caj didxnagajn, didxnialajz, niluxh che suga'ni laapacni, xheti xcälsiudzu'tzni, luxh xho rniaj diidx ni rniini.”

¹¹ Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹² Dinu gun xhigab najcnu tebloj loj rebejñ ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni.

¹³ Nuure dinu gunnarotej lagajc nuurnu, niluxh riennu si'cni nungäjñ jiennu, xcuent yälrnibee ni baniidx Dios loonu te jiennu dzuun cadre yu'litu.

¹⁴ Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu.

¹⁵ Dinu niennaro lagajc nuurnu xcuent xtzuun ste'ca bejñ, ascanu lagajc nuunu biennuni. Cabääznu tioobru xcälrililajztu, te gac jienrunu dzuun lojtu, si'ctis gañ jiennuni.

¹⁶ Te gacza gusule'nu xtidx Jesucrist ste'ca lajt ni ria'n zijtru lo guejdx cadre yu'tu, na'cza gunnaronu lagajc nuunu xcuent dzuun ni bejñ ste'ca bejñ.

¹⁷ Sa'csi nani rlanj gacnaro, suguiliä'pni xpala'n Dad Jesucrist.

¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bejñ ni rliä'p Jesucrist xpala'nni, ni'cni rbalazñäj Dios.

11

Pabl näjza rebejñ ni rniisi najcreni apost

¹ Maläii chanunäsijctu narä lañ ni guiniä gaii didxnayäle', niluxh asanunäjtu narä.

² Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladzṅaa Jesucrist te xca'ni la'tu. Rlazä gactu beñnaya chäätu lojni, si'c te dxa'p che ruchṅaani te bi'n, rut bahualḍini.

³ Niluxh rdxebä didi gusguee bendxab la'tu si'c ni basguee bäl Eva con xcäl'nadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu.

⁴ Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu.

⁵ Narä runä xhigab dina gacä bejn ni guxiiru sajc loj guiraa reapost.

⁶ Mase di gacdi guinisa'cä, xhet yäl'najndiza cayädxä; niluxh ni'c huenliisi rluijoj guiraa rediidx ni abaluiä lojtu, guiraa redzuun ni abenä ro'c.

⁷ O ¿la benä te dojl guyu'ä lojtu si'c te bej nadolajz, te gactu bejroru, sa'csi xhetliidi cua'ädi xcuent ni basule'ä xtidx Dios lojtu?

⁸ Cua'ä meel ni baniidx garenca guidoo loä che guyu'ä lojtu, te benä xtzun Dios lojtu.

⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzunutu. Sa'csi che biäd rebejtznu ni siäd Macedonia, baniidxreni guiraa ni biquinä. Loj guiraa redee dina nutalä xtzunutu, luxh si'c sinuu gunä.

¹⁰ Guideb didxlii xten Jesucrist ni yu' nejn lastoä, rniliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya.

¹¹ ¿Xhicuent rniä si'c? ¿Laa sa'csi dina chanälazä la'tu, ä? ¿Xho gacni si'c! ¿Dios anajn lacti sanälazä la'tu!

¹² Niluxh nani rungacä, lagajc ni'c sinuu gunä, te gudxonä renani rlajz gacnaro, renani rlajz naa rebejn najcreni si'cpac najcnu, niluxh direni gac.

¹³ Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni.

¹⁴ Luxh xho dini gac si'c, ni lagajc bendxab ni laa Satanäs rulujoj si'c te xangl Dios ni rdimbicha' te rusgueeni bejn.

¹⁵ Ni'cni na'c guidxelojtu palga näjza rexmos bendxab riäd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

Rdejd Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnä te guniäza didxro lagajc xcuentä.

¹⁷ Diidx ni rniä dina guiniäni xcuent xcäl'rnibee Dios, alga rniäni si'c te ni rajc yejcnä, lala redixro ni rniä xcuent lagajc narä.

¹⁸ Sa'csi lacti bejn yu' ni rniä didxro xcuent redzuun ni rujnreni lo guedxli-ujre, sigajcza siniä didxro xcuent lagajc narä.

¹⁹ Ni la'tu, sa'csi nasinduxhtu, sanunäjtu rebejn ni rajc yejcreni.

²⁰ La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzunni o rliä'preni lagajc xpala'reni, o rga'preni lojtu.

²¹ Mase rtuiyä guniäni, dipac niajcdi niniä diidx lojtu te niacä si'c najc rebejnga. Niluxh loj xhitis nani runnaroreni, (canisicä si'c te bejnayääl) narä sajcro gunnaroä.

²² ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajc toAbram? Sigajcza narä.

²³ ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcnä. Abenäru dzuun lojreni, agudijnrurenä narä loj ni gudijnreni laareni, abasäururenä narä nejn latzguuib, nicla gac guigab bal huält gudijnreni narä; baltiza huält ameer nietä.

²⁴ Gaii huält gudijn rexpejn Israel narä, tejga huält batiäjlreni duguijd detzä galbitzubigaa huält.

²⁵ Choñ huält bahuajcwreni narä garo't; stee huält bacuaareni guij yecä; choñ huält biääz barcw cadre sa'a loj nisdoo; teb dxej, teb yääl guyu'a lo nisdoo.

²⁶ Huaduxhä biaj, lacti bixuñ riesgw xcuentä lo gueuu, xcuent regubaan, xcuent rebenladxä, xcuentza rebenzajt. Bixuñza riesgw neñ reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najczeni bejtznu lo xtidx Jesucrist.

²⁷ Abenduxhä dzuun, agudeddUXhä trabajw, balti yääl dina niesä, balti huält gulanä, biolä, balti huält xheti xhi niauä; agudedäza yälñalduxh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'a xcuent reben guidoo ni huililajz xtidx Dios.

²⁹ Che rdxajg tejtü, näjza narä rdxagä. Palga tejtü riajb lo dojl, narä ruduxhä yärsia' xcuentni.

³⁰ Palga nanab gunnaroä lagajc narä, sunäni xcuent rediidx nani ruluiloj xcälrdxagä.

³¹ Dios ni najc Xtad Jesucrist, nani riäjl guiliä'p xpala'nni par tejpas, ananchee dina gusgueä la'tu.

³² Che guyu'a guedx Damasco, gubernadoor nani guyu' ro'c, najcni xpejn rei Aretas, gunibee gojp rexcuxhtisni guejdxga te niniaazreni narä te nisäureni narä neñ latzguiib.

³³ Niluxh basiäjtreni narä neñ te dximro nez ro' te padeer ni rdejd gabi guejdxga, te si'c gulaä ladzñaareni.

12

Dios baluiloj lo bacal

¹ Mase riäjl guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluiloj Dios loä.

² Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij, Diostis najn.

³ Diostis najn la guideb tiejxhni, o ganax xpritni, niluxh nanä xho huij niguiiga,

⁴ guläs Diosni cadre yu'pac Dios, luxh ro'c biejn diajgni didx-xhiga'tz, didxrodUXhtej, nani di gacdi guinii beñ guedxliuj.

⁵ Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä.

⁶ Mase rlazä guiniä didxro, didxsa'c xcuent lagajc narä, dini gac didx-nayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

⁷ Baluiloj Dios xhidalduxh cosrodUXh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huääz tiexhä, ni baxhal beñdxab xten Satanäs te gusacsíni narä te di gacä te beñnaro.

⁸ Choñ huält agunabä lo Jesucrist xcuent ni'c, te guibicajni.

⁹ Niluxh laani najni loä: "Yälracnäj ni gunidxä salduxh luj, sa'csi ruzensa'cru xcälmilagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzeñ xcälrnibee Jesucrist lastoä.

¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälñadip, yälñadaan loä.

Yu' Pablyärsia' xcuent guidoo ni yu' Corinto

¹¹ Agucä si'c te beñnayääl, lagajc la'tu bejntu nacä si'c. La'tu riäjł niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajrcru mase rut nacädi.

¹² Redzuun ni benä lał ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr.

¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. ¡Colsiäjł lajztu narä dojlre!

¹⁴ Naj cayunä xhigab jiädhuiätu, naj gacni choñ huält siälä. Di quilä xhixtentu, alga lagajc la'tu rguilä. Di rlazä gutalä xtzuuntu. Di riäjł cuchee rebiiux meel par xcuzajnreni. Reguzajn ni riäjł cuchee meel par rexi'nreni.

¹⁵ Xhet najcdi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

¹⁶ Niluxh mase si'c najcni, di narä nutalä xtzuuntu. Empac yu'reni canii basgueä la'tu sa'csi nadxällazä.

¹⁷ ¿Xhixh naatu cua'ä xhi xtentu sa'csi baxhalä rebejtznu lojtu, ä?

¹⁸ Che baxhalä Tito, räpä lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ Lałni cayoltu guiraa rediidxre, cayujntu xhigab canabnu jiäjł lajztu, niluxh xhet si'cdini. Caniinu rediidxre nez loj Dios, caniizanu con xcälracnäjä Jesucrist te si'c tioobrutu lo xtidx Dios, rebetzä nani rinälazä.

²⁰ Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlanjtu gacä. Rdxebä andi yu'tu ni cadijł, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajł diidx lo sa'ni; ni cayunnaro lagajc laani, ni cayujnza bieje.

²¹ Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechlajztu xcuent xtojłtu. Yu'tu ni di guibañnaya, resnäjtu bejn ni di gac chäältu, yu'za balti dojl rujntu.

13

Lult yälrułijdx xten Pabl

¹ Naj gac choñ huält siädhuiä la'tu. Guira'ti quej nanab cue'creni con xtidx tio'p o choñ bejn ni najnpac xhi dojl bejn tejnani.

² Mase ruti narä ro'c, arnixgä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jiälsacä, diruna gulaslazätu nicla tejtu,

³ sa'csi rlanjtu fiipactu la guli runiidx Jesucrist yälñabee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neñ lastootu.

⁴ Guliicani che cuajni lo cruzj, gucni si'c te bejn nani casis, niluxh naj nabajñni sa'csi rapduxhni xcälñabee Dios. Näjza nuure rsia'cnu si'c te bejn nani casisnäjä laani niluxh nabaññajnu laani xcuent xcälñabee Dios ni baniidxza Dios xcuenttu.

⁵ Colninäj lastootu lagajc la'tu, colhuii la guliipac ahuililajztu xtidx Dios; colhuisa'c xho najc lastootu. ¿La ditu gacbee rbäjz Jesucrist nen lastootu, ä? Palga rutini, rusqueetu lastootu, ditu nililajztu xtidx Dios.

⁶ Narä rlazä gacbeetu, dinu nusguee lastoonu, ahuililajzpacnu xtidx Dios.

⁷ Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä.

⁸ Sa'csi xhetliidi rajcdi riennu te nitloj didxgulii, xcälrnibeenu najc te gusule'nu didxlii.

⁹ Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälirililajztu lo xtidx Dios.

¹⁰ Rucuaä reguijzre lojtu che gajdna jiälä, te che jiälä na'c tilnäätu si'cpacni nungäj l tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹ Ni'cni rbejznu, colguibalajz, colhuii guisa' xcälirililajztu, colcuedcxi lajztu, colyennäj sa'tu tejsi xhigab, dxitis gubajn. Dios xten yälrinälajz näjza yälrbecdxi lajz chunäj la'tu.

¹² Colnii: “Xchan” lo resa'tu.

¹³ Guiraa rebejznu nani ahuililajz ruxhal xtixtios lojtu.

¹⁴ Yälracnäjä xten Dad Jesucrist, näjza yälrinälajz xten Dios, näjza yälracnäjä xten Sprit Dxan chu nen lastootu. Sugacni si'c.

Te Guijtz Lo Reben Gálatas

Pabl rucuaa guijtz loj reben guidoo nez región Galicia

¹ Narä, Pabl, nacä apost xten Jesucrist. Xhet rebejn̄di baxhaḷ narä, xhetza bejn̄di gule narä. Lagajc Jesucrist näjza Xtradni Dios ni yu' xhaguibaa, nani guläs Jesucrist loj rebengut, laareni agulereni narä.

² Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galicia.

³ Xca' guejbtu xcälracnäj Dios con xcälrbexilajz xten Dios xtradnu näjza xten Dad Jesucrist.

⁴ Lagajc laani cuäjbni gujt̄ni te guslaani nuure lo dojl̄ xten guedxliuj gui-jdxre, si'cni gunibee Xtradnu, Gueb-Dios.

⁵ Chä'p xpala'n Dios par tejpas. Sugacni si'c.

Xhetdi xhi stee didxcoob ni sajc guslaa nuure

⁶ Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx.

⁷ Xhetdi stee diidx ni sajc guslaa nuure lo dojl̄. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist.

⁸ Niluxh palga jiääd chu jiädluui lojtu ste'ca diidx ni ruslaa bejn̄ lo dojl̄, niluxh di diidxga gac si'c najc diidx nani abaluiinu lojtu, bejn̄ga agubibdeni, chutis najcnu, mase naräni, mase te xangl Dios ni jiääd xhaguibaali.

⁹ Si'c ni guniä lojtu, si'c rnisacä lojtu naj: Pal yu' chu jiädluui lojtu ste'ca diidx ni ruslaa bejn̄ lo dojl̄, luxh di diidxga gac si'c najc diidx nani abaluiinu lojtu, bejn̄ga agubibdeni.

¹⁰ ¿Xhi naatu? ¿La rlazä guinisa'c bejn̄ xcuentä o la rlazä guinisa'c Dios xcuentä, ä? ¿La rlazä guspaä lajz bejn̄, ä? Paru rlazä guspaä lajz bejn̄, digacdi gacä xmos Jesucrist.

Xtzun Pabl

¹¹ Colyabee sa'ä, diidx ni ruslaa bejn̄ lo dojl̄ nani abasule'ä lojtu di diidxga gac xhigab bejn̄ guedxliuj.

¹² Xhet lojdi bejn̄ guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³ Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni.

¹⁴ Loj reni rsoob xleii toMoisés narä cagusobäru xtiidxni, nanduxhäru loj guiraareni. Loj rebejn̄ nani sadxagä ladxä, maazru sanälazä xcostumbr retoxtadgoldoä.

¹⁵ Dios gule narä, guleni narä cheni nuuli xnanä narä, gurejdxni narä sa'csi sanälajzni narä.

¹⁶ Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn̄ lo dojl̄ loj reni di gac xpejn̄ Israel. Che gujc si'c rut lojdi huiye'tzä.

¹⁷ Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

¹⁸ Che agudejd si'cti chon̄ ijz, dxejcru hua'a guedx Jerusalén te biembeä Pedr, dxejc biannäni tzun-gubijdx.

¹⁹ Niluxh dina nuhuiä loj chu stee apost ro'c. Lojtis Jacob, betzhuin Jesucrist bahuiä.

²⁰ Rniliä nez lo Dios, dina guiniä didx-xhii, rediidx ni cacuaä najc guliipac.

²¹ Dxejcti hua'a reguejdx xten Siria näjza Cilicia.

²² Resa'nu ni yu' neñ xquidoo Crist guideb nez reguedx Judea, direni gumbee narä.

²³ Riejntis diajgreni: “Bejn nani basacsíduxh nuure agujc xchej, abejnga caguluiini xcuent lagajc xcärlilajz nani galoo rlajzni nunitlojni.”

²⁴ Dxejc rliä'preni xpala'n Dios sa'csi huililazäza xtiidxni.

2

Bidxaag Pabl loj reapost

¹ Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu.

² Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun.

³ Sanää Tito, te beñ griegw ni di gac xpejn Israel. Nicla lojni direni niäjb chuni bee si'c caj lo leii xten Moisés.

⁴ Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajn nu Dios. Rdxechreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlajzreni guxhiidreni nurnu, rlajzreni gusoobnu rextiidxreni.

⁵ Dipacnu nicäjb nucuadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶ Niluxh reni saj, nalajznu reni rnibee rebeñ guidoo ro'c, xhet te didx-coobdi guniireni loä. (Luxh par narä xhet najc di mase bensajcreni, sa'csi Dios runtebloj guiraa bejn.)

⁷ Luxh bahuiireni abaniidx Dios xtidx Jesucrist loä, luxh rusule'äni loj rebenzajt te guibicaj xtojlneni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii.

⁸ Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzajt nani di gac xpejn Israel.

⁹ Ni'cni Jacob, Pedr, näjza Juan nani najc beñroru neñ guidoo xten Jesucrist, gucbeereni laa Dios ni cayacnäj narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzajt. Niluxh laareni chanuureni gusule'reni loj rexpen Israel.

¹⁰ Gunabtrisreni loonu gacnäjnu rebejn ni xhet rajpdi, luxh ni'cza rlazä gunä.

Pabl gudilnäj Pedr lo guedx Antioquía

¹¹ Che biääd Pedr lo guedx Antioquía, gudilnääni, sa'csi abejnni dojl xhet laadi cayujnni.

¹² Galoo gudaunäjni rebenzajt, luxh che bidzujn gaii xpejn Israel ni baxhal Jacob, dxejcti gubicajni lo rebenzajt, diruni niaunäjreni sa'csi bidxejbni rexpejn Israel ni ru' bee ni bidzujn ro'c.

¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c.

¹⁴ Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa rebeñ guidoo: “Palga luj najclu te xpejn Israel, luxh

nabajnlu si'c rebenzijt ni digac xpejn Israel, xhet si'c di ni caj loj leii, ¿xhicuent rlanjzlu guinibeelu guibajn rebenzijt si'c rexpejn Israel nani rusooob xleii toMoisés?”

Nungäj̄l chalilajz rexpejn Israel, sigajc guiraa bejn, te guibicaj xtoj̄lreni

¹⁵ Nuure najcnu rexpejn Israel cheni gojllinu; dinu gac bendoj̄l si'c najc rebenzijt.

¹⁶ Anadonnu rut chu tejt̄i bejn sajc guibicaj xtoj̄lni che gunni si'cni caj lo leii, sa'csi nanab chalilajznu xtid̄x Jesucrist. Ni'cni biolilaaznu xtid̄x Jesucrist te jia xtoj̄lnu sa'csi rililajznu, xhet sa'csi riennu si'cni caj loj leii. Di gacdi jia xtoj̄l bejn xcuent yäl̄rusooob xleii toMoisés.

¹⁷ Palga lāl ni rlanjznu jia xtoj̄lnu xcuent xcäl̄rililajz xtid̄x Jesucrist, ruhuiinu cayenrunu dojl̄, la sajc guiniinu: Jesucrist rului rienrunu dojl̄, ¿ä? ¡Xho gacni si'c!

¹⁸ Palga rlazä gunsacä redzuun nani abarö'nä, lagajc narä rapä dojl̄ nacä beñ dojl̄.

¹⁹ Niluxh xcuent leii, anacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut che gucbeä di gacdi gusobä guiraa ni caj lo leiiga.

²⁰ Najcni si'cni gutnää Crist lo cruzj. Naj xhet narädi ni nabanä, laa Crist ni nabajn neñ lastoä. Yäl̄nabajn ni nabanä naj lo guedxliujre nabanä sa'csi rililazä xtid̄x Xi'n Dios nani rinälajz narä luxh gujtni te gudijxni xtolä.

²¹ Dina cuälazä xcäl̄rulasajz Dios. Paru sajc gudzucaj leii xtoj̄l bejn te gacreni beñnaya nez loj Dios, dxejc xlia'si gujt̄ Jesucrist.

3

Yäl̄rililajz rusia dojl̄

¹ ¡Chipsa nayäältu beñ Galacia! ¿Chu bascäjȳtu te di cuadiajgtu xtid̄x Jesucrist? Ni nez lojpacktu bisule'nu diid̄x xho cuaj Jesucrist lo cruzj.

² Tejt̄is diid̄x rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajz̄tu diid̄x ni biejn diajgtu?

³ Chipsa nayäältu. Acua'tu Sprit Dxan xten Dios dxejcti naj rlanjz̄tu guntu ni rijaibt̄is yejct̄u guntu.

⁴ ¿La xlia'si gudejdtu trabajw? Chugan la guli xlia'sini.

⁵ Che runiid̄x Dios Sprit Dxan xtenti lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajz̄tu xtiid̄xni ni riejn diajgtu.

⁶ Huililajz̄ toxtadgoldoonu Abram xtid̄x Dios, ni'cni cua' Diosni si'c te bejn nani naya lastooni.

⁷ Ni'cni colyabee dee: renani rililajz̄ xtiid̄x Dios najc xi'n toAbram.

⁸ Galooli najn Dios xcuent yäl̄rililajz̄ susia Dios lastoo rebenzijt, ni'c räjpni lo Abram: “Guiralii rebeñ guedxliuj sacle' xcuentlu.” Diid̄xre cuaj lo guijtz ni gujc galooli, cadro caj xtid̄x Dios.

⁹ Ni'cni reni rililajz̄ naj agucnäj Diosreni sigajc gucnäj̄ni toAbram nani huililajz̄.

¹⁰ Guiraa reni rlanjz̄ guibajnreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.”

¹¹ Niluxh huenliisi rien rut nayadi nez loj Dios xcuent leii, sa'csi dee najc xtid̄x Dios: palga rililajz̄ te bejn xtid̄x Dios, najcni te bennaya nez lo Dios, nabannäj̄ni Dios xcuent xcäl̄rililajz̄ni.

¹² Leii dini naa chalilajz bejn te xca'ni yálnabajn. Scree caj lo leii: “Nani gunpac si'cni caj loj reguijtz xten leii, ni'c nanab guibajn lojpac leiiga.”

¹³ Jesucrist badzucaj nuure loj yárbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.”

¹⁴ Scree gusajc Jesucrist te gusojb diidx ni rájp Dios loj toAbram, sacnäjni guiraa rebenzajt; nájza te guiraanu ni chalilajznu xtidx Jesucrist xca'nu Sprit Dxián xten Dios.

Leii náj diidx ni bia'n Dios loj toAbram

¹⁵ Betzá, naj gusá'tá te diidx xcuent ben guedxliuj. Cheni rujn bejn te guijtz te jia'n diidx lo stee bejn, mase bejntis najcreni, che abacuaani lajni lo guijtzga, rut sajcdi gudzucaj guijtzga. Rutza sajcdi gucuaaru diidx lojni che anajcni.

¹⁶ Luxh anajnnu badeed Dios xtiidxni loj toAbram nájza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist.

¹⁷ Diidx ni rlazá guiniá najc scree: Diidx nani bia'npac Dios loj toAbram gunii Diosni che cayáádx tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lahtis sajcdi.

¹⁸ Paru naquiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

¹⁹ ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlneni, lał ni jiáád nani najc xagdoon toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjł diidx.

²⁰ Te ni rusiäjł diidx xhet par tejtis bejndi najcni, niluxh Dios tejtis najc.

Xcuent leii

²¹ ¿La garenca najc xleii Moisés lo diidx ni basa'n Dios loj toAbram, ä? ¿Xho gacni si'c! Paru nica'nu te leii ni rajc rudeed yálnabajn, dxejc sii xcuent leiiga nica' bejn yálnabannaya.

²² Niluxh loj reguijtz xten Dios caj diidx ni rnii: Guiraa bejn niáuu nen dojl, te reni chalilajz xtidx Dios si'c huililajz toAbram, reni'c xca' xcälirililajz diidx xcuent Jesucrist si'cni bia'n Dios diidx loj toAbram.

²³ Che gajd xcälirililajz xcuent Jesucrist jiáád, dxejc basáuu leii nuure nen dojl, cabájztisnu guiricaj xcälirililajz xcuent xtidx Dios.

²⁴ Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojlnu con yárlirililajz xtiidxni.

²⁵ Niluxh naj sa'csi arajpnu yárlirililajz xcuent xtiidxni, dirunu guiquiin te mastr, nalajznu leii.

²⁶ Guiraatu najctu xi'n Dios xcuent yárlirililajz xtidx Jesucrist,

²⁷ sa'csi guiraatu ni gurobnistu loj xtidx Jesucrist, najctu rexpejn Jesucrist.

²⁸ Naj rutiru rexpen Israel niclaza rebenzajt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist.

²⁹ Palga najcnu xpejn Jesucrist, dxejc guliipac najcnu xi'n toAbram, dxejc sica'nu yálnasa'c ni abia'n diidx gudeed Dios loj Abram.

4

¹ Mbaj naj. Nani xca' yálnasa'c, che najcni biuux, najcni sigajc te mos, mase xtenni gac guiraa xhixten xtadni.

² Yu' chu te bejn ruhuiini, yu'za chu rnibee xhixtenni cheni agurooblina, cheni guidzujn dxej xca'ni ni gudeed xtadni.

³ Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jiennu lo guedxliuj.

⁴ Niluxh che bisa' dxej ni basoob Dios, baxhal Dios Xi'npacni. Xi'n te gunaa gojlni, loj rexpejn Israelza biädjiäjlni, basoobni leii xten toMoisés.

⁵ Si'c gujc te xcasacni reni rusoobpac leii, te xca'ni nuure gacnu si'c te xpisiäjbnii.

⁶ Luxh sa'csi anajctu xi'nni, ni'c baxhal Dios Sprit xten Xi'nni te cuääzni nen lastoonu. Laani rniini lo Dios xcuentnu: "Guejblu, Xtadnu."

⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl'nasa'c loonu xcuent Dad Jesucrist.

Rulijdxni na'c gacsac bejn mos

⁸ Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios.

⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb.

¹⁰ Cayutistu redxej, rebäii, retieemp, reijz.

¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu.

¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä.

¹⁴ Dizatu nuze' niclaza nibälajztu narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä.

¹⁵ ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu.

¹⁶ Naj ¿la rdxe'chtu loä sa'csi caniä didxlii lojtu, ä?

¹⁷ Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni.

¹⁸ Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä.

¹⁹ Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjzpacli Jesucrist nen lastootu.

²⁰ Maläii gac jäälä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹ Colguinii loä, la'tu ni rlajz gun si'cni caj lo leii, ¿la ditu gacbee, la di diajgtu jiejn xhini'c caj lo leii, ä?

²² ¡Coljiejn! Scree caj loj leii: guyu' tio'p xi'n toAbram. Tejini najc xi'n gunaa ni najc xmos Sara. Steeni najc xi'n chäälpacni.

²³ Niluxh xi'n xmosni gojl sa'csi lagajc laani bejnii xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram.

²⁴ Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii.

²⁵ Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpen Israel con rexi'nreni, sanäreni leii.

²⁶ Niluxh di guedx Jerusalén ni yu' guibaa gac si'c mos, luxh nuurnu najcnu xi'nni.

²⁷ Scree caj loj xtidx Dios:

Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejđ gunaa che rajl xi'nni. Sa'csi su'ru xi'n gunaa nani gulálajz cháalni quela xi'n gunaa ni gudiesnáj cháal stee gunaaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram.

²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlñi xi'n cháalpac Abram nani gojl xcuent diidx ni bia'n Dios loj Abram. Sigajcza najcni naj.

³⁰ ¿Xhi caj lo reguijtz? “Barilaagw gunamos näj xi'nni, te di xca' xi'n gunamos yálnasa'c xtenlu si'c ni xca' xi'n gunaa nani najc cháalpacu.”

³¹ Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháalpac toAbram.

5

Colguzutijp lajztu lo yälřirilajz xtidx Dios

¹ Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladzñaa leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladzñaa leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist.

³ Rniäza stehuält, guiraa bejn nani rlanjpac chu bee, nanab gunni si'cpac ni caj lo leii.

⁴ Palga rlanjztu guntu redzuun ni caj lo leii te guibicaj xtojltu, dxejc agubica-jtu lo Jesucrist, agubicaizatu lo xcälřracnäj Dios.

⁵ Niluxh nuure xcuentpac Sprit Dxi'an xten Dios rililajznu gudijx Jesucrist xtojlnu lo crujz, cayenloonu jiädsacni te guniidxni yälřansa'c par tejpas loonu.

⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajcz najc chalilajz bejn xtidx Dios. Yälřirilajzga rujn guibansa'cnu te chonälajznu resa'nu.

⁷ La'tu laaca sasajtu. ¿Chu badxojn gusoobtu xtidxlii Dios?

⁸ Xhet Diosdi ni guletu badxojnditu.

⁹ Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii.

¹⁰ Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹ Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojlnu lo crujz. Luxh si'cpacza rlanjreni.

¹² Rebejn nani cagusgueetu caniireni chutu bee, jmalaiiza gutiuugreni tejpas lagajcz tiejxhreni!

¹³ La'tu rebetzä, agurejdx Diostu loj xtiidxni te chalilajztu Jesucrist ni rusläa bejn lo dojl. Colhuixgaa na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejctu. Colgacnäj sa'tu con yälřrinälajz, tejni sigajcz steeni.

¹⁴ Sa'csi guiraa diidx ni caj lo leii con tejtis diidxre rsiojbni: “Chanälajztu sa'tu sigajcz rinälajztu lagajcz la'tu.”

¹⁵ Palga rdijltu, rauya'tu sa'tu, rajwtu sa'tu, jcolñatiro! Andi lagajcz la'tu gunijttu sa'tu.

Nani rchagljajz rebejn näj yälřnabajn ni rudeed xtidx Dios

¹⁶ Rniä lojtu, colguibajñ si'c ruluii xtidx Dios näjza Sprit Dxan xtenni, te si'c na'c guibajñtu si'ctis ni rlanj tiejxhtu, si'c ni najctis xhigabtu.

¹⁷ Sa'csi ni najc xhigab xten bejñ rdxe'ch loj xhigab Sprit Dxan xten Dios. Sigajcxa xhigab xten Dios dini gac tebloj con xhigab xte bejñ. Rudxoñtu loj sa'tu, ni'cni digacdi guntu dzuun ni rlanjtu guntu.

¹⁸ Luxh palga cagulijdx Sprit Dxan la'tu, dxejc dirutu quiquiin guntu si'c ni caj lo leii.

¹⁹ Guyasi jiembee bejñ xhireni'c najc redzuun ni rujñ rebejñ nani di gumbee xtidx Dios. Dee najc redzuunga: yälrusguee chääl bejñ, yälrusguee chääl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujñ niguii con gunaa,

²⁰ yälrajñ rebanäjb, yälbidxaa ni rujñ daan bejñ, yälrdxechlajz loj sa'ni, yälrchagdijl sa'ni, yälñayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejñ. Najza sa' dzunguijdxre rujñreni:

²¹ yälrdxe'ch lajz, yälrugut sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujñ sa' redojlre direni jiu' loj xcälñibee Dios xhaguibaa.

²² Niluxh xtzuum Sprit Dxan xten Dios najc yälñälajz sa'ni, yälrbalajz lastooni, yälrbedxi lajzni, yälrbecdxix lajz sa'ni, yälñajc beñsa'c lo chutis bejñ, yälñagodzlajz, yälñrililajz,

²³ yälñadolajz, yälñibee lastooni lo ni rlanj gun tiejxhni. Xheti te leii ni rudxoñ gun bejñ sa' redzuunre.

²⁴ Niluxh renani ahuililajz xtidx Jesucrist, abatio'ñreni guiraa redolguijdx ni rlanj gun tiejxhneni.

²⁵ Palga rbäjz Sprit Dxan neñ lastoonu, do'o guibajñ si'c rñibee Sprit Dxan guibajñnu.

²⁶ Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

6

Colgacnäj sa'tu

¹ Sa'ä, palga chu tejtu ni abiajb neñ dojl, lagajc la'tu nani aracheetu xtidx Dios colgulijdx bejñga, colgacnäjni te guiriini neñ dojl. Colñii lojni nadolajz, nasinlajztu lagajc la'tu didi che guidon nägajcxa la'tu jiajbtu neñ dojl.

² Colñuii xhi rquiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

³ Sa'csi nani rujñ xhigab sacduxhni, yu'za chu najcni, niluxh rut najcdini, rusgueeni lagajcsi laani.

⁴ Tejgatu colcube xho najc xtzuumtu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu quiquiin chu stee bejñ guiliä'p xpala'ntu.

⁵ Sa'csi tejga bejñ susule'ni diidx lo Dios xhini'c bejñni.

⁶ Nani casieed xtidx Dios nanab gacnäj bejñ nani ruluiini, gudeedni tudxe'n xhixtenni loj nani ruluiini.

⁷ Na'c gusgueelu lagajc luj. Dios digacdi guigueeni, ni'c guira'ti dzuun ni rujñ bejñ lagajcxa ni'c xca' bejñ.

⁸ Paru te bejñ gun dzuun xcuenttis tiejxhni, dxejc che guidzujñ dxej xca'ni yälñasa'c, sinitloj tiejxhni, dizani jiu' loj xcälñibee Dios. Palga te bejñ gun dzuun xcuent Sprit ni badeed Dios lojni, che gal yälñasa'c, sica'ni yälñabajñ par tejpas.

⁹ Ni'cni na'c guidxajgnu jiennu dzunsa'c te che guidzujñ dxej ni xca'ni yäl'nasa'c, xca'zanu te yäl'nasa'cro.

¹⁰ Ni'cni nanab lañ ni sajñni, gacñäjnu chutis bejñ, ganiddoo resa'nu ni ahuililajz.

Yäl'rulijdx näjza xtixtios

¹¹ Colhuilaa lacti reletrduxh cacuaä lojtu con ñaäpac.

¹² Guiraa reni rdxagljaz gun ni rñajztis tiejxhni, laa reni'c ni rñajz chutu bee, tedi tedreni trabajw xcuent ni cuaj Jesucrist lo cruzj.

¹³ Lagajc reni ru' bee direni gun si'cni caj lo leii, niluxh rñajzreni chutu bee te guibaa lajzreni sa'csi bejñreni gaan guyu' beega tiejxhtu.

¹⁴ Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojñnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre.

¹⁵ Che ahuililajz te bejñ xtidx Jesucrist, xhetru sajcdi chu bejñ bee, xhetza sajcdi na'c chu bejñ bee. Nani sajctis najc gacni si'c te beñcoob lo xtidx Jesucrist.

¹⁶ Guiraa renani nabajñ si'cni ruluii xtidx Jesucrist sibedxi lajzreni xcuent xcäl'rulaslaz Dios. Näjza rexpeñ Israel nani ahuililajz xtidx Jesucrist sibedxi lajzreni.

¹⁷ Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸ Rebetzä, gacñäj Dad Jesucrist guiragajctu con Sprit Dxan xtenni. Sugacni si'c.

Te Guijtz Lo Reben Efesios

Bacuaa Pabl lo reben guidoo nen guedx Éfeso

¹ Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebejn nani huililajz xtiidxni, loj reni rujn si'cpac rniini nen guedx Éfeso.

² Xca'tu yälracnäj, yälrbexi lajz xten Xtadnu Dios, näjza xten Dad Jesucrist.

Rusule' Pabl xtidx Jesucrist

³ Rliä'pnu xpala'n Dios, Dad näj Xtad Jesucrist. Dios racnäj nuure, xcuent Crist runiidxni guiraa reyälracnäj xca' lastoonu, astoo yu'lanu xhaguibaa.

⁴ Laani gule nuure, che gajdli guirixtiej guedxliujre, te gacnu xpejnni, te guibañnayanu nez lojni con yälrinälajz.

⁵ Sigajcza anungäj] xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi balaslajzni nuure.

⁶ Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejni nuure tejsi con xi'nni ni sanälajzni.

⁷ Laani baslaani nuure nen dojl xcuent xtiejnni, laani badzucajni xtoj]nu xcuent xcälruslaslajzni

⁸ nani banidxduxhni loonu. Guideb yälnejn, guideb xcäriejn

⁹ basule'ni loonu xhigab xhiga'tzni xcuent redzuun ni rlajzni gunni, xhigabza ni bejn galooli.

¹⁰ Luxh sidzujn dxej sisiojbpac xhigab ni bejn Dios. Che guidzujn dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcäl]nasa'c Jesucrist, sa'csi galooli bejn Dios xhigab guniidxni yäl]nasa'cga. Lagajc Dios benchee guira'ti ni yu', luxh rujnpacni nani abejni xhigab najc laaca gunni

¹² te guiliä'p bejn xpala'n xcäl]rnibeeni xcuentnu, nani ganiddoo biolilaaznu xtidx Jesucrist.

¹³ Näjza la'tu, che biejn diajgtu redidx gulii, rediidx ni ruslaa bejn lo dojl, dxej huililajztu xtidx Jesucrist, dxej gujczatu tejsi con laani. Dxej cua'tu Sprit Dxaan xten Dios, ni'c najc si'c seen ahuililajztu, si'cni bia'n Dios diidx.

¹⁴ Baniidx Dios Sprit Dxaan xtenni te cuääzni nen lastoonu, te ni'c najc seen xca'nu yäl]nasa'c nani guniidx Dios che abaluuxni xtzuumni, nalajznu guslaani guiraa rexpejnni te guiliä'preni xpala'nni lo xcäl]rnibeeni.

Rniab Pabl gudeed Dios yälnejn loj renani ahuililajz

¹⁵ Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexpejn Jesucrist,

¹⁶ dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios.

¹⁷ Rniabä lo Xtios Dad Jesucrist, xtadni ni rnibee xhaguibaa, guniidxni lojtu te yäl]nanduxh, te yäl]ruluiloj recos xhiga'tz te gacbeduxhrutu xcuent Gueb Dios.

¹⁸ Rniabäza lo Dios jianij xcäriejntu te gacbeetu xhini'c najc speranz xten yäl]racrejdxtu lo xtiidxni, te gacbeetu lacti saru, lacti sajc yäl]nasa'c ni gudeed Dios lo Jesucrist näjza loj rexpejnni,

¹⁹ te gacbeezatu lacti gurobduxh najc yäl]rnibee nani rajpni nez loonu nani ahuililajz xtiidxni. Guiraa redee ruluu lacti nadip najc yäl]rnibee xten Dios.

²⁰ Lagajc yäl]rnibeere bejn dzuun par Jesucrist. Con yäl]rnibeere baspajn Dios Jesucrist lo reben]gut, te gurejni xladbee Dios cadre rnibeeni xhaguibaa.

²¹ Maazru sajcnì lo chutis gubier, lo chutis yälrnibee, lo xhitis yälñadip, lo chutis ni rnibee; maazru sajcnì lo chutis nani abibee te guinibee, sigajc ñaj, sigajc nen redxej ni churu jiääd.

²² Niluxh badeed Dios guira'tini ladzñaa Jesucrist, laazani bejn bibee Jesucrist gunibeeni lo guiraa xhixten xquidooni.

²³ Reben guidooore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

2

Ruslaa Dios nurnu sa'csi rinälajzni nurnu

¹ Laani baniidxni yälñabajn lojtu che najctu si'c bengut nez loj Dios sa'csi rujntu dojl.

² Galoo gubajntu lo dojl, entis lo xnez guedxliujre guzajtu, biutu xtidx bendxab nani rnibee guedxliujre. Sprit xtenti rujn dzuun nen lastoo rexi'nni nani di gucuadiajg xtidx Dios.

³ Luxh galoo, ñaj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäjñ guidxe'ch Dios loonu, sigajc bidxe'chni loj guiraa reben guedxliuj.

⁴ Niluxh balaslajz Dios nuure. Con xcälñanälazduxhni huinälajzni nuure.

⁵ Mase anajcnu bengut lo dojl, laani baniidxni yälñabajn loonu. Rajpnu yälñabajnre con Jesucrist. Sa'csi balaslajzni nuure baslaani nuure nen dojl.

⁶ Baspañsacni nuure con Jesucrist; sigajcza bejnñi cuenäjnu Jesucrist xhaguibaa,

⁷ te nen redxej ni churu jiääd, guluilojni lacti sajç xcälñasa'c xten yälñulaslajzni, ni'c sanälajzni nuure, najcni huenduxh loonu por Jesucrist.

⁸ Sa'csi rulaslajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu.

⁹ Xhet xcuent xhi dzunsa'c di ni biennu, te di chu tejtü gac nayedxlajzdi.

¹⁰ Dios najc ni benchee nuure. Sigajcza con Jesucrist bejnñi gacnu bejn ni rujn dzunsa'c nani galooli agunibee Dios jienpacnu.

Yälrbexilajz ni rajpnu por Jesucrist

¹¹ Ni'c colñaj lajztu xho gujctu galoo. Ditu niajc rexpejn Israel. Rniireni la'tu 'benzajt' sa'csi ditu chu bee si'c ru' rexpejn Israel. Sa'csi lagajc con ñaareni rusälreni bee.

¹² Dxejc suga'tu ditu gumbee Jesucrist. Zijt yu'tu loj rexpejn Israel, najctu benzajt. Nicla gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre.

¹³ Niluxh ñaj ayu'tu lo Jesucrist, la'tu ni guyu' zijt lo Dios galoo. Ñaj agubigtu lo Dios sa'csi abia xtojltu con xtiejn Jesucrist.

¹⁴ Jesucrist najc ni rbecdxi lajznu. Laani bejn gujc rexpejn Israel tejsi con rebenzajt. Laani badzucajni redzuun xten leii te gujc rexpejn Israel tejsi con rebenzajt.

¹⁵ Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzajt. Lagajc laani bejnñi bidxagsa'reni te gujcreni tejsi che huililajzreni xtiidxni, gujcreni te beñcoob. Dxejc gulecdxini lajznireni.

¹⁶ Con yälgujt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

¹⁷ Cajza lo guijtç rediidxre:

Biäädni te basule'ni xho ga'p rebejn yälrbexi lajz rebejn ni suga' zijt lo Dios näjza reni suga' gajxh lo Dios.

¹⁸ Laani bejn sajz jiu' guiro'p cuaa bejn lo Dios con tejsi xhigab, näjza tejsi Sprit.

¹⁹ Ni'cni dirutu gac benzijt, bejn ni rut numbeedi. Anajctu tejsi con rexpejn, najczatu sa' rexpejn Dios.

²⁰ La'tu najctu si'c te yuro. La'tu najctu si'c padeer xten yu'ga. Reapost näjza reprof'e't najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajzru, sa'csi Jesucrist rnibee.

²¹ Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist.

²² Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te neñni cuääz Sprit Dxan xten Dios.

3

Pabl nungäjl chanä xtidx Dios lo rebenzijt

¹ Ni'cni yu'ä neñ latzguib, narä, Pabl sa'csi cagusule'ä Jesucrist, te jäädnää xtiidxni lojtu, najctu benzijt.

² Pet abiejn diajgtu lacti hueen najc Dios baniidxni dzuunre loä, jäädnää xtiidxni lojtu.

³ Dios baluiini xhigab-xhiga'tzni loä (si'cni bacuaä lojtu galoo).

⁴ Che goltu guijtzga, sacbeetu cati ananä rexhigabxhiga'tz xten Jesucrist.

⁵ Xhigab-xhiga'tzre di bejn niembee galoo, niluxh naj Sprit Dxan xten Dios abaluiinini loj reapost näjza loj reprof'e't.

⁶ Dee najc xhigab-xhiga'tzga: por rediidx xcuent Jesucrist ni rusläa bejn neñ dojl rujn Dios gac reni najc benzijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yäl'nasa'c si'c bia'n Dios diidx.

⁷ Narä nacä te apost xten dzuun ni baniidxni, por xcäl'rulaslajz Dios ni cuaxlia'ä. Dios baniidx dzuunre loä con xcäl'rnibeduxhni.

⁸ Luxh masä guxiiru sacä lo guiraa rexpejn, loä baniidxni xcäl'racnäjni te lo rebenzijt gusule'ä xtiidxni, nalajznu redidxcoob xcuent xcäl'nasa'c Jesucrist,

⁹ te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guirali ni yu'.

¹⁰ Si'c gujz te naj jien guirali yäl'nanduxh xten Dios. Reni najc xpejn pacni neñ xquidooni gului yäl'najnre lo rexangl Dios, loj reni rnibee xhaguibaa.

¹¹ Galooli bejn Dios xhigabre par tejpas, ni'cni biääd xtadnu Jesucrist te guzojb xhigab ni bejn Dios.

¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni.

¹³ Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

Xcäl'sanälajz Jesucrist

¹⁴ Ni'cni ruzuxhibä nez loj Xtad Dad Jesucrist

¹⁵ nani badeed lajni lo guiraa reni yu' xhaguibaa näjza reni yu' lo guedxliuj,

¹⁶ rniabä loj Dad xhaguibaa gutijpni lastootu con yäl'rnibee xcuent Sprit Dxan xtenni, sa'csi yuduxh xcäl'nasa'cni lo xcäl'rdimbicha'ni xhaguibaa.

¹⁷ Rniabäza lo Dios te jäädälajz Jesucrist neñ lastootu sa'csi ahuililajztu. Te che agusudzu'tztu, agusutijptu lo yäl'rinälajz

¹⁸ dxejc sajc gacheetu sigajc guiraa rexpejn pacni lacti gulajg, lactiza siool, lacti jiät, lactiza jiaa najc yäl_{sanälajz} xten Jesucrist.

¹⁹ Te gumbeezatu xcäl_{sanälajz} Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexcäl_{nasa}'c Dios.

²⁰ Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit D_{xan} ni rujn dzuun neñ lastoonu suniidxni reyäl_{nasa}'c.

²¹ Loj Diosre col_{deed} xquixtios. Col_{guiliä}'p xpala'nni neñ guidoo xcuent Dad Jesucrist guira dxej, par tejpas. Sugacni si'c.

4

Por Sprit D_{xan} nadxaag sa'nu

¹ Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj_l, si'cni bejnzatu xhigab cheni gurejdxni la'tu.

² Col_{guibajn} con yäl_{nalaslajz}, näjza yäl_{nadolajz}, col_{cuecdxi} lajztu. Col_{yujn} huant resa'tu con yäl_{rinälajz} sa'ni.

³ Col_{hiii} te guidxaag sa'tu gactu tejsi con Sprit D_{xan} ni ruscuecdxilajztu.

⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl_{runloj} ni rajptu xcuent diidx nani gurejdxtu.

⁵ Rajptu tejsi Dad, tejsi yäl_{rililajz}, tejsi yäl_{robnis},

⁶ tejsi Dios, tejsi Xtad guiraanu nani rnibee guira'ti lo guiraanu.

⁷ Lo tejganu abaniidxni dzuun si'ctis bejn Jesucrist xhigab guniidxni lo tejganu.

⁸ Ni'cni caj lo reguijtz:

Che huä'pni xhaguibaa, cadro rnibeeni,

abejn_{ni} gaan loj guiraa yäl_{rnibee},

dxejcti badeedni dzuun lo rexpejn_{ni} lo guedxliuj.

⁹ ¿Xhi säloj cadro caj, “huä'pni”? Dee säloj ganid biäjtni maazru jiät lo guedxliuj.

¹⁰ Lagajc nani biäjtgä, lagajc laani huä'pni jjaaru lo guiraa rexhaguibaa te sajc guinibeeni guibaa näjza guedxliuj.

¹¹ Lagajc laani badeedni xtzuun tejgareni. Yu'reni badeedni gac apost, yu'reni badeedni gac profe't, gaiireni badeedni gusule' xho rus_{laa} xtiidxni bejn lo dojl, sgaiireni badeedni gac si'c ni ga'p reben_{ni} guidoo, sgaiireni badeedni guluii rexpejn_{ni}.

¹² Guiraa redee badeedni te guluiireni rexpejn_{ni} Jesucrist, te gunreni dzuun te gustajl_{reni} rebejn_{ni} ni gac xquidoo Jesucrist.

¹³ Nungäj_l gac dzuunre che guidzujn_{li} dxej ni nadxaag-sa'nu guiraanu loj yäl_{rililajz}, che guidzujn_{li} dxej riembesa'cnu Xi'n Dios, dxejc anajcnu beñguyajl lo xtiidxni, si'c te ni aguroob loj xcäl_{rnibee} Jesucrist.

¹⁴ Dirunu gac si'c rebuux ni tera'tsi rusiejch lajzni, rucudiajg_{reni} xtidx chutis bejn, mase xhitis diidx ruluiini. Dxejc riajb_{reni} lo redid_x-xhii xten bejn nani rusguee, nani cabäjztis gusguee bejn.

¹⁵ Maazru hueen chonuunu loj redid_{xlii} xten Jesucrist con yäl_{rinälajz} te tioobnu lo guiraa recos xten nani rnibee, lagajc Jesucrist.

¹⁶ Loj Jesucrist nazdzu'tz guiraa rexpejn_{ni}, te si'cni nazdzu'tzsa'reni sääreni, najcreni tejsi loj tiejxh Jesucrist, racnä_j sa'reni segun xhi dzuun rujn tejgareni, casieedr_{reni} te cayajc xhidajlru rebejn_{ga} con yäl_{sanälajz}.

Te yäl_{naban}coob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajntu si'c nabajn rebejn_{ni} nani di gumbee Dios. Laareni rujn si'ctis ni riajb_{vejcreni}.

- 18 Nayääl xcäriejnreni, direni ga'p xcäl'nabajñ Dios sa'csi nadduxh lastooreni.
- 19 Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäjñ gunreni.
- 20 Niluxh la'tu xhet si'c di bisieedu loj Jesucrist.
- 21 Palga abiejñ diajgtu xtiidxni, niluxh abaluiini lojtu didxlii ni siädñä Jesucrist,
- 22 colgusaan yäl'nabanyujxh ni gojptu: Lo yäl'nabanyujxhga rujn bejn si'ctis ni rlanjñ. Dxejcti si'c runijtni la'tu lo Dios.
- 23 Colgusiejch lajztu, colgusia xcäriejntu,
- 24 te gactu beñcoob nani bejn Dios, colchanuu te yäl'nabansa'c, te yäl'nabanya xten xtidxliini.
- 25 Colguro'n diidx-xhii, colñii didxlii lo resa'tu sa'csi tejsi najcnu guiraanu.
- 26 Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx.
- 27 Na'c gusaantu jiu' beñdxab neñ lastootu.
- 28 Nani rilajn, na'cru cuanni. Laaca gunni dzuun con ñaani te gunni te dzunsa'c nani gudeed meel lojni te gac gacñäjzani rebejn nani xhet rajpdi.
- 29 Na'c gusaantu guirü nicla tej didxguijdx ro'tu. Colñii ganax didxsa'c te gacñäjñi guisieed reni rucua diajg xtiidxtu.
- 30 Na'c guntu gac-huin lajz Sprit Dxañ xten Dios. Laani najc te seen xten Dios najctu xpejnñ Dios, ni'c rbäjzñi neñ lastootu che guidzujñli dxej ni chäätu lo Dios.
- 31 Colguro'n yäl'nabandxuudx xtentu, näj yälrdxe'ch, näj yälrdxagdiñ sa'ni, näj yälrbexa', näj yälrgue. Colguibicaj lo guiraa redojlga, na'c gactu beñguijdx.
- 32 Nungäjñ gactu huen loj resa'tu, colgulasajz resa'tu, colsiäjñ lajztu con resa'tu ni rujn dojl lojtu si'c rsiäjñ Dios lajzñi rextojñtu xcuent Dad Jesucrist.

5

Xho nanab guibajñ rexi'n Dios

- 1 Colguibajñ si'c nabajñ Dios, sa'csi najctu xi'nni nani sanälajzñi.
- 2 Colchasanäj yäl'sanälajz sigajcni huinälajz Jesucrist nuure cheni badeedni lagajc laani lo Dios, cuajñi lo cruzj, gujtni. Laani gujñi si'c gojn, gujczani yälrbibyaal ni bidxaglajz Dios.
- 3 Nicla gusä'ttu yälrusguee chääñ bejn, nicla redoñ dxuudx, niclaza yäl'sanälaztej xhixtentisni. Nicla gusä'ttuni lo sa'tu, sa'csi xhet si'c di nungäjñ gun bejn ni naban-naya.
- 4 Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios.
- 5 La'tu anajntu nicla tej ni rusguee chälbejn, nicla tej beñdxuudx, nicla tej ni sanälaztej xhixtentisni, nicla renani rajñ rebanäjñ, nicla tej reni'c di xca' yäl'nasa'c loj Jesucrist, dizareni jiu' lo xcäl'nibee Jesucrist, xcäl'nibee Dios.
- 6 Na'c gusaantu gusguee bejn la'tu con diidx ni xhet sajcdi sa'csi xcuent redzuunga riäd xcälrdxe'ch Dios loj rebejn ni di gusoob xtiidxni.
- 7 Na'c guntu sigajc rujnreni.
- 8 Galoo nacäjytis xcäriejntu gubajntu, luxh ñaj abasanij Jesucrist xcäriejntu. Colguibajñ si'c nungäjñ guibajñ nani abianij xcäriejñni.
- 9 Sa'csi nani abianij xcäriejñni rujn dzunsa'c, rniini didxgulii.
- 10 Colguisieed xhini'c rchaglajz Dios.
- 11 Na'c guntu redzundxuudx nani rujn reni nacäjy xcäriejnreni, coltilnäj reni rujn sa' dzunguijdxga.
- 12 Sa'csi te xtujyñi najc jieinu diidx xcuent xtzunreni ni runxhiga'tzreni.

¹³ Niluxh guiraa sa' redzuunre ni rdilnäjnu, huenliisi sien xhi najcreni, suzen ni lo xpianij Jesucrist. Sa'csi guira'ti ni ruzen najc nianij.

¹⁴ Ni'cni caj loj reguijtz, räjp Dios:

Gubajñ, huistie luj ni rejslu.

¡Huistie lo dojl, luj ni naga'lu lo dojl si'c bengut,

te gusanij Jesucrist xcäriejnlu!

¹⁵ Colhuii, colsin, na'c guibajntu si'c te bejn nani di gacbee, colguibajñ si'c bejn nani yu' xcäriejnmi.

¹⁶ Coltedsa'c redxej sa'csi neñ redxejre ganax cosguijdx rujn bejn.

¹⁷ Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaa guntu.

¹⁸ Lacuaa yätu nejp nani runijtz bejn, colgapchee Sprit Dxan xten Dios neñ lastootu.

¹⁹ Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios neñ lastootu.

²⁰ Di jiäl lajztu gudeedu xquixtios lo Dios xtadnu con laj Dad Jesucrist.

Xho guibannäj sa' rexpejn Jesucrist

²¹ Sa'csi rajntu Jesucrist, colgusoob xtidx sa'tu.

²² Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist.

²³ Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guidooni lo redojl, najcreni si'c tiejxhni.

²⁴ Ni'cni, sigajc rusoob reben guidooga nani rnibee Jesucrist gunreni, sigajcza nungäjñ gusoob regunaa ni abachnaa nani guinibeetis chäälni gunreni.

²⁵ Lojtu, reniguii ni abachnaa rniä scree: Colchanälajz chäältu sigajc ni huinälajz Jesucrist rexpene guidooni, badeedni lagajc tiejxhni loj Dios cheni cuajni lo cruzj por laareni

²⁶ te basiani xtojñ rexpejn guidooni, te gujcreni te beñcoob, abidiib lastooreni con xtiidxni si'c rdiib te cos con nis

²⁷ te che xca'ni rexpene guidooni, najcreni te guidoo ni saj cru, te guidoo nani xheti xtojñni, te guidoo nani sugadzu'tz, te guidoo xhet xhi riäädxd, najcni te guidoya, xheti xhi xtojñdini.

²⁸ Sigajcza, te niguii nani abachnaa nungäjñ chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani.

²⁹ Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpene guidooni.

³⁰ Najczanu tejsi loj tiejxh Jesucrist, loj xpäälni, loj rextzujtni.

³¹ “Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejn.”

³² Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpene guidooni.

³³ Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

6

¹ Lojtu biuux, rniä scree: Colgucuaadjag xtidx Jesucrist, colgusoob xtidx xtadtu sa'csi ni'c sajz nez loj Dios.

² Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga;

³ “Te saruduxh guibajntu xchero lo guedxliujre.”

⁴ La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälñaj, colgulijdxreni con xtidx Jesucrist.

⁵ La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu neñ lastootu. Colyejn xtzuumni si'cni najc xtzuum Jesucrist.

⁶ Colyejn xtzuumni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuumnactu; si'cni rlanj Dios.

⁷ Colyujn xtzuumni guideb lastootu si'c xmos Jesucrist, et si'c di xmos beñ guedxliuj.

⁸ Anajntu dzunsa'c ni gun teygatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹ Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpejn Jesucrist lo guerr

¹⁰ Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälñadip xcälñibeeni.

¹¹ Colgajcw xhabguiib xten Dios te gac sudzu'tztu lo reyälrusguee xten bendxab.

¹² Sa'csi xhet beñ guedxliujtis cadilñajnu. Cadilñajzanu reguxhtis xte yälcäy, näjza reyälñibee, rebejn nani rñibee loj reyälcäyire, näjza rexangl bendxab nani rñibee bej xten guedxliujre.

¹³ Ni'cni colca' guideb lad-guiib xten Dios nani runiidxni loonu te gac sudzu'tznu neñ dxej ni guideednu trabajwduxh, te che agudejdi, lañtis sisiudzu'tznu.

¹⁴ Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu.

¹⁵ Colcuuaa gurach-guiib ni'tu (ni'c najc xtidx Jesucrist ni ruscuecdxi lajztu).

¹⁶ Colca' escud-guiib ni najc yälñililajz te con yälñililajz xtidx Dios di bendxab gun gaan gusguee la'tu con rextidx-xhiini.

¹⁷ Colca' yälñuslaa xten Dios lo dojl si'c te xhumbrel-guiib chu yejctu; colca'za lans xten Sprit Dxan xten Dios ni najc xtidx Dios.

¹⁸ Colñab lo Dios guiraa dxej; colñab lojni con Sprit Dxan xtenni; colsusintis; na'c jieedtu guiniabtu lo Dios xcuent guiraa xpejñni.

¹⁹ Colñabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälñuslaa bejn lo dojl.

²⁰ Xcuent rediidxga ni yu'ä neñ latzguiib, caduä con caden. Ni'cni colñab lo Dios te na'c guidxebä guiniä rediidxga si'cpacni säbyäjl guiniäni.

Lult xtixtios

²¹ Niluxh te gacheetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx.

²² Laapacni ruxhalä lojtu, te gacheetu xho yu'nu, te si'c guscuecdxini lajztu.

²³ Rniabä yälñbedxilajz par resa'nu, näjza yälñililajz con yälñsanälajz xten Dios Xtdadnu näjza xten Dad Jesucrist.

²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Rebeņ Filipos

Latzguiib yu' Pabl bacuaani loj rebeņguidoo xten guedx Filipos

¹ Pabl nājza Timoteu, nani najc rexmos Jesucrist, rucuaanu guijtzre lo guiraa rexpejñ Jesucrist nani rbājz guedx Filipos, loj rebejñ nani ruluii xtidx Dios neņ reguidoo nājza loj rediaconos.

² Gacnāj Dios la'tu con yälrbedxi-lajz xten Xdadnu nājza xten Dad Jesucrist.

Rniab Pabl lo Dios xcuent rebejñ nani rililajz

³ Che rnaj lazä la'tu, rudedä xquixtios lo Dios.

⁴ Che rniabä lo Dios, rbaa lazä rniabä lo Dios xcuent la'tu,

⁵ sa'csi abidxaag sa'nu lo xtidx Jesucrist che guslojli huililajzta hasta najli.

⁶ Anancheä Dios nani gusloj cayunsa'c dzuun neņ lastootu, lagajc laani suluxsa'c dzuunga dxejli ni jiääd Jesucrist.

⁷ ¿Xhiru xhigab nungäjñ gunä? Ni rapä la'tu neņ lastoä sa'csi cayacnäjtu narä neņ latzguiib luxh rsiudzu'tzta riye'tzta lo bejñ, guli najc rediidx nani rusule'ä xcuent Jesucrist nājza la'tu rusule'tu rediidxga.

⁸ Dios nanchee xho rbañnäätu, xho sanälazä guiraatu lo xcälñsanälajz Jesucrist.

⁹ Rniabä lo Dios te tioobru xcälñrinälajzta naj xcälñajntu nägajc churu xcäriejñ guiraatu,

¹⁰ te cuetu nani najc dzunsa'c te si'c guibañ nayatu, te na'c ga'ptu nicla tej dojl cheni jiääd Jesucrist.

¹¹ Te guidxa lastootu yälñasa'c xten te yälñabañsa'c ni runiidx Jesucrist, te guspaa lajzta Dios, guiliä'ptu xpala'nni.

Jesucrist najc xcälñabañä

¹² Rlazä gacheetu betzä: guiraa nani gusacä ni'c cayacnäj guire'chru xtidx Jesucrist.

¹³ Ni'c guiraa rebejñ, renani yu' jusgaad sigajc renani yu' garenca lajt, anajnreni niäuä latzguiib xcuent Crist.

¹⁴ Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵ Guliica yu' reni rusule' xtidx Jesucrist sa'csi rdxe'ch lajzreni, rdxe'chzaren loä. Yu'za reni rusule' xtidx Jesucrist sa'csi laaca najc xhigabreni.

¹⁶ Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä neņ latzguiib.

¹⁷ Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist.

¹⁸ Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä.

¹⁹ Ananä laaca guiriä loj guiraa recosre sa'csi canabtu lo Dios xcuentä. Luxh xcälñracnäj Sprit xten Jesucrist

²⁰ rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibañä o palga guetä.

²¹ Sa'csi palga guibañä, su'ä lo Jesucrist; luxh palga guetä sunäru gaan.

²² Palga guibanäru lo guedxliujre, saj cru gunä xtzuun Dad Jesucrist, ni'cni dina gacheä xhnic cueä xca'ä.

²³ Nagajn najcni par narä cueä lo guiro'preni. Te lajt runä xhigab: malaii guetä te cha'a cadre yu' Jesucrist sa'csi ni'c najc hueenru par narä.

²⁴ Niluxh stee lajt nancheä nungäj̄l guibanäru lo guedxliujre xcuent la'tu.

²⁵ Niluxh narä racbeäpac siannäaru la'tu, su'aru lojtu te chanuurutu lo xtidx Jesucrist, te guibalajztu lo yärlililajz,

²⁶ te guibalajzrutu xcuentä loj Jesucrist che guibisacä lojtu stehuält.

²⁷ Colhuiitis guibajntu si'cpac ni rnii xtidx Jesucrist, te palga jädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yärlililajz xten xtidx Jesucrist.

²⁸ Na'c guidxejbditu renani rdxe'ch lojtu. Laareni huenliisi ruseñ agunijtreni ni'c rdxe'chreni, ni'cni la'tu huenliisi ruseñ agulaatu neñ dojl̄ si'c baniidx Dios, ni'cni ditu guidxe'ch.

²⁹ Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajcza tedtu trabajw xcuent laani.

³⁰ Cadejdtu lagajc trabajw ni cahuiitu gudedä luxh naj riejn diajgtu caded-sicä trabajwga.

2

Xcälñalaslajz näjza xcälguobduxh Jesucrist

¹ ¿La ruspaä Jesucrist lajztu? ¿La racnäy xcälñinälajztu la'tu? ¿La yu' Sprit Dxan xtenni con la'tu? ¿La yu' xcälñanälajzni näj xcälñulaslajzni lastootu?

² Palga yu'ni, colguspaa lazä, colyejn tejsi xhigab con narä, colga'p lagajc yälñanälajzga, colguidxaag sa'tu, colyejn tejsi xhigab.

³ Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuuntu con yälñalaslajz, colhuii loj sa'tu si'c beñroru lojtu.

⁴ Na'c jiu chu tejtu lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpza Jesucrist

⁶ nani mase najcni sigajc Dios, dini niniazdzu'tz xcälñnibee Dios,

⁷ alga basa'nni te laad yälñnibee nani rajpni con Xtadni Dios te gujcnii mos cheni gojlni lo guedxliujre. Gujcnii si'ctis te bejn.

⁸ Che gujcnii si'ctis beñ guedxliuj, gujcnii beñ nadolajz, beñ nasobdiidx. Basoobni xtidx Dios, gujtni lo cruzj, luxh yälñrejt lo cruzj najc te yälñrtuiduxh.

⁹ Ni'cni baspañsac Diosni, gule'cni Crist te lajt ni najc jiaaru, badeedza Dios saj cru lajni lo laj guiraa relaj ni rusä't bejn.

¹⁰ Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez neñ yuj.

¹¹ Te guiraareni gacheepac, guiniizareni: “Jesucrist najc Dad”, te si'c chä'pduxh xpala'n Xtadnu Dios.

Rexpejn Jesucrist najc si'c bajl ni rusanij lo guedxliuj

¹² Ni'cni, resa'ä ni sanälazä, sigajcni rusoohtu xtidxä cheni suganää la'tu, sigajcza colgusoob xtidxä naj ni yu' ä zijt, colhuii tejgatu xho gac laatu neñ dojl̄, colyajc bejn ni rusoohtu diidx con yälñrdxejb.

¹³ Sa'csi Dios najc ni rujn dzuun neñ lastootu te rajc rujntu xhigabsa'c, dxejc racnäzani la'tu te rajc rujntu si'cni rlajzni.

¹⁴ Loj guira'ti ni rujntu, na'c gusmojm̄tu, na'cza gun tiop lajztu,

¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' la_l ni tre'tu loj rebe_nguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy,

¹⁶ sa'csi arapdzu'tztu xtidx yäl_nabaj_n ni runiidx Crist ne_n lastootu te guspaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj.

¹⁷ Mase lagajc xtienä guixe' te guiza' te gojn ni xca' Dios xcuent xcäl_ririlajztu, rbaa lazä, sibalaznääza la'tu.

¹⁸ Sigajcza col_guibaa lajztu, col_guibalaznäj narä.

Timoteu con Epafrodito

¹⁹ Nez loj Dad Jesucrist cayunloä guxhal_gacä Timoteu lojtu te näjza narä guibaa lazä che agucbeä xho yu'tu nejzga.

²⁰ Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu.

²¹ Guiraa rebejn_{re} rujntis xtzuuncareni, direni jiu gunreni xtzuun Jesucrist.

²² Niluxh la'tu anajntu xho rujn Timoteu; si'c racnä_j te bi'n xtadni, si'cza racnä_jni narä lo xtidx Jesucrist.

²³ Ni'cni rlazä guxhal_äni te jädhuini la'tu, fixgaäsi don xho sasaj xcuentä ree.

²⁴ Cabäzäza nez lo Dad Jesucrist don la näjza narä sajl jädhuigacätu.

²⁵ Niluxh rchaloä nanabpac guxhal_ä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhal_tuni te jiuni narä, fini xhini'c rquinä.

²⁶ Laani rlazduxhni fini lojtu, lacti cayu'ni yärsia' sa'csi gucbeetu gucxhuuni.

²⁷ Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yäl_nahuinlajz ni yu'ä ree.

²⁸ Ni'cni rlazä guxhal_gacäni te guibalajztu che fisactu lojni, näjza te na'cru gac-huinlazä xcuent la'tu.

²⁹ Col_{ca}'ni con yäl_rbalajz si'c bejtztu lo xtidx Dios, sigajcza col_yejn reni najc sigajc laani.

³⁰ Xcuent xtzuun Jesucrist ameer niejtni, dini niu xcäl_nabaj_ntisni te bejn_{ni} redzuun nani di niajcdi niujntu lagajc la'tu xcuentä.

3

Te yäl_naba_nsa'cpac

¹ Naj rebetzä, col_guibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnä_jni la'tu.

² Col_nati renani najc si'c bä'cw. Col_natiza rebejn_n nani rujn dzun gujdx. Col_natiza reni ru' bee tiejxhtisreni luxh xlia'si rujnreni si'c.

³ Renani guliipac yu' bee najc nuure nani ahuililajz xtidx Dios, rienzanu xtzuunni si'cni rlajzni sa'csi ayu' Sprit Dxan xtenni ne_n lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu.

⁴ Narä sajcza guibalazä xcuent ni rujn tiexhä. Palga yu' chu tej ni rbalajz, narä rbalazäru

⁵ sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtadä najc te ben hebreo; xcuent leii nacä te farisee.

⁶ Basobduxhä guirali rextidx Dios ni caj lo leii ni'cni basacsiduxhä rexpén Jesucrist; xcuent yäl_naba_nsa'c xten leii, xhetliidi xtolä yu'; basobdzu'tzä xtidx leii.

⁷ Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist.

⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist,

⁹ te chu'ä lojni, xhet xcuentdi xcäl_naba_nsa'cä ni najc xcuent leii, alga xcuent yäl_naba_nsa'c ni najc xcuent xcäl_ririlajz Jesucrist, yäl_naba_nsa'c ni najc xten Dios xcuent yäl_ririlajz.

¹⁰ Ni'cni rlazä gumbeäru Jesucrist loj yäl_rnibee ni rajpni sa'csi huistie guba_nsa'cni sacni loj rebe_ngut, te gumbeäru retrabajwduxh ni gudejdni, te ganä xho gunä ni rlazj Dios si'c gucbee Jesucrist, bejnzani ni rlazj Dios che gujtni.

¹¹ Te gac guidzunä lo yäl_guiba_nsac loj rebe_ngut te xca'ä yäl_nabaj_n par tejpas lo Dios.

¹² Dizana guiniä “abenä gaan” o “anacä be_nsa'c”, alga sanuätis te gunä gaan yäl_nabaj_n nani cua'ä lo Jesucrist.

¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää naä si'cni guiniazä nani churu gac.

¹⁴ Si'cni sanuutis ruxu_n bej_n te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶ Naj, cadrotis abidzunnu lo nani abiembeenu, sigajcza nanab guiba_nsijcnu, chanuutis gusoobnu rediidxga; nungäjl guibaj_nnu loj rediidxre, jiennu tejsi xhigab.

¹⁷ Rebetzä, col_tanajl narä, col_yejn si'c runä narä, col_huiiza rebej_n nani nabaj_n si'c naba_nä.

¹⁸ Xhidajl huält aguniä lojtu, naj ronäli rnisacä lojtu, yu' xhidajl reni rdxe'ch lojtu, rniyajreni nani bejn Jesucrist che gudijxni xtoj_lnu lo cruzj.

¹⁹ Redee che luux xnezyujreni sinitlojreni, sa'csi xtioozreni najc yäl_rausa'c; luxh rbaali lajzreni rujnreni dzun xtujy; luxh riutisreni xcäl_nasa'c guedxliujre.

²⁰ Niluxh nuure, xhaguibaali najc laadxnu, luxh ro'cli cabäaznu jiääd nani ruslaanu ne_n dojl, nalaaznu lagajc Dad Jesucrist.

²¹ Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl_rnibeeni. Sujnni dee con yäl_rnibeduxh ni rajpni te rnibeeni loj guirali'ti, guiraa nejz.

4

Col_guibalajztis xcuent Dad Jesucrist

¹ Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl_nasa'c xtenä, col_sudzu'tz loj xtidx Jesucrist.

² Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist.

³ Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza

Clemente näjza guiraa reni bennäj narä dzuun; alajreni caj nen reguijtz xten yäl_nabaj_n par tejpas.

⁴ Colguibalaznäj_{tis} Dad Jesucrist; stehuält rniä: col_lguibalajz.

⁵ Sugabee guiraa rebejn xho najc xcäl_nabaj_ntu lo xtidx Dios. Asiäddzungajxh dxej xten Dad Jesucrist.

⁶ Na'c guidxejbtu, col_nabtis lo Dad guira'ti, col_gudeedza xquixtios lojni la_l ni cabedx-canabtu lojni.

⁷ Dios guniidx xcäl_rbedxilazduxhni, nicla guntu xhigab lacti najc yäl_rbedxilajzga. Yäl_rbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸ Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'n_{ni}, guira'ti nani nacsac; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsac'pac, o palga yu' xhi te diidx ni saj_c guiliä'p xpala'n_{ni}, xcuent guiraa reni'c colyejn xhigab.

⁹ Nani bisieedu, nani cua'tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jiannäjni la'tu.

Gojn xten reflipenses ni xca' Pabl

¹⁰ Rbaduxh lazä nez loj Dad Jesucrist sa'csi banasac lajztu gacnäjt_u narä. Guliini; galooli rlajztu niacnäjt_u narä, luxh di niajcdini.

¹¹ Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä.

¹² Sajc guibanä che guxii rapä; saj_c guibanä che xhidajl rapä; abisiedä guibanä xhotis: saj_c gauduxhä, saj_cza guilianä; saj_c gapä xhidajl xhixtenä, saj_cza tedä trabajw.

¹³ Guira'tini saj_c gunä sa'csi Jesucrist racnäj narä.

¹⁴ Niluxh xhet najcdi; laaca dzuun bejntu che bejntu xhigab gacnäjt_u narä la_l ni cadedä trabajw.

¹⁵ Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä.

¹⁶ Cheni yu'äli guedx Tesalónica, baxhaltu meel loä tej-tio'p huält.

¹⁷ Niluxh narä di rlazä xca'ätis xhixtentu ni guniidxtu, nani rlazä najc tioobru xcäl_nasa'ctu nez lo Dios xcuent dzuun ni rujntu ruxhaltu meel loä.

¹⁸ Naj acua'ä guiraa ni baxhaltu, arapä xhidajl, arapduxhä sa'csi acua'ä nani biäd_{nä} Epafradito baxhaltu loä, te gojn ni rlianejxh si'c guxhyaal, te dzunsa'c ni rchaglajz Dios.

¹⁹ Dios xtenä guniidx lojtu guiraa nani riääd_x xca'tu, si'ctisni rajpni reyäl_nasa'cduxh xhaguibaa con Dad Jesucrist.

²⁰ Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹ Coldeed xtixtios lo guiraa rebejn ni abia lastooni nez loj Dad Jesucrist. Rebejtznu ni yu' ree näj narä ruxhal_{nu} xtixtios lojtu.

²² Guiraa rebenree ni abia lastooni nez loj Dad Jesucrist ruxhal_l xtixtios, niluxh ruxhal_{ru} resa' César xtixtios lojtu.

²³ Suga'p xcäl_rracnäj Dad Jesucrist lastootu. Sugacni si'c.

Te Guijtz Lo Rebeņ Colosas

Bacuaa Pabl loj rebeņ guidoo ni yu' guedx Colosas

¹ Narä, Pabl nacä te apost xten Jesucrist. Dios gule narä. Narä näjza bejtznu Timoteu

² cagucuaanu reguijtzre loj rebeņ Colosas nani nabannaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xtadnu.

Rniab Pabl gudeed Dios yälñajn xtenni

³ Rdeednu xquixtios lo Dios xtad Dad Jesucrist rniabnu lojni xcuenttu guixe-guixee.

⁴ Abiejn diajgnu xho rililajztu xtidx Dad Jesucrist, näjza xho sanälajztu rebeņ ni ahuililajz xtidx Jesucrist,

⁵ sa'csi cabäjztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yälruslaa lo dojl.

⁶ Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajru rebeņ ni cayacbee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeezatu guliipac najc xcälñulasajz Dios.

⁷ Sigajcza bisieedtuni lo Epafra, ni sanuutis cayacnäjni nuure lo dzuun. Laani najc te beñsa'c, yu'ni lojtu cayujnpacni xtzuun Jesucrist lacuaa nuure.

⁸ Laani abasule'ni diidx loonu xho sanälajz sa'tu sa'csi nabajñ Sprit Dxan xten Dios neņ lastootu.

⁹ Laa ni'cni dxejli nani biejn diajgnu diidxre xcuenttu, di cuäaz cabedx-canabnu lo Dios, canabnu gacbeduxhtu xho rlajz Dios guntu, guniidxni guiraa yälñajn näjza gusanijni xcäriejntu

¹⁰ te guibajntu si'cni nungäjl guibajñ bejñ ni sanajl Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsac näjza jianijru xcäriejntu xcuent yälriembe Dios.

¹¹ Tioobrutu loj xcälñadip, xcälñabee Dios te guibaa lajztu gusutiplajztu, cue'cdxilajztu loj xhitis ni sajctu.

¹² Guibalajznu guideednu xquixtios loj xtadnu Dios nani basudzu'tz nuure te xca'nu yälñabajñ par tejpas sigajc guiraa rebeņ nani ahuililajz xtiidxni yu'reni lo xpianijni.

¹³ Laani abaslaani nuure loj xcälñabee yälñacäjä, abateedni nuure lo xcälñabee xi'nni ni sanälajzni.

¹⁴ Laa xi'nni ni baslaa nuure neņ dojl cheni baxhe'ni xtiejnni, gujtni lo cruz, dxejc gudijxni rextojlnu.

Gubisacnu loj Dios xcuent xcälgujt Jesucrist

¹⁵ Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh rnibeeni lo guiralii ni yu' lo guedxliuj.

¹⁶ Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: rereii, näjza reni rnibee loj rexangl Dios, näjza reni rnibee loj rexangl bendxab, nägajcza reyälñabee xten reguixhajg, sigajczani loj regubier, lo reguxhtis ni rajp yälñabee, guiraani guc-chee por laani, näjza par laani.

¹⁷ Alanabajn Jesucrist galooli, che gajdli guirixtiej guedxliuj. Por laani yu' guira'ti ni yu'.

¹⁸ Laani najc nani rnibee guidoo, nalajznu rebejn nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajc guinibee.

¹⁹ Sa'csi bidxaglajz Dad Dios ga'p Jesucrist guiralii yälrnibee nani najc xten Dios,

²⁰ por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäj-lajzni, aguredxi lajzni sa'csi bixe' xtiejn Jesucrist lo cruzj.

²¹ Luxh la'tu gujctu si'c beñzajt lo Dios sa'csi galoo rdxe'chtu lo Dios nen lastootu xcuent redzunguidx nani bejntu.

²² Niluxh naj abiäj-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruzj cheni gujtni. Ni'c bejn ni te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu.

²³ Niluxh riäj chanuu sudzu'tztu, cuedxitu lo yälrililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist.

²⁵ Ni'c nacä te bejn ni rusule' diidx nen guidooga. Dzuunga baniidx Dios gunä par xcäl_nasa'ctu te gusule'äpac guiragajc xtidx Dios,

²⁶ te gacheenu rehxigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexpejn ni.

²⁷ Lojreni bejn Dios xhigab guluiini reyäl_nasa'c xten yälrdimbicha' xten redidx-xhiga'tz ni cagusule'ni loj rebenzajt. Yäl_xhiga'tzre säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebejn, guideb yäl_najn ruluiinu te guisa' yäl_najn xten guiraa rebejn xcuent Jesucrist che guidzujnreni nez loj Jesucrist.

²⁹ Xcuent dzuunre guideb xtipä runä dzuun con guiraa yälrnibee nani runiidx Jesucrist narä.

2

¹ Rlazä gacheetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä.

² Te tioob lastoo guiraatu sa'csi abidxagsa' lastootu lo yäl_sanälajz, näjza te ga'ptu guiraa reyäl_nasa'c ni rajp bejn che racbesa'creni xtidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist.

³ Nen lastoo Dios näjza lastoo Jesucrist naga'tz guiraa reyäl_nasa'c xten guiraa reyäl_najn, guiraa yäl_numbee.

⁴ Dee rniä lojtu te di gusguee chu gusgueetu con rediidx-xhii.

⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yälrililajz xten Jesucrist.

⁶ Ni'cni sigajc ni huililajztu xtidx Jesucrist, sigajcza col_chasanäj Jesucrist.

⁷ Col_sudzu'tz lo Jesucrist si'c rsiobdzu'tz xlobaa te yajg. Col_sudzu'tz lo yälrililajz xten Jesucrist si'c ni abisieedu. Col_gudedduxhru xquixtios lo Dios.

Yäl_nabancoob ni rudeed Jesucrist

⁸ Colhunii, na'c gusaantu guxhiid bejn xcälirililajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlajz Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist.

¹⁰ Xhet cayäädxdidi lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt.

¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtojł bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist.

¹² Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl'rnibee nani gulässac Jesucrist lo rebengut.

¹³ Che najctu si'c bengut lo dojl, näjza sa'csi di bee niu' tiejxhtu, dxejcli baniidx Dios yäl'nabajn par tejpas lojtu con Jesucrist, badzucajni guiraa rextojłnu.

¹⁴ Dios badzucaj guiraa releii nani basäuu nuure nen dojl, badzucajnini lojni, sa'csi bacuaanini lo cruzj, cadre gudijx Jesucrist guiralii rextojłnu.

¹⁵ Cheni gujt Jesucrist lo cruzj bejnni gaan loj reyäl'guxhtis näjza guiraa reyäl'rnibee xten bendxab näjza rexspritni. Basanxtujynireni nez loj guiraa rebejn. Laani bejnni gaanreni cheni cuajni lo cruzj.

Colquiił recos ni najc xten xhaguibaa

¹⁶ Nicla tejtü na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzni.

¹⁷ Guiraa redee najc si'csi te balaa xten nani churu jiaäd, te guluiireni ni rujn balaaga, nalajznu ni'c najc Jesucrist.

¹⁸ Na'c gusaantu gudzucaj bejn xcäl'nasa'ctu te gunreni gactu nadolajz, te ganu reangl. Sa' bejn'ga richu' loj nani gajdreni fii; rchaloreni najcreni benro xcuent lagajc xhigabreni.

¹⁹ Laareni direni chanajł Jesucrist nani rnibee, nani rujn roobru tiejxhni, nalajznu rexpejnni, sa'csi lojni rca'reni ni rquiiin lastooreni, te ruhaagni sa' tejpgareni si'c nadxaquiiid bääl cuä' dzujt lo tiejxh bejn, te gacreni tejsi con Dios.

²⁰ La'tu agujttu con Jesucrist, abiriitu lo rexhigab xten guedxliujre. Naj xhicient guibajntu sigajctis nabajn rebejn nani di gumbee xtidx Jesucrist, ä? xhicient rusoobtu rediidx ni caj lo releii? Loj releii caj sa' diidxre:

²¹ "Di chahuallu dee, di gaulu ni'c, di canlu dec."

²² Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani ruluii bejn.

²³ Guluiicani sa' releiiga rien asdoo ruluiireni yäl'nanduxh, luxh che ru-soob bejn releiiga rchaloreni rajnreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

3

¹ Palga anabansactu con Jesucrist, colquiił reyäl'nasa'c ni yu' xhaguibaa cadre sobga' Jesucrist xladbee Dios.

² Colyejn xhigab xcuenttis reyäl'nasa'c ni yu' xhaguibaa, na'c guntu xhigabtis xcuent reni yu' lo guedxliuj.

³ La'tu anajctu si'c bengut loj reyäl'nasa'c ni yu' lo guedxliuj, luxh yäl'nabajn ni rajptu naj, yäl'nabajn'ga naga'tz con Dios xcuent Jesucrist.

⁴ Che guluiilosac Jesucrist ni najc xcäl_nabaj_ntu, dxejc näjza la'tu suluiilojtu con laani lo xcäl_rdimbicha'ni.

Yäl_naban_biejw con yäl_naban_coob

⁵ Col_cuälaz redzunguijdx xten guedxliuj nani rujntu, yäl_rusguee gunaxteb, yäl_rujn recosdxuudx, recos ni rdxag_lajz tiejxhtu, re_xhigab-guijdx, yäl_rsiäb-lajz xhi xten bej_n, guiraa red_ee rujn runij_t bej_n lo Dios sigajc rujn bej_n che raj_n bej_n rebanäjb.

⁶ Guiraa redzuunga rujn riääd xcäl_rdx_e'ch Dios yejc renani rujn sa' redzu-unga.

⁷ Näjza la'tu bejntu sa' redzunguijdxga galoo cheni guyu'tu lo sa' yäl_nabaj_nga.

⁸ Niluxh naj näjza la'tu col_gusaan recosre; nalajznu yäl_rdx_e'ch, yäl_ruche'ch sa'ni, yäl_rujn latzsiaj sa'ni, yäl_rniyaj sa'ni, näjza rediidx-dxuudx ni rniitu.

⁹ Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx.

¹⁰ Col_yajc te be_ncoob, ni guixe-guixee cayanijru xcäriej_nni, te gumbesa'ctu Dios, te gactu sigajc najc Dios ni benchee be_nguedxliuj.

¹¹ Lo yäl_naban_coobre rutiru be_nzijt, niclaza xpe_n Israel, rutiza rebej_n ni ru'bee, niclaza bej_n ni di chu bee; rutiza be_nzijt, niclaza bej_n ni siääd zitduxh; rutiza mos, niclaza bej_n nani di chu lo bej_n, sa'csi che rililajz te bej_n xtidx Jesucrist najcni tebloj con guiraa reni rililajz xtidx Jesucrist; guiraareni najc xpej_n Jesucrist.

¹² Naj agule Dios la'tu te gactu xpej_nni nani gac naya, nani sanälajz_ni, col_guibaj_n con yäl_rulasajz, na'c guidx_e'chtu, col_yacnadoo con yäl_nadolajz, col_niiza nadolajz.

¹³ Col_yujn huant, na'c guidx_e'chtu loj sa'tu, palga yu' chu sa'tu rd_xe'ch loj sa'ni, col_gusiäjl-lajz_tu sigajcni basiäjl-lajz Dad Jesucrist lojnu xcuent rextol_nu.

¹⁴ Che abejntu guiraa recosre, col_guilru yäl_sanälajz nani rusa' loj guiraa recosre.

¹⁵ Xcäl_rbedxilajz Dios guinibee ne_n lastootu, sa'csi parpac ni'c gurejdx_ni la'tu, te gaczatu tejsi con rexpej_n Jesucrist. Col_gudeed xquixtios loj Dios.

¹⁶ Xtidx Jesucrist chuduxh ne_n lastootu con guiraa yäl_naj_n, te guluiitu, te gulijdx_tu tejga resa'tu con redij nani gulä'p toDavid xpala'n Dios, näjza redij nani rol_tu, näjza redij nani rliä'p xpala'n Dios. Redijga gol_nu te guideednu xquixtios lo Dios ne_n lastoonu.

¹⁷ Guira'ti nani guntu, sigajc rediidx ni rniitu, sigajcza redzuun ni rujntu, col_yej_n guiraani con laj Dad Jesucrist, col_deed xquixtios lo Dios xtadnu con laj Jesucrist.

Xho nanab guibaj_n te famil_i ni najc xpej_n Jesucrist

¹⁸ Regunaa nani abach_naa, col_gusoob xtidx chäältu sa'csi si'c rlajz Dad Jesucrist.

¹⁹ Reniguii nani abach_naa, col_lchanälajz chäältu, na'c guidx_echnäjt_ureni.

²⁰ Reni najc biuux, col_gusoob xtidx xtadtu loj guira'ti, sa'csi si'c rchag_lajz Dad Jesucrist.

²¹ Reni najc Dad, na'c guche'chtu rexi'ntu, didi gac-huin lajzreni.

²² Reni najc mos, col_gucuadiajg xtidx xlam_tu lo guedxliujre loj guira'ti xtzuunni. Na'c gunsa'ctu dzuun che cahuiitisreni si'c rujn renani ruspaa lajz bej_ntis. Con yäl_nadolajz col_yej_n dzuun sa'csi sanälajz_tu Dios.

²³ Guira'ti nani guntu, col_yej_nni guideb lastootu si'c xtzuun Dios, et si'c xtzuundi rebej_ntis.

²⁴ Anajntu lo Dad Jesucrist sica'tu yäl_nasa'c ni najc yäl_nabaj_n par tejpas, sa'csi loj Dad Jesucrist rujntu dzuun.

²⁵ Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

4

¹ Renani najc lam, coldeed loj rexmostu nani riäj_l xca'reni sa'csi anantu näjza la'tu rajptu xlamtu xhaguibaa.

² Colchanuu col_nab lo Dios, col_susi_n che rniabtu lo Dios. Colgudeed xquixtios lo Dios.

³ Col_nabza lo Dios con nuure te gacnä_j Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä ne_n latzguiib.

⁴ Col_nab lo Dios te guyasi gusule'ä rediidxga si'cni riäj_l guiniä.

⁵ Col_guiba_nsi_n loj rebej_n nani di gumbee xtidx Jesucrist, col_gusule' diidx cheni riäj_l guiniitu lojreni.

⁶ Rextiidxtu nanab gacni si'c rchaglajz Dios, saruduxhza gac xtiidxtu te gacheetu xho riäj_l gudzu'tu diidx loj tejgareni.

Lult xtixtios

⁷ Tiquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä.

⁸ Ruxhaläni lojtu te gacheepactu xho yu'ä, te guspaani lajztu.

⁹ Laani jädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

¹⁰ Aristarco, nani yunäj narä ne_n latzguiib, ruxhaläni xtixtios lojtu näjza Marcw, betz prim_xten Bernabé (abacuaä lojtu xcuentni, xho guntu, palga jädhuiini la'tu, sacru col_huiini).

¹¹ Näjza Jesús nani laaza Justo, ruxhal_xtixtios lojtu. Laatisreni najc rexpej_n Israel nani cayacnä_j loj dzuun xten xcäl_rnibee Dios. Laareni ruspaazazä.

¹² Epafra, ni najc te sa'tu, ruxhal_xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni r_lajz Dios guntu.

¹³ Narä rniliä xho rdzuun Epafra xcuent la'tu, näjza xcuent rebej_n ni yu' guedx Laodicea, näjza guedx Hierápolis.

¹⁴ Lucas, doctoor ni sanälajznu, näjza Demas ruxhal_zareni xtixtios lojtu.

¹⁵ Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebej_n nani re' rolizni.

¹⁶ Cheni agulujx bil_tu gui_jtzre, col_guxhaläni te jieläni ne_n guidoo xten guedx Laodicea, dxejcti col_yelza gui_jtz nani baxhalä lo reben guedx Laodicea.

¹⁷ Col_ye'tz loj Arquipo: "Bahuisa'c xtzuun Dad Jesucrist nani cua'lu lojni. Bensa'c dzuunga."

¹⁸ Lagajc narä Pabl rucuaä xtixtiosre con lagajc naä, con lagajc xleträ. Col_gusnaj-lajztu narä yu'ä latzguiib. Gacnä_j Dios la'tu. Sugacni si'c.

Guijtz Ganid Lo Reben Tesalónica

Bacuaa Pabl con rexamigwni lo guidoo guedx Tesalónica

¹ Narä, Pabl, näjza Silvan, näjza Timoteu cacuaanu guiitzre lojtu, resa'nu ni yu' guidoo lo guedx Tesalónica, reni yu' lo Dios Xtdnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz beñ Tesalónica xtidx Dios

² Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios.

³ Ruzä'tnu lo Dios xtdnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj.

⁴ Bejztu, racbeenu sanälajz Dios la'tu, laani aguleni la'tu.

⁵ Sa'csi che basule'nu xtidx Dios lojtu, et ganax diidxtis gujcn, niluxh xcälrbnee Sprit Dyan xten Dios nen lastootu bejn gucbeepactu diidx ni najc didxlii. Nanchesa'ctu xho gujcn che guyu'nu lojtu. Si'c baluiinu la'tu te guiba'ctu.

⁶ Sigajcni nabañäjn Dad Jesucrist sigajcza gusloj cua'tu xmoodnu, basobzatu diidx guideb xcälrbalajz Sprit Dyan xten Dios ni baniidxn lojtu, mase gudejdtu trabajw.

⁷ Si'c gujcn te baluiitu loj guiraa reni rililajz nez Macedonia näjza nez Acaya xho nungäj gac.

⁸ Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni.

⁹ Alga lagajc laareni ruyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guliipac.

¹⁰ Ruyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcälrdxe'ch Dios ni churu siääd.

2

Xhi bejn Pabl nen guedx Tesalónica

¹ Naj lagajc la'tu najntu, bejztu, et xlia'di bio'pnu lojtu.

² Et najntu xho gudéreni loonu, basacsíreni nuurnu guedx Filipos. Niluxh mase gudejdn trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdn trabajwduxh.

³ Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee.

⁴ Sa'csi rsoobnu xtidx Dios basannäjni nuurnu xtiidxn, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu.

⁵ Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu.

⁶ Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj niennu niacbeetu rajpnu yälrbnee sa'csi baxhał Jesucrist nuurnu.

⁷ Niluxh guc nadolajznu che guyu'nu lojtu, cuanäjnu la'tu si'c rcanäj te nan rexpäzni.

⁸ Sa'csi huinälazduxhnu la'tu, biennu xhigab xhet ganaxdi xtidx Dios guini-idxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu.

⁹ Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtü nuurnu laj ni basule'nu xtidx Dios lojtu.

¹⁰ Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu bejdxojn, gujcnu bejsa'c.

¹¹ Anajntu xho baliidxnu la'tu, xho bascuedcxinu lajztu si'c runnäj te dad rexingaanni.

¹² Guiraa dee biennu, te guibaŋsa'ctu si'c nungäjln gun reni najc xi'n Dios, lagajc Dios ni gurejdx la'tu te chunäjjtuni lo xcäl'rnibeeni näjza lo xcäl'rdimbicha'ni.

¹³ Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi bej guedxliuj. Niluxh gullii xtidx Diosni, sa'csi rusiani lastoo renani rililajz.

¹⁴ Bejtznu, dxejcti bejntu lagajc si'c rujn rebejn xquidoo Dios nejn reguedx Judea reni najc xpen Jesucrist; luxh gusajctu lagajc ni gusajcreni, basacsí reben lajdxtu la'tu. Sigajcza birinajl rexpenn Israelreni.

¹⁵ Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenu nuurnu. Direni chanälajz Dios, dizarenu gusaan chanajl rebejn Jesucrist.

¹⁶ Che rlanjznu gulijdxnu reni digac rexpenn Israel, te näjza laarenu laarenu lo dojl, direni gusaan, si'ctis cagutajlreni xtojlni. Niluxh naj abiäädpc yälrdxe'ch xten Dios yejcreni.

Rlajz Pabl nihuisacni ro'c

¹⁷ Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu.

¹⁸ Rlajznu nio'pnu, narä, Pabl xhidal huält rlazä niälä, niluxh bejdxab di nusaan.

¹⁹ ¿Xhini'c najc xcäl'rbääznu, xcäl'rbalajznu, xcäl'racnaronu? Lagajc la'tu gactuni che suunu nez loj Jesucrist che jäädsac Dad Jesucrist.

²⁰ La'tu najc ni ruspaalajznu ni rliä'pza xpala'nnu nez lo Dios.

3

¹ Dxejc, che dirunu nutijp lajznu, biennu xhigab bianxtebä guedx Atenas.

² Dxejc baxhalä Timoteu, bejtznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuedcxini lajztu, guzudzu'tzni xcäl'rililajztu.

³ Te nicla tejtü di guidxejb che jääd reyälhuin sa'csi la'tu anajntu agule Dios nuurnu ni'c sidejdnü trabajw.

⁴ Cheni yusijcnu lojtu, rnixgaanu lojtu sidejdnü trabajw; niluxh si'cni agusojb diidxga naj.

⁵ Ni'cni diruna nutiplazä, baxhalä chu jäädnä diidx xho najc xcäl'rililajztu, sa'csi cadxebä andi abasguee bejdxab la'tu, luxh xlia'si biennu dzuun guyu'nu lojtu.

⁶ Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu.

⁷ Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios.

⁸ Naj laaca rdxunnu sa'csi racbeenu sudzu'tztu nez loj xtidx Dad Jesucrist.

⁹ Xhocha gac guideednu xquixtios lo Dios xcuent guiraatu näj xcuent yärlbalajz ni yu' lastoonu xcuent la'tu nez lo Dios.

¹⁰ Dxej-yääl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacheetu xcuent xcälrlilajztu.

¹¹ Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophuiinu la'tu.

¹² Rniabzanu lo Dad Jesucrist, gunni gustiobruni lastootu te ga'prutu yärlinälajz loj resa'tu näjza loj guiraa rebejn, si'cni rinälajznu la'tu,

¹³ te gunni sudzu'tz lastootu, na'c ga'ptu dojl nez lo Xtadnu Dios, che jääd Jesucrist näjza guiraa rexpejn ni xhaguibaali.

4

Guibajnu si'c rchaglajz Dios

¹ Naj, rebejtzu, rniabduxhnu lojtu, ruliidxnu la'tu con laj Dad Jesucrist, guibajntu si'cni baluiinu la'tu nungäjl guibajntu te guspaatu lajz Dios, te si'c chanuutis guibaṅsa'ctu nez lo Dios.

² La'tu, anajntu rediidx ni baluiinu lojtu con xcälrnibee Dad Jesucrist.

³ Lagajc Dios rlajz nayatis guibaṅsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni.

⁴ Tejgatu gantu xho guibaṅnäjtu chäältu nayatis näjza xpala'nni.

⁵ Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios.

⁶ Rut chutejditu gusguee bejtzni lo redzunguiidxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu.

⁷ Sa'csi Dios gurejdxni nuurnu te guibajnu lo yälhabaṅnaya xtenni, xhet lo yälhabaṅdxuudxdi.

⁸ Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

⁹ Ditu guiquiin gucuaäru diidx xho chanälajztu resa'tu, sa'csi lagajc Dios abaluiitu xho chanälajztu resa'tu.

¹⁰ Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtzu, chä'pru xcälrinälajztu.

¹¹ Colgutijp lajztu, dxitis colguibajn, coljiu xtzuuncatu, lagajc naatu colyejn dzuun si'cni agunibeenu guntu.

¹² Te fii rebejn ni di chalilajz laaca nabaṅsa'ctu, nägajcza te xhet jäädxd di xhi rquiintu.

Xho gac che jäädsac Jesucrist lo guedxliuj

¹³ Bejtzu, rlajznu gacheetu xcuent rebengut te di gac-huin lajztu si'c rujn rebejn ni di chalilajz xtidx Dios.

¹⁴ Si'c ni rililajznu gujt Jesucrist, dxejc gubansacni, sigajcza rililajznu suspansac Dios guiraa reni nagayejs neṅ baa, renani huililajz xtidx Jesucrist. Luxh che guibi' Jesucrist, siädänireni.

¹⁵ Xcuent xcälrnibee Jesucrist rniä lojtu, nuurnu ni nabajnu che jäädsac Jesucrist, dinu nid loj reni nagayejs neṅ baa.

¹⁶ Sa'csi lagajc Dad Jesucrist siäjt lo guedxliujre, sibedxa'ni, siejnza xse' guixhajg ni rnibee, sibedxa'za trompet xten Dios. Dxejc sibaxgaa reni nagayejs neṅ baa, reni huililajz xtidx Crist.

¹⁷ Dxejc nuure ni nabansijcnu sidxaagnureni nen rebäj te lo bej chachagloonu Dad. Si'c chonnu cholaznäjnuni par tejpas.

¹⁸ Ni'cni rniä lojtu, colcuedxilajz sa'tu con rediidxre.

5

¹ Niluxh xcuent redxejga, reijzga, xhet riquiinditu gucuaäni lojtu,

² sa'csi la'tu anansa'ctu sidzujn dxej ni jääd Jesucrist cheni rut cayunlojdini, sigajc che riääd te gubaan yääl.

³ Che canii bejn: "laaca dxunnu, dxunsa'cnu", chela gacbeereni acadejdreni trabajw si'c che rdzujn yäl_nayan te gunaa che rajl xi'nni, luxh digacdi guxunreni lojni.

⁴ Niluxh bejtznu, di gac nayäältu te di che xhet cayunlojditu dxej xten Jesucrist, guidzun_xhiga'tz dxejga si'c gubaan.

⁵ Sa'csi guiraatu najctu be_nsa'c nabajntu lo bianij, lo rdxee, dinu gac benguijdx, dinu guibajn lo yääl, lo yälrcä_jy.

⁶ Ni'cni di nungäj_l guidiesnu si'c rejs stecuaa bejn, ni'cni nungäj_l sunasi_nnu na'cza jiennu redo_jl ni r_lajz tiejxhnu.

⁷ Reni rejs, rejsreni yääl, reni rsiojz, rsiojzreni yääl.

⁸ Niluxh nuure nabaj_nnu lo rdxee, ni'cni nanab na'c jiennu si'c, riäj_l xca'nu yäl_rililajz näjza yäl_rinä_lajz si'c rca' soldaad gamangw guiib ni rajcwni, ni rusä_uu lastooni. Riäj_lza guilä_zdzu'tznu sa'csi yäl_rus_laa lo do_jl najc si'c xhumbrel-guiib ni ru' yejc soldaad ni rusä_uu yejcn.

⁹ Sa'csi di Dios nibe nuurnu te chonnu gabijl, alga guleni nuurnu te xca'nu yäl_nabaj_n ni rudeed xi'nni, Jesucrist.

¹⁰ Sa'csi gujt Jesucrist lacuaa nuurnu, te guiba_n_näjnuni masä nabaj_nnu lo guedxliujre o nagayejsnu nen baa che guibi'ni.

¹¹ Ni'cni, colguspaa lajz sa'tu, tejt_u sigajcza steetu, sigajcni cayujntu n_j.

Rulijdx Pabl resa'ni

¹² Bejtznu, rniabduxhnu lojtu, col_huiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu.

¹³ Riäj_lza chanälazduxhtureni xcuent dzuun ni rujnreni. Colcuedxi con resa'tu.

¹⁴ Rulijdxnu la'tu, bejtznu, col_gulijdx reni najc be_nlatsia_j; col_sudzu'tz lajz reni guxii rbalajz lo xnez Dios; col_gacnä_j reni di gumbesa'c xtidx Dios, colcuedxi lajz guiraasi bejn.

¹⁵ Col_huii di chu tejt_u gunza dol_guijdx lo rebejn ni rujn dol_guijdx. Laaca guntu ganax dzunsa'c lo sa'tu, sigajcza lo chutis bejn.

¹⁶ Col_guibalajztis guideb nabajntu.

¹⁷ Na'c cuä_z guiniitu lo Dios.

¹⁸ Mase xhitis rsiajct_u, col_deed xquixtios lo Dios, sa'csi si'c r_lajz Dios gun reni rililajz Jesucrist.

¹⁹ Di cuälaztu xtidx Sprit Dxan xten Dios ni rniini nen lastootu.

²⁰ Na'c cuälaztu xtidx reni rnii xtidx Dios xcuent nani churu gac.

²¹ Col_quiil guiraa rediidx, col_jiannä_jtis rediidx ni najc didxsa'c.

²² Col_bicaj lo guralii dol_guijdx.

²³ Lagajc Dios, Dios ni rbecdxi lajzt_u, gusiapac lastootu, te cucheeni xaimtu, nä_j lastootu, nä_jza tiejxht_u, te na'c guntu do_jl ni di riäj_l guntu te cuä_ztu dxej ni guibisac Dad Jesucrist.

²⁴ Dad ni gurejdx la'tu rujnza guiraa ni rniini, ni'c sujnzani guiraa redzu-unre.

Ruzadiidxnireni

²⁵ Bejtznu, colnab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, go!tu guijtzre loj guiraa rebejtznu.

²⁸ Gacnäj Dad Jesucrist la'tu. Sugacni si'c.

Guijtz Ni Roj Lo Reben Tesalónica

Rucuaanu guiitzre lojtu, rexpén Jesucrist ni rbäjz guedx Tesalónica

¹ Narä Pabl, näjza Silvan näjza Timoteu, cacuaanu guiitzre lojtu, rebejtznu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist.

² Gacnäj Dios Xtradnu näj Dad Jesucrist la'tu, guscuecdxizareni lajztu.

Gun Dios yälguxhtis loj rebendoj che guibi' Jesucrist lo guedxliuj

³ Bejztznu, rudeednu xquixtios lo Dios xcuenttu, si'c riäjł jienunni, sa'csi xcärlililajztu siädroobru, näjza yälrinälajz ni rajp tejpgatu näjza sa'tu siädroobruni.

⁴ Ni'cni rliä'pnu xpala'ntu neñ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu.

⁵ Dee ruluiipac xcälguxhtis Dios najc laaca, ni'c rnii Dios riäjł jiu'tu lo xcälrnibeeni sa'csi cadejdtu trabajw xcuent yälrnibeega.

⁶ Sa'csi rujn Dios xhigab riäjłza quix reni bateedtu trabajw xtojłreni, ni'c suteedzani reni'c trabajw.

⁷ Niluxh la'tu ni cadejdtu trabajw, sujn Dios gusilaznäjtu nuure che guluiiloj Jesucrist, siriini xhaguibaa siädnäjni rexanglni ni sajc, ni rnibeduxh.

⁸ Lo te balduxh siädni, dxejc guisloj susacsíduxhni reni di gan Dios, dizareni gusoob xtidx Dad Jesucrist nani rudzucaj dojl.

⁹ Guiraareni sidejdreni trabajw, par tejpas agunijtreni, zijt chureni lo Dios, lo yälrdimbicha' xten xcälrnibeeni.

¹⁰ Che jiäd Dad guiriini xhaguibaa, dxejga siliä'p rexpejñni xpala'nni, sidx-elojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riäjł guibajñ reni guleni. Rniabzanu guniidx Dios lojtu guntu guiraa redzunsac ni rchaglajz Dios guntu, gacnäjzani la'tu con xcälrnibeeni te guntu redzuun ni rujntu sa'csi rililajztu.

¹² Te chä'p xpala'n laj Dad Jesucrist si'cni nabajntu, te laani guiliä'pzani xpala'ntu, xcuent yälrinälajz xten Dios näjza Dad Jesucrist.

2

Bendolduxh

¹ Naj, rniabduxhnu lojtu bejztznu, xcuent dxej ni jiäd Jesucrist, dxej ni guidojzpanu lojni,

² na'c chugajtu yarsia'. Na'cza gusaantu guchejbreni la'tu con diidx ni ruluii te bejñ ni najc profe't, nicla con diidx ni rnii stee bejñ lojtu, niclaza con diidx ni naareni lojtu caj loj te guiitz ni naareni baxhałnu lojtu, cadre caj “dxej ni guibi' Jesucrist abidzujñ”.

³ Na'c gusaantu gusguee bejñ la'tu xcuent rediidxre. Che gajd dxejga guidzujñ, su' bejñ ni sibälaz xtidx Dios, dxejc suluiiloj beñlatsiaduxh, xi'n nani sinitloj par tejpas.

⁴ Bejñre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni rajñ bejñ, te cueni neñ xquidoo Dios, guluilojni si'c lagajc Gueb Dios.

⁵ ¿La di lajztu guisaj cheni guyusicä lojtu, rniä rediidxre lojtu, ä?

⁶ Naj la'tu anajntu xhini'c ruscuääzni, te na'c guiricajni ansde guisa' redxej xteni.

⁷ Te yälxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscüääzni galäiini.

⁸ Dxejc suluiloj beñlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni.

⁹ Beñlatsiaduxhre najc si'cpac najc beñdxab. Che guidzujñni, guidzujñni si'c te bejn nani rnibee, sujñni seen, sujnzani milagrw ni rusguee.

¹⁰ Con xcäl_latsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni nen dojl.

¹¹ Ni'cni susaan Dios jääd te yäl_rusgueduxh te chalilajzreni didx-xhii.

¹² Te gabijl jii guiraa renani di nicäjb nililajz didxlii, alga bidxagljazreni yäl_latsiaj.

Reni gule Dios guirii nen dojl

¹³ Niluxh nuurnu riäj_l gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu.

¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcäl_rdimbicha' Jesucrist.

¹⁵ Naj bejtznu, colchanuu, colsudzu'tz, na'cza jäällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtz ni baxhalnu lojtu.

¹⁶ Lagajc Dad Jesucrist, näj Dios Xtdnu, ni sanälajz nuurnu, ni ruscäjn lajznu par tejpas, ni baniidx xcälrbääznu racnäjni nuunu,

¹⁷ guspaani lajztu, gusudzu'tzni la'tu lo guiraa redidxsa'c ni guiniitu näjza redzuunsa'c ni guntu.

3

Colñab lo Dios xcuent nuurnu

¹ Bejtznu, colñab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujçni con la'tu.

² Colñabza lo Dios xcanäjni nuurnu te di tednu ladzña rebenlatsiaj, rebenguijdx, sa'csi xhet guiraadi bejn rajp yäl_rililajz.

³ Dios rusoob xtiidxni, susudzu'tzni la'tu, sacnäjzani la'tu te di sactu dolguijdx.

⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu.

⁵ Canabä lo Dad Jesucrist guniidxni gacbeerutu xcäl_sanälajz Dios, canabäza colcuedxi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtd Jesucristnu, rnibeenu guibicajtu lo chutis te sa'nu ni ricanzajtis, ni di rlanj gunni dzuun. Guibicajzatu loj reni di guibajñ si'cni baluiinu riäj_l guibajñtu.

⁷ La'tu anajntu xho riäj_l guibajñtu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun.

⁸ Dizanu nidauxlia' xcu'n chu tejtü; guiraani bidiixnu, biennu dzuun dxej-yääl, te di nutaalnu xtzuun chu tejtü.

⁹ Masä nungäj_l niniabnu niacnäjtü nuurnu, dinu niniabni; alga biennu dzuun te baluiinu xho chanuutu.

¹⁰Cheni guyu'nu lojtu, gunibeenu scree guntu: Chutis ni di rlajz gun dzuun di riäjł xca'ni xhi gauni.

¹¹Aguniireni loonu baltitu rcanzajtis, direni gun dzuun, alga rihuiireni xhi cayujñ rebejn.

¹²Rulijdxnu rebejnre, rnibeenureni con laj Xtrad Jesucristnu: colcuedxi, colyejn dzuun te gautu.

¹³Bejtznu, na'c guidxajgtu guntu dzunsa'c.

¹⁴Palga yu' chu tejtu di gucuadiajg xtiidxnu ni caj lo guijszre, colhuii chuni'cni te na'c guchaagtuni, te guitujyni.

¹⁵Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶Gueb Dios xten yälrbexi, guscuedxi lajztu guixe-guixee, masä xhitis sajctu. Jiannäj Dad Jesucrist guiraatu.

¹⁷Narä, Pabl cacuaä xtixtiosre con ñaäpac si'c runä lo guiraa rexquitzä, scree rucuaä.

¹⁸Gacnäj Xtrad Jesucrist guiragajctu. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

¹ Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu.

² Timoteu, luj najclu si'cpac xinganä lo yälirililajz. Xtdnu Dios näjza Xtd Jesucristnu gacnäjl, gulaslajzreni luj, guscuedxireni lastoolu.

Pabl rulijdx xcuent reni ruluu diidx-xhii

³ Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx,

⁴ te na'c jiutejreni rexcuent reben'tiemp, te na'cza jiuduxhrene chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Naj rnibeä si'c chanuu gulijdxlu rebejn.

⁵ Rulijdxnu bejn te ga'preni yäl'rinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni.

⁶ Yu'reni abar'o'n rediidxre, riejtis ro'reni saniduxhrene diidx ni xhet sajcdi.

⁷ Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluireni, räjpreni, 'didxliipac dee'.

⁸ Anajnnu leii xten Dios najc sacduxhni, palga jiennu si'cni rniipacni.

⁹ Najnnu di leii gac par beñsa'c, najcni par reni najc beñlatsiaj ni di jiu leii xten Dios, näjza reni di gusoob diidx; par reben guiidj, näjza reben'dojl; par reni di jiu Dios, näjza reni rusguee; par reni rugu't xtdni, xnanni, näjza guiraa reni rugu't bejn;

¹⁰ par reni resnä j te gunaa ni digac chäälreni, näjza reni resnä j lagajc saniguiireni; par reni rbajn bejn; reni rni diidx-xhii; reni rni diidx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c,

¹¹ nalajznu sa' redzunsa'c ni rulijdx xtidx Dios-le', diidx ni ruslaa lo dojl. Narä biannää diidxre.

Rudeedni xquixtios lo Dios sa'csi rulaslajznini

¹² Rdedä xquixtios lo Dad Jesucrist ni runiidx yäl'rnibee narä sa'csi najnni nasobdidxä, ni'cni guleni narä gunä xtzuunni.

¹³ Luxh galoo guniyaäni, birinalä xpejn, basacsíäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä.

¹⁴ Niluxh lacti guroob gujc yäl'racnä j xte Xtdnu, guideb yäl'irililajz, näj yäl'sanalajz ni rajp Jesucrist.

¹⁵ Diidxre najc guliduxh, nanab chalilajzpacuni: Jesucrist biäd lo guedxliujre te guslaani reben dojl; lo reben dojl narä nacäru ben'dolduxh.

¹⁶ Ni'cni balaslajz Dios narä, mase nacä ben'dolduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl'nabajn par tejpas.

¹⁷ Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajnni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yäl'rulijdx ni runidxä lojlu te gucuasa'clu si'c te soldaad ni abisieed, sigajc ni gunii reprof'e't xcuentlu galoo.

¹⁹ Di gunijtlu yälrlilajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yälrlilajz.

²⁰ Si'c gusajc Himeneo näj Alejandro, luxh abatedäreni ladzṇaa beṇdxab te guisieedreni na'c guiniya'reni Dios.

2

Ruluini xho guiniabreni lo Dios

¹ Rulidxälu ganiddoo cuedxlu, guiniablu lo Dios, gudeedlu xquixtios lo Dios xcuent guiraa rebejn.

² Guiniabzalu xcuent rerei näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajṇnu.

³ Sa' yälrniabga najc laaca, luxh si'c rdxagljaz Dios ni rusḷaa nurnu lo dojl guiniabnu lojni.

⁴ Dios rlajz ḷaa guiraa bejn lo dojl, rlajzzani gacbeepacreni xtidxliini.

⁵ Yu' tejtis Dios, näjza tejtisza nani rusiäjl diidx lo Dios näjza loj reben guedxliuj. Laani najc Jesucrist ni gujczya niguii.

⁶ Jesucrist gujt lo cruiz te gudijxni redojl xten guiraanu ni tre' lo guedxliuj. Dee gujczye gojl dxej ni gule Dios.

⁷ Dios gule narä te gacä apost te gusule'ä xtiidxni, yälrlilajz näjza didxlii lo reni di gac xpejn Israel. Si'c ni rlajz Jesucrist rniä didxlii, dina guiniä diidx ni rusguee.

⁸ Ni'cni rlazä guiraatis lajt guiniab rebejn lo Dios, saru guiliäs ṇaareni, gusaanreni yälrdxe'ch, na'c gunreni biejy.

⁹ Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yejczyi te guidxeloj bejnreni.

¹⁰ Masru ruchaag gunreni si'cni rchalglajz Dios, si'c riäjl gun guiraa regunaa ni yu' lo Dios.

¹¹ Riäjl dxitis gucuadiajg regunaa xtidx Dios ni rusule' reniguii.

¹² Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuadiajg diidx nani cagusule'ni.

¹³ Sa'csi ganid benchee Dios Adán, dxejczyru bencheeni Eva.

¹⁴ Luxh et Adandi basguee beṇdxab, beṇdxab basguee gunaaga, dxejczy biajbni neṇ dojl.

¹⁵ Niluxh siḷiaa regunaa, palga jiureni xtzuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczarenı guṇasa'c cuedxireni.

3

Xho riäjl gac reni rnibee

¹ Dee najc didx gulii: palga rlajz te niguii ga'p dzuun xten Dios, gusule'ni xtidx Dios, guinibeenı rebejn, te dzunsa'c najc ni rlajz ni gunni.

² Ni'cni, ni rlajz gac nani rnibee, riäjl guibanṇsa'cni te na'c chu xhicuent guiniyaj rebejn ni. Riäjl gacni chääl tejtis gunaa, riäjl susiṇni, gacni te beṇsa'c, cuedxini, te guibanṇsa'cni. Riäjlza di gudxojni rolijz ni guidzuj bejn, nägajczy riäjl gacni te bejn ni nansa'c te guluiini.

³ Na'c gacni te beṇgu, nicla te ni rdxagdijl bejn, na'cza gacni te nani rsia' lajz ni ga'pni xhidajl meel, riäjl cuedxini lajz ni, na'c chanälajz ni meel.

⁴ Riäjl guinibesa'cni rolijz ni, saru gunni te gusoob rexi'nni xtiidxni.

⁵ Sa'csi palga di te bejn gan xho guinibeenı lagajczy rolijz ni, aticaxh gac ga'pni guidoo xten Dios.

⁶ Di riäj̄l guinibee te beŋcoob nani entis huililajz, te di guschä'pni xpala'nni sas jiajbni lo lagajc xcäl̄naj Dios ni biajb beŋdxab.

⁷ Luxh riäj̄lza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzŋaa beŋdxab.

Xho riäj̄l gac reni rcanäj nen guidoo

⁸ Si'cza rediaconos riäj̄l gacreni bejŋ ni yu' xcäriejŋreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan.

⁹ Riäj̄l gapdzu'tzni rediidx nagajŋ xten yäl̄rililajz, ni'c nanab gac naya lastooreni.

¹⁰ Riäj̄l fixgaatu xho nabajŋreni. Palga nabansa'creni, rutza gacdi gucuaquidireni, sajc gacreni diacono.

¹¹ Regunaa ni rlajz gac diaconas riäj̄lza chu xcäriejŋreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun.

¹² Riäj̄l gac rediacono chääl tejtis gunaa. Riäj̄l guinibesa'cni rexi'nni näj guiraa reni yu' rolijzni.

¹³ Sa'csi rediaconos ni runsa'c xtzuunni, sanälajz bejŋreni, dizareni guidxejb rsiudzu'tz lastooreni lo xcäl̄rililajz xtidx Jesucrist.

Gurobduxh najc yäl̄xhiga'tz xten Jesucrist

¹⁴ Cacuaä diidxre lojlu, niluxh rlazä jädhuigaä la'tu.

¹⁵ Luxh palga gaclaä, anajŋlu xho riäj̄l guibajŋ bejŋ rolijz Dios, nalajznu xquidoo Gueb Dios ni nabajŋ par tejpas. Guidoore rniaszdu'tz näjza ruluiiru didxlii xten Dios.

¹⁶ Rdxeloyaduxh guiralii bejŋ yäl̄xhiga'tz xten xcäl̄najŋ Dios:

Dios biääd lo guedxliuj si'c te beŋguedxliuj,

Sprit Dxaŋ xten Dios gunii beŋdxanni;

bahuii rexangl Dios lojni;

basule'reni xtiidxni lo rebejŋ ni di gac xpejŋ Israel;

guira lajt huililajz bejŋ xtiidxni;

huäjsni lo xcäl̄rdimbicha' Dios xhaguibaa.

4

Reni rbicaj lo xnezyuj Dios

¹ Aguniipac Sprit Dxaŋ siääd redxej che chu reni guro'n yäl̄rililajz, sucuadi-ajgreni xtidx rebejŋ ni rusguee näj xtidx rebeŋdxab,

² nicla jiureni rniireni didx-xhii ni rusguee, sa'csi xhetiru xcäriejŋreni, anajcni si'c najc cadre rudxujy te guiblaa: xhetru racbeedini.

³ Suluii rebejŋre na'c guchŋaa bejŋ, suluiizareni na'c gau bejŋ guiraloj, niluxh Dios bejŋpac redee te xca' rebejŋ ni rlilajz, ni racbeeza didxlii, te gudeedreni xquixtios lo Dios.

⁴ Guiralii reni benchee Dios najc laaca, di riäj̄l cuälaznu xhi rca'nu che rudeednu xquixtios loj Dios.

⁵ Sa'csi xtidx Dios näj yäl̄rbedx-rniab lo Dios runsa'c guira'ti.

Te ni runsa'c xtzuun Jesucrist

⁶ Palga susnajlu lajz rebejtznun rediidxre, sajclu te mossä'c xten Jesucrist, luxh si'c sisieedruzalu diidx xten yäl̄rililajz, näj yäl̄rluisa'c ni sanuulu.

⁷ Na'c jiulu ni rni regunaroyeii ni xheti xtzuunni. Bisieed sudzu'tz lastoolu lo xtidx Dios.

⁸ Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios nen lastooni, sa'csi racnäjni bejn lo yäl_nabaj_nre näjza lo yäl_nabaj_n ni najc par tejpas.

⁹ Dee najc didxlii, riäj_l chalilajz guiraatuni.

¹⁰ Ni'c riennu dzuun, rdeednu trabajw, sa'csi cabäjznu Gueb Dios ni nabaj_n, ni rus_laa bejn lo dojl, ganiddoo renani rililajz xtiidxni.

¹¹ Sajplu guinibeelu soob rediidxre, näjza guluiilu rediidxre.

¹² Di gusaanlu cuälazreni luj sa'csi najclu bi'n; riäj_l gaclu te ni suu te fii guiraa reni rililazsa'cpac xho rniilu, xho nabaj_nlu, xho sanälajzlu sa'lu, xho rililajzlu, näjza xho rajplu xhigabsa'c.

¹³ La_l ni guidzunä ro'c, bil_l xtidx Dios lo rebejn, baliidxreni, baluiiza xtidx Dios lojreni.

¹⁴ Di gusaanlu reyäl_nnajni ni baniidx Dios lojlu cheni basuj rebe_ngool _naareni yejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios.

¹⁶ Gopdzu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucuadiajg xtiidxlu.

5

Xho guibannäjnu reni rililajz

¹ Na'c quidxa'lu loj te be_ngool; guninäjni si'c xtaclu, baliidx rebi'n si'c bejtzlu,

² baliidx renanbe_ngool si'c xnanlu, baliidx redxap steeb si'c rebisiajnlu con rexhigabsa'c.

³ Gucnäj rebiuud ni guliipac rquiin chu gacnäjreni te chu xhi gaureni.

⁴ Niluxh palga yu' chu biuud yu' xi'nni o xajgni, suguisiedxgaareni guibanayareni lo xnez Dios, te quiixreni di'n ni nasääbreni lo xtacleni, näj xnanreni ni bas_laareni, sa'csi ni'c najc laaca, rdxag_lajzza Diosni.

⁵ Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios.

⁶ Niluxh biuud ni nabaj_n cadedgustisni najc si'c te ni agujt nen dojl.

⁷ Basule' rediidxre lojreni te rut gucuaquijdireni.

⁸ Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidx Dios, be_nguijdxru najcni lo rebejn nani di chalilajz xtidx Dios.

⁹ Di gucuaalu laj rebiuud lo guiitz te gacnäjtuni palga gajdni chu gayoj_n ijz. Riäj_lza gac biuudga te gunaa ni guban_näsa'c chääl_ni.

¹⁰ Riäj_lza gumbee bej_nni xcuent redzunsac ni ruj_nni; palga bas_laani rexi'nni, palga badedlaani rolijzni gues ben zijt, palga gudiibni ni' rexpejn Dios te si'c guzen xcäl_nadolajzni, palga racnäjni reni rdej_d trabajw, palgaza riuni ruj_nni guira'ti redzunsac.

¹¹ Niluxh na'c gucuaalu laj biuud ni yu' guxiiru ijz sa'csi che guichag_lajzreni te niguii, siäl_lajzreni diidx ni bia'nreni lo Jesucrist, te rlajzni guch_nasacreni.

¹² Dxejc siu'reni nen dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios.

¹³ Dxejc sia' lojreni xhet gundireni, rijreni rolijz bejn ricuereni. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni.

¹⁴ Ni'cni rlazä rebiuud ni najc dxa'pru guch_naareni stehuält, chu xi'nreni, fisa'creni rolijzreni te na'c guiniyajreni rebejn ni rdxe'ch lojnu.

¹⁵ Sa'csi yu' gaii biuud ni alagubica_j lo xnez Dios sanajlreni be_ndxab.

¹⁶ Pal yu' tej resa'nu ni najc sa'ni te biuud, riäjĵ gacnäjnini, na'c gusaanni gutajĵni xtzuun guidoo, te si'c guidoo sajc gacnäj rebiuud ni rquiinpac chu gacnäjreni.

¹⁷ Rebengool ni rnibesa'c guidoo, riäjĵ chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidksa'creni la'tu con xtidx Dios.

¹⁸ Sa'csi lo xtidx Dios caj scree: "Na'c gusällu guijxh ro' gon che rusiani triuu"; si'cza caj stee diidx: "Riäjĵ gax bejn ni rujn dzuun."

¹⁹ Na'c cucuadiajglu xtidx tej ni rucuaquij te bengool palga ruti tio'p, chon testiigw.

²⁰ Niluxh reni sanuu rujntis dojl, riäjĵ gulijdxlureni nez loj reben guidoo, te näjza laareni guidxejbreni.

²¹ Nez loj Dios, nez loj Dad Jesucrist, nez lojza reangl ni gule Dios, rulidksduxhälü chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn.

²² Na'c gusiojb lajzlu gusuĵlu ñaalu yejc te bejn, te gacni bejn guidoo palga gajdni guisieed guibaṅsa'cni lo xnez Dios sa'csi lagajc yejclu jiajb rextojĵni. Gubicaj lo guiraa dolguijdx.

²³ Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

²⁴ Yu' bejn ruzengajc rextojĵni ni'c rajcni castiigw, niluxh yu' bejn ni di xtojĵni guzengajc.

²⁵ Sigajcsa redzunsac ni rujn bejn; yu'reni ruzengajc, niluxh mase dini guzengajc, digacdi jianxhiga'tzni, sidzujn dxej suzenni.

6

¹ Reni najc mos riäjĵ cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu.

² Palga yu' remos ni najc xlamni te nani rlilajz, na'c cuälazreni rextiidxni sa'csi najcni bejtzni lo xcälrlilajz Jesucrist. Riäjĵ gunsa'crureni xtzuunni, sa'csi najcni sa'ni loj yälrlilajz xten Dios, luxh sanälajzzarenini. Rediidxre baluii, basule'.

Yälṅabansa'c näjza te lastoo ni rbedxi

³ Palga yu' chu ruluii garenca diidx, diidx ni digac didksa'c, si'c najc xtidx Jesucrist, näjza xhet si'c diidxdi ni ruluii xho guibaṅsa'c bejn,

⁴ bejnga rlajz guiliä'p lagajc xpala'nni, niluxh xhet najndini. Si'c te yälguijdx yu'tis yejcnä yälguiniab diidx, yälrdildiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni.

⁵ Rujnzani rdilnäj bejn sa'ni. Guiraa redee gun bejn ni aguxhijñ xcäriejñni, bejn ni diru ga'p didxlii. Rchaloreni sujñreni ganduxh xcuent rediidx ni ruluiireni. Gubicaj lo sa' bejnre.

⁶ Niluxh yälṅabansa'c näjza te lastoo ni rbedxi, redee sa'cduxh.

⁷ Sa'csi xhet biopñädinu lo guedxliujre, luxh sigajcza xhet sajcdi chonänu che guetnu.

⁸ Niluxh palga rajpnu xhi gaunu, xhi gajcwnu, con ni'c riäjĵ guibalaaznu.

⁹ Niluxh reni rlajz ga'p xhidalduxh meel, riajbreni lo xhigab guijdx, rujnzarenä xhidajl dzuun ni xhet sajcdi, ni rujn daan, ni rusiääz bejn lo yälruhxin, lo yälrñitloj.

¹⁰ Sa'csi yälrinälajzni meel najc xlobaa guiraa redzunguijdx. Yu'za bejn ni rladuxh ga'pni meel, rusaanreni xcälrlilajz Dios, dxejc lagajc laareni rujn rdedduxhreni trabajw.

Dzun-huen xten yälirilajz

¹¹ Niluxh luj, bejn xten Dios, baxu'n lo guiraa dee, te chanuulu lo xcälxhigabsa'clu näjza yäl_naba_nsa'clu; te chanajllu yäl_rililajz näjza yäl_sanälajz; te chanuulu lo yäl_rbecdxi lajz näjza yäl_nadolajz.

¹² Benduxh dzuun xcuent yäl_rililajz Jesucrist, gunazdzu'tz yäl_nabajn ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni.

¹³ Naj rulidxälu nez loj Dios ni rudeed yäl_nabajn lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't,

¹⁴ rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jääd Xtad Jesucristnu.

¹⁵ Sidzujn dxejga nani agunii Dios guidzujn. Dios ni najc le' sujn scree sa'csi laatisni najc Dios, najcni reii xten rerei, rnibeezani reni rnibee.

¹⁶ Laatisni dini guet, nabajni lo bianij cadro rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riäj_l ga'p rebejn xpala'nni. Laani rajp yäl_rnibee par tejpas. Sugacni si'c.

¹⁷ Balijdx reni rajp xhidajl xhixtenu lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajn, ni runiidx loonu guiralii xhixtenu ni rquiinnu te guibalajznu.

¹⁸ Balijdxreni gunreni dzunsa'c, gundajzreni dzunsa'c, gacnäjreni reni xhet rajpdi, cuenäsa'creni sa'reni.

¹⁹ Si'c ga'preni yäl_nasa'c ni guzudzu'tzreni che jääd Jesucrist, te guini-aztzu'tzreni yäl_nabajn par tejpas.

Rulijdxni Timoteu

²⁰ Timoteu, cuenäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl_najn'.

²¹ Sa'csi yu' reni sanuu yäl_najnre ni'c banijtreni lo Dios xcuent yäl_rililajz. Gacnäj Dios luj. Sugacni si'c.

Guijtz Ni Rojp Lo Timoteu

Stee guijtz ni baxhal Pabl loj Timoteu

¹ Narä Pabl, nacä apost xten Jesucrist. Dios gule narä, xcuent yälñabajñ ni gudeed Dios loj reni yunäj Jesucrist, si'c ni bia'n diidx.

² Cacuaä guiitzre lojlu, Timoteu, xi'nä lo yälñililajz. Rinälazä luj. Rniabä lo Xtadnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

Rusule'ni xcuent Jesucrist

³ Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä.

⁴ Rnaj lazä xho biinlu, ñaj rlazä fiä lojlu te guibalazä.

⁵ Rnaj lazäza yu'pac yälñililajz lastoolu si'cni guyu'ni galoo lastoo xmanlu Loida dxejcru lastoo xnanlu Eunice si'cza yu' yälñililajzga lastoolu ñaj.

⁶ Ni'cni rniä lojlu ñaj, si'cni rcanäj bejñ rodäj te di juiini, si'cza cuanäduh reyälñajñ ni baniidx Dios lojlu cheni basuä ñää yejclu.

⁷ Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnno.

⁸ Na'c guitujylo guiniilu rediidx xten Xtad Jesucristnu, na'cza guituinäjlu narä sa'csi yu'ä neñ latzguiib xcuent Jesucrist. Näj luj gudejd trabajw ni siääd xcuent yälñrusule' xtidx Dios si'ctis gacnäj Dios luj.

⁹ Dios ni gulää nurnu neñ dojl, gurejdx nurnu te guibañsa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c rlanjni laani, sa'csi balaslajzni nuurnu xcuent Jesucrist galooli che gajdli guncheeni guedxliuj.

¹⁰ Niluxh cheni biääd Jesucrist ni badzucaj rextojñnu lo guedxliujre, baluiloj yälñulaslajzga. Jesucrist banitloj yälñnibee xten yälñgujt. Xtiidxni, ni rusule' xho rbicaj dojl, baluui yälñabajñ, näjza yälñabajñ par tejpas.

¹¹ Dios gule narä te gacä te ni rusule' xtiidxni, te gacäza te apost, näjza te bejñ ni rului loj reni di gac xpejñ Israel.

¹² Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajc gapdzu'tzni dzuun ni baniidxni loä dxejli cheni guibi'ni.

¹³ Chanuu guluiilu redidxsa'c ni banidxä lojlu. Gubajñza lo yälñililajz näj lo yälñanälajz ni rajpnu sa'csi yu'nu lo Jesucrist.

¹⁴ Cuanädu'tz reyälñajñ ni baniidx Dios lojlu näj Sprit Dxan xtenni ni rbäjz neñ lastoonu.

¹⁵ Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes.

¹⁶ Dad Jesucrist gacnäj reni yu' rolijz Onesíforo sa'csi balti huält biädspaani lazä, dini nitujy sa'csi yu'ä neñ latzguiib.

¹⁷ Che bidzujñni guedx Roma, gudiilpacni narä te bidxälñi narä.

¹⁸ Dad Jesucrist gulaslajz laani che guidzujñ dxej ni guibi' Jesucrist. Luj anajnlu balti dzunsa'c bejnne che guyu'ni guedx Éfeso.

2

Te ni runsa'c xtzuun Jesucrist

¹ Ni'cni xi'nä, guzutijp sa'csi rulaslajz Jesucrist luj, racnäjnlu.

² Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajc guluiiza diidxga lo stecuaa bejn.

³ Batijp lajzlu tednäjlü narä trabajw si'c te soldadsa'c xten Jesucrist.

⁴ Di te soldaad gun dzuun ni bejn ni che gajdni gac soldaad. Rujnni xtzuum bejn ni guleni gacni soldaad, te si'c guspaani lajz bejnga.

⁵ Sigajcza, ni rguijt digacdi xca'ni yäl_nasa'c palga dini quitsa'c si'c riäj_l quitni.

⁶ Bejn ni rujn dzuun loniaa nanab xca'ni xcäl_nasa'cni ganidoo.

⁷ Bejn xhigab xcuent ni rniä lojlu, dxejc sujn Dios gacbeelu guiraani.

⁸ Basnaj lajzlu Jesucrist, te xagdoo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu.

⁹ Ni'cni cagutipä lazä cadedä trabajw, caduä caden si'c te bejn ni bagu't sabejn ni. Niluxh digacdi xcaduu xtidx Dios.

¹⁰ Ni'cni cadedä trabajwre te gacnää reni agule Dios te näjza reni'c chalilajz xtiidxni te guibaj_nreni lo bianij xten Jesucrist par tejpas.

¹¹ Guliiduxh najc diidxre;

palga agujtnu con laani, sibannäjzanu laani.

¹² Palga rdejdnü trabajw, sinibenäjzanu laani.

Palga dinu guicä'p numbeenuni, dizani guicä'p numbeeni nuurnu loj Xtadni Dios.

¹³ Mase dinu chanuu lo xtiidxni, laani susoobni xtiidxni sa'csi digacdi cuatzajzni diidx lagajc laani.

Te bejn nani abia xtzuumni

¹⁴ Basnaj lajz rebejn xcuent rediidxre, gunibee lojreni nez lo Dad Jesucrist na'c tildiidxreni sa'csi sa' diidxga xhet sajcdini, ruxh_ntisni reni riendiajgni.

¹⁵ Batijp lajzlu te guidzuj_nlu lo Dios si'c te bejn ni runsa'c dzuun, xheti xhicuent guitujy_lu, sa'csi ruluisa'cpaclu xtidxliitis Dios.

¹⁶ Gulälaz yäl_nriyaj näjza xhidalduxh diidx ni xhet sajcdi, sa'csi renani rucua diajg rediidxga riajbrureni lo redol_nguijdx.

¹⁷ Luxh diidx ni ruluiireni suxh_ngajcni lastoo bejn si'c rxhin_nlajz tiejxh bejn. Ni'c casiajc Himeneo näj Fileto.

¹⁸ Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rililajz.

¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejn_ni"; näjza "Nanab guibicajreni lo redol_nguijdx, guiraa reni ahuililajz xtidx Jesucrist."

²⁰ Nen te yuro, xhet ganaxdi cos or_n näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquiin guixe-guixee.

²¹ Sigajcza te bejn ni rlajz gun dzuunro xten Dios, riäj_l guibicajni loj redol_nguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

²² Gubicaj lo redzunguijdx ni rujn rebejn, huinuu yäl_nabansa'c, yäl_nrililajz, yäl_nsanälajz, gulecdxiza lajzlu näj reni rujn xtzuum Dios, naya lastooreni rbedx-rniabreni lo Dios.

²³ Na'c jiulu rediidx ni ruluii rebejn guedxliuj. Anajnlü rediidxga rujn rdil_näj rebejn sa'ni.

²⁴ Niluxh te xmos Dad guibaa di riäj_l guchaagni reni rdij_l; riäj_l gacni bensa'c loj guiraatis bejn. Riäj_lza guluisa'cni; riäj_lza gutip lajzni che xhet laadi rujn bejn lojni.

²⁵ Guideb yäl_nadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacbeereni didxgulii,

²⁶ te jianij xcäriejnreni te guiriireni ladz_naa be_ndxab, te gunreni ni r_lajztis Dios.

3

Xho gac rebejn nen redxelult

¹ Nanab gacheelu nen redxelult sidzuj_n dxej tedtu trabajw.

² Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglajz chä'p xpala'ntisni, bejn ni rniyaj Dios; su' bejn ni di gusoob xtid_x xtadreni, su' bejn ni di gudeed xquixtios lo Dios, su' bejn ni najc be_nguijdx_{tis}.

³ Nen redxelultga su'za bejn ni di chanälajz sa'ni, bejn ni di lajzni jiäjl, bejn ni rusgueduxh; bejn ni digacdi guscüääz dolguijdx ni rujnreni; bejn ni guyalazduxh; bejn nani ru_ro'n guira'ti dzunsa'c.

⁴ Nen redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi najcreni be_nsacduxh; bejn ni rchaglajzru gun nani rchaglajz tiejxh_{reni} lacuaa chanälajzreni Dios.

⁵ Nen redxelult su' bejn ni najc si'c be_nguidoo, ascanu rusoobreni xtid_x Dios, niluxh naadireni xca'reni yäl_nadip näj yäl_rnibee xten Jesucrist ni ruchaa lastoo bejn.

Na'c guchaaglu rebejn_{ga},

⁶ sa'csi loj sa' bejn_{re} yu' reni richu' rolijz bejn, sasgueereni regunanayääl ni rujn dojl. Regunaare rinuu rujreni ni r_lajztis tiejxh_{reni}, rujnreni guiraloj.

⁷ Rebejn_{re} rsiedduxh didxcoob, niluxh di didxlii xten Jesucrist jiu' yejcreni.

⁸ Sigajcni gujc Janes näjza Jambres ni bidxe'ch loj Moisés, sigajcza najc rebejn_{re}, cadxechnäjreni didxlii xten Jesucrist, najcreni bejn ni aguxhij_n xcäriejnreni, luxh direni gacbee xtid_x Dios, direni ga'p yäl_rrililajz.

⁹ Niluxh direni chanuu xchej, sa'csi huenliisi suhuii guiraa rebejn najcreni be_nguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰ Luj sanuutislu lo nani rusule'ä, näj xho naba_{nä}, näj xhicuent runä dzuunre, lo xcäl_rrililazä, lo xcäl_nadolazä, lo xcäl_sanälazä, näjza xho batip lazä.

¹¹ Najnlu xho basacsíreni narä gudedäza trabajw ladz_naa rebejn nen reguejdx xten Antioquía, guedx Iconio, näjza guedx Listra. Gudedä trabajw niluxh Dios bas_laa narä loj guiraa retrabajwga.

¹² Guliduxh guiraa reni r_lajz chutis loj Jesucrist sidejdpacreni trabajw.

¹³ Niluxh rebe_nguijdx näj reni rusguee, sinuutisreni redol_rguijdx, sinuuru gusgueereni bejn, luxh susgueeza bejn laareni.

¹⁴ Luj huinuu guzudzu'tz loj ni abisieedlu, nani ahuililajzzalu, luj anajnlu chuni'c baluini lojlu.

¹⁵ Cheni biuuxlilu racbeelu xtid_x Dios, ni ruluiilu xho guiriilu nen dojl te xca'lu yäl_nabaj_n par tejpas sa'csi rililajzlu xtid_x Jesucrist.

¹⁶ Guiraa rediidx xten Dios ni caj lo guijtz, lagajc Dios baniidxni te xcajni lo guijtz.

Guiralii xtid_x Dios najc laaca te guluii nuurnu xhini'c najc didxlii,

te gacheenu xhi najc didx-xhii,

te gacbeezanu xho riäj_l guiba_nsa'cnu.

¹⁷ Te susi_n niguii ni najc xpejn Dios,

te gac gunni guiraa redzunsa'c ni riäj_l gunni.

4

¹ Rulidxälu nez lo Dios näjza nez lo Dad Jesucrist ni jiääd si'c reii te gunni yälguxhtis loj reni nabajñ näjza loj reni agujt; rniäza dee lojlu:

² basule' xtidx Dios, gususin lo Dios mase xhitis or. Baluui reben dojl, gudiñäjä reni di rlanj guzobdiidx xtidx Dios, balidxnäj resa'tu xtidx Dios.

³ Sa'csi sidzujñ dxej di rebejn guidxagljaz gucuadiajg yälrluisa'c; alga diidx ni najc lagajc si'c najc xhigabreni rlanjreni jiendiajgreni, ni'cni siguiilreni xhidajl bejn ni ruluii te guisieedreni ganax ni rlanjreni gucuadiajgreni.

⁴ Susäuureni diajgreni te di jiendiajgreni xtidxlii Dios; alga xhitis diidx gucuadiajgreni.

⁵ Niluxh luj huinuutis lo xtidx Dios, batiplajz yälhuin, guniitis xho rudzucaj Dios rextojlreni, beñsa'c xtzuunlu.

⁶ Sa'csi narä suga'ä ree te ju'treni narä, asiäddzungajxh dxej ni guetä.

⁷ Agulujx bacuaä si'c te soldaad ni huicuasa'c lo guer, agulujx xnezyuä, gopdzutzä yälrlilajz.

⁸ Naj cabäzä xca'a yälñasa'c ni guniidx Dad xhaguibaa, suniidxni yälñabansa'c. Dad najc juejz ni runsa'c yälguxhtis. Niluxh xhet loätis guniidxni yälñabansa'c. Sudeednini loj guiraa rebejn ni catiplajz cabäjäzreni dxej cheni guibisac Jesucrist.

Rediidx ni räjpni lojtis Timoteu

⁹ Basaaga lajzlu jiädhuigajlu narä;

¹⁰ sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Cresent sää lo reguejdx ni re' nez Galacia. Baxhalä Tito sää guedx Dalmacia.

¹¹ Xtebtis Lucas suganäj narä. Gudiil Marcw te jiädñäluni sa'csi sajc gacnäjni narä lo xtzun Dios.

¹² Tíquico baxhalä sää guedx Éfeso.

¹³ Cheni jiädñälu, jiädñälu ca'p ni basa'nä guedx Troas rolijz Carpo, näj rexlibrä; di jiälza lajzlu rexquitzä.

¹⁴ Alejandro, ni najc gubetzguib, basacsíduxhni narä. Dios quiixni sigajcni bejn.

¹⁵ Luj bahuii te di gunni xhi gunni luj sa'csi rdxecheduxhni lo xtidx Dios ni rusule'nu.

¹⁶ Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni.

¹⁷ Niluxh Dad ni yu' xhaguibaa gucnäj narä, baniidxni yälñadip te gujc guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä gulääni narä ladzñaareni, si'c ro' te beedz.

¹⁸ Suslaani narä loj guiraa redolguijdx, saptzu'tzni narä, sigucheezani narä te chunääni lo xcälñibeeni xhaguibaa. Lojni coldeed xquixtios, colganduxhni par tejpas. Sugacni si'c.

Rudeedni xtixtios lo rexamigwni

¹⁹ Badeed xtixtios lo Prisca näjza lo Aquila näjza loj resa' Onesíforo.

²⁰ Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni.

²¹ Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhalreni xtixtios lojlu.

²² Dad Jesucrist chunäj xaimlu. Dios gacnäj guiraatu. Sugacni si'c.

Te Guijtz Lo Tito

Bacuaa Pabl lo Tito

¹ Narä Pabl, nacä xmos Dios, apost xten Jesucrist, te gacnäã guiroobru xcärlililajz reni agule Dios, te gacbeezareni didxlii ni rusia xcälñabajñnu.

² Cayunlojzanu yälñabajñ par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej.

³ Niluxh che bidzujñ dxej ni agulexгаа Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni ruslaa nurnu nen dojl.

⁴ Caciaä guijtzre lojlu, Tito, xi'nä lo yälñililajz ni ria'pnu xcuent Jesucrist. Rniabä lo Dios Xtradnu näj lo Dad Jesucrist ni rbää nuurnu nen dojl, gacnäjreni luj, gulaslajzreni luj, guscuecdxizareni lajzlu.

Dzuun ni rujn Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebeñgool loj reguidoo nen teja reguejdx si'cni gunibeä gunlu.

⁶ Gule beñgool ni nabañsa'c, te na'c guiniyaj bejñreni, nanab gacni chääl tejtis gunaa, riäjñza chalilajz rexi'nni, na'c guibajñreni si'ctisni rlajz tiejxhreni, jiureni xtidx xtradreni.

⁷ Niguui ni rnibee guidoo rcanäj rexhixten Dios, ni'cni riäjñ ga'pni te yälñabanya. Na'c gacni te bennajd, na'c gacni te beñnadxecha', na'c gacni beñgu, na'c gacni te bejñ ni rdxagdijñ bejñ, na'cza xca'ni meel ni dini niunsa'c gaan.

⁸ Nanab gacni te bejñ ni rudedlaa rolijzni jia'n beñ biooz, riäjñza chanälajzni dzunsa'c, gac nasinñi, chu xcäriejñni; guibañsa'cni nez lo Dios, sigajcza nez lo rebejñ, guibanñayani nez lo Dios, na'c gunni nani rlajztis tiejxhni.

⁹ Riäjñ chanuutisni lo didxlii ni bisieedni te gac gulidxnäjzani bejñ xtidx Dios, te guzejcni diidx lo rebejñ ni rniyaj xtidx Dios.

¹⁰ Yu' xhidajñ beñgujdx, bejñ ni rnii diidx ni xhet sajcdi, näjza xhidajñ bejñ ni rnii didx-xhii ni rusguee. Näjza lo rexpen Israel ni riuduxh leii yu' sa' bejñre.

¹¹ Sa' redee ni nanab jiäu ro'ni, sa'csi rusgueerene xhidallo sa'reni, ruluiireni ni di riäjñ guluiireni te gunreni gaan meel.

¹² Te niguui ni siääd lagajc lajdxreni guniini xcuent lagajc rebeñ lajdxni: "Rebejñ ni najc cretenses rniuduxhrene didx-xhii, niälajzzeneni. Rlajzreni gausa'creni niluxh di rlajzreni gunreni dzuun."

¹³ Niluxh guliini, ni'cni gudilñajreni, te chalilazsa'creni xtidx Jesucrist,

¹⁴ te na'cruza gucuadiajgreni rediidx ni rdxällajz rexpen Israel, niclaza rediidx ni rnibee bejñ ni gulälaz didxlii.

¹⁵ Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdXuudx, xcäriejñlireni nacdXuudx.

¹⁶ Naj rujnsireni si'cni numbeerene Dios, niluxh ni rujnreni huenliisi ruzeñ direni nililajz, najcreni beñgujdx, direni jiu xtidx Dios, digacdi gunreni nicla tej dzunsa'c.

2

Rulijdx Pabl Tito guluisa'cni rebejñ

¹ Niluxh luj guniitis rediidx ni ruluisa'c.

² Baluui rebengool gac benya, bejn ni yu' xcäriejnni, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yälirilajz, yälšanälajz, näjza ni rbecdxi lajzni.

³ Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redidxa'c

⁴ te guluiireni regunaa dxa'p chu xcäriejnreni, chanälajzreni chääłreni näj rexi'nreni.

⁵ Gacreni nasin, guibanayareni, xcanäsa'creni rolizreni, gacreni beñsa'c gusoobreni xtidx chääłreni, te rut guiniyajdi xtidx Dios.

⁶ Sigajcza gojz lo rebi'n riäjł chu xcäriejnreni.

⁷ Luj guzuj te fiireni xho riäjł gun bejn dzunsa'c. Che guluiilureni, saru baluui guiraa reni riäjł guluiilu.

⁸ Didxa'c gunii te rut gacdi guiniyaj diidxga, te si'c guitujy chutis ni rłajz guidxe'ch lojtu te xhet xhi didxguijdxdi gac guiniireni xcuentlu.

⁹ Balijdx remos te gusoobreni xtidx xlamreni, te gunsa'creni dzuun, na'c guzejceni diidx lo reklamreni.

¹⁰ Na'c cuanreni alga guibañsa'creni te guluii xcälñabajñreni lacti sacduxh xtidx Dios ni basłaa nuurnu neñ dojl.

¹¹ Sa'csi abiääd xcälracñäj Dios, abiädñäni yälrusłaa neñ dojl lo guiraa rebejn.

¹² La xcälracñäj Dios ni ruluii nuurnu gusa'nnu redzunguijdx, näjza dzuun xten guedxliujre te guibañsa'cnu, te chonälajznu Dios lo guedxliujre.

¹³ Ruluiizani nuurnu cuääznu guidzujñ dxej ni soob xtiidxni ni basa'nni loonu xcuent dxej che jiääd Gueb Dios näj Xtad Jesucristnu ni rusłaa nuurnu lo dojl.

¹⁴ Laani gujtni te gusłaa ni nuurnu lo guiraa redolguijdx, te basiani nuurnu te gacnu xpejn, gaczanu te bejn ni rdxagłajz rujn dzunsa'c.

¹⁵ Diidxre gunii, balijdx, basule' si'c te beñnajn. Di gusaanlu cuälazreni luj.

3

Ni riäjł gun reni rlilajz

¹ Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenı gunreni xhitis dzunsa'c.

² Na'c guiniyajreni bejn, cuedxireni, gaczarenı bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejnnu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagłajztis rujn tiejxhnu, nabajñtisnu lo dolguijdx, rudxonłajznu, rdxe'ch bejn loonu, rdxe'chzanu lo sa'nu.

⁴ Niluxh che baluiloj xcälřulasłajz näjza xcälřinälajz Dios ni rusłaa nuurnu näjza rebeñ guedxliuj lo dojl,

⁵ dxejc basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balasłajzni nuurnu. Basłaa Dios nuurnu lo dojl sa'csi bidiib lastoonu, te biäjł xtojłnu te najcnu beñcoob, sa'csi bascoobza Xsprit Dxan xten Dios xcäriejnnu.

⁶ Baniidx Dios cuääzpac Xsprit Dxanni neñ lastoonu xcuent ni bejn Jesucrist ni basłaa nuurnu,

⁷ te sa'csi rujn Dios cuent najcnu beñsa'c sa'csi abadzucajni xtojłnu, naj sica'nu xcälñasa'cnu ni cabääznu, nalaaznu yälñabajñ par tejpas.

⁸ Dee ni najc guliipac, ni'cni rłazä chanuutislu guiniilu rediidxre loj rebejn, te rebejn ni rililajz xtidx Dios gunduxhreni ganax dzunsa'c. Rediidxre najc laaca, sacduxhreni loonu.

⁹ Naj basaan rediidx ni najc xlia'si, rediidx ni gunii reben galoo, yälrdildiidx xcuent xleii to Moisés sa'csi guiraa rebiejyga xhet sajcdini, xhetza huendi rujnreni.

¹⁰ Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu.

¹¹ Sa'csi anajntu sa' bejnga abaro'nni, agulälazni didxlii, lagajc xtojlni sujn nitni.

Diidx ni bacuaani lojtis Tito

¹² Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajl.

¹³ Gucnäduhx licenciaad Zenas näjza Apolos, badeed guiraa ni rquinnreni te chanuuren i xpiajreni, te xhet jiaädxdireni.

¹⁴ Suguisieedza resa'nu gunreni dzunsa'c te gacnäjreni che guiquinnuren i, te na'c guibajnreni xlia'si.

Ruxhalni xtixtios

¹⁵ Guiraa reni yunäj narä ruxhal xtixtios lojlu. Badeedza xtixtios loj resa'nu lo yälrililajz. Dios gacnäj guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹ Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios.

² Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu.

³ Dios Xtdnu näj Dad Jesucrist gacnäj la'tu, guscuedxireni lajztu.

Xcälsanälajz näj xcärlililajz Filemón

⁴ Rudedä xquixtios lo Dios xcuent luj che rniä lo Dios.

⁵ Abiejn diagä xcuent yälrinälajz näj yälirililajz ni rajplu lo Dad Jesucrist, näjza reni yu' lo Dios.

⁶ Rniabä lo Dios tioobru xcärlililajzlu laj ni rusule'luni, te gachesa'creni xcuent guiraa reyäl'nasa'c ni rajplu, ni runiidx Dad Jesucrist lojlu.

⁷ Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcälrnibee Jesucrist sajc guiniä gunlu xhitis ni riäj l gunlu,

⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist.

¹⁰ Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

¹¹ Galoo, dini niajc beñsa'c lojlu, niluxh naj sacnäduxhni guiro'pnu.

¹² Ruxhalšacäni lojlu, te xcasacuni stehuält si'c ni najräni xca'lu, sa'csi siädnäni lojlu ascanu lagajc lastoä.

¹³ Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios.

¹⁴ Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi rlanjpaclu gacni si'c.

¹⁵ Pet gubicaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas.

¹⁶ Naj xhetru si'c di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj l chanälajzruluni, xhet si'c chutis te bejn, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lu, cua'ni sigajc narä.

¹⁸ Palga yu' xhi bejn ni lojlu o palga yu' xhi nazäabni lojlu, basa'nni lo xcuentä.

¹⁹ Lagajc narä, Pabl abacuaä guijtzre con ñää con xleträ, narä siguixäni. (Te na'c guiniä nazäabzalu lagajc luj loä.)

²⁰ Betzä, benläa hueenre narä si'c te ni sanälajz Dios te guspaalu lazä nez loj Dad Jesucrist.

²¹ Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu.

²² Sigajcza basuchee te lajt cadre jia'nä, sa'csi cabäzä gudzu' Dios ni gunabtu lojni, gusaan Dios jädhuiä la'tu.

Ruxhalni xtixtios lojni

²³ Epafra ruxhal xtixtios lojlu. Laani yunājni narā latzguiib, sa'csi guni-izani xtidx Jesucrist.

²⁴ Marcw, Aristarco, Demas, nāj Lucas, ni racnāj narā lo dzuunre, ruxhalzareni xtixtios lojlu.

²⁵ Dad Jesucrist gacnāj la'tu. Sugacni si'c.

Te Guijtz Nani Biääd Loj Reben Hebree

Agunii Xi'n Dios xtidx Xtadni

¹ Neñ redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni.

² Neñ redxejre aguniini loonu por Xi'nni, lojzani badeed Dios yäl̄rnibee guncheeni guedxliujre, badeedzani guira'ti lojni.

³ Laani najc xtuxh xten xcäl̄rdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj̄l̄nu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl̄rnibee si'c te bejn̄ ni riannäj xhixten Xtadni. Lajzani sajcru lo relaj rexangl Dios.

⁵ Sa'csi Dios di niäjb loj nicla tej rexangl̄ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl̄ni:

Narä gacä xtadni, laani gacni xi'nä.

⁶ Niluxh che biädñäni Xi'n xtebni lo guedxliuj, guniini:

Guiraa rexangl xten Dios, ¡Colgan Xi'nä!

⁷ Che gunii Dios xcuent rexangl̄ni räjpni:

Rujnni ruxhuñ rexangl̄ni si'c bej, rujnni rbebajl rexmosni.

⁸ Niluxh xcuent Xi'nni guniini:

Luj najc Dios.

Nabajn̄lu par tejpas;

xcäl̄rnibeelu par tejpas najc te yäl̄rnibesa'c.

⁹ Ahuinälajzlu xhigabsa'c, dipaclu nichagljajz xhigabguijdx, ni'cni Dios ni najc Xtioslu, baniidxru yäl̄rbalajz lojlu quela loj resa'lu.

¹⁰ Rniizani:

Luj, Dad, che guslojli bencheelu guira'ti,

bencheelu cad soob guedxliuj, ñaazalu bencheelu reguibaa.

¹¹ Laareni sinitlojreni, niluxh luj nabajn̄lu par tejpas.

Guiraareni siujx si'c riujx te lajd.

¹² Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajn̄lu, di rexijzlu ted.

¹³ ¿Gucxha räjp Dios lo te xangl̄ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

¹⁴ Guiraa rexangl Dios najc sprit, ruxhal Diosreni te chayacñäjreni rebejn̄ ni xca' yäl̄nabajn̄ par tejpas.

2

Na'c gusaanni diidx ni ruslaani lo dojl

¹ Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni.

² Anajntu aguzojb diidx ni gunii rexangl Dios neñ redxe galoo. Luxh reni di nusoob diidxga bejnreni dojl, dxejc bateed Diosreni trabajw.

³ ¿Xho gac guibicaj xcälñaj Dios yejnu palga dinu jiu rextidx Dios xcuent yälrusläa lo dojl, ä? Ni Dad, Jesucrist basa'n diidxga lo rexpejnñacni, dxejc laareni basule'reni rediidxre loonu.

⁴ Niluxh Dios baluui najc diidxga guliipac sa'csi bejnñi reseen, näjza yälrdxeloduxh, näjza xhidajl remilagrw. Badeedzani Sprit Dxan xtenni loj renani ahuililajz xtiidxni te gun tejpgareni garen-garen xtzuunreni si'ctis ni rlajz Dios gunreni.

Nani guläxtiej yälrusläa bejn lo dojl

⁵ Di Dios gudeed yälrnibee lo rexanglñi te guinibeereni guedxliucoob ni cagusä'tnu ñaj.

⁶ Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizaluni?

⁷ Nagabsi dxej guxiiru sajñi lo reangl xhaguibaa,

dxejcti badesaclu xcälñasa'cni,

badesaclu xpala'nni,

badeedzalu yälrnibee lojni te guinibeeni guira'ti ni bencheelu.

⁸ Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh ñaj ruhuiinu gajñi guinibee guiralii ni'c.

⁹ Alga rhuiinu Jesucrist, ni bejn Dios guxiiru sajñi lo reangl xten Dios che guyu'ni lo guedxliuj balsi dxej. Che baluux Jesucrist xtzuunni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

¹⁰ Dios benchee guiralii ni yu' lo guedxliujre, ñajli rnibeeza Dios guira'ti. Luxh Diosre rlajz chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxtiejni yälrusläa bejn lo dojl che gudejdni trabajwduxh lo cruz.

¹¹ Sa'csi Jesucrist, ni rujn chasanäj bejn te yälñabanya, näjza reni risanäj yälñabanya, tejtis najc xtadreni. Ni'cni di Xi'n Dios guitujy guiniini lojreni: “betzä”.

¹² Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

¹³ Räjpzani:

Sibäzä gacnäjä Dios narä.

Ste lajt guniini:

Bahuui loä näjza rexi'nä ni baniidx Dios loä.

¹⁴ Te famiñ najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnñi si'c beñguedxliuj, gujtzani te gujc bejnñi gunijñ nani rnibee yälgujt, nalajznu, beñdxab.

¹⁵ Te si'c basläani guiraa reni rdxejb yälgujt, najcreni si'c reni yu'tis loj xlamñni guideb nabajñreni, lacti rdxejbreni yälgujt.

¹⁶ Guliini dini niääd te gacnäjni reangl xten Dios, biäädni te gacnäjni guiralii rexaj toAbram.

¹⁷ Ni'cni gujñi si'cpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlajz Dios gacni te gusläani rebejn lo dojl.

¹⁸ Sa'csi lagajc laani gudejdni trabajw, luxh baquiilza beñdxabni niujñni dojl, ni'c ñaj sajç gacnäjni renani ruquiil beñdxab gun dojl.

3

Jesucrist sajcru loj Moisés

¹ Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhojz ni sajcru, rusule'zani xtidx Dios xcuent nani ahuililajznu.

² Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtznuun Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj.

³ Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés.

⁴ Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj.

⁵ Basoob Moisés diidx si'c te mos, cuanäjni rexpen Dios si'cni gunibee Dios gunni, te baluini xho gac redzuun ni gajd gac dxejc, luxh naj agujc redzuunga.

⁶ Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷ Ni'cni, si'cpac rnii Sprit Dxi xten Dios:

Naj, palga jiendiajgtu xse'ni,

⁸ na'c gun-najdtu lastootu si'c bejn rebejn ni bidxehnäj Dios che cuansajreni lo reyubijdz.

⁹ Ro'c bidxehnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

¹⁰ Ni'cni lał ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,
dina gusanä jiu'reni xcälrusilazä.

¹¹ Ni'cni bidxe'ch Dios lojreni,
bejn Dios te xhigabduxh,
di rebejnğa jiu' te gusilaznäjni.

¹² Bejtznu, colnatiro andi chu tejtü rujn xhigabguijdx, rlajz guibicaj lo Dios, ni nabajn par tejpas, sa'csi dini chalilajz xtiidxni.

¹³ Ni'cni colgulijdx resa'tu guixe-guixee, laga najcni nadxej; te di chu tejtü gacnajd lastooni xcuent reyälrusguee xten redojl.

¹⁴ Sa'csi palga chanuunu sudzu'tznu lo xtidx Dios ni huililajznu che biem-beenuni, dxejc yu' xhi rajpnu con Jesucrist.

¹⁵ Si'c caj lo guijtz:

Nadxej, palga jiendiajgtu xse' Dios,

na'c gunnajdtu lastootu si'c bejn rebejn ni bidxehnäj Dios lo reyubijdz.

¹⁶ ¿Chu reni'cni bidxehnäj Dios che biendiajgreni xtiidxni? ¿La et laadi guiraa rebejn ni gulää Moisés guedx Egipto, ä?

¹⁷ ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä?

¹⁸ ¿Chu loj räjpni dipacreni jiu' lo xcälrusilajzni? Loj reni di nusoob xtiidxni.

¹⁹ Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

4

¹ Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejtü di gun gaan jiu' lo yälrusilajzga.

² Sa'csi nuure abiejn diaagzanu diidx ni rusia dojl, sigajc biejn diajg rebejnğa; niluxh xlia'si biejn diajgreni diidxga sa'csi bacuadajgrenini niluxh direni nililajzni.

³ Luxh nuure ni ahuililaaznu siu'nu lo yälrusilajzga; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh, di rebejnğa jiu' te gusilaznäjreni narä.

Mase abaluuxni xtzuumni cheni birixtiejli guedxliuj.

⁴ Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuumni, dxejcti basilajzni tebdxej.

Xhet bejndini dxejga.

⁵ Stehuält guniini:

Di rebejnğa jiu' te gusilaznäjreni narä.

⁶ Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni.

⁷ Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdtu lastootu.

⁸ Paru nudeed Josué yälrusilajzga loj rexpen Israel, diru Dios ninisac xcuent stee dxejre.

⁹ Naj ria'nza te yälrusilajz par rexpejn Dios,

¹⁰ sa'csi nani riu' lo xcälrusilaznäj Dios, rusilajzzani lo xtzuumni sigajc basilajz Dios lo xtzuumni.

¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gacnajd lajz renani di nililajz.

¹² Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, räazni nez nen redzujt näj yojb. Sigajcza xtidx Dios räaz nez cadre rlia' sa' xsprit näjza xaim bejn. Ruluiiza xtidx Dios rehxigab ni yu' lastoo bejn, näjza redzuun ni rlanj lastoo bejn gun.

¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcru najc Jesucrist

¹⁴ Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaaznu xtidx Dios.

¹⁵ Xpixhojznu ni sajcru sajcru gulaslajzni nuure te di jiajbnu lo dojl, sa'csi laani sigajcza gudejdni trabajw, baquiil bendxabni te niujnni dojl, niluxh dini niujn dojl.

¹⁶ Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

5

¹ Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlni nez lo Dios.

² Rdejdza bixhojz trabajw sigajc benguedxliuj, ni'c sajcr ga'pni yälndolajz loj rebejn nani nayääl näjza reni abanijt lo Dios.

³ Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

⁴ Rut sajcdi gac bixhojz xcuentcani. Dios najc ni rbejdxni te gacni bixhojz, dxej rudeedni xpala'nni lojni si'c badeednini lo Aarón.

⁵ Si'cza di Jesucrist niajc bixhojz ni sajcru xcuentcani. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

⁶ Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

⁷ Cheni gubajñ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujt; Dios bacuadiajg xtiidxni sa'csi huinälajz Jesucrist Dios.

⁸ Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw.

⁹ Che bidzujñ dxej baluuxni guiraa redzuun ni rrajz Dios gunni, laani gujcni nani rudeed laa bejñ nani rusoob xtiidxni lo dojl par tejpas

¹⁰ sa'csi Dios gulälajni bixhojz ni sajcrü, gujcni bixhojz sigajc gujc Melquisedec.

Rxhunriezgw gusa'nni xcärlililajzni

¹¹ Rrajznu guiniinu xhidalduxhru diidx xcuent Melquisedec, niluxh nagan-duxh gusule'nuni lojtu sa'csi nadyejctu, ditu gacbee.

¹² Agujc xchej huililajztu rediidx xcuent Jesucrist. Ariäjñ gusule'tu rediidxre naj, niluxh alga rquinnrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rrajztu yäsactu le'ch lacuaa gautu yäjt, bääñ; nalajznu, redidxnagajn xten Dios.

¹³ Reni najc si'c báz, rä' le'chtis, direni gumbesa'c redidкса'c xten Dios.

¹⁴ Niluxh rebeñ guyajñ rajw yäjt. Sigajcza redidxnagajn xten Dios najc par rebeñ ni aguyajñ lo xtidx Dios, renani ayu' xcäriejñni, arumbeereni nani najc dzunsa'c, nani najcza dzunguijdx.

6

¹ Nanab guisieedrunu xtidx Dios te churu xcäriejñnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechlajz, xcuent redzuun ni rujñ rejñ bejñ, näj yälrililajz xtidx Dios.

² Na'c guluiitisnu xcuent yälrobnis, näj yälrudzubnaa yejc bejñ, näj xcuent yälrbajñsac rebengut, näj xcuent yälguxhtis par tejpas.

³ Alga do'o guisieedru xtidx Dios te churu xcäriejñnu, palga si'c guniidx Dios jiennu.

⁴ Yu' bejñ ni abianij xcäriejñni, ni acua' reyälñasa'c ni rudeed Dios, ni rbäjz Sprit Dxañ xten Dios neñ lastooreni,

⁵ luxh bidxaglajzreni xtidx Dios näj yälñabee xten Dios ni churu jiääd.

⁶ Palga laareni guibisacreni lo sa' yälñabajñ ni gojpreni galoo, diru gacdi guidxaa xmodreni stehuält, sa'csi dxejc sajcni si'c ni lagajc laareni gu-cuasacreni Xi'n Dios lo crujz, nalajznu susanxtujyreni Jesucrist nez loj rebejñ.

⁷ Beñ guedxliuj ni bieñ diajgni najc si'c najc yuj ni rä' nis che riajbtis nisguij. Palga yujga gudeed yälñasa'c loj reni rujñ dzuun lojni, sunle' Dios yujga.

⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujñ rebejñ gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajñnu huililajztu xtidx Jesucrist näjza xtiidxni ni rusläa lo dojl.

¹⁰ Sa'csi Dios najc ni rujñ yälguxhtissa'c, diza lajzni jiäl ni rujntu la'tu näj yälñälajz ni rajptu par laani che racnäjtu rebejznu lo yälrililajz, luxh guixee si'c rujntu.

¹¹ Naj rla^zn^u te^jga^tu chaⁿuu ga'p la^ga^jc ya^lrba^la^jzre dxe lultli, te gac guiraa ni cabä^jz^tu.

¹² Rla^zn^u na'c gactu be^jn ni rbedxitis, alga guntu sigajc be^jn reben galoo, gopdzu'tzreni ya^lrila^la^jz ni batipduxh la^jzreni, gulä^jzreni te cua'reni reyälⁿasa'c ni bia'n diid^x gudeed Dios lo^jreni.

¹³ Luxh che bia'n Dios diid^x lo^j toxtadgoldoonu Abram, guniini por la^ga^jc laani sa'csi ruti stee ni saj^cru lo^jni.

¹⁴ Scree gunii Dios: “Guliä sacnä^ä luj, sunidxäza xhidajl xi'nlu.”

¹⁵ Cheni agulä^jz Abram xchej, guso^jb diid^x, cua'ni nani gunii Dios lo^jni.

¹⁶ Sa'csi cheni rniliipac be^jn te diid^x, rniireni diid^xga por la^j ste'ca be^jn ni saj^cru lo^jreni, sas che rusä'treni la^j be^jnga xhetru yu'di xhi gunreni bie^jy.

¹⁷ Rla^jz Dios gacheepac rexag^doo to Abram sisio^jbpac diid^x ni bia'nni che guniini lo^j Abram galooli. Sisio^jbpac xtiid^xni, sa'csi guniini diid^x con la^ga^jc la^jni che bia'nni diid^xga.

¹⁸ Ni'cni naj yu' tiop diid^x ni digacdi guichaa sa'csi digacdi guinii Dios did^x-xhii, rusoobpacni xtiid^xni, rudeedzani ya^lrbedxilajz lo^j renani gubig-guxuⁿ lo^jni, lo^j reni sanuu lo^j ya^lrila^la^jz xtiid^xni nani abaniid^xni loonu por la^ga^jc la^jni.

¹⁹ Laa ni'cni cabä^äznu ni rusudzu'tz la^jznu si'c duu-guiib con ancl ni rniazdu'tz te barcw. Si'c rusudzu'tzni lastoonu te jionnu cadro yu'ni detz ladró.

²⁰ La^ga^jc ro'c biu' Jesucrist xcuent nuure, te galooli baxhalni xnez Dios loonu, te guj^cni bixho^jzro par te^jpas si'c guj^cza bixho^jz nani laa Melquisedec.

7

Jesucrist najc bixhojzro si'c najc Melquisedec

¹ Galoo che guj^c Melquisedec reⁱi xten gued^x Salem, guj^cni bixho^jzro xten Gueb Dios. Che gubi' Abram che gulu^jx guer cadro bagu'tni reⁱii ni bidxe'ch lo^jni, huichaglo^j Melquisedecni, sas gunabni lo Dios te gacnä^jru Dios Abram.

² Dxe^jcti be^jn Abram tzuu cuaa guiraa ni be^jnni gaan, te badeedni te^j cuaani lo^j Melquisedec. La^j Melquisedec sälo^j “reⁱi ni runsa'c ya^lguxhtis”, dxe^jctiru reⁱi xten gued^x Salem sälo^jzani “reⁱi xten ya^lrbedxilajz”.

³ Baluiilo^jni lo^jreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc go^jlⁿi niclaza guc guj^tni. Guj^cni si'c najc Xi'n Dios. Najctiszani bixho^jzro par te^jpas.

⁴ Naj col^huii, lacti te beⁿsa'c, te beⁿro najc Melquisedec. Lo^jni badeed toxtadgoldoonu Abram te^jga ni saj^cru lo te^jga tzuu ni be^jnni gaan. Luxh Abram najc be^jn ni saj^cru lo rexpe^jni.

⁵ Leⁱi xten Moisés, rnibee xca' rebixho^jz ni najc xfamilⁱ Leví te cuaa lo sa'reni si'c ni badeed to Abram lo^j Melquisedec, mase najcreni rexag^doo Abram.

⁶ Niluxh di Melquisedec gac xfamilⁱ Leví. Niluxh badeed Abram te cuaa xhixtenni lo^j Melquisedec. Dxe^jcti benle'ni Abram ni biannä^j xtid^x Dios.

⁷ Naj rut saj^cdi guinii garenca, sa'csi nani saj^cru runle' ye^jc nani guxiiru saj^c.

⁸ Naj rebixho^jz ni rca' te^jga lo tzuu ni rajpreⁿi, najc be^jn ni re^jt. Niluxh rnii xtid^x Dios xcuent Melquisedec ni cua' te cuaani galooli: najcni si'c te bixho^jz nani nabajⁿ par te^jpas.

⁹ Ni'cni saj^c guiniinu xcuent Leví nani rca' te cuaa, la^ga^jc laani agudij^x te cuaaga che badeed Abram te^jga ye^jc tzuuga lo Melquisedec.

¹⁰ Sa'csi mase gajd xi'n toAbram chu che huichagloj Melquisedecni, bati-jpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

¹¹ Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niquiin niääd stee bixhojz ni di gac si'c Aarón, alga si'c najc bixhojz Melquisedec najcni.

¹² Sa'csi cheni rdxaa te cuaa bixhojz nanab näjza leiiga guidxaa.

¹³ Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga.

¹⁴ Huenliisi najnnu najc Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec.

¹⁶ Luxh dini niajc bixhojz si'c rnii releii ni guyu' dxejc. Laani gujcnii bixhojz xcuent yälrnibee ni najc par tejpas, ni rut gacdi gutzujl.

¹⁷ Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

¹⁸ Dxejcti gunijt leii sa'csi xlia'si gujcnii, di niajcdi niujn bejn si'cni rniini.

¹⁹ Di xleii toMoisés niujn gaan nibansa'c bejn. Naj lacuaa leiiga rajpnu te xcärlirilazsa'c; ni'c rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni.

²¹ Stecuaa rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajzni, räjpni:

“Luj najclu te bixhojzro par tejpas,

lagajc si'c gujc Melquisedec.”

²² Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés.

²³ Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz.

²⁴ Niluxh Jesucrist rajpni yälnabajn par tejpas, naj najczani bixhojz par tejpas.

²⁵ Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajnni par tejpas te canabni lo Dios xcuent laareni.

²⁶ Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa.

²⁷ Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojl rebejn. Niluxh Jesucrist tejtis huält gudejdni trabajw, bejnnini cheni cuajni lo cruzj, baxhe'ni xtiejnni xcuent nuure, gujtni. Si'c gudijxni xtojlnu par tejpas.

²⁸ Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabsa'c par tejpas.

8

Jesucrist najc nani rusiäj diidx

¹ Diidx ni sajcruni loj rediidx ni caniiinu najc scree: bixhojz ni najc xpixhojzronu agurej xladbee Dios lo xcärdimbicha'ni xhaguibaa.

² Nen yu' ni najc dxan, nen guidoo ni benchee Dios yu' bixhojzre, xhet nendi guidoo ni runchee reben lo guedxliuj.

³ Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojreni, ni'cni nanab ga'p Jesucrist xhi gudeedni lo Dios.

⁴ Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regojn si'c ni rnibee xleii Moisés.

⁵ Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.”

⁶ Niluxh xpixhojznu Jesucrist rujn dzuun ni sajcru, sa'csi najcni nani suga' galäii xnezyuj Dios loj reben guedxliuj, gusule'ni diidx ni gunii Dios cheni bejn ni xhigabcoob, basa'nni didxcoob loj reben guedxliuj. Luxh didxcoobre sacduxhruni.

⁷ Paru niajc nusiejch leii ni badeed Dios galooli lo Moisés lajz rebejn, di niquiin niujn Dios ste xhigabcoob.

⁸ Niluxh bahuii Dios xhet cayunsa'c di reben guedxliuj, dxejc räjpni:

Naj rniliä sidzujn redxej che gunä stee xhigab,
jia'n stee diidx loj rexpejn Israel näjza loj rexpejn Judá te xca'reni didxcoob.

⁹ Xhet si'c di xhigab ni benä che bia'nä diidx loj retoxtadgoldooreni nen redxej ni gunazä naareni te gulääreni lajdx reben Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰ Niluxh diidx nani runä xhigab rlazä jia'n diidx loj rexpejn Israel nen redxejre gac scree, räjp Dad:

Sunä chu rexleii lo xcäriejnreni, sucuaäza xtidxä nen lastooreni.

Dxejcti narä gacä Xtiosreni, laareni gac rexpenä.

¹¹ Rut chu tejdi guluii sa'ni,

nicla bejtzni, nicla chu stee bejn gäbreni, “colyembee Dad”,

sa'csi alanumbee guiraareni narä, rebäz sigajc reben gool.

¹² Narä sulaslazäreni susiaä redzundxuudx ni bejnreni, diru lazä guizaj rextojreni, nicla latzsiaj ni bejnreni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

9

Xquidoo guedxliujre näjza guidoo xhaguibaa

¹ Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre.

² Guc-chee guidoo dxejcti gojl te ladro galäiini te gujcn ti'o'p yu'. Yu' ni najc ganid laani yudxan. Ro'c suga' candilieer, näjza mex cadre naga' yätxtiil ni aguc le'

³ Ni rojp yu'ga najc dejtz ladro, ro'c najc yudxanduxh.

⁴ Ro'c suga' te guiib cadre ru' yaal. Najcni ganax oor. Ro'c yu'za te guijn ni laa “arco de pacto”, najcwni ganax oor, sigajc dejtzni, sigajcza nenni. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen guijnga yu' bar xten toAarón nani biga', guyu' bid lojni, näjza guij cadre bacuaa Dios xleii toMoisés.

⁵ Yejc guijnga caj ti'o'p figur oor ni najc si'c xangl Dios. Laareni rujn rachee bejn suga' Dios ro'c. Lagajc redee rusäuu con rexhigareni cadre ruxhe'

bixhojzro xtiejn guidxaa xcuent xtoj̄l rebejn̄. Ro'cti di gacdiru guiniirunu xcuentreni naj̄.

⁶ Che gulujx gusucheereni, riu' rebixhojz si'csi si'c neñ guidoo, neñ yudxan te rajñreni Dios si'c gunibee Dios.

⁷ Niluxh neñ stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält neñ teb ijz, te chanäni xtiejn reguidxaa ni gudeedni te jia xtoj̄lni najza te jia xtoj̄l rebejn̄ ni najc xpejn̄ Israel.

⁸ Luxh guiraa reni'c ruluii Sprit Dxañ xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajñreni Dios.

⁹ Guiraa ni gujc galoo najc si'c te balaa, baluiini xho gacni naj̄. Regon najza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj̄l rebejn̄.

¹⁰ Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn̄ te ria ganaxtis tiejxhreni che guidzujñli dxej cheni guchaa Dios guira'ti.

¹¹ Niluxh abiääd Jesucrist, naj̄ laani najc bixhojzro xcuent redidxcoob ni sajcro naj̄. Nacoob guidoro cadro biu' bixhojzre, nasa'cruni naj̄. Xhet con naadi bejn̄ guc-cheeni. Dizani gac guidoo guedxliujre.

¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn̄ni ca'ni biu'ni yudxanduxh tejtis huält, te si'c baslaani nuure lo dojl̄ par tejpas.

¹³ Reni basia xtoj̄l bejn̄ galoo najc redee: xtiejn regon najza redxib, naj̄ cobdäj xten reguidxaa ni rejc neñ guidodxanga; bastiojbni guiro'preni yejc reni yu' xtoj̄lni.

¹⁴ Palga basia redee xtoj̄l bejn̄, aticaxh xtiejn Jesucrist sajc gusia dojl̄, sa'csi rajpni yäl̄nabajñ par tejpas. Lagajc laani badeedni xtiejn̄ni lo Dios. Niluxh najcni renya sa'csi dini niujn dojl̄, rusiazani xcäriejn̄nu xcuent retzuun ni xhet sajcdi, te chunu loj Dios ni nabajn̄ par tejpas.

¹⁵ Ni'cni Jesucrist najc nani suga' galäii: nez lo Dios najza nez loj rebeñ guedxliuj xcuent didxcoob. Yäl̄gajt xten Jesucrist najc te gudzucajni xtoj̄l rebeñ najza xtoj̄l renani bejn̄ si'cni caj lo leii, te xca' guiraa reni agurejdx Dios yäl̄nabajñ par tejpas, si'c bia'n diidx galooli.

¹⁶ Didxcoobre najc si'c che rlanj̄ tej bejn̄ guinibee xho guidis xhixtenni che agojl̄ guetni, nanab gucuaa bejn̄ga lo te guijt̄z xho guidisni, dxejcti gucuaani lajni. Niluxh xhet sajcdi guijt̄zga che gajd bejn̄ga guet.

¹⁷ Xhet sajcdi guijt̄zga che nabañsijc nani bejn̄ni. Sajcni che agujt̄ bejn̄ga.

¹⁸ Ni'cni che bia'n Dios diidx loj rexpejn̄ Israel galoo, gujt̄ te man te bixe' rejn̄.

¹⁹ Che gulujx gunii Moisés rediidx si'c ni caj lo leii loj guiraa rexpejn̄ Israel, bagu'tni rebiser, redxib, cua'ni rejnga najza nis, bahuajdxni guid-xiil xniaa najza te la' yajg balagbäz, hysopo, dxejcti bastiojbni rejn̄ yejc guijt̄z cadro caj leii, najza yejc rebejn̄.

²⁰ Dxejc guniini lojreni: “Rejnre najc seen sile'pac diidx ni abaxhañ Dios lojtu.”

²¹ Sigajcza bastiojb Moisés rejn̄ guidoo naj̄ guiraa renani rquiin rebixhojz che rajñreni Dios.

²² Leii xten Moisés rnibee jia guiralii con rejn̄, palga di rejn̄ guixe', di xtoj̄l bejn̄ jia.

Xtiejn Jesucrist rudzucaj dojl̄

²³ Ni'cni biquiinpac gujt̄ remanre, bixe' xtiejn̄ni te basiani reni najc xpalañ reni yu' xhaguibaa, niluxh reni yu' xhaguibaa rquiin guixe' xtiejn̄ te ni sajcro.

²⁴ Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios.

²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn. Di guiquiin jiu'runi balti huält.

²⁶ Palga nanab gunni si'cni rujn rebixhojz, sajpni por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn lo Dios cheni gujtni, cuajni lo cruz te si'c badzucajni par tejpas xtoj̄l rebejn.

²⁷ Guiraa bejn nanabpac guetreni tejtis huält, dxejctiru sidejdreni yälguxhtis xten Dios.

²⁸ Sigajcza tejtis huält badeed Jesucrist xtiejn ni bixe' lo cruz te badzucajni xtoj̄l xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl̄, alga te gusa'ni xcäl̄rusl̄aa renani cabäjzni.

10

¹ Sa'csi leii xten to Moisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gusa'cni rebejn nani guibig lo Dios, sa'csi di xtiejn man gudzucajpac rextoj̄lreni.

² Paru najc nibicajpac xtoj̄lreni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtoj̄lreni, diru xcäriejnreni gumbee dojl̄.

³ Niluxh yäl̄rejt man näj yäl̄rudeedreni rejn casob ijz rusnajtisreni lajzreni xcuent dojl̄.

⁴ Sa'csi digacdi gudzucajpac regon näjza xtiejn redxib xtoj̄l bejn.

⁵ Ni'cni che biääd Jesucrist lo guedxliuj räjpni lo Dios:

Di rlajzlu xtiejn guidxaa niclaza regon niluxh abejnlu gacä nigui-guedxliuj.

⁶ Dilu nichagljaz yäl̄rejc xten guidxaa niclaza yäl̄rudeed rejn, niclaza gojn ni rudeed rebejn te gusiani xtoj̄lreni.

⁷ Dxejc räpä: “Narä basiälä te gunä si'cni rlajzlu Dad, Dios, (si'cni caj nen reguijtz xcuent ni sacä).”

⁸ Che gulujx gunii Jesucrist diidxga: “Di rlajzlu, dizalu guidxagljaz xcäl̄rejt guidxaa näjza regon niclaza xcäl̄rejc guidxaa, niclaza yäl̄rudeed rejn xcuent xtoj̄l bejn si'cni caj lo leii gun bejn.”

⁹ Dxejcti räjpni: “Narä siälä, te gunä si'cpac ni rlajzlu, Dad Dios.” Dxejc badzucaj Jesucrist nani gujc galoo, te guläxctiejni didxcoob ni bia'n Dios loonu naj.

¹⁰ Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn lo cruz tejtis huält par tejpas.

¹¹ Guiraa rexpixhojz Israel rujnreni dzuun guixe-guixee te rudeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl̄.

¹² Niluxh Jesucrist tejtis huält baxhe' xtiejn lo cruz te badzucajni xtoj̄l rebejn par tejpas. Naj agurejni xladbee Dios cadre rnibeeni.

¹³ Ro'c cabäjzni guiraa ni rdxe'ch lojni te cuereni ladzni'ni.

¹⁴ Ni'cni tejtis huält cuajni lo cruz te basiani par tejpas guiraa renani ahuililajz xtiidxn.

¹⁵ Sigajcza rnii Sprit Dxaan xten Dios loonu; najni:

¹⁶ Diidx nani jiannääreni nen redxejre gac scree, naj Dad Dios: sucuaä rextidxä lo xcäriejnreni,

susäläza xtidxä neñ lastooreni.

Dxejcti räjpni:

¹⁷ Diru lazä guizaj rextojlreni nicla rextolguijdxreni.

¹⁸ Ni'cni, cheni abia xtojł bejn, diru quiquiin gudeedreni guidxaa te jia rextojlreni.

Nanab guibignu lo Dios

¹⁹ Ni'cni resa'nu, na'c guidxejbtu, sajc jiu'nu yudxanduxh cadre bixe' xtiejn Dad Jesucrist nani abadeedni lo Dios.

²⁰ Naj yu' te nezyuj, nezsiucoob, nezyuj xten xcälñabañcoobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajc xtiejnni lo Dios.

²¹ Jesucrist najc xpixhojzronu nani rnibee rexpejn Dios.

²² Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yälñrililajzpac abia lastoonu xcuent rehxigabguijdx, abidiibza tiejxhnu lo nis-ya.

²³ Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu.

²⁴ Naj do'o guihuii xho jiennu te gacñaj sa'nu te si'c chonälajznu sa'nu nägajcza te jiennu ganax dzunsa'c.

²⁵ Na'c jiennu si'c rujn rebejn nani diru jiäd che rdxagsa'nu. Nanab guiliidxnu resa'nu sa'csi naj asiäddzujgajxh dxej ni guibi' Dad Jesucrist.

²⁶ Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc.

²⁷ Dxejcsii guidxeebtisnu guilääznu yälñguxhtisduxh xten Dios näj guiboo ni guze'c renani rdxech loj Dios.

²⁸ Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o chon ni nancheepac, räjpreni dini nusoob leii, gujt bejnga, rut balaslajzdini.

²⁹ Maazru yälñrusacsíduxh nanab ted renani ruläj yejc Xi'n Dios cheni direni gusobdiajg xtiidxni. Alga ruo'nreni xtiejnni ni baxhe'ni lo cruz te basianini. Rusanxtujyzani Sprit Dxan xten Dios nani badeed didxcoob lojni.

³⁰ Anancheenu gunii Dios: “Narä susquixä bejn; loä siguijx bejn”, räjp Dios. Stehuält guniini: “Dad sujn yälñguxhtis rexpejnni.”

³¹ ¡Cosduxh gac bejn ni jiajb ladzñaa Dios nani nabajn par tejpas!

³² Niluxh colñaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios.

³³ Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw.

³⁴ La'tu banaj lajztu renani yu' latzguiib, guideb yälñbalajz batip lajztu che cua'reni guiraa xhixtentu, sa'csi gucheetu xhaguibaa rajptu reyälñnasa'c ni sajcu, niluxh yu'ni par tejpas.

³⁵ Na'c gunijttu xcälñrililajz xtidx Jesucrist, sa'csi yälñrililajzga gun xca'tu yälñabajn par tejpas.

³⁶ La'tu nanab cuedxitu te che abejntu ni rñajz Dios, dxejc xca'tu nani aguniini guniidxni.

³⁷ Sa'csi xtidx Dios ni bia'n rnii:
Asiäddzujgajxhpc dxej ni jiädni,
asiäddzujgajxhpc dxej ni jiäd nani siäd, dipacni gaclaa.

³⁸ Renani nabañsa'c sibannäj yälñrililajz,
niluxh palga yu' chutej ni guidxejb chalilajz,

dini'c gun guibaa lazä.

³⁹ Niluxh nuure dinu gac si'c reni rusaan yärlililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

11

Yärlililajz

¹ ¿Xhini'c najc yärlililajz? Yärlililajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni.

² Dios huinälajz retoxtadgoldoonu sa'csi huililajzreni xtiidxni.

³ Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuinu. Con xtiidxtisni bencheeni nani dinu guihuii.

⁴ Gojpa toAbel yärlililajz badzubyaalni rexquidxaani lo Dios. Yärlbijbyaal xtenni sajcro loj yärlbijbyaal xten toCaïn. Ni'cni gunii Dios najc toAbel beṅsa'c. Naj mase agujt Abel, sanuutis racbeenu xcuent yärlililajz ni gojpa.

⁵ Sigajcza gojp Enoc yärlililajz, ni'c sinä Dios Enoc xhaguibaa, guideb nabajṅni, te na'c niejtni. Diru rebejṅ nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubaṅsa'cni, baspaani lajz Dios.

⁶ Rut chu tejdi sajc guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzani sudeed Dios xcälṅnasa'cni loj renani rguilni, nalajznu renani rlajz gumbeepac Dios.

⁷ Gojpa toNoé yärlililajz. Che räjp Dios lojni siajbpac nisguij ni gajdreni fi, huililajzni. Bejṅni si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpa yärlililajzga, bejṅni gubibde rebejṅ guedxliuj, gunijtreni sa'csi direni nililajz xtiidxni. Dxejcti cua'ni yälṅnabaṅsa'c ni siääd xcuent yärlililajz.

⁸ Sa'csi gojp toAbram yärlililajz, basoobni xtidx Dios che gurejdx Diosni, biriini lajdxni te huijṅni cadre gudeed Dios yuj lojni te cuääzni ro'c. Biriini lajdxni, mase dini gan caro chääni.

⁹ Gojp toAbram yärlililajz, ni'c huilälajzni si'c beṅzijt loj reyuj ni räjp Dios gudeedni lojreni. Ro'c gulälajzreni si'c lajdx beṅzijt. Gulälajzni neṅ reyuguijd, sigajcza bejṅ toIsaac näjza toJacoob, sa'csi näjza lojreni räjp Dios gudeedni yujga.

¹⁰ Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹ Sigajcza gojp toSara yärlililajz te mase anajcni beṅgool niluxh agudejd chu xi'nni, cua'ni yälṅnibee xten Dios te gujṅni nan, guyu' te xi'nni, sa'csi huililajzni susoob Dios xtiidxni.

¹² Ni'cni mase siäädzuṅgajxh dxej ni guet toAbram, guyu' xhidalduxh xajṅni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcni xhidalduxh, nicla gac guigabreni.

¹³ Guiraa rebejṅre gujt, direni nica' yuj nani räjp Dios gudeedni lojreni; niluxh sa'csi rajpreni yärlililajz, bahuiireni lo yujga zitro, ni'c bibalajzreni, sa'csi anajreni najcni beṅzijt, cansajsireni lo guedxliuj.

¹⁴ Reni rnii si'c, rniliireni caguilsijcni cadre gac lajdxreni.

¹⁵ Paru niujnreni xhigab lajdxreni najc guejdx cadre biriireni, pet niajc nibisacreni ro'c.

¹⁶ Niluxh laareni rlajzreni te lajdxreni ni sajcro, nalajznu lajdx Dios xhaguibaa, ni'c rguilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadre cuääzreni xhaguibaa.

¹⁷ Gojppza toAbram yälirililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli:

¹⁸ “Isaac guniidx chu xhidajl xajglu, xagdoolu.”

¹⁹ Sa'csi nanchee toAbram rajp Dios yälrnibee te guspajjnni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰ Näjza toIsaac gojp yälirililajz benle'ni toJacoob näjza toEsaú, räjpni xhini'c gun tejpgareni.

²¹ Gojppza toJacoob yälirililajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojnni Dios.

²² ToJosé gojp yälirililajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtuzjtni.

²³ Gojp rexuczajn Moisés yälirililajz, ni'c cheni gojl Moisés, bacua'tzrenini choñ bäii, sa'csi bahuiireni bázdaanni. Direni niu xtidx reii ni gunibeeni, räjpni ju'treni báz niguii.

²⁴ ToMoisés gojp yälirililajz, ni'cni che aguroobni di rlanjz ni nirilajni xi'n xindxa'p reii xten Egipto.

²⁵ Bejn ni xhigab tednäjni trabajw rexpejn Dios lacuaa niujnni redzuun ni rchaglajz rujn reben Egipto, sa'csi najc reni'c dojl, luxh tera'tsi ruspaareni lajz bejn.

²⁶ Par laani maazru sajc tedni lagajc trabajw ni gudejd Jesucrist lacuaa niajpni reyälhasa'c xten Egipto sa'csi laani cabäjtisni reyälhasa'c nani churu gudeed Dios lojni.

²⁷ Gojp toMoisés yälirililajz biriini lajdx reEgipto, dini nidxejb yälrdxe'ch xten reii, huinuutis gusudzu'tzni si'cni najc xhigabni, ruhuiini loj nani di guzen, nalajznu Dios.

²⁸ Gojp Moisés yälirililajz bejn ni lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet.

²⁹ Gojp rexpejn Israel yälirililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanjz rebejn Egipto nidejd, gubi' nis, dxejc gulo'reni neñ nis.

³⁰ Xcuent yälirililajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga.

³¹ ToRahab, te gunaguijdx, gojppzani yälirililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniä? Di gal di guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent retoprofe't.

³³ Guiraareni gojp yälirililajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäj Dios ni bia'n diidx xca'reni, basäureni ro' rebeedz.

³⁴ Guyu'reni neñ te balduxh luxh xhet gujcdireni, gojl baxunreni te di niejtreni con espaad. Reni gujc benrdxajg, guzutzut'reni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni.

³⁵ Guyu' regunaa ni cuasac rextogoolreni, gubañsacreni lo rebengut.

Sgaiireni gujt xcuent yälrusacsí lacuaa nicäjbreni nusiech lajzreni te nuslaa bejnreni sa'csi rlanjzreni xca'reni stee yälñabajn ni sajcru.

³⁶ Sgaiireni gudejd trabajw guniyaj bejnreni, gudinnäj bejnreni chiir, cuaduuzareni caden, guyu'zareni latzguiib.

³⁷ Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yälirililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejcreni trabajw rusacsí bejnreni.

³⁸ Sa' rebejnnga di nungäj reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gaureni nicla nis te yäreni; cuanzajreni nez neñ redajn, nez neñ rebiliäa näj nez neñ guedduxh ni yu' neñ yuj.

³⁹ Guiraa rebejnnga gojp yälirililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni,

⁴⁰ sa'csi bejn Dios xhigab gunni te dzunsa'c lojreni. Bejn Dios xhigab guniidxni yälhasa'c loonu, naj tejsi guica'nu con laareni nani bia'n diidx guniidx Dios.

12

Guihuitisnu lo Jesucrist

¹ Ni'c najcni si'cni suga'nu galäii guiraa rebejnre luxh cahuiireni xcälirililaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl nabajnu, te di jieednu chosaanu nez lo nezyuj ni sasanäanu nez cadro chonnu.

² Do'o guiuidzu'tz nez loj Dad Jesucrist nani guläxtiej, nani guluuxza xcälirililajznu. Jesucrist gudejd trabajw lo cruzj, dini nitujy gujtni lo sa' yälgujtga, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadro rnibeeni.

³ Colyujn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu laj ni cabäjtuni.

⁴ La'tu gajd xtiejntu guixe' lo yälrucuanäj dojl.

⁵ ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcäl naj Dad niclaza jieedlu che tilnäjni luj.

⁶ Sa'csi si'c runnaj Dad renani sanälajzni, rujnni ríaa guiraa renani rca'ni si'c xi'nni.

⁷ Palga gatijp lajzlu lo xcäl naj Dios, sica'ni luj si'c xi'nni, sa'csi ¿chu dad di gunnaj xi'nni?

⁸ Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redolgujdx.

⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlajzni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yäl nabajñ, ä?

¹⁰ Xtadnu lo guedxliujre bennajreni nuure tio'p-choñ dxej, te gac gusoobnu xtiidxni. Niluxh si'c runnaj Dios nuure te jia'pnu te yäl nabanya, te gac nayazanu sigajc najcni laani.

¹¹ Guliini xhet xhi yäl najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl najga rusob xtiidxni, rca'reni te yäl nabanya ni rbecdxilajzreni.

Riez guze'ni xtidx Dios

¹² Ni'cni colsudzu'tz reñaatu ni abadxajg, colsudzu'tz yecxhijbtu ni abadxajg,

¹³ te colquuil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Colquiiil xho cuedxinäjtu guiraa rebejn. Colchanä te yäl_nabanya, sa'csi renani di guibanyadi, digacdi fiireni loj Dad Jesucrist.

¹⁵ Colhuisa'c te di gunijt chutejtu lo xcäl_racnä_j Dios, colnatiro gac chu tejtü si'c te cuanlaa ni rujn daan, sa'csi sa' bejn_ga suxhinni guiraa renani ahuililajz.

¹⁶ Nicla tejtü na'c ga'p stee gunaa te laad, nungäj_l cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl_nasa'cni ni najc xtenni sa'csi najcni xingan galoo xtadni. Bato'nini te cua'ni yäl_rajwtis.

¹⁷ Anajntu, cheni rlajzni niunle' xtadnini te nica'ni ni najc xten xingan-galooni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Colnatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacä_jy, nacäiboo, cayajcza bedonduxh.

¹⁹ Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgreni rediidxga, direni nutiplajz, gunab-duxhrene na'cru guiniini lojreni.

²⁰ (Sa'csi direni nutiplajz diidx ni caniini, rä_jpni: "Palga ted te mantis guläj xhuj dajnga, colju'tni con guij.")

²¹ Te yäl_nadxebduxh najc nani guzen ro'c, lagajc toMoisés rä_jp: "Cayacditä yäl_rdxejb."

²² Niluxh la'tu agubigtu lo dajn xten Siön, cad najc lajdx Dios ni nabaj_npac, nalajznu guedx Jerusalén ni yu' xhaguibaa cadro yu' xhidalduxh xangl Dios,

²³ cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, nä_jza loj resprit xten rebejn nani abasia Dios te anajcreni be_nnasa'c.

²⁴ Agubigzanu loj Jesucrist nani suga' galäii nez loj Dios nä_j be_n_guedxliuj xcuent didxcoob ni bia'n Dios, nä_jza lo xtiejn Jesucrist ni badeedni lo Dios xcuent nuure. Jesucrist rniab jiäj_l lajz Dios, luxh ni'c sajcro loj nani rniab xtiejn toAbel. Xtiejn toAbel rniab quiix nani bagu'tni.

²⁵ Ni'c colnatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siäd guedxliujre, ¿xho jiennu tedbianu palga guilälaznu nani ruluii nani siäd xhaguibaali?

²⁶ Xse' Dios basniib guedxliuj galooli, niluxh naj_rnisacni: "Ste huält susnibä xhet ganaxdi guedxliuj, susnibä nä_jza xhaguibaa."

²⁷ Che gunii "ste huält", ni'c sä_loj guibicaj renani benchee Dios ni rac rniib, te jia'n renani digacdi guiniib.

²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonäl_aaznuni guideb yäl_rdxejb nä_jza yäl_nadolajz,

²⁹ sa'csi Xtiosnu najc si'c te balduxh ni ruse'c, ni runitlojza.

13

Xho guspaa bejn lajz Dios

¹ Colchanuu lo yäl_rinälajz sa'ni.

² Di gusaantu gudeedu rolijztu guidzuj_n biooz, sa'csi loj reni bejn si'c, yu'reni badeed rolijzrene bidzuj_n xangl Dios rolijzrene, niluxh direni niacbee chu najcreni.

³ Colsnaj lajztu reni yu' ne_n latzguiib, ascanu la la'tu ni yunäreni latzguiib. Colsnajza lajztu renani basacsí bejn, ascanu la la'tu ni cagusacsíreni sa'csi nä_jza la'tu najctu be_n_guedxliuj si'c najcreni.

⁴ Colga'p xpala'n yäl_guchnaa te guiban_nayatu con chäältu sa'csi sujn Dios yäl_guxhtis rebejn ni resnä_j chääl bejn nä_jza reni rusguee rebe_n_xteb.

⁵ Na'c chanälajztu meel, colguibalaznäj ni rajptu, sa'csi Dios agunii: “Dipacna gusanälu, dizana cuälazälu.”

⁶ Ni'c dinu guidxeb guiniinu:
Dad ni yu' xhaguibaa najc ni rcanäj narä;
dina guidxebä xhitis ni gunnäj bejn narä.

⁷ Colsnaj lajztu renani baluui guibansa'ctu, ni basule'za xtidx Dios lojtu; colhuui xho nabajreni te sigajcza colchanä xcälrlilajzreni.

⁸ Sigajc gujc Jesucrist naii, sigajcza najcni nadxej, sigajcza sajcn par tejpas.

⁹ Na'c gusaantu gusiejchreni lajztu xcuent ste'ca yälruui ni digac si'c najc xtidx Jesucrist. Sacduxh sudzu'tz lastoonu lo yälracnäj ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

¹⁰ Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo.

¹¹ Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga.

¹² Si'cza gujt Jesucrist te laad, dejtz guejdx, te basiani xtoj rebejn xcuent lagajc xtiejn.

¹³ Naj colcho' chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist.

¹⁴ Sa'csi lo guedxliujre dxunlaasinu, niluxh caguuilnu laadxnu ni chu jiädru, te ro'c guidxunnu par tejpas.

¹⁵ Guideb xcälracnäj Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni näj jielnu redij.

¹⁶ Na'cza jiälajztu guntu huen, gacnäj sa'tu, sa'csi reni'cni najc redzuun ni rdxaglaz Dios.

¹⁷ Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun.

¹⁹ Rniä lojtu, guiniabrutu loj Dios, te gun Dios jiojb guibi'ä jiälä lojtu.

Te didxle' näj lult xtixtios

²⁰ Dios xten yälrbedxilajz ni baspajn Dad Jesucrist lo rebengut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas.

²¹ Dios gun gactu beñsa'c, bendxojn loj xhitis te guntu ni rlajzni, näj gunni loj guiraa nuure si'c ni rlajzni xcuent Jesucrist. Colspaa lajz Jesucrist par tejpas! Sugacni si'c!

²² Resa'nu, rniabä lojtu, colcuedcxi lajztu, colcuadiajg rediidx ni ruliidxre, sa'csi riojbg cacuaä te labäz guiitzre lojtu.

²³ Colyabee abirii bejtznu Timoteu latzguiib. Palga guidzujgajni ree, siädnäni jiadhuiä la'tu.

²⁴ Colgudeed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhal xtixtios lojtu.

²⁵ Gacnäj Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

¹ Narä Santiaag, xmos Dios näjza xten Dad Jesucrist, ruxhalä xtixtios loj guitzubutio'p cuaa rexpejn Israel ni nare'ch lo guedxliujre.

Yälñajn nani runiidx Dios loonu

² Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezyuj Dios,

³ sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdxilajz.

⁴ Dxejcti yälrbecdxilajz sajz gunni xtzunni neñ lastootu, te gactu bensa'c, bejn ni aguyajl lo xtidx Dios, nani xhet cayäädxdidi xcälñajni.

⁵ Palga yu' tejtü ni cayäädxdidi xcälñajni, suguniabnini lo Dios, sa'csi Dios rudeedduxhni yälñajn loj guira'ti bejn, luxh dini guinii didxlaa lojni. Palga guiniab bejn, sudeedza Diosni.

⁶ Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bāj ni sanä bej, nezree-nezre'c sääbni.

⁷ Nani najc si'c, na'c gunni xhigab yu' xhi xca'ni lo Dad Jesucrist.

⁸ Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹ Te sa'nu ni najc nadolajz, suguibalajzni sa'csi najcni beñro sa'csi guläs Diosni,

¹⁰ sigajcza bejtznu ni yu' xhixtenni, suguibalajzni sa'csi abaluii Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa.

¹¹ Sa'csi che rliejn gubijdz näjza te belaa, li rgoł recuaanga, li riuii reguii ni caj lojni, dxejc rtejbreni, dxejcti agunijt xcälñajni. Si'cza sinitloj te bejn ni yuduxh xhixtenni lał ni yu'ni lo xnezyujni.

Xhi xca'ni che tedni trabajw

¹² Chicbaa niguii ni rsiudzu'tz lał ni cadejdni trabajw, sa'csi che agunii Dios didxsa'c xcuent nani bejn sica'ni coron xten yälñabajn par tejpas ni bia'n Dios diidx gudeedni loj rebejn ni sanälajz Dios.

¹³ Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquii Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl.

¹⁴ Niluxh tejgatu runijt che rcäjy xcäriejntu sa'csi riajb yejctü guntu cosguijdx.

¹⁵ Che riajb yejctü guntu cosguijdx, runijttu rujntu dojl, luxh dojl che abejntuni, riädnäni yälgujt.

¹⁶ Sa'ä ni sanälazä, na'c gusaantu gusgueereni la'tu.

¹⁷ Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni.

¹⁸ Lagajc xcuentni bejn Dios gacnu xpejnni sa'csi huililajznu xtidxliipacni, te gacnu reben galoo loj rexpejnni.

Xho nanab jiennu

¹⁹ Acanajntu recosre, sa'ä ni sanälazä. Niluxh tejgatu nanab gusquejnni te gucuadiajgni, per gaclaani te guiniini, gaclaazani te guidxe'chni,

²⁰ sa'csi xcälrdxe'ch bejn dini gun xcäl'nasa'c Dios.

²¹ Ni'cni colcuälaz guiraa recosguijdx, guiraa recoslatsiaj ni ria'n. Guideb yäl'nadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajc guslaa xaimtu lo dojl.

²² Niluxh baluui lo guira'ti bejn najctu bejn ni rusoobpactu xtidx Dios, xhet bejndi ni rucuardiajgtis xtiidxni, ni rusgueeni lagajc laani.

²³ Sa'csi palga najc te bejn te nani rucuardiajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuaajn.

²⁴ Sa'csi che ruhuiini xho najcni, sägajcni, riallazgajcni xho najcni.

²⁵ Niluxh nani ruhuidzu'tz lo leisa'c, nalajznu leii nani ruslaa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnga najc ni sajp yälrbalajzpac lo xhitis ni rujnni.

²⁶ Palga yu' tejtü ni rujn xhigab najcni te bejn ni randuxh Dios, niluxh di gacdi gusäuni ro'ni, guiraloj rniini, bejnga rusguee lagajc laani, luxh xhet sajcdi yälrajn Dios xteni.

²⁷ Yälrajn Dios ni najc guliipac, ni xhet nu'chdi lojni najc scree: chahuiini rebisiäjb, näjza regunaa ni agujt chääl'ni che yu' xhi rquiinreni, näjza na'c säblajztu guntu nani rujn reben guedxliuj ni di chalilajz xtidx Dios.

2

Nanab tebloj jiennänu guira'ti bejn

¹ Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcru tej bejn lo sabejnni.

² Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed,

³ dxejcti la'tu jiuurutu nani najcw ladsa'cga, naatu: "Ree gurej lo yagx-hilsa'cre", dxejcti gäblu lo bejn ni xhet rajpdi: "Rec gusulii o gurej lo yujre",

⁴ ¿la xhet rujnditu xhigab garenca najc tej bejn lo sa'ni, ä? Luxh dxejce acayajctu si'c juejz ni rujn xhigab guijdx.

⁵ ¡Colgucuardiajg, betzä ni sanälazä! Agule Dios bejn nani xhet rajpdi lo guedxliujre te ga'preni yäl'rilibazduxh, te lo xcäl'rnibee Dios xca'reni xcäl'nasa'c ni bia'n diidx gudeed Dios loj renani sanälajzni.

⁶ Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsitu, li rgobxhajxhreni la'tu, rinäreni la'tu loj reguxhtis, ä?

⁷ ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸ Palga guliitu cagusoobtu leii xten xreiinu Dios, si'cni caj lo xquijtz Dios scree: "Colchanälajz sa'tu sigajc rinälajztu lagajc la'tu", laaca rujntu.

⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu bejn dojl, bejn ni rbälaz leii.

¹⁰ Palga yu' te bejn ni rusoob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga.

¹¹ Sa'csi lagajc Dios ni gunii: "Na'c guesnäjlu bejn ni di gac chäällu", lagajc laani guniizani: "Na'c ju'tlu." Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiralii releii.

¹² La'tu colguinii, colguibajn si'c rebejn ni gun Dios yälguxhtis con xtiidxni ni ruslaa bejn lo dojl.

¹³ Sa'csi renani di gulasajz bejn, che gun Dios yälguxhtisreni, dizani gulasajz laareni. Sajcru yäl'rulasajz lo yälguxhtis.

Yäl'rilibajz näj dzuun ni rujn bejn

14 Resa'ä, ¿xhi sajc palga guinii te bejn: “Ahuililazä xtidx Dios”, niluxh dini gun dzuun ni riäjł gunni, ä? Sa' yälřililajzre, ¿la suslaanini lo dojl, ä?

15 Palga yu' te bejznu o te bisiajnnu ni dini ga'p xhajn, luxh xhetiza xhi gauni, xhi yäni,

16 luxh gäb tejtı lojni: “Sucuedxi lajzlu jiilu, suguidxa' lajzlu, suguidxaj xque'lu”, niluxh dini gudeed nani caquiinni, ¿xhi sajc rediidx ni räjpni lojni, ä?

17 Sigajcza yälřililajz nani di guquiil bejn gunreni xtzıun Dios najc si'c te ni agujt, sa'csi dini guquiil bejn gunreni dzuun.

18 Yu'za reni naa: “Luj rajplu yälřililajz, narä runä xtzıun Dios; baluii narä xcälřililajzlu xhet näjdi xtzıun Dios, dxejcti narä suluiä xcälřililazä xcuent rextzıun Dios ni runä.”

19 La'tu rililajzıtu yu' tejtı Dios. Laaca rujnlu, niluxh näjza rebeñdxab rililajz yu' tejtı Dios, racdijtlireni, rdxebdxhrenini.

20 ¿La di rıajzıtu gacheetu, beñnayaäl? ¿La ditı gan, yälřililajz ni di guichagnäj xtzıun Dios najc te yälřililazgut?

21 Dios badzıcaj xtojł toxtadgoldoonu Abram sa'csi bejnıni si'c gunıbee Dios gunni, che badzıubni xingaanni Isa'c lo piään, nugu'tnıni nez lo Dios.

22 Colhuii xho tejsi junt sadxaag xcälřililajz toAbram dzuun ni bejnıni, dxejcti sa'csi bejnıni nani gunıbee Dios gunni, bejn Dios gujc xcälřililajzıni sa' yälřililajz nani rıajz Dios ga'p rexepejnıni.

23 Dxejcti huile' xtidx Dios cadro caj scree: “Abram huililajz ni räjp Dios lojni, ni'cni badzıcaj Dios xtojłıni, cua' Dios Abram si'c te beñnaya.” Birilajzani “xamiıgw Dios.”

24 Ni'cni ruhıııtu rca' Dios te bejn si'c beñnaya nez lojni xcuent xtzıun Dios ni rujnzani, xhet ganaxtııs xcuent xcälřililajz bejnıga.

25 Sigajcza gısaıjc toRahab, ni gujc te gunadxab. Dios badzıcajza xtojłıni, bejn Dios xhıgab najcni te beñnaya sa'csi bejnıni xtzıun Dios che badeedni rolıjzıni bacua'tzıoj tıo'p xpejn Israel ni gujc guıxhıjg ni sagula'tz guejdxıga, dxejc gıcnäjıııreni te sıııreni ste'ca nez yuj.

26 Sigajc ni di gacıdı guıbaıjn tiejxh bejn palga xheti sprıt, sıgajcza di gacıdı guıbaıjn yälřililajz palga dini gun dzuun ni rnıbee Dios gunni.

3

Rediidx nani rnıı luudxnu

1 Resa'ä, na'c gac xhidajltı bejn ni rulıııı xtidx Dios, sa'csi anajjnı rac yälğuxhtısrıru rebejn nani rulıııı xtııdıni.

2 Sa'csi guıragajcnu riennı xhidajł cuaa dojl. Palga yu' te bejn ni di gunıjt lo dııdı ni rnıııı, laani najcni te beñsa'c, rajcza rnıbeeni guıdeb tiejxhıni.

3 Palga rusälınu guııb ni ru' ro' cabaiı te chääni cadro rıajzınu jıııı, rnıbeezanı guıdeb xtiejxhıni.

4 Colhuii rebarcwro, mase sıoldıxhreni, luxh rebedıxh rulanaareni, niluxh capıtán ni rusaj barcw lo nısdoo, te guıbbáz ni caj xhajn barcw neñ nııs, con ni'ctııs rıınánıni cadrotııs rıajzıni.

5 Sigajcza najc luudxnu, najcni te labáz tiejxhınu, luxh colhuii lactı dıdıxro rnıııı. Najcni sı'c te balbáz ni rajc ruze'c guıragajc reyajg ni yu' dajı.

6 Luxh luudxnu najc sı'c te bajł. Rıııı luudxnu guıraa redıdıdxıudx ni rnıııı rebeñ guedxlııjre nani rdxe'ch lo Dios. Lo guıraa rela' ni najc tiejxhınu, laa luudxnu ni rundxıudx guıdeb tiejxhınu. Luudxnu ralguıj con xquıboo gabıjł.

7 Rebejn sajc gııacıdııııreni guıraloj guıdıxaa, guıraa mane', guıraa bäl, guıraa man lo nısdoo, abasıacıdıııı bejnıreni,

⁸ per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn.

⁹ Lagajc luudxnu rliä'pnu xpala'n Dios Xtadnu, lagajc laani rniyajnu sabejnnu ni benchee Dios sigajc najcni.

¹⁰ Tejsi ro'nu rnile' lo Dios nägajcza rgue lo bejn. Rebetzä, jxhet si'cdi nungäjldi gacni!

¹¹ ¿La rbää bejn nisnejxh näjza nisrop lo tejsi bisie, ä?

¹² Betzä, ¿la caxajsi sajx caj aceitun loj te yagiigw, ä? ¿O la sajx caj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yälnejn ni siäd xhaguibaa

¹³ ¿Chuni'c lo guiraatu yu' xcäriejnni, nanduxhni, ä? Suguluiini xho najcni xcuent xcäl'nabansa'cni, sugunni xtzuunni guideb yäl'nadolajz ni rudeed xcäriejnni.

¹⁴ Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcäl'nasa'c lagajc luj, na'c gaclu gualajz, sa'csi ni'c najc si'c ni caniilu didxrusguee xcuent xtidxlii Dios.

¹⁵ Sa'csi sa' yälnejnre, xhet xhaguibaadi siädni, alga najcni yälnejn xten guedxliujre, xten reben guedxliuj, xtenza rebenxab.

¹⁶ Sa'csi cadro yu' yälrdxe'ch lo sa'ni, näj cadro rujn bejn guira'ti parsi xcäl'nasa'c lagajc laani, ro'c yu' bieje, yu' guiralajz latsiaj.

¹⁷ Niluxh yälnejn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiralajz dzunsa'c, runle'pacreni xtiidxreni, direni guinii tej diidx laaga cayujnreni garenca dzuun.

¹⁸ Renani rguuil yälbedxi, yälbedxi rbe'creni te xca'reni te yäl'nabannaya nez loj Dios si'c xcäl'nasa'creni.

4

Ni nabañäj guedxliuj

¹ ¿Casiäd rebieje, reyälrdxe'ch lo sa'ni ni casiajctu? ¿La direni jääd xcuent lagajc xhigab ni yu' lastootu, ä? Lagajc rexhigabga rujn bieje nen lastootu, ruscäyreni xcäriejntu.

² La'tu rlajztu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilnäjtu sa'tu. Ditu ga'p nani rlajztu sa'csi ditu guiniabni loj Dios.

³ Rniabtuni, niluxh dini guniidxnini sa'csi xhet laadi najc xhigabtu gunab-tuni, alga gunabtu sa'csi rlajztu gunijttuni si'cni rlajztu.

⁴ ¡Aii! Bejn ni di gandzu' Diostis. ¿La ditu gan bejn nani rlajz gun redzuun ni rujn reben guedxliuj, bejn ga rdxe'chreni lo Dios, ä? Ni'cni palga yu' chu tejtuni ni rlajz chanuu lo ni rajc lo guedxliujre, bejn ga rdxe'ch lo Dios.

⁵ O ¿la rchalotu xlia'si caj lo xtidx Dios rediidxre: “Sprit ni baxhal Dios te cuääzni nen lastoonu, randzu'ni nuurnu sa'csi rlajzni guinibeeni nuurnu?”

⁶ Niluxh runiidxru Dios xcäl'racnäjni loonu. Ni'cni rni xtiidxni scree: “Dios rdxechnäj renani runnaro lagajc laareni, niluxh rudeedruni xcäl'racnäjni lo rebenadolajz.”

⁷ Coljiu'pac lo xnezyuj Dios. Colsudzu'tzpac te di guntu ni rlajz benxab, te guxunni lojtu.

⁸ Colguibigru lo Dios te guibigzani lojtu. Bendojl, colquiib naatu, nalajznu na'cru guntu latsiaj; colgusia lastootu, la'tu ni runtio'p lajztu.

⁹ Sugacnaj lajztu, suchuti xliajs, colyonduxh. Colguchaa xcäl_ruxijstu, col_ca' yäl_huin, colguchaa xcäl_rbalajztu, col_ca' yäl_roon.

¹⁰ Colyajc si'c bejn ni xhetliidi sajc nez loj Dad Jesucrist, te laani guiliäsni la'tu gunni la'tu beņro.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yäl_guxhtis sa'ni, reni'c rniyaj xleii Dios, rujnreni yäl_guxhtis xleii Dios luxh palga guntu si'c, dirutu gac renani rusooob xtidx Dios, alga najctu juejz xten leii.

¹² Tejtis najc nani runiidx leii loonu, tejtis najc juejz; najcni nani rajc rus_laa bejn lo dojl, nani sajcza gunitloj bejn. La'tu, çchuxh najctu te guntu yäl_guxhtis lo sa'tu, ä?

Dinu gan xhi gac guixee

¹³ Naj col_cuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel.

¹⁴ Luxh nicla gantu xho gac xcäl_nabajntu guixee. Xcäl_nabajntu najc si'csi te za nani rienloj tera'tbäz, dxejcti rnitlojni.

¹⁵ Hueenru guiniitu scree: "Palga rlanj Dios sibaannu, te jiennu dee o dec."

¹⁶ Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojl.

¹⁷ Ni'cni ni najn xho riäjł gunni, palga dini gun si'c, rujnni dojl.

5

Rulijdxni rebejn ni yu' xhidajł xhixtenni

¹ Col_gucuadiajg xtidxä, bejn ni yu' xhidajł xhixtentu. Col_yoon, col_cuedxa' xcuent recasionduxh ni sactu.

² Guiraa rexhixtentu nani rajptu aguxhijņ, luxh rexhajbtu agudajw rebaguiidni.

³ Oor näjza pla't xtentu agubibtiejnni, aguxhijņni. Lagajc dee gun gacbee Dios ditu niujņ ni rlanj Dios guntu, lagajc ni'c gun chectu, nitlojtu. çXlia'si batiedajntu xhixtentu neņ redxej lultga!

⁴ çCol_huii! Ditu niguixsa'c loj reni bejn xtzuuntu, ni'cni laareni cayujnreni yäl_quij lo Dios xcuenttu. Luxh xhadiajgli Dios xten reangł ni yu' xhaguibaa abidzujņ yäl_quij xtentu ni cabe'c renani batie' xcäl_nasa'ctu.

⁵ Agubaņsa'cpactu lo guedxliujre, bejntu lanij si'ctis ni rlanjztu, abastio'tu lastootu neņ redxej xten yäl_rugu't.

⁶ Gudiiltu xho bagu'ttu rebeņsa'c luxh laareni dxiitis gusujreni, xhet bejndi- reni te na'c nugu'ttureni.

Col_cuääz jiäd_xhii Diostu

⁷ Resa'ä, dxitis col_cuääz guidzujņ dxej cheni jiäd Dad Jesucrist. Col_huii xho rujn bejn ni rbe'c binij, dxitis rbäjzni gac xcäjłni lał ni riajb nisguigaloo näjza nisguij ni riajb lult.

⁸ Si'cza la'tu col_cuäzdxi, col_gustioob lastootu sa'csi asiäd_dzujņgajxh dxej ni jiäd Dad Jesucrist.

⁹ Resa'ä, na'c chale'ctu xquej sa'tu, didi gun Dios yäl_guxhtis la'tu, sa'csi asiäd_dzujņgajxh dxej che guidzujņ Dios ni najc Juejz.

¹⁰ Rebetzbidä, col_huii xho gudejd reniguii nani bacuaa xtidx Dios trabajw galoo, xho guläjzareneni.

¹¹ Col_huii xho rniinu chicbaa renani guläzdxi lo trabajw ni gudejdreni. Abiejn diajzatu xho bejn Job che gudejdni trabajw, anajnzatu xho guzajcni

xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yäl_rulaslajz.

¹² Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: “Mbaj”, ni'ctisza colguinii. Che naatu: “Na'c”, ni'ctisza colguinii te na'c gun Dios yälguxhtis la'tu.

¹³ ¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugo_lni dij te guiliä'pni xpala'n Dios.

¹⁴ ¿La yu' chu tejtü ni cayacxhuu, ä? Sucueedxni rebengool ni rnibee nen guidoo, te guiniabreni lo Dios xcuentni la_l ni cagusäl_zareni se't lo cuajni con laj Jesucrist.

¹⁵ Luxh palga rililajzpacreni che canabreni, siajc be_nracxhuuga, siliäs Jesu-crist bejnga. Luxh palga bejnni dojl, sibicaj xtoj_lni.

¹⁶ Ni'cni colguxhobdojl lo sa'tu, col_nab lo Dios xcuent sa'tu te jiajctü. Che rniabduxh te be_n naya lo Dios, dzunroza rujn Dios.

¹⁷ Elías, te bejn ni gunii xtidx Dios agujc xchero, gujczä te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj cho_n ijz garol.

¹⁸ Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyäl_nasa'c xtenreni lo guedxliuj.

¹⁹ Rebetzä, palga yu' chu tejtü ni guibicaj lo xtidx Dios, luxh yu' chu gacnä_j guibisacni lo xtidx Dios,

²⁰ sugacbee bejn nani racnä_j guirii be_ndojl lo xnezyuguijdxni te guibisacni lo Dios, bejnga agucnä_jni te gu_äa xaimni lo yäl_gujt, te gubicajza guiraa xtoj_lni, mase xhidalduxh najc xtoj_lni.

Guijtz Ganid Nani Bacuaa Pedr

Pedr cacuaa guiitz loj reni rililajz ni nare'ch

¹ Narä Pedr, te apost xten Jesucrist, cacuaä guiitzre loj renani agule Dios gac rexpejn ni nani rbäjz si'c benzijit lo reguedx Ponto, Galacia, Capadocia, Asia, näjza Bitinia.

² Xtdnu Dios gule la'tu galooli bencheeni niguui, aguleni la'tu par lagajc laani te gun Sprit Dxan xteni xtzuumni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuedxini lastootu lo guiraliiti.

Te yäl'nabajn ni cabäaznu

³ Colguiliä'p xpala'n Dios ni najc Xtd Jesucrist, Dios nani xcuent xcäl'rulaslazduxhni bejn ni gojpn te yäl'nabañcoob sa'csi baspañsacni Jesucrist loj rebeñgut. Sa'csi rajpnu yäl'nabañcoob, ni'c nadippac lajznu.

⁴ Ni'cni laani suniidxni te yäl'rusalajz ni di nitloj, ni di xhiñ, ni di jiuui si'c riuui rebalajg. Yäl'rusalajzga aguluchedzu'tzni xhaguibaa par la'tu,

⁵ nani cayapdzu'tz xcäl'milaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre,

⁷ te guzen xho rililajztu. Xcäl'rililajztu sajcru lo oor nani rnitloj, niluxh xcäl'rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl'milaagwrni, näjza xcäl'rdimbicha'ni.

⁸ Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl'rbalajz ni rut rajcdi rusule', sa'ni yu' xhaguibaatis,

⁹ sa'csi xcäl'rililajztu suslaa xaimtu lo dojl, sica'tu yäl'nabajn par tejpas.

¹⁰ Luxh xcuent yäl'ruslaa dojlre, rebejn nani gunii xtidx Dios agujc xchero, laareni abasulexgaareni xcuent xcäl'racnäj Diosre nani siääd lojtu. Luxh bisiedduxhrene, gunabdiidxzareni,

¹¹ te rlajzrene gacheerene chu bejn o gucpac gac nani cagusä't Sprit xten Crist ni yu' neñ lastooreni che gunixgaani xho nungäj ted Jesucrist trabajw, dxejcru xcasacni yäl'rnibee.

¹² Baluii Dios lojrene, di rediidxga soob neñ redxej ni nabajnrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhał Dios Sprit Dxan xteni te cuäazni neñ lastooreni. Näjza rexangl Dios ni rbäjz xhaguibaa rlajz gacheerureni rediidxga.

Xcäl'nabannayanu nez loj Dios

¹³ Ni'cni, colsanij xcäriejntu, colgusudzu'tz lastootu, guideb lastootu colyenloj yäl'racnäj xten Dios ni abia'n diidx xca'nu che guibisac Jesucrist lo guedxliuj.

¹⁴ Gactu si'c biuux nani rusob xtidx xtdni. Na'cru xcäjbtu guntu redzun-guijdx ni bejntu galoo che gajdtu gumbee Dios.

¹⁵ Dios ni gule la'tu najc dxan. Sigajcza la'tu, loj guiralii ni rujntu colyajc bendxan.

¹⁶ Sa'csi lo xtidx Dios caj scree: "Sajctu beñdxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujn yälguxhtis loj guiraa bejn xcuent dzuun ni bejn, la'tu riäjl guidxejbtuni guiraa dxej ni nabansijctu lo guedxliujre.

¹⁸ Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu,

¹⁹ badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist.

²⁰ Guliipacni che gajdli guirixtiej guedxliujre, gule Dios Jesucrist, niluxh najru, neñ redxelult che gajd guedxliujre nitloj, biädluilojni par xcäl'nasa'ctu,

²¹ la'tu nani rililajz xtidx Dios xcuent Jesucrist. Luxh Dios baspansac Jesucrist loj rebengut, badeedni yäl'rnibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu col'chanälajzpac sa'tu.

²³ Sa'csi acua'tu xcäl'nabancoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siäd xhaguibaa, xhet lo bejdzdi ni rnitloj.

²⁴ Galooli gunii Dios scree:

Guiraa rebeñ guedxliuj najc si'c recuaan,
guiraa xcäl'nasa'creni najc si'c reguii ni rcaj lo cuaan,
recuaan rgol, lirtejbza reguii xtenni,

²⁵ niluxh xtidx xtdad Jesucristnu rsiudzu'tzni tejpas.
Luxh diidxre najc diidx ni basule'reni lojtu.

2

¹ Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu.

² Si'c riojl rebäznite' le'ch, si'c za col'quiiil xtidx Dios par sprittu. Col'jiojl xtidx Dios te gustioobruni la'tu lo yäl'rusläa lo dojl,

³ palga agucebeetu lacti hueen najc xcäl'racnäj Jesucrist.

Crist najc si'c te guij ni nabajn

⁴ Col'guibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebeñ badzucaj guijga, niluxh Dios gulenini sa'csi sacduxhni.

⁵ Sigajcza tejpgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xpriit xtenntu. Dee najc nani rchaglajz Dios.

⁶ Sa'csi galooli gunii Dios scree:

Agule'cä te bejn neñ guedx Siön, nalajznu Jerusalén,
ni gac si'c te guisa'c, te guiro ni rsiuj squiin te yuro.
Chutis bejn ni chalilajz xtiidxni, dini jianxtujy.

⁷ Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',
lagajc guijga gujc guijpac ni baliib squiin xten yu'ga

⁸ näjza:

Te guij ni rliaj ni' bejn, ni ruzälta'reni,
laareni riajbreni sa'csi direni gusoob xtidx Dios,

luxh agunibexгаа Dios nitlojreni.

Renani gule Dios

⁹ La'tu najctu te cuaa bejn ni agule Dios, tejpgatu najctu rebixhojz ni najc si'c reii xten Dios. La'tu najctu te bennaya, te bensa'c, rexpejn pacni. Aguleni la'tu te gusule'tu reyäl nasacduxh ni bejn Dios ni gurejdx tu che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios.

¹⁰ La'tu galoo rut najcditu, niluxh naj najctu rexpejn pac Dios. Galoo gajd Dios gulaslajztu, luxh naj abalaslajz Dios la'tu.

Colguibajn lo xnezyuj Dios

¹¹ Rebetzä ni sanälazä, nabajntu lo guedxliujre si'c benzijt, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl nen lastoo bejn te cuälazreni xnezyuj Dios.

¹² Colguibaṅsa'c laḷ ni yu'tu loj rebenzijt ni di gac xpejn Israel te palga guiniyajreni la'tu gäbreni najctu benlatsiaj, che fiireni redzunsac ni rujntu, siliä'ppacreni xpala'n Dios che jiädsac Jesucrist te gunni yälguxhtis.

¹³ Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro,

¹⁴ regubernadoor nani ruxhalni te rujnreni yälguxhtis rebendojl näjza te guiliä'pni xpala'n reben nani laaca rujnreni.

¹⁵ Sa'csi Dios rlajz guntu recossa'c te cuecdxitu rextidxnayääl ni rnii reni di rlajz gumbee didxlii xcuent Jesucrist.

¹⁶ Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios.

¹⁷ Ga'ptu yäl nadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

Gudejd Jesucrist trabajw te baluini xho jiennu

¹⁸ La'tu ni najc mos, guideb yäl nadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx.

¹⁹ Sa'csi rchaglajz ruhuii Dios te bejn palga sa'csi rililajz te bejn xtidx Dios rujn bejn huant che rdejdn trabajw luxh xhet bejndini.

²⁰ Palga la'tu rujntu latsiaj ni'cni rusacsini la'tu, ¿xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac, luxh rujntu huant, ni'c najc laaca nez loj Dios.

²¹ Te guntu si'c gurejdx Diostu, sa'csi gudejdz Jesucrist trabajw xcuenttu te guluini xho guntu che chanuutu lo xnezyujni.

²² Laani dini niujn nicla tej dojl, laani dini nusguee nicla tej bejn con didx xhii.

²³ Che guniyajreni lojni, dini nudzu' yäl rniyajga. Che cadejdn trabajw, dini nudzu' diidx niluxh bateedni lagajc laani ladzṅaa Dios ni rujn yälguxhtissa'c.

²⁴ Gudeed Jesucrist trabajw si'c te bendolduxh, bacuaarenini lo cruz te ro'c gusacsiduxh tiejxhni xcuent xtojḷnu, te na'c gunrunu dojl, te guibaṅsa'cnu lo xnezyuj Dios. Gudilguijdxreni tiejxhni te basiajcn la'tu.

²⁵ Sa'csi galoo gujctu si'c rexiil ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

3

Xho nanab guibannäjtü chäältu

¹ Sigajcza la'tu, regunaa ni abachṅaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu.

² Sa'csi fiini xho riulu xtiidxni nájza xho rniilu nadolajz lojni, nájza xho nabannäsa'cluni.

³ Na'c gusucheetu ganax lo jiaatis, si'c najc guichniil yejctu, nájza biaoer ni rcaj diajgtu, guejntu, naatu, nájza ladsa'c ni najc sacru.

⁴ Colgusuchenäj lastootu yälñadolajz, yälñbecdxi lajz, nájza yälñanälajz, sa'csi direni nitloj, luxh sacduxhrene nez loj Dios.

⁵ Galoo si'cza bejn regunaa ni gujc xpejn Dios ni huililajz xtidx Dios, basucheerene lastooreni, basoobrene xtidx cháälrene.

⁶ Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac, nájza na'c guidxejbditu.

⁷ Sigajcza la'tu, niguii ni abachnaa, colguibannäsa'c cháältu. Colgapdani sa'csi dini gacnadip si'c te niguii; nanab guntu si'c sa'csi nájza lojrene badeed Dios yälñabajñ par tejpas. Colyejn si'c, te gucuadiajg Dios che cuedx-guiniabtu lojni.

Renani rdejd trabajw che laaca rujnrene

⁸ Dee najc ni cania loj guiraatu, saru colguibanäj sa'tu. Colgulasajz sa'tu, colchanälajz sa'tu si'c rinälajz te niguii bejtzni. Gactu beñsa'c, beñnadolajz.

⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyälñasa'c ni guniidxni lojtu.

¹⁰ Sa'csi scree caj lo xtidx Dios:

Nani rchaglajz guibajñni,

luxh rlanjzani saru tedni redxej lo guedxliujre,
sugudxojni guinii ro'ni didxnaj nájza didx-xhii.

¹¹ Guibicajni loj redzunguijdx, sugunni redzunsac'tis.

Suquiiilni yälñbedxi te ni'c chanuuni.

¹² Sa'csi ruhuii Dios rebejn ni rujn dzunsac,
rucuadiajzani xtiidxrene che rniabrene lojni.

Niluxh rudzuréni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsac?

¹⁴ Palga caxäjsi tedtu trabajw che guntu redzunsac. ¡Chicbaatu! Na'c guntu xhigab, ni claza guidxejbtu xcälñruchejbreni.

¹⁵ Colgusaan guinibee Dad Jesucrist neñ lastootu, gususin te gudzu'tu diidx lojrene rniabdiidx lojtu xhicuent runlojtu guibi' Jesucrist. Guideb yälñadolajz saru gudzu'tu diidx.

¹⁶ Colguibanäsa'c te cuedx xcälñriejntu te che guiniyajrene la'tu sa'csi nabañsa'ctu loj Crist, jianxtujy reni rniyaj la'tu.

¹⁷ Sa'csi hueenru tedtu trabajw che cayuntu te dzunsac, palga si'c rlanjz Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent rextojñnu. Xhetliidi xtojñni guyu' nez loj Dios, niluxh gudejñni trabajwduxh xcuent rebendojl. Bejni si'c te gac guibignu lo Dios sa'csi gujt tiejxh Jesucrist, luxh guyusac sprit xteni lo tiejxhni te gubañsacni.

¹⁹ Che gajd xpriitni guibisac lo tiejxhni, huij spritni basule'ni diidx loj resprit ni yu' latzguuib.

²⁰ Respritga najc renani di nusoob xtidx Noé che basule'ni xtidx Dios lojrene. Gulajz Dios rebejnğa guiraa redxej ni cayujñ Noé barcwro agujc xchero. Baslaa Dios xcälñabajñ xhujñtis bejn, xhet gujcdireni gudejdrene lo nisguiro ni biajb guideb guedxliujre.

²¹ Che robnisnu naj, rusnaalajznu rebejn̄ga; yälrobnisga ruluiloj xho ruslaa Diosnu lo dojl̄. Et sa'csi riäjt beed lo tiejxhnu nen̄ nisga, alga sa'csi dxejc rni-abnu lo Dios guniidxni te xcäriensa'c, sa'csi sajc xca'nuni xcuent ni gubansac Jesucrist lo rebeṅgut.

²² Che birii Jesucrist loj rebeṅgut, biu'ni xhaguibaa cadre gurejni xladbee Dios te ro'c rnibeeni loj rexangl Dios, näjza loj guiraa respit ni rajc rnibee, ni yu' lo guedxliuj näjza xhaguibaa.

4

Colyejn xtzuum Dios

¹ Ni'cni sa'csi agudejd Jesucrist trabajw cuajni lo cruiz xcuentnu, sigajcza la'tu riäj̄l guntu xhigab sidejdtu trabajw lo guedxliujre sa'csi nani agudejd trabajw, diruni gun dojl̄,

² te guideb nabaj̄n̄ni lo guedxliuj, guibaj̄n̄ni si'c rlanj Dios, diruni guibaj̄n̄ te gunni redzunguijdx xten guedxliujre.

³ Sa'csi bejntu si'ctis ni rlanjtu galoo, bejntu si'c rujn rebejn̄ ni di gumbee Dios, bejntu si'cni rlanj tiejxhtu, bejntu latsiaj, gusojztu, bejntu relan̄iro, gudedcaj gusojztu, luxh bejntu cosxtuiduxh bazuxhijbzatu loj rebanäbdxab.

⁴ Dxejcti rebejn̄ ni rujn recosga naj, rdxelojreni sa'csi dirutu gun ni rlanjreni, ni'c rniyajreni la'tu.

⁵ Niluxh laareni suureni nez loj Jesucrist ni agojl̄ gun yälguxhtis loj guiraa rebejn̄, rebejn̄ ni nabaj̄n̄ näjza renani agujt, te gusule'reni xcuent nani bejnreni.

⁶ Ni'cni basule' Jesucrist xtidx Dios loj reni agujt, te mase che gubaj̄n̄reni lo guedxliuj gujcreni yälguxhtis si'ctis ni rajc bejn̄, dxejc gujtreni, naj sprit xtenreni sinuu guibaj̄n̄ si'c ni rlanj Dios.

⁷ Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiṅ xcäriejntu te saru cuedx-guiniabtu lo Dios.

⁸ Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtoj̄l sa'tu.

⁹ Saru gurenäj bejn̄ ni rdzujn rolijzlu, na'c jiejytu.

¹⁰ Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu.

¹¹ Palga tejt̄u najc xtzuumni guluiini xtidx Dios, suguiniini ascanu najcni xtiidxpac Dios. Palga tejt̄u najc xtzuumni gacnäjni sa'ni, sugunnini, guideb yäl̄nadip yäl̄nadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäj̄l chä'p xpala'n̄ni, laatisni riäj̄l guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd̄d te gactu preeb. Na'c guntu xhigab xhichani'c casiajct̄u.

¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist.

¹⁴ Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xp̄rit Dxan xten Dios guideb xcälrdimbicha'ni nen̄ lastootu.

¹⁵ Gunatiro, andi gusaantu ted tejt̄u trabajw sa'csi bagu'ttu bejn̄, o sa'csi gulajntu xhi xten bejn̄, o sa'csi bejntu latsiaj, o sa'csi huichu'ni lo xcuent sa'ni ni xhet nungäj̄l̄di gacbeeni.

¹⁶ Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

¹⁷ Abidzujn dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaaznu xtiidxni, jxhocha gun rebejn nani di chalilajz xtidx Dios xcuent Jesucrist!

¹⁸ Lo xtidx Dios caj scree:

Lacti naganlajz rliaa rebenmaya lo dojl,
 jxhocha gunäjni rebejn nani di chalilajz xtidx Dios näjza rebendojl?

¹⁹ Ni'cni, guiraatu nani cadejd trabajw xcuent xtidx Dios si'cni rlajz Dios, colgudeed xprittu lo Dios ni di gusguee, ni bencheetu, te chanuutis guntu ni riäjł guntu.

5

Yärlulijdx loj renani ahuililajz xtidx Dios

¹ Narä nacä te bengool, bahuiä trabajw ni gudejd Jesucrist, bahuiäza xcälrđimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool,

² colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlajz Dios guntu, na'c gunlojtu meel. Colguibalajz cayajptu rexpejn Dios.

³ Na'c guinibeetu lojreni si'c rnibee te lam loj reni rujn xtzuunni, colguluiireni xho gunreni con xcälnabaŋsa'clu.

⁴ Che guibisac Jesucrist, ni rajp nuure, laani suniidxni xcuentnu, te yälnasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebengool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni,
 niluxh racnäjni rebejn ni najc nadolajz.

⁶ Ni'cni guideb yälnadolajz coljiu lo Dios sa'csi rajpni yälrnibeduxh, te guiliä'pni xpala'ntu che gal dxej ni guibisacni.

⁷ Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

⁸ Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguilni chu guxhinni.

⁹ Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznu ni nabajn lo guedxliujre.

¹⁰ Che agudejdtu trabajw tiop-choŋ dxej, Dios nani rajp guiraa yälracnäj, nani gurejdx la'tu te näjza la'tu xca'tu xcälrđimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb.

¹¹ Laani rajpni yälrnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guiitzre lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcälracnäjpac Dios. Colsudzu'tz xcuent yälracnäjre.

¹³ Rexpejn Dios ni re' lo guedx Babilonia ruxhal xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhalza xtixtios lojtu.

¹⁴ Colguinii "xchan" lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

Guijtz Ni Rojp Ni Bacuaa Pedr

Pedr rucuaa te guiitz loj reni ahuililajz

¹ Narä nacä Simón Pedr, ni rujn xtzun Jesucrist, te apost xtenni. Rucuaä guiitzre lojtu nani rililajz xtidx Dios sigajc ni rililajznu, sa'csi bahuii Dios loonu si'c bennaya xcuent Xtiosnu Jesucrist nani baslaa nuurnu lo dojl.

² Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

Xho riäjl gac rexpejn Crist

³ Sa'csi xcälrnibee Dios baniidx guira'ti ni rquiinnu te guibaṅsa'cnu, te gacnu bennaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni.

⁴ Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejñni, sajcnu beṅsa'c si'c najcni sa'csi abiriinu loj redzunguijdx ni chagljaz rujn rebejn ni ruxhin guedxliujre.

⁵ Ni'cni nanab gacbeenu xho nabañnu lo guedxliujre. Siroobru xcälrililajztu sacnäjni la'tu te guibaṅsa'cnu lo Dios; luxh sa'csi nabaṅsa'ctu, siroobru xcäl'najntu xcuent dzunsa'c näjza dzunguijdx.

⁶ Luxh palga guroob xcäl'najntu xcuent dzunsa'c näjza dzunguijdx saj guinibeetu tiejxhtu te na'c guntu dzunguijdx. Che guinibeetu tiejxhtu, sixedxi lajztu. Che arajptu yäl'rbedxilajz, sajctu beṅsa'c, beṅdxan.

⁷ Che anajctu beṅsa'c, beṅdxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist.

⁸ Palga la'tu rusobtu guiraa rediidxre, luxh chanuutis caroobreni neñ lastootu, ditu guibaṅxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist.

⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiäl'lajzni xho basia Dios rextojl'ni nani bejnni galoo.

¹⁰ Ni'cni rniä lojtu rebetzä, col'sejs, col'guisieed xtidx Dios te gacbeepactu, guluilojzatu lo bejn xho gurejdx, xho gule Dios la'tu, sa'csi laḷ ni chanuu gucuadiajgtu rediidxga, dipactu gunijt lo Dios.

¹¹ Palga guibajntu si'c lo guedxliujre, siu'pactu xhaguibaa cadre rnibee Dad Jesucrist par tejpas.

¹² Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yäl'rililajz xten didxlii ni yu' neñ lastootu.

¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre.

¹⁴ Ananä asiäddzunuḡajxh dxej ni xca' Dios narä, sa'csi abaluii Dad Jesucrist ni'c loä.

¹⁵ Ni'cni cayunduxhä dzuun naj, te che guiquiinni sinaj lajztu xtidxä che agu'tä.

Renani bahuii loj yäl'nasa'c xten Crist

¹⁶ Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcälrdimbicha'ni.

¹⁷ Sa'csi che badeed Dios xtadnu yäl̄rnibee, yäl̄rdimbicha' lojni, dxejc biejn diajgnu gunii Dios, birii xse'ni neñ te za ni gurej xhaguibaa, räjpni: “Dee najc xi'nä ni sanälazä, rbanälazduxhäni.”

¹⁸ Lagajc nuure biejn diajgnu xse' Dios che guniini xhaguibaali che gyunäjnu Jesucrist lo dajn ni najc dxan.

¹⁹ Ni'cni naj guliiru rediidx ni gunii reprove't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusaniy te lajt ni nacäy, susaniyreni xcäriejntu dxejli ni jääd bajl xhaguibaa. Dxejc lagajc laani susaniy lastoonu.

²⁰ Niluxh ganiddoo nanab gacbeetu dee: nicla tej bejn sajc guinii laatisni sajc guinii xhi säloj xtidx Dios,

²¹ sa'csi nicla tej diidx ni bacuaa reprove't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpriet Dxan Dios lojreni gucuaareni.

2

Rebejn nani rusguee (Judas 4-13)

¹ Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcäl̄rililajzreni, sibälazreni lagajc Dad Jesucrist nani gudijx xcuent xtojl̄reni. Niluxh renani rusguee, siojb nitlojreni par tejpas.

² Xhidajlza bejn sinajlreni lo xcäl̄nabanguijdxreni, dxejcti ni'c gun siniyay xhidajl bejn xnezyuj xtidxlii Dios.

³ Sa'csi ruguilajzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcäl̄guxhtisreni nani gun Dios, näjza xcäl̄rnitlojreni cabäzgjcreni agujc xchero.

⁴ Najcni si'c sa'csi di Dios niällajz rextojl̄ rexanglni nani bejn dojl̄, niluxh baxhal̄nireni gabijl, basäunireni neñ reguednacäy cadre cabäjzreni dxej ni gun Dios xcäl̄guxhtisni.

⁵ Sigajcza rebejn ni guyu' galoo, banitloj Diosreni, baslaa Dios xcäl̄nabajn Noétis näjza sgajdzreni, sa'csi basule' Noé xtidx guluii Dios. Luxh baxhal̄ni nisguiro te biädnitlojni guiraa rebejn nani di nucuadiajg xtidx Dios.

⁶ Bejn Dios yäl̄guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gachee bejn xho runnäy Dios rebejn ni di gusoob xtidx Dios.

⁷ Gulää Dios Lo't ni gujc te beñsa'c lo reguejdxga, sa'csi guc-huin lajzni xcuent relatsiaj ni bejn rebeñdojl̄ga.

⁸ Guideb ni guläjs Lo't, te beñsa'c, lo guejdxga, dxej, yääl guc-huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi beñsa'cni.

⁹ Anajn Dios xho racnäjni rebeñsa'c te rbäänireni lo retribajw ni cadejdreni, anajnza Dios xho gusacsini rebeñdojl̄ cheni guidzujnli dxej ni gunni xcäl̄guxhtisreni.

¹⁰ Guliduxhni, sujnru Dios yäl̄guxhtis loj rebejn nani rlajz gun si'ctisni rlajz tiejxhreni, näjza renani rbälaz xcäl̄rnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'.

¹¹ Niluxh nicla tej rexangl Dios ni rajpru yäl̄rnibee lo rebejnre, direni guiniyay, cue'creni xquejreni lo Dios.

¹² Luxh, rebejn̄ga najc si'c reguidxaa nani xheti xcäriejnreni, cabäjztisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni.

¹³ Bejnreni dojl̄, ni'c sinitlojreni, sidejdreni yälrusacsiduxh xcuent rextojl̄reni. Laareni rchagljazreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu lā ni cayajc lanij cayaunäjreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl̄, rusgueereni rebejn̄ te gunzareni dojl̄, ruluiireni lastooreni te säblajzreni meel, najcreni bejn̄ nani batzubde Dios,

¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichagljazru nani rquijx yällatsiaj.

¹⁶ Niluxh gudil̄näj Diosni xcuent xtojlni, bejn Dios gunii te mandip si'c xse' bejn̄, te bascuääzni profe'tga, dini nusaan niujnni nani cayujnni, cayujnni si'c te bejn̄ ni rajc yejcn̄i.

¹⁷ Reben̄ latsiajre najc si'c te bisie cadre xheti nis, najczareni si'c rexcäjy ni sanä bej nezree nezrec che cabi' te bero. Laareni su'reni lo xcäjy par tejpas che gun Dios yäl̄guxhtis.

¹⁸ Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn̄ ni rlanjztis tiejxhreni, con yällatsiaj rusgueereni rebejn̄ nani entis birii loj reni rujn sa' dzunguijdxga.

¹⁹ Rusgueereni, rniireni rut gudxojndini palga jäd̄najlnireni, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn̄, ni'c rusäuni nen̄ latzguiib.

²⁰ Sa'csi palga agubicaaj te bejn̄ loj redzunguijdx xten guedxliuj sa'csi huililajzreni xtidx Dad Jesucrist nani ruslaa rebejn̄ lo guiraa dojl̄, dxejctiru gubisacni loj xtojlni, abixhidsacreni lo xtojlni, nalajz najcreni si'c che gajdreni gumbee xtidx Dios.

²¹ Huenru direni niembee xnezyuj Dios, quela che abiembeerreni nezyujga, cuälazreni didx dxan, xtidx Dios ni basule'reni lojreni.

²² Dxejcsii rsiojb diidx ni najc scree: “Rbisac te bä'cw loj xcäl̄rdzujbni. Cuch ni entis gojz richusacni lo xpajnni.”

3

Xho gac che guibisac Jesucrist

¹ Rebetzä, dee najc ni rojp guijt̄z ni caguxhalä lojtu; lo guiro'p guijt̄zre cagusnibä la'tu xcuent reyäl̄rulijdx ni gusnaj lajztu.

² Col̄gusnaj lajztu rediidx ni gunii reprofe't agujc xchero, näjza rediidx ni gunii Dad Jesucrist nani basule' reapost.

³ Ganiddoo, col̄gacbee dee: che asiäd̄dzun̄gajxh redxelult, siäd̄ad rebejn̄ ni rgubee rextidx Dios, laareni sujnreni si'ctis ni rlanjz tiejxhreni.

⁴ Siniabdiidxreni: “¿Xhicuent gajd Jesucrist guibisac si'cni bia'n diidx? Cheni gujt̄li rextadgoldoonu, guira'ti sanuutis najcni si'c gujcn̄i cheni guc-cheeli guedxliujre.”

⁵ Niluxh che rniireni si'c, rlanjzpac jäll̄lajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen̄ nis, naj tre'ni loj nisga.

⁶ Dxejcti gunitloj guira'ti ni yu' lo guedxliujga che biajb te nisguiro, gunitlojni.

⁷ Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni rebendojl.

⁸ Rebetzä, na'c jiällajztu, Jesucrist ruhuii tebdxej si'c te tzugayuu ijz, rhui- izani te tzugayuu ijz si'c tebdxej.

⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäzjni gusiejch lajztu, sa'csi di rlajzni nitloj nicla tejtü.

¹⁰ Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guira- gajcni sejni.

¹¹ Sa'csi sinitloj guiraa redee, ni'c nanab guibanayatu lo guedxliujre, na'c guntu dojl.

¹² Colcuäjz dxejtis ni jiäd Dios lo guedxliuj. Dxejc sejc xhaguibaa, sinitlojni, luxh guiralii ni yu' sialni lo guiboro.

¹³ Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru dojl.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabanayatu, xhetiru xtojltu.

¹⁵ Colhunii xhi dzuun bejn Dad Jesucrist ni'c rajpnu yälruslaa lo dojl. Sigajcza bacuaa bejznu Pabl ni sanälajznu. Bacuaani sa'csi badeed Dios yälnejn lojni.

¹⁶ Nen guiraa rexquijztni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlo- jreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgheetu, te na'c gunijttu xcälrsiudzu'tztu lo xtidx Dios.

¹⁸ Colgustioob xcäriejntu con yälracnäj näjza yälnejn xten Dad Jesucrist nani ruslaa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yäl̄nabajn par tejpas loonu

¹ Galooli che gajd Dios gun guedxliuj, agac nabajn Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä ñaani. Laani najc Diidx ni runiidx yäl̄nabajn par tejpas loonu.

² Baluilojni loonu; reapost bahuiinu lojni. Ni'cni rniä lojtu, nabajn Jesucrist par tejpas. Rniliäpac nabannäj Jesucrist Dios. Baluui Dios Jesucrist loonu.

³ Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtenu najc tejtis con Dios, nājza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu.

⁴ Cagucuaä rediidxre lojtu te guibalazduxhtu.

Dios najc Bajl

⁵ Naj cagusule'ä rediidx nani baluui Jesucrist loonu. Dios najc bajl. Guiraa redzuun ni rujnni, ganax dzunsa'cni. Xhet yäl̄nacäjydi yu' lo Dios.

⁶ Palga chutis tejnu naa, tejtis najc xhigabnu con Dios, niluxh rienu redzunguijdx, rniinu didx-xhii, runijtnu dinu chasanäj xtidx Dios.

⁷ Palga nabajnnu lo bianij si'cni nabajn Dios lo bianij, tejtis xhigab rienu con resa'nu. Dxejc rusiaza xtiejn Jesucrist Xi'n Dios lastoonu che rienu dojl.

⁸ Palga naanu xheti xtoj̄nu, rusgueenu lagajc nuunu, luxh dinu ga'p xtidx Dios neñ lastoonu.

⁹ Palga guicäjpn̄u lo Dios guiraa redojl̄ ni cayennu, siäl̄lajz̄ni xtoj̄nu, sudzucajni rextoj̄nu, sa'csi laaca rujnni luxh gulii najc rextiidxni.

¹⁰ Palga guinuunu dinu niujn dojl̄, rniinu najc Dios si'c te bejn̄ ni rnii didx-xhii sa'csi anaj Dios yu' xtoj̄nu, luxh dizanu ga'p xtidx Dios neñ lastoonu.

2

Racnäj Jesucrist nuunu nez loj Dios

¹ Guejbtu, resa'ä nani huililajz xtidx Dios, cagucuaä rediidxre lojtu lo guiijtz te na'c guntu dojl̄. Niluxh palga jiennu dojl̄, racnäj Jesucrist nuunu, rniinu xcuentnu lo Dios, sa'csi xheti xtoj̄ni.

² Gujt Jesucrist xcuentnu lo crujz. Gudijxni rextoj̄nu lo crujz. Luxh et rextoj̄tisnu gudijxni. Gudijxni rextoj̄ guiraa rebejn̄ ni re' lo guideb guedxliuj.

³ Palga rusoobnu rextidx Dios, huenliisi rluii riembeenu Dios.

⁴ Cheni rnii te bejn̄, “narä rumbeäni”, niluxh dini gusoob rextiidxni, rusgueeni resabejn̄ni. Di lajz̄ni nilii xtidx Dios.

⁵ Palga rusoobnu xtidx Dios, guliipac rinälaaznu Dios, ni'c najnnu nabannäjnuni.

⁶ Cheni rniinu nabannäjnu Jesucrist, nanabpac guibañsa'cnu si'c gubajn̄ Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli.

⁸ Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajn̄ lo yäl̄nacäjy. Baluui Jesucrist redidxcoobga loonu. Guliipac najc Dios si'c bajl. Dini guibajn̄ lo nacäjy.

⁹ Palga chutis tejnu rnii, “nabañä lo nianij xten Dios”, niluxh rdxe'chni lo resa'ni, lo yälñacäjy yu'ni.

¹⁰ Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljajz gunni dojl.

¹¹ Niluxh palga rdxe'chnu lo resa'nu, nabajñnu lo yälñacäjy sa'csi riennu dojl, sasaanu lo yälñacäjy. Nicla gacheenu canejz chonnu, sa'csi ruscäjy beñdxab balojnu.

¹² Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo cruzj gudijx Jesucrist rextojñnu.

¹³ Cagucuaä rediidxre lo guejbtu, redad beñgool, sa'csi huililajztu rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidx beñdxab.

Cagucuaä rediidxre lojtu rexi'nä, sa'csi rumbeetu Dios.

¹⁴ Abacuaä rediidxre lo guejbtu, redad beñgool, sa'csi numbeetu Jesucrist nani nabajñ galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx beñdxab.

¹⁵ Na'c guichagljajztu guntu renani rujn rebejn nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejtü rehxixtenti ni ra'pnu lo guedxliuj, dxejc dinu chanälajz Dios.

¹⁶ Rebeñ guedxliuj ni di chalilajz xtidx Dios rchagljajzreni rujnreni redzunguijdxre: rujnreni dzunguijdx nani rchagljajz tiejxhrene; rujnreni dzunguijdx nani rchagljajz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac.

¹⁷ Luxh rnitlojpac guedxliuj. Sinitlojza guiraa reni rchagljajz rujn rebeñ guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibaññajñni par tejpas.

Didx guli näjza didx-xhii

¹⁸ Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejn diajgtu siääd niguiiga. Naj yu' xhidajl reniguii nani rdxechlajz lo Crist. Ni'c alaracheenu asiäddzungajxh dxejga che guluiloj niguiiga.

¹⁹ Yu' xhidajl rebejn ni rdxechlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

²⁰ Gule Dios Jesucrist. Jesucristre baniidx Sprit Dxan xten Dios loonu te gacheenu xhini'c najc redidxliipac.

²¹ Et sa'csi ditu gan xhi diidx najc didx guli bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guli, anajntu dina gusgueä la'tu.

²² Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios.

²³ Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴ Colgusoob rediidx ni biejn diajgtu galooli che huililajztu rextidx Dios. Palga rusoobtu rediidxga, nabaññajtu Dios näj xi'nni Jesucrist.

²⁵ Abia'n Jesucrist diidx guniidxni yälñabañcoob loonu. Naj ara'pnu yälñabajñre, ra'pnuni par tejpas.

²⁶ Abacuaä rediidxre lojtu xcuent rebejn ni rlanj chalilajztu rediidx ni xhet guliidi.

²⁷ Baxhal Jesucrist Sprit Dxi xten Dios loonu. Rbäjzni nen lastoonu. Dinu guiquiin chu stee bejn guluii loonu xhi diidx najc gulii, sa'csi lagajc Sprit Dxi xten Dios ruluii xtiidxi loonu. Naj ruluiini la'tu guiraa ni najc gulii, dini gusguee la'tu. Colguibanäj Jesucrist; colgusoob xtidx Jesucrist si'cni ruluii Sprit Dxi xten Dios lojtu.

²⁸ Naj guejbtu resa'ä, colguibanäj Jesucrist, te che jiädsacni lo guedxliuj sisiutzu'tznu nejz lojni, dinu guitujy nejz lojni.

²⁹ Anajntu laaca najc Dios. Anajntu renani rusoob xtidx Dios sasanäjreni Dios, ni'c najcreni xi'n Dios.

3

Rexi'n Dios

¹ Bahuii xho huinälazduxh Dios nuure, ni'c anaj Dios nuure najcnu rexi'nni. Luxh gulii najcnu rexi'n Dios. Reben guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu.

² Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani.

³ Che rnaj laaznu sidzujn dxej gac tejganu si'c ni najc Jesucrist, dxej rbanša'cnu si'c ni gubajn Jesucrist lo guedxliuj.

⁴ Di rebejn ni rujn dojl gusoob leii xten Dios. Che riennu dojl, runijtnu lo leii xten Dios.

⁵ Racbeenu Jesucrist biäd lo guedxliuj, gujcn niguui te guj badzucajni rextojlnu. Laani dini niujn dojl.

⁶ Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni.

⁷ Resa'ä, na'c chalilajztu didx-xhii ni rni bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist.

⁸ Rebejn nani rujn dojl najc xi'n bendxab. Galodooli rujn bendxab dojl. Ni'cni biäd Jesucrist Xi'n Dios lo guedxliuj te gudzucajni redojl nani rujn bejn xcuent bendxab.

⁹ Rebejn nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios nen lastooreni. Direni gun dojl, sa'csi najcreni xi'n Dios.

¹⁰ Si'c riembeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäj chanälajznu resa'nu

¹¹ Lagajc rediidxre biejn diajgtu galooli che huililajztu rextidx Dios: colchanälajz resa'tu.

¹² Xhet si'c di toCain nani gujcn xi'n bendxab. Bejn dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx.

¹³ Na'c guidxelojtu che guidxechlajz rebejn lojtu.

¹⁴ Racbeenu dirunu sa lo xnezyuj yälgujt, sa'csi dinu guidxechlajz lojz resa'nu. Rajpnu yäl nabajn par tejpas sa'csi rionälaznu resa'nu. Chutis tejni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni.

¹⁵ Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnu che rugu't te niguui te bejn dini ga'p yäl nabajn par tejpas.

¹⁶ Racbeenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäjl gacnäjnü resa'nu, mase guetnu lacuaa guetreni.

¹⁷ Chutis tejnu ni rajp xhidajl xhixtenni, luxh dini gacnäj nicla tejnu ni xhet rajpdi, di bejnğa chanälajz Dios.

¹⁸ Guejbtu resa'ä, na'c chanälaaznu resa'nu con rextiidxtisnu, na'c guinitisnu rionälaaznu resa'nu. Palga rionälaazpacnu resa'nu, sacnäjnü resa'nu.

Sisiutzu'tznu nez loj Dios

¹⁹⁻²⁰ Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac beṅsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexi'nni.

²¹ Rniä lo guejbtu nani rinälazä, palga lagajc lastoonu rnii loonu, “cagu-sooblu xtidx Dios”, sisiutijp lastoonu che rbedx-rniabnu lo Dios.

²² Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaa lajz Dios.

²³ Dee najc rediidx ni gunibee Dios gusoobnu: chalilaaznu xtidx Dios, diidx ni rnii xho gujt Jesucrist lacuaa nuunu, chonälaazzanu resa'nu si'cni gunibee Dios.

²⁴ Palga rusoobnu guiraa nani gunibeeni, nabaṅṅäjnuni, si'cza nabaṅṅäjni nuunu. Nancheenu nabaṅṅäj Dios nuunu, sa'csi baniidxni Sprit Dxan xtenni te cuääz neṅ lastoonu.

4

Scree gacbeenu xhi didx najc guliipac

¹ Guejbtu renani rinälazä, na'c chalilajztu rextidx chutis bejn nani naa, “rniä rextidx Dios lojtu”. Ganiddoo colgula'tz rextiidxni te gacbeetu don chu xtidx caniini, sa'csi xhidajl bejn sini lojtu, “nuunu rniinu rextidx Dios”, niluxh caniisireni si'c.

² Scree gacbeenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacnäj Sprit Dxan xten Dios, reni'c canii xtidx Dios.

³ Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxechduxh loj Jesucrist, luxh naj abidzujn rextzuun niguiiga lo guedxliuj.

⁴ Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neṅ lastoonu abejnni gaan lo beṅdxab ni nabajn lo guedxliuj.

⁵ Rebejn ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi.

⁶ Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rnii didxliipac. Scree gacbeezanu chu rebejn rnii diidx ni xhet guliidi.

Rinälaajz Dios rebejn

⁷ Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäj nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh guli riembeenu Dios.

⁸ Palga chutis tejnu di chanälajz resa'ni, dizani gumbee Dios, sa'csi lagajc Dios racnäj chanälaaznu Dios, racnäjzani chanälaaznu resa'nu.

⁹ Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo guedxliuj te gudijxni rextojlnu lo cruzj te si'c guibaṅṅäjnuni par tejpas.

¹⁰ Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhałni Xi'nni lo guedxliuj te gudijxni xtojłnu lo crujz.

¹¹ Rniä lo guejbtu nani rinälazä, si'cni rinälajz Dios nuunu, sigajcza rłajzni chanälaaznu resa'nu.

¹² Nicla tej bejn gajd fii lo Dios. Niluxh palga chanälaaznu resa'nu, Dios nabajn nen lastoonu, dxejc guli rinälaazpacnu Dios.

¹³ Nancheenu nabaññajnu Dios, sigajcza nabaññajpac Dios nuunu, sa'csi abaxhałni Sprit Dxan xteni cuääz nen lastoonu.

¹⁴ Narä näjza reapost abahuiinu loj Jesucrist. Caniä lojtu abaxhał Xtadnu Dios Xi'nni lo guedxliuj te gusłaani rebejn lo xtojłreni.

¹⁵ Chutis tejnu ni rnii “Jesucrist najc Xi'n Dios”, nabaññajni Dios, nabaññajza Dios bejnğa.

¹⁶ Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabaññajnu Dios, nabaññajza Dios nuunu.

¹⁷ Naj sanälaaznu Dios si'cni rłajzni luxh palga chanälaaznuni guidebtis ni guibajnu, dinu guidxejb che guidzujn dxej ni gun Jesucrist yälguxhtis lo guedxliuj. Dinu guidxejb sa'csi guideb nabajnu lo guedxliuj, nabaññajnu Dios si'c nabaññaj Jesucrist Dios.

¹⁸ Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejndi trabajw, gajd bejnğa chanälazsa'c Dios.

¹⁹ Rinälaaznu Dios sa'csi ganiddoo Dios huinälajz nuunu.

²⁰ Palga chutis tejnu naa “rinälazä Dios” niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii.

²¹ Agunibee Dios, nani rinälajz Dios chanälajzni resa'ni sigajc rinälajzni Dios.

5

Riennu gaan lo guiraa redolguijdx lo guedxliuj

¹ Chutis ni rililajz Jesús najc Crist nani baxhał Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios.

² Palga rinälaaznu Dios, palga rusoobzanu xtiidxni, dxejc najnu rinälaaznu resa'nu nani najc Xi'n Dios.

³ Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni.

⁴ Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist.

⁵ ¿Chuni'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

Rediidx ni baluii Dios loonu xcuent Jesucrist

⁶ Biääd Jesucrist lo guedxliujre. Birobnis Jesucrist, baxhe'zani xtiejnni lo crujz. Xhet ganaxdi te guirobnisni biäädni, näjza te guxhe'ni xtiejnni lo crujz che biäädni. Sprit Dxan xten Dios canii rediidxre. Guliipac rextiidxni.

⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios.

⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo crujz che gujtni.

⁹ Palga rililaaznu xtidx rebejn ni rbäjz lo guedxliuj, nungäj̄l chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios.

¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist nen lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist.

¹¹ Scree najc rediidx ni rnii Dios. Abaniidx Dios loonu yäl̄nabajn̄ par tejpas. Yäl̄nabajn̄ga biäd̄nä Xi'nni, Jesucrist.

¹² Palga nabannäjnu Xi'nni, rajpnu yäl̄nabajn̄ par tejpas. Palga dinu guibannäj Xi'nni, dinu ga'p yäl̄nabajn̄ par tejpas.

Xtixtios con diidx ni rulijdx

¹³ Abacuaä rediidxre lojtu ni rililajz rextidx Jesucrist te gacbeepactu rajptu yäl̄nabajn̄ par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni.

¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujn dojl̄, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl̄nabajn̄ lojni. Niluxh yu' te dol̄roduxh. Chutis te bejn ni gun dojl̄ga, di Dios gudeed lo bejn̄ga yäl̄nabajn̄ par tejpas. Dizana guiniä guiniabtu lo Dios xcuent bejn̄ ni rujn dol̄roga.

¹⁷ Guiraa redzunguijdx nani rujn rebejn̄ najc dojl̄. Niluxh yu' redojl̄ nani di gun gunijt bejn̄ lo Dios par tejpas palga jiu bejn̄ xtidx Dios.

¹⁸ Racbeenu guiraanu nani najc xi'n Dios di rlaaznu jiennu dojl̄. Racnäj̄ Jesucrist nuunu te di bej̄dxab gun gaan nuunu, te dizanu gusoob xtidx bej̄dxab.

¹⁹ Nancheenu nuure najcnu xi'n Dios, niluxh guiraa rebejn̄ nani riutis rextzun guedxliuj cagusoobreni xtidx bej̄dxab.

²⁰ Najnnu biäd̄ä Jesucrist Xi'n Dios lo guedxliuj. Baluini nuunu rextidx Dios te jiembeenu Dios, nani najcpac Dios gului. Nabannäjnu Dios ni najc gului, sa'csi nabannäjnu Jesucrist. Laani najc Dios ni najc gului. Caguniidxni loonu yäl̄nabajn̄ par tejpas.

²¹ Resa'ä, na'c guzuxhijbtu lo rebanäj̄b ni xhet guliidi. Sugacni si'c.

Guijtz Ni Rojp Ni Bacuaa Juan

Diidx gulii nájza yálrinälaaznu resa'nu

¹ Narä nacä beṅgool. Cagucuaä guiitzre lojlu nane' nani agule Dios, nájza loj rexi'nlu. Rinälazäpac la'tu luxh xhet xtebädi; nájza guiraa reni rililajz xtidx Dios sanälajztu.

² Nuure rinälaaznu la'tu sa'csi yuchee neṅ lastoonu rediidx nani najc gulii, luxh dilajznu jiäl rediidxre.

³ Xtradnu Dios, nájza Jesucrist Xi'nni, gacnäy nuunu, jiareni nuunu, guscuedxi lajznu con xcälñajn didxlii nájza yálrinälaajz.

⁴ Bibalazduxhä che gucebeä yu' rexi'nlu ni rusooob xtidx Dios si'c gunibee Dios loonu gusoobnuni.

⁵ Nane' ni gule Dios, diidx nani rniabä gusoob guejblu naj dini gac didx-coob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanälaaznu resa'nu.

⁶ Sinälaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

Rebejn ni rnii garenca diidx ni xhet guliidi

⁷ Balti bejn birii loonu, naj cagusgueerani xhidajl bejn ni re' lo guedxliuj. Caniireni di Jesucrist najc niguii che biädni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist.

⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejn ni rlajz gugu'ch xtiidxpacni lo xtidx Jesucrist, di bejnğa gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios.

¹⁰ Palga jiäd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'."

¹¹ Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäzani redzunguijdx ni rujn bejnğa.

Rudeedni xtixtios

¹² Xhidalduxhru diidx rlazä guiniä lojtu, niluxh di rlazä gucuaäreni lo guiitz. Cabäzä jiädhuiä lojtu ro'c te guiniä rediidxre lojpactu, te guibaalajztu.

¹³ Rexi'n bäjllu, nani aguleza Dios, ruxhaḷ xtixtios lojlu. Ni'ctis najc ni rucuaä lojtu. Sugacni si'c.

Guijtz Ni Riojn Ni Bacuaa Juan

Cagucuaani didxa'c lo Gayo

¹ Narä nacä te bengool. Caguxhalä guiitzre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu.

³ Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist.

⁴ Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

⁵ Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riäädreni lojlu.

⁶ Aräjpreni lo resa'nu ni rdxagsa' ree xho huinälajzlureni näjza xho gucnäjlureni. Laaca bejnlu gucnäjlureni resa'nu, badeedlu xhi biquiinreni lo nejz che biriireni rolizlu. Si'cza nanab jiennu lo guiraa resa'nu, nalajznu rebejn ni ruluii xtidx Dios.

⁷ Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist.

⁸ Si'cza nanab gacnäjnu rebejn ni riluii xtidx Jesucrist nen garen-garen guejdx, te si'c jiennänu xtzuum Dios guiraa renani ruluii xtidx Dios.

Di Diótrefes niujn redzunsä'c

⁹ Abaxhalä te guiitz lo rexpejn Jesucrist ro'c. Niluxh Diótrefes rlanj guinibeeni lo resa'nu ro'c. Dini jiu xtidxä.

¹⁰ Ni'cni che guidzunä ro'c, narä siniä rediidxre lo resa'nu ro'c, che guidx-aag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riääd ro'c, mase rlanj chu tejtü fiireni. Luxh rlanjni gudxojni guidxagnäjtü rebejn nani ruhuii resa'nu ni ruluii xtidx Jesucrist.

¹¹ Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

Rniireni didxa'c xcuent Demetrio

¹² Guiraa rebejn ganax didxa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxa'c xcuentni. Najnlu guliipac rediidx ni rniä.

Rudeedni xtixtios

¹³ Rlazä guiniä xhidalduxhru diidx lojlu, niluxh di rlazä gucuaä rediidxga lo guiitzre.

¹⁴ Runä xhigab di gaclaa jäadhuiä lojlu, dxejcti jieinu diidx.

¹⁵ Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga reexamigwä ro'c.

Guijtz Ni Bacuaa Judas

Judas cagucuaa loj renani agule Dios

¹ Narä nacä Judas, ni rujn xtzuum Jesucrist. Narä nacäza betz Jacob. Cagucuaä guiitzre loj renani agule xtdnu Dios, renani sanälazduxhni, nani cayapcheeni par Jesucrist.

² Rniabä lo Dios, gulaslazduxhruni la'tu, guscuecdxiduxhruni lastootu, gacnäjni la'tu, guniidxruni yäl'sanälajz.

Renani rului yäl'rusguee (2 Pedro 2:1-17)

³ Rebetzä nani sanälazä, che cayunduxhä xhigab gucuaä lojtu xcuent yäl'rusläa lo rextojl'nu ni rajpnu, benä xhigab riojbru gucuaä te guiitz lojtu te gulidxätu sudzu'tznu, gapdzu'tztu yäl'rilibajz ni basule'reni par tejpas loj rexpejn Dios.

⁴ Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chalilajz xtidx Dios, najcreni beñguidxduxh, rutzuréreni xcäl'racnäj Dios, rujnreni xtuju, sanäreni te yäl'nabañdxuudx. Rbälazzareni xpaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejpas, rlazä gusnä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni.

⁶ Rexangl Dios nani di nucuadiajg diidx, ni birii cadro rlajz Dios churen, reni'c basäu Diosreni cadro nacäiboo te cabäzreni gun Dios xcäl'guxhtisni lojreni.

⁷ Si'c bejn ni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii birääch, regunaa guyunäjzaren, regunabirääch. Dxejc gudejdreni trabawduxh huejcreni neñ guiboo par tejpas xcuent xtojlni, ni'c najc te yäl'rulijdx loonu.

⁸ Rebejn ni riu' lojtu naj najc si'c reben galoo ni bejn dojl. Nabajjnreni si'c ni bisieedreni lo guiraa nani rului yäl'rnixcal, ruxhinreni tiejxhreni, rbälazreni xcäl'rnibee Dios, rniyajzaren rexangl Dios.

⁹ Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: "Sugun Dad Jesucrist yäl'guxhtis lojlu."

¹⁰ Niluxh rebejn ga rniyajreni nicla ganreni xhini'c rniireni. Niluxh nani racheepac rebejn ga najc yäl'najn nani nicla niquiin nisieedreni, lala sa' nani rujnza reguidxaa, ni xheti xcäriejn, reni'c sujn nitlojreni.

¹¹ ¡Aii! ¡Riazanuren! Sanajlreni xnezyuj Caín, luxh te gunreni gaan meel ruxhunlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni.

¹² Laaren najcreni te xtuiduxh lo rexchej ni rajc guidoo, direni guidxeyb gauxchenäjreni la'tu, sa'csi xque'tisreni riuren. Najcreni si'c te xcäy ni xhet nisguij siädnäni, nani sanä bej nezree nezrec; najczaren si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäädx.

¹³ Laaren najc si'c nis ni räjs lo nisdoo, che cayajc te bidonduxh, säa, siädni, carii xtujujreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejpas.

¹⁴ Xcuentza redee agunixgaaza Enoc ni najc xagdodoo Adán, rájpní: “Bahúí, siádná Dios xhidalduxh xanglní

¹⁵ te gunní yálguxhtis loj guiraa bejn te gusacsíduxhni guiraa rebejn ni di gumbee Dios xcuent redolduxh ni bejnrení, xcuentza redidxnaj ni guniyaj rebendolduxhre Dios.”

¹⁶ Rebejnre laa rení rmojm, runduxhrení quej, rujnrení si'ctis ni rlajz tiejxhrení, rniirení guiraloj didxnaj, rniisirení didxsa'c loj rebejn te gun rebejnnga si'c ni rlajzrení gunrení.

Rulijdxni rebejn nani ahuililajz xtidx Dios

¹⁷ La'tu, betzá ni sanälazá, riäjł guinaj lajztu rediidx nani guní reapost xten Dad Jesucrist,

¹⁸ sa'csi guniirení lojtu: “Neñ redxelult che guibisac Jesucrist, su' bejn ni suxhiznäjnrení rextidx Dios, sujnrení si'ctis guisia' lajzrení.”

¹⁹ Redee najc renani run rlia' rexpejn Dios lo sa'rení; rinuuzarení ni yu' lo guedxliuj, diza Xpřit Dxan xten Dios cuääz neñ lastoorení.

²⁰ Niluxh la'tu rebetzá nani sanälazá, coltioob loj xcälřililajztu ni siääd lo Diostis, colnab lo Dios xcuent yälřnibee xten Xpřit Dxan xtenní.

²¹ Colguibajntis lo yälřsanälajz xten Dios, colřsusintis lał ni cayunlojtu yälřrulaslajz xten Dad Jesucrist ni guniidx yälřnabajn par tejpas.

²² Colgacnäj renani di chalilazsa'c te chalilajzpacrení xtidx Dios.

²³ Colyacnäj sgaii te guibicajrení lo dojl, gudobxhaxrení, colyejn xhigab lo guiboo cayejrení. Colyacnäj sgaii bejn, colgulaslajzrení con yälřrdxejb, niluxh colnatiru te di guntu lagajc dojl ni rujnrení. Gulälaz nani rujnrení, nani ruxhiñrení.

Redidx lult

²⁴ Colguiliä'p xpala'n Dios nani racnäj la'tu didi jiajbtu lo dojl, nani rujn sajc suutu lo xcälřřimbicha' Dios, nayadujtu, rbaduxh lajztu.

²⁵ Yu' tejtis Dios. Laatisni rajpni yälřnajn te guslaani nuurnu lo dojl xcuent ni bejn xtadnu Jesucrist. Colguiliä'p xpala'nni, rajpni guiralii yälřnibee, yälřřimbicha', galooli, näj naj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Baluijoj Jesucrist lo Juan

¹ Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhaḷ xanglni lo Juan, te baluiini guiraa recosga lojni.

² Ni'cni bacuaa Juan lo guijtzre guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani rol guijtzre xcuent recos ni churu gac, renani riuza rediidxga, renani rguchee rediidxga neḅ lastooni sa'csi siäddzũgajxh redxej che soob rediidxga.

Juan cagucuaa guijtzga lo gajdz guidoo

⁴ Narä nacä Juan. Cagucuaä guijtzre loj guigajdz reguidoo ni tre' lo región Asia. Dios guspalajz la'tu, guscuecdxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz respit ni suga' guideb gabi cadre rniweeni,

⁵ näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo guban̄sac lo rebengut, nani rniweena lo guiraa rereii loj guedxliujre. Laani sanälazduxhni nuure, laani rudzucajni xtojḷnu con xtieljnni.

⁶ Laani bejnii gacnu te beḅro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

⁷ ¡Colgacbee! Laani sibisacni lo rexcäy, luxh guiragajc rebejn suhuui lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc reletr A con Z —rni Dad Dios—. Nabanä nadxej, sigajcza gubanä nani, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

Bahuiä loj Jesucrist lo xcälrdimbicha'ni

⁹ Narä, Juan, bejtztu, näjza ni cadednäjtũ trabajw xcuent Jesucrist, ni riunäjzatu cadre rniweena Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhaḷreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre.

¹⁰ Te dmingw, laḷ ni cayunää Dios, guzacä astoo canixcaḷä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet,

¹¹ najni loä:

—Narä nacä ganiddoo, nacäza lult. Lo te guitro bacuaa nani filu, dxejcti baxhaḷ guijtzga loj guigajdz guidoo ni yu' nez Asia, neḅ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejc gubireä te bahuiä chuni'c canii loä. Che gubireä bahuiä lo gajdz gandilier oor.

¹³ Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujḅ lo ni'lini, lastoozani naliib te cinturonḅ gulajz ni najc ganaxduj oor.

¹⁴ Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcru rbebajl lojni.

¹⁵ Ni'ni rdimbicha' si'c guiib ni laa bronz che cayejcni lo guiboo. Xse'ni riejn nadipduxh astoo che riäjt nisro nen regueuu.

¹⁶ Ladbee ca' naani gajdz balxhaguibaa; ro'ni rii te espad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxejblu, narä nacä ni gubajn galooli, narä nacäza ni guibajn lult.

¹⁸ Narä nacä ni nabajnpac; gutä, niluxh naj nabanä par tejpas. Rapä yälnibee lo yälgujt näjza lo gabijl.

¹⁹ Ni'cni bacuaa recos ni abahuiilu, nani cayajc naj, näjza nani churu gac.

²⁰ Dee najc laa yälxhiga'tz xten regajdz balxhaguibaa ni bahuiilu lo naä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

2

Rediidx nani chää loj rexpejn guidoo Éfeso

¹ Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, näjza nani rsiaj galäii guigajdz gandilier oor, rnii rediidxre lojtu:

² Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu benlatsiaj; näjza bala'tztu xho rujn rebejn nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueereni bejn.

³ Rsiudzu'tztu, rujntu huant xcuent xtidxä, gajdtu guidxajc.

⁴ Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo.

⁵ Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechla-jztu, sudzucaä xcandilieertu cadre suga'ni.

⁶ Laaca rujntu rbälaztu xtzuun rebejn ni laa nicolaítas, sa'csi näjza narä rbixlazä xtzuunreni.

⁷ Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yälnabajn, ni yu' xhaguibaa cadre yu' Dios.”

Rediidx ni rniini loj rexpejn guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu:

⁹ Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz bendxab.

¹⁰ Na'c guidxejblu trabajw nani agojl tedlu. Aree bendxab gusäl gaii sa'tu nen latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yälnabajn.

¹¹ Nani rlanj cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojppa lojni.”

Rediidx ni rniini lo rexpejn guidoo ni yu' Pérgamo

12 Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu:

13 Narä nanä caro rbäjztu, rbäjztu lo guejdx cadre rnibee Beñdxab. Rsi-udzu'tztu xcuent xtidxä. Laltis rsiudzu'tztu rililajztu xtidxä, mase neñ redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadre rnibee Beñdxab.

14 Niluxh yu' tiop-choñ xtojltu. Lojtu nadxaag gaii beñ ni rujn si'c beñ toBalaam agujc xchero. Laani baseedni Balac xho gunni te jiajb rexpeñ Israel neñ dojl, baseednireni gaureni recos ni gurej lo dxan nez loj rebanäjb, baseedzani rexpeñ Israel guesnäjreni chutis gunaa.

15 Sigajcza nadxaag lojtu gaii beñ ni riu rediidx ni rusule' reni laa nico-laítas.

16 Colgusiechxgaa lajztu, te di jiälgacä lojtu te gucuanääreni spaad ni yu' ro'ä.

17 Nani rlanj cuadiajg diidx, sucuadiajgni diidx ni rnii Sprit Dxi xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibáz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

Rediidx nani rniini lo rexpeñ guidoo ni yu' Tiatira

18 Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rrebajl balojni, ni rdimbicha' ni'ni si'c bronz, ni'c rnii rediidxre lojtu:

19 Ananä xtzuuntu, sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu.

20 Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni beñ. Luxh xcälruseedni cagusgueeni rexpenä nani ahuililajz xtidxä, te naj rujnreni cosguijdx, si'c yälresnäj ni di gac chäälni, rajwzarenini nani gurej lo dxan xten rebanäjb.

21 Aguläzä xchej te gusiechlajzni, gusaanni gunni dojl, luxh naaddini gusiechlajzni xcuent redzunguijdx ni rujnni.

22 Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni.

23 Sugutxhiä, sunitloä rexi'n gunaaga, te si'c gacbee guiraa rebeñ ni yu' neñ reguidoo narä nacä ni rula'tz rexhigab ni yu' xcäriejnreni, näjza yälrililajz ni yu' neñ lastooreni. Te gacbeezarenini narä sunidxä lo tejgatu ni riäjł xca'tu xcuent redzuun ni rujntu.

24 Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten beñdxab, xhetru rniädi lojtu, dirunä gutalä xtzuuntu.

25 Colyapdzu'tz rextidxä nani arajptu dxejli ni guibisacä lojtu.

26 Nani gun gaan lo dojl, näjza nani cagusoob xtidxä dxe lultli, lojni sudedä yälrnibee te guinibeeni renacion.

27 Si'cni baniidx Xtadä yälrnibee loä, sudedä yälrnibee lojni, te guinibeeni guiraa rebeñ guedxliuj, gunnäjni yälguixhtis lojreni te barguiib si'c rujn ni runchee guesbajñ, rlia'ni guiraa regues nani xhet sajcdi.

28 Sunidxäza bale' xhaguibaa ni rii rsildoo (ni säloj guibannäjnu Dios).

29 Nani rlanj cuadiajg sucuadiajgni diidx ni rnii Sprit Dxi xten Dios loj reguidoo.”

3

Rediidx nani rniini lo rexpejn guidoo ni yu' Sardis

¹ Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujttu, dirutu gun xtzunä.

² Colguibajn, colgula'tzru nani rapsijctu xcuent rextidxä nani ameer nitloj nen lastootu. Narä ruhuiä ditu niunsa'c dzuun xtenä nez loj Dios.

³ Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibajn, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu.

⁴ Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjreni.

⁵ Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadre caj laj renani sibajnnäj Dios par tejpas. Sicäpäza nez loj Xtadä näjza nez loj guiraa rexquixhajgni, bejnga najc rexpenä.

⁶ Nani rlanj cuadiajg diidx, sucuadiajgni diidx ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi toDavid (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu:

⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä.

⁹ Suhuiitu xho gunä rebejn ni yu' lo guidobäz xten bendxab. Rniisireni najcreni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu.

¹⁰ Sa'csi basoobtu xtidxä ni gunibeä sutijptu, na'c jieedtu, ni'cni narä sacnäzatu che guidzujn dxej tedtu trabajw. Luxh orga ameer guidzujn lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj.

¹¹ Narä di gaclaa jäälä; gopdzu'tz ni rajptu, te rut gudzucajdi ni gunidxä xca'tu.

¹² Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcnä te bejn nani gac guinibee cadre yu' Dios. Sibajnni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncoob, nani guirii xhaguibaa cadre yu' Dios; lojni sucuaäza laä ni najcza nacoob sa'csi najcni xpenä.

¹³ Nani rlanj cuadiajg diidx, sucuadiajgni ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Laodicea

¹⁴ Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuäz guiniini didxliiga, nani guläxtiej guedxliujre näj guiralii ni benchee Dios, laani rniini scree:

¹⁵ Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni!

¹⁶ Ni'cni, sa'csi najctu si'c nistiib, ditu gac si'c nisnajl, niclaza gactu si'c nislää, sibäro'ä la'tu.

¹⁷ Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu beñ gubijn, te beñ probduxhlu, di lojlu jien, luxh suga'lu xhabäälü nez lo Dios.

¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujylu suulu xhabäälü; gusiiza unguent loä te chää balojlu, te jien lojlu.

¹⁹ Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu.

²⁰ Colhuii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnääni, te guibañsa'czani nez loä.

²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadre rnibeeni xhaguibaa.

²² Nani rlajz cuadiajg diidx, sucuadiajgni diidx ni rnii Sprit Dxiän xten Dios loj reguidoo.”

4

Calä'preni xpala'n Dios xhaguibaa

¹ Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcu gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaä ree, te guluiä lojlu recos ni churu gac che luux gac recosre.

² Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadre rbej nani rnibee xhaguibaa, luxh ro'c sobga' nani rnibeeni.

³ Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jasje, näj cornalina. Guideb gabi yagxhil cadre rnibeeni dejd te xquitgubijdx ni rbebalsejs si'c guisa'c ni laa esmeralda.

⁴ Guideb gabi cadre rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejegareni.

⁵ Nez lo yagxhilro cadre rnibeeni ri reyälrdinya' näjza guzii. Nez loj cadre rnibeeni cayalguij gajdz bajl ni najc gajdz Sprit Dxiän xten Dios.

⁶ Nez loj cadre rnibeeni yu' astoocanu te nisdoo ni rien si'c te guiuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzeneni yu' balojni.

⁷ Manganidga najc si'c te lion; man ni rojppga najc si'c te gonbäz; man ni riojnga rujn lojni si'c rujn loj te niguii; man ni rdajppga najcni si'c te bisiro cagutajp xhaguibaa.

⁸ Niluxh guidap remanga tejegareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni: Dxiän, dxiän, dxiän najc Dad Dios ni rajp yälrnibeduxh, nani yu' galooli, nani yu' naj, nani churu jääd.

⁹ Guidap remanga rliä'preni xpala'n Dios, rusuxhijbreni rajnrenini, rdeedzareneni xquixtios loj nani rnibee par tejpas.

¹⁰ Dxejc guigalbitap rebengool, suzuxhijbzareni loj nani rbej lo yagxhilro, te ganreni nani nabajn par tejpas. Sucuaareni xcoronreni nez loj xyagxhilroni, siniireni lojni, säjpreni:

¹¹ Dad Dios baxhuaannu, Guejbpac lu riäj l xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiej guira'ti nani yu' naj, yu'reni sa'csi rlajz Guejblu chureni, ni'cni benchee Guejblu guiraareni.

5

Te guijtz näj te ni najc Xiil xten Dios

¹ Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te bilii guijtz. Caj diidx nez lojni caj diidx nez dejtzni, nadxe'ni, caj gajdz seii lojni.

² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj l guxhal guijtzre? ¿Chuni'c riäj l gutiäjs reseiire?

³ Niluxh nicla tej bejn di nidxäj l ni riäj l gutiäjs reseiiga te guxhalni guijtzga; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäj l chu niajc nuhuii lo guijtzga.

⁴ Narä ronduxhä sa'csi nicla tej rut riäj l di gutiäjs reseiiga, niclaza ni riäj l gol guijtzga, niclaza ni riäj l fiitis lo guijtzga.

⁵ Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdo toJudá, xagdo toDavid, abejnni gaan lo yälgujt ni'c naj riäj l guxhalni guijtzga, gutiäjszani guigajdz reseiiga.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj.

⁷ Laani gubigni, cua'ni guijtzga, guläänini naa ladbee xten nani sobga' lo yagxhilroga canibee.

⁸ Che cua'ni guijtzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbejdx, yälrniab xten rexpejn Dios.

⁹ Cayolzareni te dicoob ni najc scree:

Guejblu sacduxh,
riäj lpac xca' Guejblu guijtzga,
gutiäjs Guejblu reseiiga, sa'csi bagu't rebejnlu,
näjza xtiejnlu gudijx xcuent bejn lo Dios.
Gudijxlu xcuent bejn ni najc garen-garen raz,
ni rnii garen-garen didxsaj,
ni siääd garen-garen guejdx lo garen-garen ladxbejn.

¹⁰ Badeedlu gacreni reii näjza bixhojz lo Dios.

Laareni sinibeereni reben guedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhte najcreni, xhidalduxh miyon najcreni.

¹² Dipduxh najc xse'reni, caniireni scree:

Sacduxh Xiil nani bagu'treni,
ni'c riäj l xca'ni yälrnibeduxh, yälrapduxh, yälmanduxh, yälmilagwr.

Riäjlza guiliä'pnu xpala'nni, guzuxhijbnu lojni gaṅnuni, gudeednu xquixtios lojni.

¹³ Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez neṅ guedxliuj näj lo nisdoo, biejn diagä caniireni scree:

Loj nani sobga' lo yagxhilro cadro rnibeeni, näjza loj ni najc Xiil xten Dios, laatisni sacduxhni, guiliä'pnu xpala'nni, guzuxhijbnu nez lojni gaṅnuni, gäbzanu rinibeeni par tejpas.

¹⁴ Dxejcti guidap remanga rnigajcreni scree:

—Sugacni si'c.

Dxejcti guigalbitap rebeṅgool bazuxhijbreni nez loj nani nabajṅ par tejpas, gojṅrenini.

6

Guigajdz reseii

¹ Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te filu.

² Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujṅni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te filu.

⁴ Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälñadoo, yälrbedxilajz, lo guedxliujre, te ju't sa' rebejṅ. Badeedreni te spadro cua'ni.

⁵ Dxejcti che batiäjsni ni riojṅ seiiga, biejn diagä gunii ni riojṅ manga, najni loä:

—Gudaa te filu.

Dxejc bahuiä lo te cabai yas. Nani bijbni naazni te balans.

⁶ Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; choṅ kil salbaad xca'lu gunlu dzuun tebdxej. Niluxh na'c guhuaḷlu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te filu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzn siädnałgajc ni rnibee gabijl. Gula'ni rebejṅ ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebeṅguedxliuj te ju'treni rebejṅga con spaad, näj yälrliaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejṅ nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios.

¹⁰ Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt tejgareni. Dxejc räjpreni lojreni cuäzsijcreni, gusilajzreni, laḷ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigas-boo loj gubijdx si'c te ladyas, sas bäii gujc guidebni si'c rejn.

¹³ Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga.

¹⁴ Dxejcti gunitloj guibaa si'cni rnitloj te guijtze che re'ni, rajcni te bilii. Guiraa redajn näjza reyuj ni re' galäii lo nisdoo biniibreni, bidxaa xljadreni.

¹⁵ Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajczeni baxunreni, huicuatxlojzeni nen rebiliää nen redajn.

¹⁶ Dxejc räjpreni loj redajn, loj reguilaj:

—Colgutejb yejcnu, colgucua'tz nuure loj nani rbej lo yagxhilro xhaguibaa näjza loj yälguxhtis xten nani najc Xiil xten Dios.

¹⁷ Sa'csi abidzujn dxero xten xcälguxhtisni, ¿chuni'c sajc suu nez lojni?

7

Tegayuu tiubitajp mil rexpejn Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg.

² Bahuiä lo stee xangl Dios, ni siääd nez cadre rliejn gubijdx, ca'ni seii xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo.

³ Räjpni lojzeni:

—Guläzsijectero, lał ni guicuaanu te seen lo cuaj reni najc xpejn Dios, te dxejcru sajc guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mil bejn ni bibee loj rexpejn Israel.

⁵ Loj rexpejn Judá bibee tzubitio'p mil; loj rexpejn Rubén bibee tzubitio'p mil; loj rexpejn Gad bibee tzubitio'p mil;

⁶ loj rexpejn Aser bibee tzubitio'p mil; loj rexpejn Neftalí bibee tzubitio'p mil; loj rexpejn Manasés bibee tzubitio'p mil;

⁷ loj rexpejn Simeón bibee tzubitio'p mil; loj rexpejn Leví bibee tzubitio'p mil; loj rexpejn Isacar bibee tzubitio'p mil;

⁸ loj rexpejn Zabulón bibee tzubitio'p mil; loj rexpejn José bibee tzubitio'p mil; loj rexpejn Benjamín bibee tzubitio'p mil.

Benquixhuj ni najcw ladnolbäj

⁹ Dxejcti bahuiä lo xhidalduxh bejn, benquixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilro xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarenizijn.

¹⁰ Dipduxh rniireni, räjpreni:

Dios ni rnibee lo yagxhilro, näjza nani najc Xiilre, baslaareni nuure lo xtojnu.

¹¹ Suga'za guiraa rexangl Dios guideb gabi yagxhilro cadre rnibeeni, näjza guideb gabi rebenool näjza guidap remanga, dxejcti bazuxhijbreni, basajbreni lojzeni nez lo Dios,

¹² räjpreni:

Sugacni si'c. Loj Xtiostisnu colye'tz sacduxhni;
colguiliä'p xpala'nni;
laatisni rajpni yälajn;

lojtisni colgudeed xquixhtios, laatisni colgan,
col_suxhijb lojni; laatisni rajpni yälrnibee näjza yälmilagwr.
Sugacni si'c par tejpas.

¹³ Dxejc gunii te bengool loä, najni:

—Renani najcw reladnolbäjre, ¿chu najcreni? ¿Casiädreni?

¹⁴ Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajwduxh, renani abia rextojlreni sa'csi xtiejn Xiil xten Dios agudijx xtojlreni.

¹⁵ Ni'cni suga'reni nez loj yagxhilro xten Dios dxej-yääl cayujnreni xtzu-
unni nen xquidooi. Ni'cni sacnäy nani sobga' lo yagxhilroga guiraa renani
suga' nez lojni, sunäjtisni laareni.

¹⁶ Dirureni guiliaan, niclaza jiojlreni, diza gubijdx guze'c lojreni, dizareni
gacnanlaa.

¹⁷ Sa'csi nani najc Xiil xten Dios ni sobga' galäi loj yagxhilro xten Dios,
laani cayajpnireni si'c xilbäz, sinänireni cadro yu' nisyä ni rudeed yäl_nabajn
par tejpas. Suspijdz Dios nisbee balojreni, dirureni goon par tejpas.

8

Ni rajc gajdz seiiga

¹ Che batiäjsni ni rajc gajdz seiiga, gucdxi xhaguibaa si'cti med or.

² Dxejcti bahuiä loj guigajdz xangl Dios ni suga' nez loj Dios. Lojreni
badeedreni gajdz trompe't.

³ Dxejctiru biääd stee angl, ca'ni te bacue ni najc ganax oor, bazujnini nez
loj piändxan. Badeedreni lojni naclejn yaal te cachaagnini loj guiraa rextidx
xpejn Dios ni rniireni che rbedx-rniabreni lo Dios, te checni lo piändxan ni
najc ganax oor, ni yu' nez loj yagxhilroga.

⁴ Dxejcti gujxhga nägajc rextidx rexpejn Dios, birii ladsnaa xangl Dios ni ca'
bacue, huä'preni nez loj Dios.

⁵ Dxejcti lagajc anglga cua'ni guiboo ni dzuub lo piändxanga, bachajni
bacue, dxejcti baslojnini lo guedxliuj. Dxejc guyu' te guziduxh, bidinyaduxh,
guczä te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusinreni te
guisloj golreni retrompe'tga.

⁷ Che bil trompetganid, guixob näj guiboo nu'chreni rejn gusloj cayajbreni
loj guedxliuj. Dxejcti huejc ni riojn la' guedxliuj, huejczä ni riojn la' reyajg
näjza guiralii recuaan.

⁸ Che bil ni rojp xangl Dios trompe't ni ca'ni, ascanu yu' chu bacuaani biajb
si'c te danro ni cayejc loj nisdoo. Dxejcti gujc ni riojn la' nisdoo si'c rejn.

⁹ Dxejcti gujt ni riojn la' rebäjl näj guiraa reman ni yu' loj nisdoo. Gunitlojza
ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ni, biajb te balro xhaguibaa,
cayejcn si'c te balguejd. Bitejbni loj ni riojn la' regueuu, näjza cadro rliejn
nis.

¹¹ Laj bajlga najc Ajenjo, ni säloj te cos ni nanladuxh. Ni riojn la' nis gujc nis
nanladuxh. Dxejcti gujt xhidalduxh bejn xcuent nisnanlaaga.

¹² Che bil ni rdajp xangl Dios trompe't ni ca'ni, guxhijñ ni riojn la' gubijdx,
näjza ni riojn la' bäii, näjza ni riojn la' rebal xhaguibaa, bicäyreni. Dxejcti
dirureni guzanij ni riojn la' dxej, näj ni riojn la' yääl.

¹³ Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä reben guedxliuj che guisloj goļ schoņ rexangl Dios retrompe't ni ca'reni. Sidejd reben guedxliuj trabajwduxhru.

9

¹ Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl.

² Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej.

³ Dxejcti lo gujxhga birii betzsu gusujreni guideb lo guedxliuj. Cua'reni yälrnibee gacreni nialajz si'c nialajz renaxejb.

⁴ Cua' remanga yälrnibee na'c gunreni daan loj reguixa', loj recuaan, loj reyagbajñ; rebejntis nani xhet beedi xten Dios caj lo cuajreni, reni'c gusacsíreni.

⁵ Cua'reni yälrnibee na'c ju'tni bejñ, gaii bäii gusacsíreni xcälñayanreni bejñ. Luxh xcälñayanreni najc si'c yälñayan cadro rauya' te naxejb te bejñ.

⁶ Neñ redxejga, siguiil rebejñ yälgujt, luxh direni guidxälñi. Luxh mase rlajzreni guetreni, sibicaj yälgujt lojreni.

⁷ Rebetsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujñ si'c loj rebejñ.

⁸ Xquichejcreni si'c najc xquichejc gunaa; reläyjreni najc si'c läjy lion.

⁹ Luxh guideb tiejxhreni caj si'c guiib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii näj xcarreni che agojñ chääreni guer.

¹⁰ Xhibaanreni najc si'c xhibaan naxejb, xcuchreni yu' yälñayan te gusacsíreni reben guedxliuj gaii bäii.

¹¹ Yu'za ni rnibee lojreni, xangl beñdxab ni birii gabijl. Xtidx hebreo laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejñ ni lascanu siädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios.

¹⁴ Luxh xse' bejñga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

¹⁵ Dxejcti baslaani guidap reanglga te ju'treni ni riojñ la' beñ guedxliuj. Luxh gule Dios reanglga parpac dxejga, bäiiga, ijzga.

¹⁶ Biejn diagä bal najc guiraa resoldaad ni rbijb cabaii: najcreni tio'p gayuu miyoñ.

¹⁷ Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guiib, najcni xniaa näj zul näj gojtz. Dxejcru yejç recabaiiga najc si'c yejç te beedz. Ro'reni carii bajl näj gujxh, näj sufr.

¹⁸ Ni riojñ cuaa bejñ gujt xcuent guichoñ replaag nani carii ro' recabaii, xcuent bajl näj gujxh, näjza sufr.

¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejñ nani di replaagre nugu't, direni nusiejch lajzreni xcuent ni cayujñ naareni, te rajñreni rebeñdxab, näjza rebanäjb ni nac-chee oor, näjza pla't, näjza latón, näjza guiñ, näjza yajg. Luxh rebanäjbga di gacdi fiireni, di diajgreni jieñ, di gacdi sareni.

21 Diza rebejn_{ga} nusiejch lajzreni xcuent xcäl_{rugu'treni}, xcäl_{rujnreni} yäl_{bidxaa}, xcäl_{resnäjnreni} bejn ni di gac chääl_{ni}, niclaza xcäl_{gubaanreni}.

10

Te angl ni ca' te guijt

1 Bahuiä stee xangl Dios ni rajp yäl_{rnibeduxh}, siäd_{jiäjtni} xhaguibaa, li yu'ni neñ bāj, yej_{cni} dejt xquitgubijdx, luxh lojni najc si'c gubijdx. Reni'ni najc si'c tio'p pilajr bajl.

2 Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbä_{jgw} lo yuj,

3 dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa.

4 Che gulujx gunii guziiga, narä rlazä nucuaä lo guijt nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

5 Angl nani suj ni'ni loj nisdoo näjza loj yuj, guläs ñaani ladbee nez xhaguibaa.

6 Guniliini diidx con laj GuebDios ni nabajñ par tejpas, ni guläx_{tiej} xhaguibaa näjza guiraa ni tre' xhaguibaa; ni guläx_{tiej} guedxliujre näjza guiraa ni tre' lojni; ni guläx_{tiej} nisdoo näjza guiraa ni tre' neñ nisdoo. Räj_{pni}:

—Diru redxejre gaclaa.

7 Che guidzujntis dxej ni agojl goł ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

8 Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladzñaa angl ni suj te laad ni'ni loj nisdoo, stelaad ni'ni lo guedxliuj.

9 Dxejcti hua'ä lo anglga, räpā lojni:

—Guniid_{xlu} libre'ga.

Laani najni loä:

—Anire, cua'ni, gudajwni. Sun nanñ_{aani} xque'lu, niluxh ro'lu saj_{cni} nej_{xh} si'c dzujn.

10 Dxejcti cua'ä libre'ga lo ñaa anglga, dxejc gudauäni. Ro'ä guyu'ni nej_{xh} si'c dzujn, luxh che gudämäni, lacti guc nanñ_{aani} xque'ä.

11 Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj reñei.

11

Tio'p niguii ni rusule' xtidx Dios

1 Dxejcti baniidxni loä si'c te biquii nani rurej_{xh}. Dxejc guyu' chu naj loä: —Huisu te charej_{xhlu} xquidoo Dios, näjza piänd_{xan}, balabza balti bejn rusuxhijb nenga.

2 Na'c gutiexhlu gabi lole' guidooga, sa'csi ni'c acua' reben_{zijt}ni te tiubitio'p bäi chalä_{jsreni} guedxd_{xan} si'ctis ni rla_{jzreni}.

3 Narä sudedä yäl_{rnibee} lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mil' tio'p_{gayuu} gayojñ dxej.

4 Guiro'preni najc si'c tio'p yag oliib, si'c tio'p gandilieer ni suga' nez lo Dios.

5 Palga yu' chu bejn rla_{jz} gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäj_l guet chutis ni rla_{jz} gun latsiajreni.

⁶ Guiro'p redade'ga rajp yälrnibee te gusäureni xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiädgusacsí xhitis plaag lo guedxliuj, si'ctis huält ni rlaizreni.

⁷ Che luux gusule'reni xtidx Dios, dxejcti ni najc si'c te man nialajz sirii gabijl te jiädchagdijlni guiro'preni. Sujnni gaanreni, sugu'tniren.

⁸ Dxejcti jia'n guiro'p rebenğutga lad caii xten guejdx cadre bacuaareni Dad Jesucrist lo cruzj. Guejdxroga rbälajzareni Sodoma näjza Egipto.

⁹ Choñ dxej garol guiraa rebejn ni siäd guedxbäz, ni siäd guedxro, ni najc garen-garen raz, ni rnii garen-garen xtidx guiraa rebejn guedxliuj, suhiii loj guiro'p rebenğutga, direni gusaan guiga'tzreni neñ baa.

¹⁰ Guiraa renani nabajn lo guedxliujre sibalazduxhrene sa'csi gujtreni. Luxh sa'csi rbalazduxhrene, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni.

¹¹ Che gudejd choñ dxej garolga, baspañsac Diosreni, dxejcti huitiesacreni. Guiraa reni bahiii lojreni, bidxebduxhrene.

¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa.

¹³ Lagajc orga gujc te xuduxh, gurebä'n tej lo tzuu la' guejdxga, gujt gajdz mil bejn lo xu ni gujc ro'c. Rebejn ni bia'n ro'c bidxebduxhrene, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujñ ni riojñga.

Ni rajc gajdz xangl Dios gol trompe't

¹⁵ Che bil ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladznaa Dad Dios näjza Jesucrist; luxh laani sinibeeni par tejpas.

¹⁶ Galbitajp rebengool nani sobga' lo tron xtenreni cadre rnibee Dios, biabrlojreni nez loj Dios te calä'preni xpala'n Dios.

¹⁷ Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

¹⁸ Bidxe'ch rebenğut guedxliuj lojlu, luxh abidzujñ dxej guidxe'chlu lojreni, gunlu yälğuxhtis rebenğut, te gudeedlu cossa'c loj rexpejñlu, lo renani gunii xtidx Dios, lo renani huililajz xtiidxlu, lo renani rusuxhijbni nez lojlu;

rebenğut sigajc rebenğuro.

Abidzujñza dxej che cuäcajlu renani bejn daan guedxliujre, te nitlojreni par tejpas.

¹⁹ Dxejc bixal xquidoo Dios ni yu' xhaguibaa, neñ guidooga bien te guijn cadre yu' guij cadre caj rediidx ni bia'n Dios loj rexpejñ Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

12

Te gunaa näj te ni najc si'c te gutiatzro

¹ Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäi, yejcti yu' te coron ni nac-chee tzubitio'p balxhaguibaa.

² Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh.

³ Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcti, sojb tzuu xca'chni. Tejga yejcti yu' te coron, najcreni gajdz coron.

⁴ Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni.

⁵ Dxejcti gojl xi'n gunaaga, najcni te niguii, luxh te bar guuib nungäjl guinibenäjni lo guiraa reben guedxliuj. Guläsgajcreni bäzga te sanärenini xhaguibaa cadro rnibee Dios.

⁶ Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mił tio'p gayuu gayojn dxej.

⁷ Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglni gudilduxhreni,

⁸ niluxh direni niujn gaan, luxh di niajcdiru nia'n manga näjza resa'ni xhaguibaa.

⁹ Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Bēndxab, ni laaza Satanás, ni rusguee guideb guedxliujre.

¹⁰ Dxejcti biejn diagä xse' te ni canii dipduxh xhaguibaali, räjpni:

—Abidzujn yälruslaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl.

¹¹ Laareni gujc bejnreni gaan loj bēndxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni.

¹² Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt bēndxab lo guedxliuj, luxh cadxecheduxhni sa'csi anajnni guxii dxej räjpni.

¹³ Che guchee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsínini.

¹⁴ Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Choñ ijz garol guyu'ni ro'c, nacuatzlojni lo bälga.

¹⁵ Dxejcti ro' gutiatzrore birii nis si'c te gueuu te nuslo'ni gunaaga.

¹⁶ Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga.

¹⁷ Dxejc bidxecheduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

13

Tio'p manduxh

¹ Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcti cadro caj diidx ni rniyaj Dios.

² Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadro rbejni, näjza xcälrnibeduxhni.

³ Dxejcti bahuiä te yejcti najc ascanu yu' chu batiuugni con madxed, ameer guetni, luxh biajc cadro gurujg yejcti. Ni'cni rdxeloduxh guiralii rebejn guedxliuj, sanajlreni manduxhga.

⁴ Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlñi, gucuanäjñini?

⁵ Yu' chu badeedza lo manroga diidx dxejcti gusloj caniini guiraloj didxguyalajz, diidx ni rniyaj Dios. Yu'za chu badeed ga'pni yälñibee tiubitio'p bäii, gunni si'ctis ni rlanjñi.

⁶ Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa.

⁷ Dxejcti yu' chu basaan bacuanäj manroga rexpejn Dios. Bejn manroga gan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh.

⁸ Dxejcti guiraa rebejn guedxliuj sazuxhijbreni, sagajnreni manroga, guiraa rebejn nani di lajreni nicaj lo libr xten yälñabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

⁹ Palga yu' chu rlanj cuadiajñi, sugucuadiagsa'cni.

¹⁰ Palga yu' chu nungäjñi jäuu neñ latzguiib, siäupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäjñi gunreni huant, chanuutis chalilazsa'creni xtidx Dios.

¹¹ Dxejcti bahuiä loj stee manro, cariini neñ yuj. Sojb tio'p xca'chni si'c xca'ch te xiil, rniini si'c rnii te gutiatz.

¹² Luxh rnibeezani si'cni rnibee manroga lagajc nez loj manroga, rujnzani rusuxhijb rebejn guedxliuj loj manrogalooga ni gurujc yejcti, luxh biajc yejcti.

¹³ Manroga ni birii neñ yuj rujnzani remilagwrro, rujñni rtejb bal-guiboo xhaguibaali, rtejbni lo guedxliuj nez loj rebejn.

¹⁴ Rusgueeni rebejn nani nabajn lo guedxliuj xcuent remilagwrro nani rujñni nez loj manrogalooga. Guinibeeni gun rebejn guedxliuj te banäjñi si'c najc manroga nani batiuug madxed yejcti, luxh biajca yejcti.

¹⁵ Dxejcti man ni rojpga baspajn banäjñbga te guinii banäjñbga, dxejcti gunibeeni guet guiraa rebejn nani di guzuxhijb lojni te ganreni.

¹⁶ Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbäz.

¹⁷ Gunibeezani digacdi sii, digacdiza guto' bejn palga xhet seendi caj ñaani o lo cuajni. Seenga najc laj manga o numbr xten laj manga.

¹⁸ Dee rquiin yälñajn. Renani rajp yälñajn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

14

Dij ni rol te gayuu tiubitajp mil

¹ Che bahuiä stee, bahuiä suga' Xiil xten Dios yejc dajn ni laa Siön. Sukanäjñi te gayuu tiubitajp mil bejn nani caj lo cuajreni laj Xiil näj laj Xtadni.

² Biejn diagä rubej xhaguibaali, rubeduxh, riejnni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni rol arp.

³ Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebenool. Rutliidi gujc bisieeddi dijga, xtebtis tegayuu tiubitajp mil bejn nani gulaa lo reben guedxliuj.

⁴ Reniguiire najc renani gajd xhin con gunaa; nicla tejreni di niesnäj te gunaa, najcreni bejn dxan. Laareni rinajlreni Xiil xten Dios cadrotis sääni. Redee gulaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch.

⁵ Nicla tej didx-xhii di guirii ro'reni, sa'csi xhetliidi xtojreni, nayareni suga'reni nez loj tron cadro rnibee Dios.

Rediidx nani bazule' jion rexangl Dios

⁶ Dxejcti bahuiä loj stee xangl Dios, rutajtni nez galäi xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rnii garen-garen xtiidreni.

⁷ Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujn or gunni yälguxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

⁸ Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiilni guzojz guiraa reguejdx xten guedxliuj xcuent xcäl-latsiajni, xcuent dojl ni bejnii guideb lagaa; najcni si'c reni rä' nejp.

⁹ Dxejcti biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo naani,

¹⁰ sidxechduxh Dios lojni, di xcälguxhtisduxh Dios tedcaj lojni. Sidejdpacni trabajwduxh nen balro näjza azufr nez loj rexangl Dios näjza nez loj Xiil xten Dios.

¹¹ Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni.

¹² Ni'cni renani huililajz xtidx Dios, reni rusoozba xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxiin xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yäl'nasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcnii, dxejcti naani ca'ni te guibozi ni caduxh ro'ni.

¹⁵ Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni:

—Basäl xquiboizlu, batiuug, te batie' yäl'nasa'c, sa'csi agojl or guire' yäl'nasa'c, guideb guedxliuj aguyajlni.

¹⁶ Dxejcti nani sobga' lo bäjga basniibni xquiboizni, batiuugni yäl'nasa'c ni caj lo guedxliujre.

¹⁷ Dxejcti stee xangl Dios birii nen guidoo ni yu' xhaguibaa, ca'zani te guibozi ni caduxh ro'ni.

¹⁸ Dxejcti birii stee xangl Dios nez loj piändxan xten Dios. Laani rajpni yälrnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlreni.

¹⁹ Dxejc batiuug anglga guiraa reresim uub ni yu' lo guedxliujre nalajznu reben guijdx, basäl nireni neñ tanc cadre guläjreni yejcn i sa'csi rdxechduxh Dios lojreni.

²⁰ Dxejcti baläjreni yejc reuub nez orii te guejdx. Biriiduxh rejn yejcreni, gutiäs rejnga, bidzujñ rejnga ro'li recabaii, gujcn i si'c che riu' nisro gueuu, biäjtni si'cti chon gayuu mil metr guideb gabi cadre baläjreni yejc reuub.

15

Guigajdz xangl Dios näj lult xcälguxhtis Dios

¹ Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, teygareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yälrdxe'ch xten Dios.

² Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäi nisdooğa suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios.

³ Cayolreni dij xten to Moisés ni gujc xpejn Dios, cayolzaren i dij xten Xiil xten Dios. Scree najc dijga:

Sacduxh, ruscheloj guiraa redzuun ni rujn Guejblu, Dad Dios, ni rajp guiraa yälrnibee.

Rujn Guejblu ganax dzunsa'c, rnii Guejblu ganax didxlii.

Guejblu rnibee loj guirali i reguejdx ni yu' lo guedxliuj.

⁴ Bahuii, Dad, ¿chu laa ni di guidxejb Guejblu ni di guiliä'p xpala'n Guejblu? Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluiloj guiraa rextzunsa'cpac Guejblu.

⁵ Dxejcti bahuiä xhaguibaa, bixal ro' yu' ni najc dxanro neñ guidoo, cadre yuchee guij cadre caj xleii to Moisés.

⁶ Ro' yudxanroğa birii gajdz xangl Dios ni ca' plaag te gusacsíreni reben guedxliuj. Najcwreni te ladliñ ni najc nolbäj, ni rdimbichaduxh. Dejd si'c te cinturoñ lastooreni ni najc ganaxduj oor.

⁷ Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcälguxhtisro Dios nani nabajñ par tejpas.

⁸ Gudxaj guidoo ni najc yudxanroruga gujxh ni siäd xcuent xcäl milaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

16

Rexhijg ni guidxa xcälguxhtis Dios

¹ Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

² Anglalo ni huij, baslojni ni yu' nen xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajnreni banäjb ni najc si'c manroga, birii tiejxhni te guedxyanduxh ni najc si'c cancer.

³ Dxejc ni rojp anglga baslojni ni yu' nen xhijg ni ca'ni loj nisdoo, te bejnii gubixhloj nisdooa gujcni si'c rejn xten te beñgut. Dxejcti gujt guiralii reman ni yu' lo nisdoo.

⁴ Ni riojn anglga baslojni ni yu' nen xhijg ni ca'ni loj regueuu näjza cadre rliejn nis. Gubixhlojreni gujcreni rejn.

⁵ Dxejcti biejn diagä gunii angl ni rajp yäl̄rnibee lo nis räjpni:
—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujn Guejblu yäl̄guxhtis redzunguijdx.

⁶ Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjl gacreni.

⁷ Dxejcti biejn diagä canii steeni lagajc lo piändxan, räjpni:
—Guliipacni Dad Dios ni rajp guiralii yäl̄rnibee, xcäl̄guxhtis Guejblu najc laaca, si'c riäjl gacni.

⁸ Dxejcti ni rdajp anglga cua' xhijg ni ca'ni, baslojni ni yu' nen xhijgga lo gubijdx, te badeedni lo gubijdx yäl̄rnibee guze'cnäjni rebejn guiboo.

⁹ Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yäl̄rnibee loj recosga. Niluxh direni nusiechlajzreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' nen xhijgga lo tron cadre rnibee manroduxh. Bicäy guideb cadre rnibee manduxhga, luxh rebejn rauya'tisreni lujdxreni sa'csi cayajcreni yäl̄nayanduxh.

¹¹ Guniyajreni Guejb Dios ni yu' xhaguibaa sa'csi rajcreni yäl̄nayanduxh, xcuentza rexquedxnayanreni. Luxh direni nusiechlajzreni xcuent xtoj̄lreni.

¹² Dxejcti ni rajc xho'p anglga cua'ni xhijgni, baslojni ni yu' nen xhijgga loj gueuro ni laa Eufates. Gueuga gubidzlii nisni te guc-chee te nezyuj xten rerei ni jääd nez cadre rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii choñ spritguijdx ni najc si'c bedz,

¹⁴ sa'csi najcreni resprit xten beñdxab, rujnreni milagwr, senro. Rijreni loj guiraa rerei loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yäl̄rnibee che guidzujni lo guedxliuj.

¹⁵ “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal̄ lojni che guibi'ä si'c rujn nani najcw guiraa xhajbni, te na'c guiga'ni xhabääl̄ni, jianxtujyni che guibi'ä.”

¹⁶ Dxejc gutie'reni guiraa rebejnre te lajt ni laa lo didx hebre “Armagedón”.

¹⁷ Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadre yu' tron cadre rnibee Dios, räjpni:

—Agujcni, agulujxhni.

¹⁸ Dxejc guyuduxh yäl̄rdinya' näj guziro. Gujca te xuroduxh lo guedxliuj, te xu sa' ni gajdpac gac.

¹⁹ Che gujc xuroga, biräjs guedxroduxhga, gujcni choñ la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yäl̄guxhtis guedxga.

²⁰ Li gubicaj, gunitloj reyuj ni tre' lo nisdoo, gunitlojza redajn.

²¹ Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcni.

17

Gun Dios yälguxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis.

² Guiraa rerei lo guedxliujre bennäjreni gunaaga dojl, sigajcza guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlanjreni.

³ Dxejcti huinäni narä si'c lo te bacał nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuycjni, sojbza tzuu xca'chni.

⁴ Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj.

⁵ Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.”

⁶ Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä.

⁷ Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuycjni näj tzuu xca'chni.

⁸ Manroga ni bahuiilu gubajnni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtz xten yälñabajn xten Dios, guijtz ni guc-chee che birixtiejli guedxliuj, rebejnğa sidxeloduxhreni che fiireni loj manroga nani gubajn galoo, ni gunitloj, niluxh naj agubansacni.

⁹ Ree nanab ga'pni yälñajn. Gajdz rebitiuycjni säloj gajdz dajn cadro sobga' gunaaga,

¹⁰ sälojzarenı gajdz reii. Agujc gaii reiıga ni cayajb. Tej rereiıga canıbee naj. Stee reiıga churu jıääd. Luxh che jıääd lult reiıga, guxii dxej guinıbeeni.

¹¹ Manro ni gubajn galoo, ni agunitloj naj, ni'c rac xhujn reii, najczani tej loj guıgajdz rerei, luxh sinitlojni, sejtni par tejpas.

¹² Guidzuu rexca'chni ni bahuiilu säloj tzuu reii. Gajdreni guisloj guinıbee naj. Laareni näjza manroga xca'reni yälñıbee teb or, nalajznu guxii dxej.

¹³ Tejtis xhıgab gun rereiıga, gudeedreni xcälñadıpreni, xcälñıbeereni lo manroga.

¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnıbee loj guiraa redad, najcni Reii ni rnıbee lo guiraa rerei. Luxh renani siädñajni najc reni agurejdxni, reni aguleni, sisiudzu'tznäjrenini.

¹⁵ Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa ben guedxliuj, guiraa bejn ni rnii garen-garenca xtiidxreni, ni siääd garen-garen reguejdx.

¹⁶ Guitzuu reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälñi, sajwreni bältiejxhni, suze'creni gunadxabga lo guıboo.

¹⁷ Sa'csi abasniib Diosreni te gunreni tejsi xhıgab, te gudeedreni xcälñıbeereni lo manroga che guidzujnli dxej ni chale' guira'ti ni gunii Dios gac.

18 Gunadxabga ni bahuiilu säloj guedxro ni rnibee loj guiraa rereii loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädyäjt xhaguibaa. Siädnäni yälrnibeduxh, xcälrdimbicha'ni bazanij loj guedxliujre.

² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadre rbäjz reben_udxab, ro'c rcanzaj guiralii cuaa spritdxab, najczani xpitiääz guiraa reman xhaguibaa ni najc mandxab, mandxuudx.

³ Sa'csi guiraa reben_u guedxliuj agusojzreni xcuent dojl_u ni bennäjreni gunadxabga, guiraa rereii loj guedxliuj bejn dojl_u guläsnäjreni gunadxabga, luxh guiraa reben_u guedxliuj ni ruto' abejnreni ganduxh, agujcreni ri'cw xcuent recosdxab ni rujn gunabdxabga.

⁴ Dxejcti biejn diagä xse' stee nani canii xhaguibaa:

—Colguirii guejdxga rexpensä, te di näj la'tu gunnäjtu gunadxabga dojl_u, te di tedtu trabawduxh lo replaag xtenni.

⁵ Sa'csi yuduxh rextol_uni, abidzuj_ureni xhaguibaali, luxh abanajza lajz Dios rextol_uni.

⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejn_uni laani. Nen_u co'p cadre badeedni gu' bejn_u (te trabajw ni bateedni bejn_u), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält.

⁷ Lacti gulä'p gunaaga xpala'nni, gubaj_uni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubaj_uni, sigajcza gac-huin lastooni sa'csi bejn_uni xhigab nen_u lastooni: “Narä sobga'ä ree si'c te rein_u, te ben_uroduxh, dina gacä biuud, niclaza gac-huin lazä.”

⁸ Ni'cni tejsi dxej siajb yej_ucni guiraa replaag xten Dios: yälgujt, yälhuin lajz, näj yälrliaan, luxh sejczeni lo balguiboo, sa'csi rnibeduxh Dad Dios ni gun xcäl_uguxhtisni.

⁹ Guiraa rereii lo guedxliujre ni bennäj gunaadxabga cosguijdx, reni cuansanäj_unini, sonduxh_ureni, siaduxh_ureni che fiireni gujxh ni carii cadre cayej_ucni.

¹⁰ Zijtru sisiuj_ureni sa'csi rdxejb_ureni replaag xten gunadxabga, dxejc siniizaren_u:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzuj_u yäl_uguxhtis yejclu.

¹¹ Rebejn_u ni ruto' loj guedxliuj sonduxh_ureni, siaren_u guejdxga sa'csi rutru rsiidi xhixtenren_u ni ruto'reni.

¹² Laaren_uni ruto'reni oor, pla't, guiraloj reguisa'c, perl, ladlin_u, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm,

¹³ näjza caneel, guiraloj laj comiid, näjza yalnejxh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiiil, näjza cabaii, näjza gare't, näjza bejn_u ni ruto'reni tiejxh_ureni, xaimren_u. Guiraa reni'c ruto'reni.

¹⁴ Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicaj_ureni lojtu, luxh di gacdiru guidxäl bejn_u reni'c.

¹⁵ Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinuxh lajzreni,

¹⁶ säjbreni:

—Aii, aii, riaduxhnu guedxrore, naiti gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl,

¹⁷ tera'tbäztis baralii recosro ni najc xhixtenni, guxhijnreni.

Guiraa recapitán xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt,

¹⁸ näjza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujx ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejn ni lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni.

²² Diru guibi' jiejn cayel nez xladcaïilu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't.

²³ Diru guibi' jieñ xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

²⁴ Neñ guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19

¹ Che gulujx recosre, biejn diagä lascanu xse' xhidalro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälruslaa lo dojl,

näj yälrndimbicha', näj yälmilagwr.

² Sa'csi xcälguxhtisni najc ganax laaca,

huentis najcni, sa'csi abejn ni yälguxhtis gunadxabga nani caguxhin reben guedxliuj xcuent xcälñadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool näjza guidap remanbajnga bazuxhijbreni, biabrojreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii: Colgudeed xquixtios lo Dios,

guira'tu ni rujn xtzuun Dios,
guira'tu ni rajntu Dios, rebenro sigajc rebennadolajz.

Sa' xten Xiil xten Dios

⁶ Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtenu ni rajp guirali yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujn dxejguchnaa Xiil xten Dios, aguzucheeza dxa'p.

⁸ Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza anglga löä:

—Bacuaa diidxre: “Chicbaa renani bidon jääd lo xsa' Xiil xten Dios.”

Guniizani löä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni löä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgulii. Entis laaca rujnni yälguxhtis, entis laaca rucuaani che rujnni guer.

¹² Rebalojni rbebajl, yejcn yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni.

¹³ Najcwni te lajd ni nadiini rejn; lajni najcza Xtidx Dios.

¹⁴ Guiraa resoldaad guibaa xten Dios siädnajlni najcwreni ladnol, ladnaya, bijbzareni cabainol.

¹⁵ Ro'ni carii te spaad ni caduxh guiro'p laad ro'ni te ni'c tilnäjni guirali reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis lojni reni rdexchlajz lo Dios, si'c ruläjreni yec uub che rbääreni bin, si'c sujnzä Dios ni rajp guirali yälrnibee.

¹⁶ Lo xhajbni näjza cuä' cujdni caj lajni: “Reii xten rereii, Dad xten redad.”

¹⁷ Bahuiä loj te angl suga'ni galäi gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios;

¹⁸ te gautu xpääl rereii, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbáz sigajc rebenro.

¹⁹ Dxejcti bahuiä loj manro näjza loj rereii guedxliuj, abire'reni te gucuanäjreni nani rbijb cabainol näjza guiraa resoldaad xtenu.

²⁰ Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjx xten manroga. Guiro'p redee bacuaareni guideb nabajreni nen te bal guiboduxh ni recnäj sufr.

²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te miĵ ijz

¹ Dxejcti bahuiä loj te xangl Dios ni siädjiäjt xhaguibaa, siädnäni liäii ni ruxhal guedro ni laa gabijl. Ca'zani te cadenro.

² Anglre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te miĵ ijz.

³ Basälñini neñ gabijl, te ro'c basäunini, bacuaani liäii te na'cru gusgueeni reben guedxliuj laĵ ni guiza' te miĵ ijz. Che guiza' reijzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcn sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubañsacreni loj rebenġut, gurenäjreni Jesucrist te laani gunibenäjreni te miĵ ijz.

⁵ Dee najc yälrbansac galoo lo rebenġut. Niluxh stecuaa rebenġut, direni guibansac che guisa'li te miĵ ijz.

⁶ Chicbaa rebejn nani guibansac ganiddoo, najcreni bendxan ni agubicaj xtojreni. Ni rojp yälgujt di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te miĵ ijz.

⁷ Che guiza' te miĵ ijzga, suslasacni Satanás neñ gabijl.

⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo.

⁹ Huä'preni lo te camp cadro gulagduxh. Gudäyjreni guideb gabig cadro rnibee rexpejn Dios neñ guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni.

¹⁰ Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsirenini sidejdreni trabawduxh dxej-yääl par tejpas.

Yälguxhtis ni gujc nez loj tronronol

¹¹ Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjĵ par laareni.

¹² Bahuiä lo rebenġut, benro sigajc benñadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guiitz xten xcälñabannäj Dios par tejpas. Dxejcti bejn ni yälgutxhtis rebenġut xcuent ni bejnreni, xcuenta rediidx nani caj loj reguijtzga.

¹³ Guiranejz biäd rebenġut: nisdoo batzuug rebenġut ni yu' lojni, gabijl näjza yälgujt batzuugza rebenġut ni yu' lojreni. Dxejcti bejn Dios yälguxhtis tejgareni xcuent ni bejnreni.

¹⁴ Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp.

¹⁵ Guiraa bejn ni di lajni nidxäjĵ lo xlibr yälñabajn bacuaazani reni'c lo bajlga.

21

Xhaguibacoob näjza guedxliucoob

¹ Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruza nisdoo.

² Narä Juan, bahuiä lo guedx Jerusaléncoob, guedxdxan, siädjijätni xh-aguibaali cadro rnibee Dios. Sucheduxhni si'c rsiuchee te dxa'p nani agojl guchnaa.

³ Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejni. Sibannäj lagajc Gueb Diosreni.

⁴ Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajch chalilajz bejn rediidxre.

⁶ Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälhabajñ par tejpas.

⁷ Chutis nani gun gaan lo dojl, sica'zani guiraa dee si'c yälhasa'c, luxh narä sacä Xtiosni, laani sacni xi'nä.

⁸ Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäjä gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejc guiboo näjza sufr par tejpas. Dee ni najc yälgujt ni rojp.

Guejdx Jerusaléncoob

⁹ Dxejcti lo guigajdz xangl Dios ni ca' guigajdz xhijg ni guidxa guigajdz reyälgujxtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

¹⁰ Dxejcti bejnni gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjijätni nez lo Dios.

¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr.

¹² Guideb gabi guejdxga dejt te paderro cadro caj tzubitio'p xportonroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpejn Israel.

¹³ Choñ portonga caj nez cadro rliejn gubijdx, yu'za choñ portonga nez ladbee, yu'za choñ portonga nez ladbäw, yu'za choñ portonga cadro räaz gubijdx.

¹⁴ Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

¹⁵ Angl ni caninäjä narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga.

¹⁶ Guejdxga najc cuadraad: sigajc ni sioolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil tio'p gayuu kilómetros tejga laad. Sigajc sioolni, sigajcza gulajgni, sigajcza jiaani.

¹⁷ Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäjza anglga.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn.

¹⁹ Recimient xten padeerga nac-chee guisa'c. Guiganid najc guijaspe; ni rojppga najc zafiro; ni riojn̄ga najc ágata; ni rdajppga najc esmeralda;

²⁰ ni rgaiiga najc onix; ni rxho'pga najc cornalina; ni rgajdzga najc crisólito; ni rxhujn̄ga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista.

²¹ Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihujn̄.

²² Dina nuhuiä nicla tej guidoo nen̄ guejdxga, sa'csi suga' Gueb Dios ni rajp guiralii yäl̄rnibeduxh, näjza Xiil xten Dios. Laani najc xquidoo guejdxga.

²³ Guejdxga dini guiquiin gusanij nicla gubijdx niclaza bäii, sa'csi lagajc xcäl̄rdimbicha' Dios näjza Xiil xten Dios ruzanij ro'c.

²⁴ Rebejn̄ guedxliuj ni rililajz xtidx Dios sajz sareni lo bianijga, luxh rereii ni siäd lo guedxliujre siädñazareni xcäl̄rnibeereni, näj xpala'nreni ro'c.

²⁵ Di ro' reportanga jiäuu rdxej, luxh ro'c xhettiza yääl.

²⁶ Ro'c chanäzareni yäl̄nasa'c näj xpala'n reguejdxro ni yu' lo guedxliuj.

²⁷ Niluxh di gacdipac jiu' nicla tej cosguijdx ro'c, niclaza te bejn̄ ni rujn̄ cosguijdx näj yäl̄rusguee. Ro'c siu' ganaxduj renani caj lajni lo libr̄ xten yäl̄nabajn̄ par tejpas nani ca' Xiil xten Dios.

22

¹ Dxejc baluii anglga te gueuro loä, cadre yu' nisyä xten yäl̄nabajn̄. Rdimbicha'ni si'c te guihujn̄, luxh cariini lo tron̄ cadre rnibee Dios näjza Xiil xten Dios,

² rdejdn̄i loj nezyujro ni rdejd galäii guejdxga. Guiro'p laad gueuga sojb reyajg xten yäl̄nabajn̄, lojreni rcay tzubitio'p cuaa ninejxh nen̄ tebijz, tejga cuani tejga bäii; luxh rebalajg ni rcay lo reyajgga najc te gusajcni reben̄ guedxliuj.

³ Dxejcti ro'c xhettiru yäl̄rdzubde, sa'csi ro'c yu' tron̄ cadre rnibee Dios näjza Xiil xten Dios, ruzuxhijbza rexpejn̄ni, rajn̄reni laareni.

⁴ Suhuiireni lojpacni si'cpac ni najcni, sicajza laj Dios lo cuajreni.

⁵ Ro'c diru yääl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Siäddzungajxh dxej ni guibisac Jesucrist

⁶ Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn̄ ni gunii xtiidxni agujc xchero, lagajc laani baxhal̄ni xanglni te baluilojni loj rexpejn̄ni guira'ti nani agojl gac.

⁷ —Sajngalu gan, siojb jiäl̄a. ¡Chicbaa nani riu rediidx ni caj lo librr̄e!

⁸ Luxh narä, Juan, biejn̄ diagä rediidxre, bahuiäza recosre. Luxh che bahuiä, che biejn̄ diagä bazuxhibä te ganä xangl Dios nani baluii loä guiraa redee.

⁹ Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn̄ rebejn̄ ni gunii xtidx Dios agujc xchero, sigajc rujn̄ rebejn̄ ni rusoo rediidx ni caj lo librr̄e. Bazuxhijb loj Diostis.

¹⁰ Dxejc najni loä:

—Na'c gusäuulu guijt̄z cadre caj rediidxre xcuent nani churu gac, sa'csi asiäddzungajxh redxej ni chale'reni.

¹¹ Luxh la_l ni guidzuj_n dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza be_nnaya, si'cza chanuu gacni be_nnaya.

¹² Gunajtiro:

—Siojb jiälä, luxh siäd_nää xhi gunidxä loj tejgatu si'c ni riäjl xca'tu xcuent dzuun ni bejntu.

¹³ Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

¹⁴ 'Chicbaa renani riu xtidx Dios, najcreni si'c ni rguib xhajbreni te sajc jiu'reni nez porton xten guejdxga, sajcza gauni ninejxh ni caj lo yajg xten yäl_nabaj_n par tejpas.

¹⁵ Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchaglajz rnii didx-xhii te gusgueeni.

¹⁶ 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä ne_n reguidoo loj rexpe_nä. Narä nacä te xajg torei David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejn diajg_nreni diidxre, gäbreni:

—Coltaa.

Sujiäädza chutis ni cayo_l, sujiäd_yäxlia'ni nis yäl_nabaj_n par tejpas.

¹⁸ Sa'csi narä rniliä'ppac lojtu, guiraatu ni riejn diajgtu rediidx ni caj lo guiitzre xcuent recos ni churu gac, palga yu' chu tejt_u gutajlru diidx ni caj guiitzre, suteedru Dios be_nga replaag yej_cni loj ni caj lo guiitzre.

¹⁹ Palga yu' chu gudzucaj loj rediidx ni caj lo guiitzre, sudzucajza Dios nani nica'ni lo yajg xten yäl_nabaj_n par tejpas, näjza lo guedx Dxan, ni caj xcuentreni lo guiitzre.

²⁰ Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaä Dad Jesucrist.

²¹ Sujiääd xcäl_racnäj Dad Jesucrist lo guiraatu. Sugacni si'c.